

Namo tassa bhagavato arahato sammāsambuddhassa

Paramatthadīpanī

Saṅgaha mahāṭīkā pāṭha

Ganthārabbhakathā

[Ka]

Udayā yassa ekassa, saddhammaraṃsi jālino;
Pabujjhiṃsu janambujā, jātikkhette mahāsare.

[Kha]

Vandāmi taṃ mahāsūraṃ, mahāmoha tamonudaṃ;
Sañjātaṃ so hadaye mayhaṃ, tamokhandhaṃ panūdataṃ.

[Ga]

Porāṇakehi viññūhi, vaṇṇitā vaṇṇanā bahū;
Dissanti idha lokamhi, abhidhammatthasaṅgahe.

[Gha]

Na tāhi tuṭṭhiṃ vindanti, ye sārathā bhimānino;
Te maṃ saṅgamma yācanti, paramatthassa dīpanaṃ.

[Ṇa]

Mahaṇṇave ratanāni, uddharitvā dipavāsinaṃ;
Yathicchakaṃpi dajjeyyuṃ, na vattabbāva ūnatā.

[Ca]

Tathevetha vipulatthā, aṇṇave ratanūpamā;
Satakkhattuṃpi vaṇṇeyyuṃ, pariyādinnā na hessare.

[Cha]

Tasmā tāsū vaṇṇanāsu, sāramādāya vaṇṇanaṃ;
Nānāsārattha sampuṇṇaṃ, uttāna padabyañjanaṃ.

[Ja]

Nātisaṅkhepa vitthāraṃ, mandabuddhippabodhanaṃ;
Karissaṃ taṃ paramatthesu, suṇantu pāṭavatthinoti.

Pathamagāthā-paramatthadīpanī

1. Abhidhammatthasaṅgahaṃ kattukāmo anuruddhatthero saṅgahārabbe tāva sappayojane pañcapiṇḍatthe dassento ādigātha māha. Pañcapiṇḍatthānāma ratanattayavandanā, ganthābhidheyyo, ganthappakāro, ganthābhidhānaṃ, ganthappayojanaṃ. Tattha tīsu ratanesu nippaccakāraṇaṃ ratanattayavandanānāma. Sā **sammāsambuddhamatulaṃ sasaddhammagañuttamaṃ abhivādiyāti** etehi padehi dassitā. Sakalena ganthena abhihitā padhānatthabhūtā cattāro abhidhammatthā ganthābhidheyyo. So abhidhammatthasaṅgahantipade **abhidhammattha** saddena dassito.

[1] Vibhāvaniyaṃ pana

Saṅgahitabhāvopi abhidheyyoyevāti katvā abhidheyyo abhidhammatthasaṅgahapadena dassitotivuttaṃ. Taṃ na sundaraṃ.

Na hi so appadhānatthabhūto saṅgahitabhāvo imasmiṃ piṇḍatthadassane abhidheyyo nāma bhavituṃ yuttoti. Ito paṭṭhāyaca ṭikāyanti vutte imassa saṅgahassa dvīsu sīhaḷaṭṭikāsu pathamāṭṭikā daṭṭhabbā. Vibhāvaniyanti vutte etarahi pākaṭā dutiyā. Ṭikāsūti vutte dvepi. Mahāṭṭikāyanti vutte visuddhimagge mahāṭṭikā daṭṭhabbā. Yañca vacanaṃ vibhāvaniyaṃpi āgataṃ, aññatthāpi āgataṃ, taṃpi idha vibhāvaniyaṃtveva vuccati āsannattāti. Sabhāgadhammasaṅgahavasena ganthavidhānākāro ganthappakāro. So pana **saṅgaha** saddena dassito.

[2] Vibhāvaniyaṃ pana

Abhidhammatthasaṅgahapadenāti vuttaṃ. Taṃ na sundaraṃ.

Na hi abhidhammatthasaddo ganthavidhānākāraṃ dīpetīti. Atthā nugatā ganthasamaññā vanthābhidhānaṃ. Taṃ abhidhammattha saṅgahapadena dassitaṃ. Saṅgahaganthe kate satī taduggahaparipucchādivasena anāyāsato laddhabbaṃ dhammānaṃ sarūpāvabodhādikaṃ anupādāparinibbānantaṃ ganthassa phalānuphalaṃ ganthappayojanaṃ taṃpi abhidhammatthasaṅgahapadeneva sāmattiyato dassitaṃ.

[3] Vibhāvaniyaṃ pana

Saṅgahasaddenāti vuttaṃ. Taṃ na sundaraṃ.

Na hi abhidhammatthasaddena vinā anāyāsato saṃsiddhimattadīpakena saṅgahasaddamattena tādiso anupādāparinibbānanto payo janaviseso sakkā viññātuṃ, asaddhamma saṅgahānaṃpi loke sandissanatoti.

2. Tattha ratanattayavandanā tāva asaṅkheyyaappameyyappayojanā hoti. Yathāha –

Te tādise pūjayato, nibbuta akuto bhaye;
Na sakkā puññaṃ saṅkhātuṃ, yamettha mapi kenacīti.

Ya metthamapītietha yenakenaci api manussenavā devenavā brahmunāvā saṅkhātuṃ na sakkāti yojanā. Ṭikākārāpi taṃ payojanaṃ tattha tattha bahudhā papañcenti. Saṅgahakārā pana antarāyanivāraṇameva viśesato paccāsīanti. Saṅgahakārā tīca buddhaghosattherādayo aṭṭhakathācariyā vuccanti.

Nippaccakārassetassa,
Katassa ratanattaye;
Ānubhāvena sosetvā,

Antarāye asesatoti hi vuttaṃ.

3. Kathaṅca ratanattayavandanāya antarāyanivāraṇaṃ hotīti. Vuccate-ratanattayavandanā hi nāma vandanākiriyaḅhinipphādako sattakkhattuṃ sattakkhattuṃ anekakoṭisatasahassavāre pavattamāno mahanto puñṇābhisaṇḍo puñṇappavāho. So ca anuttāresu buddhādīsū puñṇakkhettesu saṃvaḍḍhitattā therassa ca uḷāracchandāsaddhābuddhiguṇehi paribhāvitattā mahājutiko mahapphalo mahānisamsa ca puñṇātisayo hoti. So sayāṃ payogasampattibhāve ṭhatvā bahiddhā vipattipaccāye apanetvā sampattipaccāye upanetvā atipaṇītautucittāhāra samuṭṭhitānaṃ sarīraṭṭhakadhātūnaṃ upabrūhanaṃ katvā paṭisandhito paṭṭhāya laddho kāssa janakakammassa anubalaṃ deti. Aladdhokāssa ca puñṇantarassa okāsalābhaṃ karoti. Atha laddhānubalena laddho kāsena ca tadubhayena puñṇena nibbattā rūpārūpasantatiyo therasantāne yamakamahānadiyo viya balavabalavanti yo hutvā pavattanti. Tadā tasmim iṭṭhaphalaghanaparipūrīte therasantāne aniṭṭhaphalabhūtānaṃ rogādi antarāyānaṃ uppattiyā okāso nāma natthīti iṭṭhaphalasantānavibādhakāni aniṭṭhaphalasantānajanakāni ca apuñṇakammāni dūrato apanītāneva honti. Na hi kammānīnaṃ puñṇāni apuñṇāni ca attano vipākuppattiyā okāse asati vipaccantīti. Tato tasmim santāne āyuvanṇā dayo iṭṭhaphaladhammā yāva ganthaniṭṭhānā yāva āyukappariyo sānāpi vā vaḍḍhanapakke ṭhatvā pavattanti. Yathāha –

Abhi vādanasīlissa, niccaṃ vuḍḍhāpacāyino;
Cattāro dhammā vaḍḍhanti, āyuvanṇo sukhaṃ balanti.

Evam tāya vandanāya antarāyanivāraṇaṃ hotīti. Tasmā saṅghārabbhe ratanattayavandanākaraṇaṃ therassa attanā ārabbha mānasāṅgahassa anantarāyena parisamāpanutthaṃ. Na kevalaṅca therasseva, sotūnaṅca saṅghaṃ gaṇhantānaṃ ādimhiyeva ratanattaya vandanā siddhito anantarāyena gahaṇa kiccasampajjanatthanti.

[4] Vibhāvanīyaṃ pana

Sattasu javanesu pathamajavana vaseneva vandanā payojanaṃ vibhāvitāṃ viya dissati.
“Diṭṭhadhammavedanīyabhūtā”ti hi tattha vuttaṃ. Taṃ na sundaraṃ.

Upatthambhanakiccasseva idha adhippetattā. Tassa ca sattaṣu javanesu upaladdhattāti. Yathā hi āhārarūpassa dvīsū kicesu ojaṭṭhamakarūpajananakiccaṃ parittakaṃ appamattakaṃ hoti. Catussanta tirūpupatthambhanakiccameva mahantaṃ adhimattaṃ. Tathāhi paṭṭhānēpi tadupatthambhanakiccameva gahetvā kabaḷikāro āhāro imassa kāyassa āhārapaccāyena paccāyoti vibhaṅgavāro vibhatto. Evamevaṃ idhapi pathamajavanassa avunāva vipākajananakiccaṃ parittakaṃ appamattakaṃ hoti. Ahetukavipākamattaṃ janetīti aṭṭhakathāsu vuttaṃ. Kammantarupatthambhanakiccameva mahantaṃ adhimattaṃ. Taṅca sattaṣu javanesu upalabbhati yevāti. Yasmā pana ganthābhidheyye ganthappakāre ganthappayojane ca ādito vivitesati soto janānaṃ ganthassavane ussāho jāyati. Tasmā tesāṃ ganthā bhidheyyādīnaṃ dassanaṃ ganthe ussāhajananaṭṭhaṃ. Ganthābhidhānadassanaṃ vohārasukhatthanti. Idamettha piṇḍatthadassanaṃ.

4. Ayaṃ pana padattho. Sammāca bujjhi sāmāṅca bujjhīti sammā sambuddho. Ettha ca sammāsaddo aviparītatthe nipāto. So bujjhitabbesu ñeyyadhammesu bujjhanakriyāya asesabyāvibhāvaṃ dīpeti. Tathāhi padesaṅgāne ṭhitā paccekabuddhādayo attano visāye eva aviparītaṃ bujjhanti. Avisāye pana andhakāre pavīṭṭhāvīya hontīti aṭṭhakathāyaṃ vuttaṃ. Visāyo ca tesāṃ appamattakova sabbaññuvisāyaṃ upādāya yathā hattha puṭe ākāso appamattakova ajaṭākāsaṃ upādāyāti. Te hi phassādīsū dhammesu ekadhammampi sabbākārato bujjhituṃ nasakkontīti. Sabbaññubuddhānaṃ pana avisāyo nāma natthi, yattha te viparītaṃ bujjheyyuṃ. Te hi anamatagge saṃsāre anantāsu ca lokadhātūsū tiyaddhagate addhamuttake ca dhamme hatthamaṅike viya samasame katvā bujjhanti. Sabbe dhammā sabbākārena buddhassa bhagavato ñānamukhe āpāta māgacchantīti hi vuttaṃ. Tattha ñānamukheti sabbaññummahābhavaṅgaṃ sandhāyāha. Tattha hi te dhammā bodhimaṅḍe sabbaṃ

abhidhammaṃ sammasanato paṭṭhāya niccakālaṃ upaṭṭhahantīti. Sabbaññubuddhā pana yattake dhamme vicāretuṃ icchanti. Tattake dhamme āvajjanāya viṣuṃ katvā āvajjitvā vicārentīti. Nanu dhammā mahantā bhavaṅgaṃ parittakanti na codetabbametaṃ. Arūpadhammānañhi paramukkaṃsapattānaṃ esa ānubhāvoti. Saṃsaddo pana sāmanti etassa atthe upasaggo. So bhagavato paṭivedhadhammesu anācariyakataṃ dīpeti. Na me ācariyo atthīti hi vuttaṃ. Nanu bhagavato tatīyacatutthārappa samāpattiyō ālārudakamūlikāti. Saccam. Tā pana analaṅkaritvā laddhamattāva hutvā chaḍḍitattā pacchā bujghanakriyāya pādakamattāpi nahonti. Kuto paṭivedhadhammāti. Tasmā tā bhagavato buddhabhāve sācariyakataṃ na sādhentīti. Ayamettha pāḷi anugato attho. Yathāha –

Tattha katamo ca puggalo sammāsambuddho. Idhekacco puggalo pubbe ananussutesu dhammesu sāmaṃ saccāni abhisambujjhi. Tattha ca sabbaññutaṃ pāpuṇāti. Balesu ca vasibhāvaṃ. Ayaṃ vuccati puggalo sammāsambuddhoti.

Tatthāti nimitte bhummaṃ. Balesūti dasabala ñāṇesu. Vasibhāvanti issarabhāvaṃ. Etthaca pubbe. La. Sāmantietaṃ saṃsaddassa atthaṃ dasseti. Tatthātiadinā [sammāsaddassaatthanti. Sammāsambuddhapadaṃ]

5. Idāni thero attano vandanāṃ suṭṭhubalavaṃ karonto atulanti āha. Anekaguṇapadavisayā hi vandanā suṭṭhutam balavatī hotīti. Nanu ekaguṇapadavisayāpi vandanā antarā yanīvāraṇesamatthā siyāti kiṃ dutīyenāti. Na na samatthā. Viññujātikā pana satthuguṇatthomane mattakārino nāma na honti. Thero ca tesam aññataro. Tvaṃ pana aviññujātikō. Tasmā mattaṃ karonto codesīti. Apica. Na kevalaṃ antarā yanīvāraṇameva vandanāya icchitabbaṃ hoti. Athakho paññāpāṭavādiatthopi icchitabboeva. Sopi hi anāyāsena gantha niṭṭhānassa ganthapārisuddhiyā ca paccayo hotīti. Anussatiṭṭhānesu hi cittabhāvanā cittasamādhānāvahā hoti. Citta samādhāne ca sati paññātikkhāsūrā hutvā pahati. Samāhito bhikkhave yathābhūtaṃ pajānātīti hi vuttaṃ. Tasmā tadatthāyapi attano vandanā suṭṭhu balavatī kātābbāyevāti.

[5] Vibhāvaniyaṃ pana

“Yathāvuttavacanattha yogepi sammāsambuddhasaddassa bhagavati samaññāvasena pavattattā atulanti iminā vise setī”ti vuttaṃ. Taṃ na sundaraṃ.

Mahantañhi satthuguṇapadānaṃ majjhe etaṃ sammāsambuddhapadaṃ, cando viya tārakānaṃ majjhe. Tasmā taṃ sabhāvaniruttiṃ jānantānaṃsantike bhāvatthasunñānaṃ satthusamaññāmatam bhavituṃ nārahati. Aññesaṃ pana padasahassaṃ vuccamānaṃpi satthu samaññāmatameva sampajjatīti. Tulayitabbo aññena saha pamitabboti tulo. Na tulo **atulo**, natthitulo sadiso etassāti vā atulo. Bhagavā. Na hi atthi bhagavato attanā sadiso koci lokasminti. Yathāha –

Na me ācariyo atthi, sadiso me na vijjati;
Sadevakasmiṃ lokasmiṃ, natthi me paṭipuggaloti.

Anacchariyañcetam, yaṃ buddhabhūtaṃ atulattam. Sampatijātassapi panassa atulatā paññāyati. Tadā hi mahāpuriso sampatijātova samāno puratthimadisābhimukho aṭṭhāsi. Tasmim disā bhāge anantāni cakkavāḷāni ekaṅgaṇāni ahesuṃ. Tesu ṭhitā devabrahmāno mahāpurisa idha tumhehi sadiso natthi. Kuto uttaritaroti paramāya pujāya pūjesuṃ. Evaṃ sesadisāsupi. Tadā mahāpuriso attano sabbalokaggabhāvaṃ ñatvā aggohamasmi lokassa, seṭṭhohamasmi lokassa, jeṭṭhohamasmi lokassa ayamanti mājāti, natthi dāni punabbhavoti evaṃ achambhivācaṃ nicchāresīti. Idampi anacchariyaṃ, yaṃ pacchimabhavaṃ pattassa atulattam. Yādā pana so sumedhabhūto dīpaṅkarabuddhassa santike niyatabyākaraṇaṃ gaṇhi. Tadāpi thapetvā dīpaṅkarasammāsambuddhaṃ pāramitāguṇehi tena sadiso koci nattheva. Natthibhāvocassa tadā pavatte hi dasasahasilokadhātukampanādīhi asādhāraṇapāṭihāriyehi dīpetabbo. Tāni hi paccekabodhisattānaṃ satasahassaṃpi pavattetuṃ na

sakkhissatiyeva. Kuto sāvakabodhi sattānanti. Teneva hi tadā pavattipāramipavicayaññāṇaṃ attano visaye sabbaññuthaññāṇagatikanti aṭṭhakathāyaṃ vuttaṃ. Sāvakabodhisattāpi hi yato paṭṭhāya attano bodhiyā anurūpe sambhāradhamme sayameva jānituṃ sakkonti. Tato paṭṭhāya anivattidhammā hutvā vattānusārīmahāpūthujjanabhāvaṃ atikkamitvā bodhisattabhūmiṃ okkantā honti. Ekena pariyāyena niyatā sambodhiparāyanā ca nāma honti. Tadā eva buddhānaṃ sammukhibhāve sati niyatabyākaraṇaṃ labhanti. Sabbaññu bodhisatta paccekabodhisattesu vattabbameva natthīti.

[6] Vibhāvaniyaṃ pana

Samitatthe yyakārassa akārassa vā vasena etaṃ siddhanti vuttaṃ. Taṃ na sundaraṃ.

Na hi tulasaddo dhātusiddho kammaśādhano ca bhavituṃ na yutto. Tulayituṃ asakkuṇeyyoti atulo. Appame yyoti hi tīkāyaṃ vuttaṃ. Etena tulasaddo kammaśādhanoti dipeti. Evañca sati kammaśādhaneneva tadatthasiddhito kiṃ tato samitatthe yyakārassaakārassa vā cintāyāti. Vatticchānugato saddappayogoti katvā etaṃ vuttanti ce. Na. Yathā suttaṃ yuttaṃ vajjetvā assutassa parikappānāya payo jānābhavatoti. [Atula padaṃ]

6. Imehi pana dvīhi padehi satthu tisso sampadā vibhā vitā honti. Hetusampadā phalasampadā sattupakārasampadācāti. Tattha satthu mahākaruṇā samaṅgitā bodhisambhārasambharaṇaṇca hetusampadānāma. Bodhimaṇḍe pavattitā catuvīsati koṭṭisabhasahassasaṅkhā mahāvajiraññāṇasaṅkhātā sabbaññumahā vipassanāpi ettheva saṅgahitā. Sā hi mahābodhiyā padaṭṭhāna bhūtāti. Pahāna sampadāyameva vā sā saṅgahitāti daṭṭhabbā. Phalasampadā catubbidhā pahānasampadā ñāṇasampadā ānubhāvasampadā rūpakāyasampadā cāti. Tattha saha vāsanāya kilesappahānaṃ pahānasampadā nāma. Pahānassa sabbapāriṇīṭīti attho. Atthato pana ariyamaggo, aggamaggaññāṇameva vā. Sabbaññuta ññāṇa dasabalaññāṇādīni ñāṇasampadā.

[7] Vibhāvaniyaṃ pana

Etāsu dvīsu sampadāsu ñāṇasampadā pathamaṃ vuttā, tato pahānasampadā. Pahānasampadāyeva pana pathamaṃ vattabbā. Sā hi ñāṇasampadāyapubbaṅgamabhūtā paccayabhūtā ca. Mahāṭīkāyañca sāyeva pathamaṃ vuttāti.

[8] Yañca vibhāvaniyaṃ

“Sabbaññutaññāṇapadaṭṭhānaṃ aggamaggaññāṇa”nti ñāṇasampadāyaṃ vuttaṃ. Taṃpi na yujjati.

Aggamaggaññāṇaṃhi pahānasampadā eva bhavituṃ arahati. Na hi maggaññāṇato aññā pahānasampadānāma atthīti. Yañca koci vadeyya maggaññāṇaṃ ñāṇaṇca hoti pahānañca. Tasmā ubhayattha vattuṃ yuttanti. Taṃpi na yujjati. Evañhi sati sampadāsaṅkaro hotīti.

[9] Tathā vibhāvaniyaṃ

Ñāṇasampadāyaṃ sabbaññutaññāṇaṃ sabbapathamaṃ vattabbampi na vuttaṃ. Taṃpi na sundaraṃ.

Nanu “tammūlakāni ca dasabalādi ññāṇāni”ti ettha ādisaddena sabbaññutaññāṇampi gahitanti ce. Taṃpi na yujjati.

Na hi appadhānaṃ sarūpato niddisitvā padhānaṃ pākāṭaṃ ādisaddena gahitanti ñāyāgataṃ hotīti. Acinteyyānubhāvehi silā diguṇehi iddhi dhammehi ca sampadā ānubhāvasampadā. Lakkhaṇā

nubyañjanappaṭimaṇḍitassa rūpakāyassa sampatti rūpakāyasampadā. Sattupakāroduvidho āsayasampadā, payogasampadā ca. Ajjhāsayaassa ulāratā kāyavacīpayogassa ca parisuddhatāti attho. Tattha devadattādīsu virodhisattesupi niccaṃ hitajjhāsayaatā āsaya sampadā. Loke abhiññātānaṃ rājūnaṃ rājamahāmatānaṃ seṭṭhi gahapatīnaṃ devarājūnampi dhammaṃ desentassa lābhasakkārādi nirapekkhatāvasena desanāpayogasuddhi payogasampadā. Tattha dve pahānañānasampadā sammāsambuddhapadena vibhāvītā. Dvīhi ānu bhāvarūpakāyasampadāhi saha dve sattupakārasampadā atulapadena. Hetusampadā pana dvīhipi padehi sāmattihiyato vibhāvītā. Na hi tādisiyā hetusampadāya vinā itarāsaṃ pavatti atthīti. [Sampadā]

7. Punapi thero attano vandanaṃ balavataraṃ karonto sasaddhammagañuttamanti āha. Etena dhammasaṅghānaṃpi vandanā katā hoti. Dūratohaṃ namassissaṃ, sasaṅghaṃ lokanāyakanti hi vutte saṅghassapi namanakriyāpatti sahasaddena viññāyati. Eva midamaṃ daṭṭhabbaṃ. Tattha namassissanti namassiṃ.

[10] Yampana vibhāvaniyaṃ

“Guṇibhūtānaṃpi hi dhammasaṅghānaṃ abhivādetabba bhāvo sahayogena viññāyatī”ti vuttaṃ. Tattha abhivādetabba bhāvoti navattabbaṃ. Abhivāditabhāvoti pana abhivādananti vā vattabbaṃ. Evañhi sati idha adhippetassa kriyā samavāyassa siddhattā dhammasaṅghānaṃpi therassa vandanā kriyāpatti siddhā hotīti. Itarathā tabbapaccayassa arahatthadīpanato abhivādanā rahatā saṅkhāta guṇasamavāyo vutto siyā. Soca idha nāhippeto. Attano nidassanena ca saha na sameti saputtadāro āgatoti.

Apica thero imaṃ ganthaṃ racayissāmīti pubbabhāgeyeva tīṇi ratanāni vandi, atha taṃ attano vandanaṃ ganthappaṭiññāya saha ghaṭetvā dassento imaṃ gāthaṃ racayītipi na na sakkā vattunti. Tathāhi abhivādiyāti vuttaṃ. Na abhivādiyāmīti. Esanayo aññatthapi. Tattha saddhammena ca gaṇuttamena ca attanā nimmitena sakalalokassa saraṇabhūtena saha vattatīti sasaddhamma gaṇuttamo. Sammāsambuddho. Na hi paranimmitena saddhammena gaṇuttamena ca sahitā sāvakā sasaddhammāti ca sagaṇuttamāti ca vuccanti. Na ca attanoeva saraṇabhūtena saddhammena sabrahmacārigaṇuttamena ca sahitā paccekabuddhā tathā thomanāṃ arahantīti, tasmā idampi satthu asādhāraṇaguṇapadameva hotīti daṭṭhabbaṃ.

Tattha dhāretīti dhammo. Ke dhāreti, attānaṃ dhārente. Dhammo have rakkhati dhammacārinti hi vuttaṃ. Kathaṅca dhāreti, catūsu apāyesu vaṭṭadukkhesuca apatamāne karonto. Kiṅca dhāraṇaṃnāma, yesaṃ vasena sattā apāyesuvā vaṭṭadukkhesuca patanti, tesamaṃ kilesānaṃ ekadesenavā sabbasovā samucchindanaṃ. Imasmiṃ atthe cattāro ariyamaggā nibbānaṅca nippariyāyato dhammonāma. Ariyamaggā hi kilese samucchindantā nibbānena saheva hutvā samucchindanti. Na vināti, tasmā teyeva paṅca ekantato dhammonāmāti. Pariyattidhammo pana dhāraṇupāyoyeva hoti. Cattāri sāmāññaphalānica dhāraṇaphalāniyeva honti, kilesānaṃ paṭippassambhanavasena pavattattā dhāraṇānukūlapavattāni ca. Tasmā ete paṅca pariyāyadhammāyevāti. Athavā, dhārīyatīti dhammo. Dhāraṇārahotti vuttaṃ hoti. Yo hi dhārentaṃ ekantena dukkhato moceti. Aggasukheca paṭiṭṭhāpeti. Soyeva dhāraṇārahattā idha dhammonāmāti. Kopana soti, yathā puttadhammāyeva. Tehi keci bhāvanā vasena keci sacchikiriyavasena keci diṭṭhadhammasukhavihārasena keci uggaha dhāraṇavasena dhārīyanti. Te ca evamaṃ dhārīyamānā dhārentaṃ yathārahaṃ apāyadukkhato vaṭṭadukkhato ca mocenti, aggeca phalasukhevā nibbānasukhevā paṭiṭṭhāpentīti. Dhārentivā sappurisajānā apāyesu vaṭṭadukkhesuca attānaṃ apata mānaṃ vahanti etenāti dhammo. Dharantivā ettha dhammadīpā dhammappaṭisaraṇā janā laddhappaṭiṭṭhā hontīti dhammotipi yujjatiyeva. Kasmā panettha dhammo dasavidhova vutto. Nanu paṭipattidhammena saha ekādasavidhova vattabboti. Saccamaṃ. Sopana paṭipattidhammo maggassa pubbabhāgappaṭipadāeva hotīti pubbacetanā viya dāne magge eva so saṅgahito. Tasmā dhammo dasavidhova sabbattha vuttoti daṭṭhabbo.

Apica, yadaggena pariyattidhammo idha dhammasmiṃ saṅgahito. Tadaggena pariyattidhārakopi saṅghe vandaneyye saṅgahitoti yutto. Yadaggenaca puthujjanakalyāṇako saṅghe sekkhesu saṅgahito. Tadaggena tassa kalyāṇahetubhūto paṭipatti dhammopi dhamme vandaneyye saṅgahitoti daṭṭhabbo. So hi puthujjanabhūtopi yehi dhammehi samannāgatattā sekhe sotāpatti phalacchikiriyāya paṭipanne saṅgahito. Te pana dhammā sekkhe sotāpattimagge asaṅgahitāti nasakkā vattunti. Ettāvata ye vadanti saṅghaṃ saraṇaṃ gacchāmīti, ettha puthujjana kalyāṇako saṅghe asaṅgahito. Na hi taṃsaraṇaṃ gacchantassa saraṇagamaṇaṃ sampajjati. Tesam taṃ paṭikkhittaṃ hoti. Evaṃ pana vattabbo, yo vo ānanda mayā dhammoca vinayoca desito paññatto, so vo mamaccayena satthāti evaṃ satthuṭhāne thapetvā bhagavatā saṃvaṇṇito pariyattidhammo dhammasaraṇe saṅgahitoti yutto, taṃ dhārentopana kalyāṇappaṭipattiyaṃ ṭhitopi atthi. Aṭṭhitopi atthi. Yo aṭṭhito, so attanopi saraṇaṃ nahoti. Kuto parassa. Satthārā ca anekesu suttasahassesu so garahito. Tasmā so saṅghasaraṇe asaṅgahito. Itarova saṅgahitoti yuttoti.

Santānaṃ dhammoti saddhammo. Samitakilesānaṃ tatoyeva pasatthānaṃ pūjītānaṃ sappurisaṇaṃ paṇḍitānaṃ dhammoti attho. Yoca santānaṃ dhammo, sopi ekantena santoyeva hotīti santo dhammotipi saddhammo. Pasattho pūjito dhammoti attho. Sacco vā. Ayañhi aññatitthiyadhammo viya dhārentaṃ navisaṃvādeti. So hi ayaṃ me hitoti dhārentassa ahitoyeva sampajjati. Ayaṃ pana tathādhārentassa hitoyeva sampajjati. [Saddhammapadaṃ]. Gaṇuttamapade loke samāna diṭṭhisīlānaṃ sahadhammikānaṃ samūho gaṇoti vuccati. Idha pana uttamehi sīlādiguṇehi yutto bhagavato sāvakaṃsaṅgho uttamoca so gaṇocāti atthena uttamagaṇonāma. Soyeva idha gaṇuttamoti vuccati yathā muniseṭṭho munivaroti.

[11] Vibhāvanīyaṃ pana

“Gaṇānaṃ gaṇesuvā devamanussāsādisamūhesu uttamo gaṇuttamo”ti ca vuttaṃ. Taṃ na sundaraṃ.

Etasmiñhi atthe sati uttamasaddo padhānabhūto hoti. Soca guṇamhiyeva pavattatīti tena idha ariyaṃsaṅgho vuttoti nasijjhatīti. Etthaca gaṇoti saṅghoyeva vuccati. Soca saṅgho duvidho sammutisaṅgho, dakkhiṇeyyaṃsaṅgho. Tattha samaggena saṅghena kataṃ upasampadākammaṃ sammutināma. Tāya sammutiyaṃ upasampannabhūmiṃ patvā ṭhito bhikkhusaṅgho sammutisaṅghonāma. So vinayakammesu pasiddho. Dakkhīṇeyyaṃsaṅgho nāma aṭṭha ariyapuggalasaṃmūho. Sopana kiñcāpi sammutisaṅghepi antogadhoyeva hoti. Tathāpi saraṇagamaṇa vandanā māna pūjāsakkārānussatiṭṭhānesu anuttara puññakkhetta vise sapariggahatthaṃ bhagavatā tathā tathā saṃvaṇṇetvā so visuṃ vuttoti daṭṭhabbo. Puthujjanasaṅghohi puññakkhettaṃ samānopi anuttaraṃ puññakkhettaṃ nahoti. Kasmā. Sālikkhetta tiṇānaṃ viya khettaduṭṭhānaṃ sakkāyadīṭṭhi vicikicchānusaṃyānaṃ sabbhāvāti. Puññakkhettabhāvo panassa purime saddhammapade vuttanayena veditabboti. [Sasaddhammagāṇuttamapadaṃ]

8. Abhivādiyāti visesato vanditvā. Ettha ca ayaṃ loke sīlādiguṇayutto seṭṭho vandaneyyoti evaṃ seṭṭha cittaṃ paccupaṭṭhāpetvā vandanto visesato vandatīti vuccati. Vandanā pana tividhā kāyavandanādivasena. Yathāha –

Tisso imā bhikkhave vandanā, katamā tisso. Kāyena vandati, vācāya vandati, manasā vandatīti.

Tattha seṭṭhacittaṃ paccupaṭṭhāpetvā jāṇudvaya kapparadvaya nalāṭa saṅkhātāni pañca aṅgāni bhūmiyaṃ paṭiṭṭhāpetvā vandaneyyānaṃ abhimukhaṃ nippajjanto kāyena vandatināma. Yaṃ sandhāya pañcappaṭiṭṭhitena vanditvāti tattha tattha vuttaṃ. Yāyaca avandiyatṭhānesu vandantassa āpatti hotīti. Guṇapadāni vācāya pavattento vācāya vandatināma. Namō buddhassa, namatthu buddhassa, namo vimuttiyā, namo vimuttānaṃ, vipassissa namatthūti evamādīsūpi vācā vandanāyeva. Guṇapadāni

anugantvā guṇe anussaranto manasā vandatināmāti.

9. Bhāsissanti kathessāmi. Kāmañca thero imaṃ saṅgahaṃ racayanto potthakāruḷhaṃ katvāva racayissati. Ganthakammaṃ nāma vācākkamesu pasiddhanti katvā bhāsissanti vuttanti daṭṭhabbaṃ.

10. Abhidhammatthasaṅgahanti pade abhidhamme vuttā atthā abhidhammatthā. Te saṅgayhanti ettha etenātivā abhidhammatthasaṅgaho. Saṅgayhantitica therena saṃkhipitvā gayhanti kathiyantīti attho. Abhidhammeti cettha abhiatireko abhivise soca dhammo abhidhammo. Dhammoti ca vinayapāḷito aññaṃpāḷi dvayaṃ vuccati. Yo vo ānanda mayā dhammoca vinayoca desito paññattoti hi vuttaṃ. Tañca pāḷidvayaṃ āṇāvidhānasāṅkhātāṃ vinayana kiccaṃ vajjetvā kusalādi ke yathāpavatte paramatthadhamme eva dīpetīti. Evaṃ dīpentesuca tesu dvīsu dhammesu yo itarato atirekoca hoti visesoca. Ayameva abhidhammo nāma. Itaropana dhammoyeva. Evañca katvā dhammo abhidhammo vinayo abhivinayoti idaṃ catukkaṃ vedītabbaṃ. Tattha dhammonāma suttantapiṭakaṃ. Abhidhammonāma yattapakaraṇāni. Vinayonāma ubhato vibhaṅgo, abhivinayonāma khandhakaparivārāti aṭṭhakathāsu vuttaṃ. Atirekavisesatā cettha kusalādi vasena khandhādivasena saṅgahādivasena tathā tathā desetabbappakārānaṃ anavasesavibhattivasenavā suddhadhammādhīṭṭhāna desanāpavattivasenavā vedītabbā. Yato sabbaññubuddhā imaṃ abhidhammadesanaṃ devisueva desenti. Na hi manussā evarūpaṃ tayo māse nirantaraṃ pavattanayogyāṃ kathāmaggaṃ ekena iriyāpathena ādīto paṭṭhāya pariyoṣānaṃ pāpetvā paṭiggahetuṃ sakkonti, naca eva rūpo ekamātikānubandho kathāmaggo nānākhaṇesu nānājanānaṃ desetūṃ sakkuṇeyyo hotīti. Kecipana vinayapāḷitopi abhirekavisesataṃ tassa vaṇṇenti. Taṃ aṭṭhasāliniyā na sameti. Tattha hi dhammanāmikānaṃ dvinnaṃ pāḷīnaṃ majjheeva ayaṃ atirekavisesatā vicāritā. Naca yujjati vinayena saha tathā vicāretuṃ asamānakiccavisayattā. Vinayo hi kāyavācānaṃ vinayanakicco, ajjhācāraṃvisayoca. Dhammo pana dhammavibhāgakicco dhammappavatti visayocāti. Kecipana vadanti evaṃ santepi vinayo eva sabbajēṭṭhako siyā. Vinayaṃ vivaṇṇentassa hi pācittiyāpatti hoti. Dhammaṃ vivaṇṇentassa dukkaṭṭāpattimattāti, taṃ nayujjati. Vinayo hi āṇācakkāṃ. Dhammoca dhammacakkāṃ. Tattha vinayaṃ vivaṇṇento satthu āṇācacke pahāraṃ deti. Sattari agāraṃ mahanto hoti. Yassaca sattari agāraṃ, tassa dhammasaṅghesu tīsu sikkhāsuca agāraṃ siddho hoti. Tasmā vinaya vivaṇṇane āpatti mahantī hoti. Na sabbajēṭṭhakattāti. Apica, vinayonāma sāsanassa mūlaṃ. Vinaye aṭṭhite sāsanāṃ natiṭṭhati. Tasmā sāsanassa ciraṭṭhitatthampi vinayavivaṇṇane mahatī āpatti paññattāti.

Iti paramatthadīpaniyā nāma abhidhammattha saṅgahassa

Catutthavaṇṇanāya pathamagāthāya

Paramatthadīpanā niṭṭhitā.

Dutīyagāthā-paramatthadīpanī

11. Evaṃ ādigāthāyatamaṃ payojana sahite pañca atthe dassetvā idāni te abhidhammatthe uddesato dassento dutīyagāthamāha. Tattha **tatthāti** bhāsissaṃ abhidhammattha saṅgahanti vutte tasmīṃ abhidhammatthasaṅgahapade mayā vuttā abhidhammatthā sabbathāparamatthato catudhā hontīti yojanā. Etthaca -

[12] **Ṭikāyaṃ** tāva

Tattha tasmīṃ abhidhammatthasaṅgahapakaraṇetivā abhidhammattha padetivā abhidhammetivā tasaddattho niddiṭṭho. **Vibhāvaniyaṃ** pana tasmīṃ abhidhammeti. Sabbaṃ nasundaraṃ.

Na hi abhidhammattha saṅgahapakaraṇe mayā vuttā abhidhammatthāti yujjati. Pakaraṇampi hi

upari vuccamānameva hoti. Natu vuttaṃ. Kuto abhidhammatthāti. Na ca saṃvaṇṇanāpakaraṇesu ādimhiyeva tāva tasaddo appadhānapadāni paccāmasatīti atthi. Tasmā aṭṭhasālīniyaṃ ādimhi tattha kena ṭṭhena abhidhammoti vākyeviya idha tasaddattho vedītabboti. Evañhi sati –

[13] Ṭīkāsu

Sabbathā vuttāti yojanāpi paṭikkhattā hoti.

Sā hi vakkhamānehi sabbayāpi dvādasa, sabbathāpi aṭṭhārasātiādīhi nasametīti. Tatta **sabbathāti** dhammasaṅgaṇiyaṃ vuttana kusalādinā sabbappakārenapi catudhāva honti, vibhaṅge vibhatte na khandhādinā sabbappakārenapi catudhāva hontīti attho. Dhātu kathāyaṃ vuttenātiādīnāpi vattabbaṃ.

12. Paramatthatoti paramattha saccato. Dve hi saccāni sammutisaccaṃ, paramatthasaccanti, tattha satta puggala atta jīvādikā paññattiatthā sabhāvato avijjamānāyeva honti. Dhammavavattānāññārahitānaṃpana mahājanānaṃ citte mahantamahantāpi hutvā vijjamānāviya paññāyanti, teca mahājanā samaggā hutvā tesam ekantena atthibhāvaṃ gahetvā tathā tathā voharanti ceva sampaṭicchantīca. Tasmā te mahājanehi samaggehi sammatattātatoyevacca vacīsaccaviratisaccānaṃ vatthubhūtattāsammuti saccanti vuccanti. Tasmim sammutisacce ṭṭatvā sammā paṭipajantā sabba lokiyasampattiyoca sabbabodhisambhāra dhammecca ārādhenti. Micchāpaṭipajantā apāyapūrakā honti. Evaṃ mahantañhi sammuti saccanti. Paramatthasaccaṃ pana patvā taṃ saccameva nahoti. Tañhi sayam avijjamānaṃyeva samānaṃ mahājane vijjamānantveva gaṇhāpeti. Sakkāyadīṭṭhi dvāsaṭṭhidiṭṭhi tividhamicchādiṭṭhīnaṃ vatthu hutvā bālajanānaṃ vaṭṭadukkhato niyyātum nadeti. Evaṃ viparītañhi sammutisaccaṃ. Evaṃ mahāsāvajjañcāti. Paramatthasaccaṃpana duvidham sabhāvasaccaṃ ariyasaccanti. Tattha dhammasaṅgaṇīādīsu sattasu pakaraṇesu vibhattā kusalādayo dhammā sabhāvasaccaṃnāma. Te hi sayam sabhāvato vijjamānattā kusalānāma dhammā atthi sukhānāma vedanā atthīti gaṇhantena viṣaṃvādentīti. Taṃ pana ariyasaccaṃ patvā kiñci asaccaṃpi hotiyeva. Tathāhi anubhavanabhedamattaṃ upādāyeva vedanā sukhā dukkhā adukkhamasukhāti vuttā. Na sabbākārato sukhabhūtattā. Sabbehi pana aniccatā saṅkhatatādīhi anekasatehi ākārehi sabbāpi vedanā dukkhāeva. Tathā anavajjasukhavipākāṭṭhena kusalabhāvopi akusalaṃ upādāyeva vutto. Sabbepi hi tebhūmakā kusalasammata dhammā sāsavatā saṃkilesikatā oghaniya yoganiya upādāniyatā saṅkhātehi vajjehi sāvajjāeva honti. Dukkhasaccabhūtānañca vipākānaṃ jananaṭṭhena ekantena dukkhavipākāeva honti. Ajjhattatikañca sabbalokiyasammataṃ upādāya vuttaṃ. Sabbepi hi catubbhū makadhammā ekantena attāpināma natthi. Kuto ajjhattānāma. Bahiddhāeva honti. Saṅkhāre parato passāti hi vuttanti. Ayaṃ nayo sesattika dukadhammesupi yathārahaṃ netabbo. Ariya saccāṃnāma sabbesaṃ tebhūmakadhammānaṃ ekanta dukkhabhāvo taṇhāya ekanta dukkhasamudaya bhāvo nibbānasseva dukkhanirodha bhāvo aṭṭhaṅgikassa maggasseva dukkhanirodhamaggabhāvocāti. Idhameva hi parisuddhabuddhīnaṃ ariyānaṃ ñāṇe acalamānaṃ sabbākārāparipuṇṇaṃ nippariyāyasaccaṃ hotīti. Tesu idha sammutisaccaṃ nivattento paramatthatoti ida māha. Tena vuttaṃ paramatthatoti paramatthasaccatoti. Tattha attho duvidho sabhāvasiddhoca parikappasiddhoca. Tattha yo vinā aññāpadesena kevalaṃ viṣuṃ viṣuṃ attano lakkhaṇena vijjamāno hutvā siddho. So cittādiko attho sabhāvasiddhonāma. Yopana attano lakkhaṇena vijjamānoyeva nahoti. Vijjamānassapana atthassa nānā pavattiākāre upādāya cittena parikappetvā saviggahaṃ katvā gahito cittamayo cittanimmito hutvā citteeva upalabbhamāno hoti. So sattapuggalādiko attho parikappasiddho nāma. Tesu sabhāvasiddhoyeva paramatthonāma. So hi santi bhavanti buddhisaddā etthāti attho. Ekantavijjamānaṭṭhena itarato paramo ukkaṃsagato atthoti paramattho. Api ca, ye ayaṃ atthi ayaṃ upalabbhatīti gahetvā tassa abhiññeyyassa abhiññatthāya, pariññeyyassa pariññatthāya, pahātabbassa pahānatthāya, sacchikātabbassa sacchikaraṇatthāya, bhāvetabbassa bhāvanatthāya paṭipajanti. Tesam tadatthasādhane avisaṃvādakaṭṭhena paramo uttamo atthoti paramattho. Itaropana avijjamānattā tassa abhiññādiatthāya paṭipajantānaṃ tadatthasādhane viṣaṃvādakoyeva bhavissati. Napana tadattham sādhesa tīti paramatthoti vuttum nārahatīti.

[14] Vibhāvanīyaṃ pana

“Paramassavā uttamassa ñāṇassa attho gocaroti paramattho”tipi vuttaṃ. Taṃ na sundaraṃ.

Na hi paramasaddoñāṇe vattamāno dissati. Naca atthasaddo gocareti. Yañca anuṭṭikāyaṃ saccameva saccikaṃ. So eva attho aviparītassa ñāṇassa visayabhāvaṭṭhenāti saccikaṭṭhoti vuttaṃ. Taṃpi aviparītena ñāṇena araṇīyato upagantabba to atthoti imamatthaṃ dasseti. Naparamasaddassa atthanti.

[Paramatthapadaṃ]

13. Cittanti ettha cintetīti cittaṃ. Etthaca cintanakriyā nāma niccaṃ ārammaṇāpekkhā hoti. Na hi sā ārammaṇena vinā labbhatīti. Tasmā ārammaṇaggahaṇa ārammaṇupaladdhiyeva idha cintanāti daṭṭhabbāti. Evañhi sati bhavaṅgasamaya visaññisamayesu cittaṃ ārammaṇena vināpi pavattatīti evaṃ vādīnaṃ vādo paṭikkhitto hoti. Santesupica nissaya samanantarādīsu tassa paccayesu tehi nāmaṃ alabhitvā ārammaṇapaccayavasenevassa nāmaṃ siddhanti daṭṭhabbaṃ. Cinenti sampayuttakā dhammā etenāti cittaṃ. Tañhi ārammaṇaggahaṇakicce pubbaṅgamabhūtanti taṃ sampayuttadhammāpi ārammaṇaṃ gaṇhantā tassa vaseneva gaṇhantīti. Cintanamattaṃvā cittaṃ. Sabbepi hi dhammā taṃtaṃ kriyāmatṭvā honti. Na tesu dabbamvā saṅghānaṃ vā viggahovā upalabbhati. Paccayāyatta vuttino ca honti. Na te attano thāmenavā balenavā vasenavā sattiyāvā uppajjituṃpi sakkonti. Pageva cintetuṃvā phusetuṃvāti. Khaṇamattaṭṭhāyinoca honti, na kadāci kassaci vase vattituṃ sakkontīti. Tasmā tesu idaṃ dabbam, ayaṃ satti, aya kriyāti evaṃ vibhāgo nalabbhatīti daṭṭhabbaṃ. Evañca katvā sabbesu paramatthapadesu ekaṃ bhāvasādhanameva padhānato labbhati. Tadañña sādhanānipana pariyāyato va labbhanatīti veditabbaṃ. Ettha ca dabbādivasena abhedassa cintanassa atthavisesañāpanatthaṃ vibhāga kappanāvasena bhedakaraṇaṃ pariyāyakathāti daṭṭhabbaṃ. Yathā silā puttakassasarīranti, tathā karaṇaṇca taṃ taṃ kriyāsaṅkhāta dhammavimuttassa paraparikappitassa kārakabhūtassa atta jīva satta puggalassa sabbaso abhāvādīpanatthaṃ. Sati hi attādimhi kiṃ abhedassa bhedakappanāyāti.

Vibhāvanīyaṃ pana

Sasavisāṇaṃ viya abhūtassa bhūta kappanā vuttā viya dissati. Ayamassādhippāyo-dhammesu kattāvā kāre tāvā koci natthi. Lokepana attappadhāno kriyā nipphādako kattānāma siddho. Tasmā cintanakicce attappadhānatā dīpanatthaṃ taṃ kattubhāvaṃ citte āropetvā cintetīti cittanti vuttaṃ.

Cittassaca balena taṃsampayuttānaṃpi tasmim kicce tadanukūlappavattidīpanatthaṃ punakaraṇabhāvaṃ citte kattubhāvaṇca tesu āropetvā cinenti sampayuttakā dhammā etenāti cittanti vuttanti. Api cettha cittasaddo vicitratthavācako daṭṭhabbo. Vuttañhe taṃ saṃyuttake –

Diṭṭhaṃ vo bhikkhave caraṇaṃnāma cittanti. Evaṃ bhante. Tampi kho bhikkhave caraṇaṃ cittaṃ citteneva cintitanti. Tenāpi kho bhikkhave caraṇena cittaṃ cittaññeva cittataranti, nā haṃ bhikkhave aññaṃ ekanikāyaṃpi samanupassāmi yaṃ evaṃ cittaṃ. Yathayidaṃ bhikkhave tiracchānagatā pāṇā. Tepi kho bhikkhave tiracchānagatā pāṇā citteneva cittikatā. Tehipi kho bhikkhave tiracchāna gatehi pāṇehi cittaññeva cittataranti.

Tattha caraṇaṃnāma cittanti yathavicitrāni dibbavimānādīni cittaṃkammāni katvā idaṃcidaṇca puññaṃ karontā idhacidhaca nibbattāti dassento vicaranti. Tassa paṭakoṭṭhakassettaṃ nāmaṃ. Cittenāti nissakke karaṇavacanaṃ. Yathayidanti yathā ime. Cittikatāti vicitrā katā. Etthaca cittavicittakāya saññāvicittā. Saññāvicittatāya taṃhāvicittā. Taṃhāvicittatāya kammāni vicittāni. Kammavicitta tāya yoniyo vicittā. Yonivicittatāya tesam tiracchā nagatānaṃ vicittatā veditabbā. [Vacanattho]

Taṃ taṃ sabhāvo lakkhaṇaṃ, kiccasampattiyo raso;
Gayhākāro phalaṃvāpi, paccupaṭṭhāna saññitaṃ.

Āsannakāraṇaṃ yaṃ taṃ, padaṭṭhānanti taṃ matam;

Dhammānaṃ vavatthānāya, alaṃ ete vibuddhino.

Āramaṇavijānanalakkhaṇaṃ cittaṃ, pubbaṅgamasam, sandhānapaccupaṭṭhānaṃ,
nāmarūpapadaṭṭhānaṃ. [Cittaṃ]

14. Cetasikanti ettha cetasi bhavaṃ tadāyattavuttitāyāti cetasikaṃ. Phassādi dhammajātaṃ. Etthaca tadāyattavuttitā nāma ekuppādatādīhi lakkhaṇehi cittena saha ekī bhūtaṃsa viya pavatti. Etena yā cittassa jāti. Sāeva phassādīnaṃ. Yā cittassa jarā, yaṃ cittassa maraṇaṃ, yaṃ cittassa āramaṇaṃ, yaṃ cittassa vatthu, tadeva phassādīnanti evaṃ ekapuppha mañjariyaṃ ekavaṇṭupanibbandhāni pupphāni viya cittena saha ekajātiyādi upanibbandhā phassādayo dhammā idha cetasikaṃnāmāti siddhā honti. Evañca sati cittampi tehi phassādīhi saha tatheva āyattaṃ pavattatīti taṃpi phassikaṃ vedanikantiādinā vattabbanti ce. Na. Cittasseva jeṭṭhakattā. Manopubbaṅgamā dhammā, manoseṭṭhā manomayāti hi vuttaṃ. Etthaca manomayāti manasāeva pakatā nimmitā cittaṃkriyā bhūtatī attho. Etena te phassādayo dhammā cittena vinā nupalabbhantīti dasseti. Cittaṃpana tehi kehici vināpi pavattatiyeva. Pañcaviññāṇa cittaññītehi kehici vitakkādīhi vinā uppajjati. Tasmā tesaññeva tadāyatta vuttitā vattabbā na cittassāti.

[15] Vibhāvaniyaṃ pana

Ekālambaṇatā mattena tesam tadāyattavuttitaṃ cetasi kattañca vibhāveti. Taṃ na sundaraṃ.

Na hi ekālambaṇatāmattena cetasikaṃnāma jātanti. Ettha ca loke nānāvaṇṇadhātuyo udake ghaṃsitvā vatthumhi nānā cittaṃkammāni karonti, tattha vatthumhi pharaṇaṃ bandhanañca udakasseva kiccaṃ, na vaṇṇadhātūnaṃ. Nānārūpa dassanaṃ vaṇṇadhātūnameva kiccaṃ, na udakassa. Tattha vatthuviya āramaṇaṃ daṭṭhabbaṃ. Udakaṃviya cittaṃ. Nānā vaṇṇadhātuyoviya cetasikadhammāti. [Cetasikaṃ]

15. Rūpanti ettha ruppātīti rūpaṃ. Sītuṇhādīhi virodhi paccayehi visama pavatti vasena vikāraṃ āpajjati, tehi vā vikāraṃ āpādiyatīti attho. Yathāha –

Ruppātīti kho bhikkhave tasmā rūpanti vuccati. Kena ruppanti. Sitenapi ruppanti. Uṇhenapi ruppanti. Jighacchāyapi ruppanti. Vipāsāyapi ruppanti. Daṃsa makasa vātātapa sarim sapa sapphassehipi ruppātīti. Ruppātītica ruppanti, kuppanti, ghaṭṭiyati, piḷi yati, bhijjati.

Mahāniddese vuttaṃ. Ayamettha piṇḍattho, ye dhammā ciraṭṭhitikāca honti sappatiḥhasabhāvāca. Tesaññeva ṭhitikkhaṇesu virodhipaccayehi samāgamonāma hoti. Napanaññesaṃ parittakkhaṇānaṃ appatiḥhasabhāvānanti. Tesañhi appatiḥhasabhāvānaṃ sukhuma rūpānaṃpi bahiddhā sītādīhi samāgamonāma natthi. Kuto parittakkhaṇānaṃ appatiḥhasabhāvānañca arūpadhammānanti. Yadi evaṃ sukhumarūpānaṃ arūpatāpatti siyāti. Nasiyā. Oḷārikarūpehi samānagati kattā. Tānihi oḷārikesu ruppamānesu ruppantiyevāti. Samāgamoca nāma idha thapetvā āpātagamaṇaṃ āramaṇakaraṇaṃ aññamaññaviruddhānaṃ ṭhitipattānaṃ oḷārikarūpānaṃ mahābhūtānamevavā aññamaññābhiggaṭṭanaṃ vuccati, ruppanti ghaṭṭiyati piḷiyati hi vuttaṃ. Ruppānañcānaṃ parasenāyuddhena raṭṭhakhobhoviya kalāpantaragatadhātūnaṃ kuppanaṃ bhijjanaṃca vuccati. Kuppanti bhijjati hi vuttaṃ. Etthaca kuppātīti khobhati cañcalati, bhijjati vikāraṃ āpajjati. Yasmiṃ khaṇe virodhipaccayasamāgamaṃ labhanti. Tato paṭṭhāya sayampi vikārapattā honti. Omattādhimattarūpasantatīnaṃ uppattiyā paccayabhāvaṃ pattā hontīti attho. Apicettha ruppānaṃ duvidhaṃ vaḍḍhanaṃ, hāyanañca. Tadubhayampi kappavutṭhāne kappasaṇṭhāne nānāyukappa saṃvacchara utu māsa ratti divādīnaṃ parivattaneca pākaṭaṃ hotīti. Kasmā pana rūpanti nāmaṃ ghaṭṭanavasena ruppānadhammānameva siddhanti. Tesameva saviggahattā. Rūpadhammā hi samūhasaṇṭhānādi bhāvapattiyā saviggahā honti. Tasmā tesameva ruppānaṃ paccakkhatopi lokassa pākaṭanti tesveva rūpanti nāmaṃ siddhanti daṭṭhabbaṃ. Arūpadhammā pana aviggahāti na tesam vikāro paccakkhatopi lokassa pākaṭo hoti. Taṃ taṃ rūpavikāraṃ disvāvā sutvā vā pucchitvāyeva vā so lokena jānitabbo aññatra paracittavidūhi. Tasmā tesam rūpatāpatti natthīti.

[16] Vibhāvanīyaṃ pana

Tesaṃ rūpatāpattippasaṅgo sītādiggahaṇa sāmattiyena nivattito. Yasmā pana vohāronāma lokopacārena vinā nasijjhati. Lokopacāroca pākaṭanimittavase neva pavatto. Tasmā idha sītādiggahaṇena vināpi tappasaṅganivatti lokatova siddhāti daṭṭhabbā.

Yasmā ca brahmaloke brahmānaṃ kāyavikāra vacīvikārā ca iddhivikuppanāvasappavattā nānārūpavikārāca dissantiyeva. Teca ekena pariyāyena ruppanākārāeva nāma honti, tasmā tesaṃ vasena tattha rūpānaṃ rūpatāsiddhi hotīti vedītabbaṃ. Rūpayati vā attano sabhāvena pakāsatīti rūpaṃ. Arūpadhammā hi na attano sabhāvena pākaṭā honti. Rūpasannissayeneva gahetabbā. Idaṃ pana attano sabhāvene va pākaṭaṃ pañcaviññāṇehipi gahetabbanti. Imasmiṃ atthe sati brahmaloke rūpānaṃpi uju katova rūpatāsiddhi hotīti.

[17] Vibhāvanīyaṃ pana

Anuggāhakānaṃ sītādīnaṃ vasena taṃ sabhāvā nātivattana vasenaca tattha rūpatāsiddhi vibhāvītā. Yasmāpana sīte nāpi uñhenāpītiādivacanaṃ nidassanamattaṃ hoti. Kamma cittāhāraṇaṃpi vasena ruppanassa sambhavato, tathāhi saññā viññāṇānīpi rūpārammaṇarasārammaṇehi eva pāliyaṃ niddiṭṭhāni. Na hi saññā rūpaṃeva sañjānāti. Na ca viññāṇaṃ rasa meva vijānāti. Nidassanamattena desanā hotīti viññāyatīti. Tasmā sītādiggahaṇaṃ amuñcitvāva tattha rūpatāsiddhivibhāvanena payojana natthīti. [Rūpaṃ]

16. Nibbānanti ettha nibbāyanti sabbe vaṭṭadukkhasantāpā etasminti nibbānaṃ. Nibbāyantīti ye kilesāvā khandhāvā abhāvitamaggassa āyatīṃ uppajjanārahapakkhe ṭhitā honti. Teyeva bhāvitamaggassa anuppajjanārahapakkhaṃ pāpuṇantīti attho. Na hi khaṇattayaṃ patvā niruddhā atītadhammā nibbāyanti nāma. Paccuppannesu āyatīṃ avassaṃ uppajjamānesuca dhammesu vattabbameva natthīti. Vaṭṭadukkhasantāpāti kilesavaṭṭa kammavaṭṭa vipākavaṭṭa dukkhasantāpā. Na hi tividha vaṭṭadukkhasantāparahitānaṃ rukkhādīnaṃ anuppādanīrodho nibbānaṃnāma hotīti. Etasminti visaye bhummaṃ. Yathā ākāse sakuṇā pakkhantīti. Yehi te nibbāyanti. Tesaṃ tabbinimuttaṃ aññāṃ nibbutiṭṭhānaṃnāma kiñci natthīti. Nibbāyanti vā ariyajānā etasminti nibbānaṃ. Nibbanti dhīrā yathayaṃ padīpoti hi vuttaṃ. Nibbāyantīti taṃ taṃ kilesānaṃvā khandhānaṃvā puna appaṭisandhikabhāvaṃ pāpuṇantīti attho. Ekasminti visayeeva bhummaṃ, etasmiṃ adhi gatetipi yojenti. Ṭīkāsupana bhavābhavaṃ vinanato saṃsibbana to vānaṃ vuccati taṇhā. Tato nikkhantanti nibbānanti vuttaṃ.

[18] Vibhāvanīyaṃ pana

“Nibbābhivā etena rāgaggiādīkoti nibbāna”ntipi vuttaṃ. Taṃ na sundaraṃ.

Na hi maggeviya nibbāne katthaci karaṇasādhanaṃ diṭṭhaṃ, naca nibbānaṃ nibbūti kriyāsādhane rāgādīkassa kattuno saha kāripaccayo hotīti. [Nibbānaṃ]

Dutīyagāthāya paramatthadīpanā niṭṭhitā.

Cittasaṅgaha-paramatthadīpanī

17. Idāni uddesakkamena cittaṃ tāva niddisanto tattha cittantiādīmāha. Tatthāti tesu catūsu abhidhammatthesu. Tāva pathamaṃ. Cattāro vidhā pakārā yassa taṃ catubbidham.

18. Kāmāvacaranti ettha kāmīyatīti kāmo. Kāmentivā ettha sattā avikkhambhitakāmarāgattā

kāmaratiyāeva ramanti. Na uparibhūmīsu viya jhānaratiyāti kāmo. Ekādasavidhā kāmabhūmi. Nanu cettha jhānalābhinopi santīti. Na na santi. Tepana kadāci devāti natthettha doso. Avīcinirayādayo kathaṃ kāmīyanti. Kathaṅca tattha sattā kāmaratiyā ramantīti. Nimitassādavasenaṃ bhavanikantivasenaṃvati. Maraṇakāle hi upaṭṭhitā nirayaggijālā suvaṇṇavaṇṇāviya khāyanti. Eko kira micchādīṭṭhiko brāhmaṇo maraṇamañce nippanno hoti. Tassa ācariyabrāhmaṇā samīpe ṭhatvā brahmalokaṃ bho gacchāti vadanti. Tassapana avīciniraye aggijālā upaṭṭhahanti. Tadā so bho ācariyā suvaṇṇavaṇṇā paññāyanti āha. Esa bho brahmaloko. Tattha gacchāti vadanti. So kālaṅkatvā avīcimhi uppajji. Evaṃ nimitassādavasena te kāmīyanti. Tattha uppannānaṃpi bhavanikantināma hotīti. Apica, tattha uppannā avikkhambhitakāmarāgāeva honti, okāse sati kāmaratiyā ramissantī yevāti. Tasmim kāme avacarati kāmāvacaraṃ. Etthaca avacarati padassa uppajjati attho na gahetabbo. So hi attho pāliyaṃ nasameti. Nānādosayuttoca hotīti. Yaṃ etasmim antare etthāvacarā ettha pariyāpannāti hi pāliyaṃ vuttaṃ. Yadi cettha so attho adhippeto siyā. Evaṃ sabhi etthāvacarā etthuppannāti vuttaṃ siyā. Napana vuttaṃ. Naca pariyāpannasaddo uppannasaddena saha samānatthoti sakkā vuttaṃ. Na hi lokuttaracittāni tīsu bhavesu uppannā nipi tatra pariyāpannāniyeva hontīti. Evaṃ tāva pāliyaṃ nasametīti.

Yadica so attho gahito siyā. Evaṅca sati tasmim kāme ye mahaggata lokuttaradhammā uppajjanti. Tesampi kāmā vacaratāpattidoso rūpāvacaratādi muttidosoca āpajjati. Yeca kāmāvacaradhammā rūpārūpabhūmīsu uppajjanti. Tesaṅca rūpārūpā vacaratā pattidoso kāmāvacaratā muttidosoca āpajjati. Nanu yebhuyyavuttivasenapi kesaṅci nāmalābho hoti. Yathā vanacarako saṅgāmvacaroti. Tasmā idhapi tesam dhammānaṃ attano attano bhūmīsu uppannabahulattā kāmāvacarādi nāmalābhe sati na koci dosoti. Na. Evaṅhi sati lokuttara dhammānaṃ kāmāvacaratādi mucchanatthaṃ yebhuyyena uppannabhūmi visuṃ vattabbā siyā. Na ca sā nāmabhūmi atthi. Yattha te yebhuyyena uppajjanti. Tehi uppajjantā tīsu bhavesu eva uppajjanti. Tasmā tesam kāmā rūpārūpāvacaratāpattidoso dunnivāro siyāti. Evaṃ nānādosayutto hotīti. Tasmāssa tathā atthaṃ aggahetvā etthāvacarā ettha pariyāpannāti bhagavatā saṃvaṇṇitena pālinayenevassa attho gahettaboti. Ayaṅhettha attho. Kāme avacarati pariyāpannabhāvena tasmim ajjhogāhetvā carati pavattatīti kāmāvacaranti. Pariyāpannabhāvocanāma attano ādhārabhūtena tena kāmēna saha samānajātīgottanāmatā saṅkhātehi paritobhāgehi tasmim kāme āpannabhāvo anuppaviṭṭha bhāvo. Antogadhabhāvoti vuttaṃ hoti. Soca tathā pariyāpannabhāvo pariggāhiniyā kāmataṅhāya katoti daṭṭhabbo. Ettāvātā yedhammā rūpārūpasattasantānabhūtāpi mayhaṃ eteti kāmā taṅhāya pariggahitā kāme pariyāpannāva honti. Te kāmāvacarānāmāti siddhā honti. Rūpārūpā vacaresupi ayaṃ nayo netabbo. Tesupana rūpataṅhā arūpataṅhāca pariggāhinī taṅhā daṭṭhabbā.

Ye pana dhammā tiṇṇaṃ taṅhānaṃ pariggahavimuttā honti. Te tīsu bhavesu uppannāpi tatra apariyāpannāeva hontīti lokuttarā nāma jātāti veditabbā. Etthaca paṭṭhāne āruppe kāmācchandaṃ nīvaraṇaṃ paṭicca uddhaccanīvaraṇantiādinā arūpasattasantānēpi kāmācchandasaṅkhātāya kāmataṅhāya uppatti vuttā. Tasmā rūpārūpa bhūmīsu uppannānaṃ kāmādhamaṇaṃ pariggāhinītaṅhā rūpārūpasattasantāna gatāpi daṭṭhabbā. Pāliyaṃ kāmācchandanaīvaraṇanti idaṃ nīvaraṇajātikkattā vuttaṃ. Na hi jhānabhūmīsu ekantaīvaraṇakiccāni nīvaraṇāni sakkā laddhanti. Atra kāmābhedo vattabbo. Dvekāmā kile sakāmoca, vatthukāmocāti. Tattha thapetvā rūpārūparāge añño sabbopi lobho imasmim catubbhūmiparicchede kile sakāmonāma. Thapetvāca rūpārūpāvacaradhamme aññe sabbepi tīsu bhūmīsu uppannā kāmāvacaradhammā vatthukāmonāmāti. Yaṃpana aṭṭhasāliniyaṃ sabbepi tebhūmakā dhammā vatthukāmoti vuttaṃ. Taṃ mahāniddeṣe niddiṭṭhena suttantikapariyāyena vuttanti gahettabbā. Na hi rūpārūpāvacaradhammā abhidhamme kāmānāmena vuttā atthīti. [Kāmāvacarapadam]

19. Rūpāvacaraṃ arūpāvacaranti ettha rūpārūpasaddā tāsu bhūmīsu nirulhāti daṭṭhabbā. Apica dve bhūmiyo rūpabhūmi, arūpabhūmiti. Tattha ruppanalakkhaṇaṃ rūpaṃ yattha natthi, sā catubbidhā bhūmi arūpabhūmināma. Sesā sattavīsatividhā bhūmi rūpabhūmināma. Tatthaca heṭṭhā ekādasavidhā bhūmi oḷārikena kāmēna visesetvā kāmā bhūmiti vuttā. Upari soḷasavidhā bhūmi rūpabhūmicceva vuttāti daṭṭhabbā. Yatthapana taṅhāvā jhānānivā rūpārūpasaddehi vuttāni. Tattha nissayassanāmaṃ nissite āropanavasena nissayopacāro veditabbo. Yatthaca kāmāvacarādisaddehi bhūmieva vuttā. Tattha nissitassa nāmaṃ nissaye āropanavasena nissito pacāroti. Yamettha vattabbā, taṃ kāmāvacarapade

vuttanayamevāti. Ayamettha tebhūmaka paricchede pāḷianugatā paramatthadīpanā. Yathāha –

Katame dhammā kāmāvacarā. Heṭṭhato avīcinirayaṃ pariyantaṃ karitvā uparito paranimmitavasavattīdeve anto karitvā yaṃ etasmiṃ antare etthāvacarā ettha pariyāpannā khandhadhātuāyatanā rūpā vedanā saññā saṅkhārā viññāṇaṃ. Imedhammā kāmāvacarā. Katame dhammā rūpāvacarā. Heṭṭhato brahmalokaṃ pariyantaṃ karitvā uparito akaniṭṭhe deve anto karitvā yaṃ etasmiṃ antare etthāvacarā ettha pariyāpannā samāpannassavā upapannassavā diṭṭhadhammasukhavihārissavā cittacetāsikā dhammā, ime dhammā rūpāvacarā. Katame dhammā arūpāvacarā. Heṭṭhato ākāsaññāyatanupage deve pariyantaṃ karitvā uparito nevasaññā nāsaññā yatanupage deve anto karitvā yaṃ etasmiṃ antare. La. Ime dhammā arūpāvacarāti.

[19] Tīkāsū pana

Yathāvuttaṃ suvisadaṃ pāḷinayaṃ aggahetvā aññathā vacanattāca vinicchayāca ettha vuttā. Sabbe te sārato na paccetabbāti.

Nanu aṭṭhasāliniyameva teca aññeca atthā vuttāti. Saccam. Bhūtaṃpana suvisadaṃ pāḷianugataṃ atthaṃ ñatvā kiṃvikkhepenāti.

20. Lokuttaranti ettha lujjanapalujjanaṭṭhena loko vuccati yathāvutto tebhūmakadhammo. Yathāha lujjati palujjati kho bhikkhave tasmā lokoti vuccati. Evaṃ sante lokuttaradhammānaṃpi nibbānavajjānaṃ lokatāpatti siyā. Kasmā, tesampi lujjanapalujjanadhammattāti. Nasiyā. Yattha hi nicco dhuvo sassatoti mahājanassa micchāgāho nivisati. Tattheva tassa nivāraṇatthaṃ ayaṃ lokasamaññā niyamīyati. Tasmā sabbaso micchāgāhavimuttānaṃ tesam lokatāpatti natthīti vadanti. Yesamvā lujjanampalujjanañca mahājanassa pākaṭaṃ. Tesaññeva lokatāsiddhīti natthi lokuttarānaṃ lokattappasaṅgoti. Lokato uttaraṭṭhīti lokuttaraṃ. Maggacittaṃ. Tato uttiṇṇanti lokuttaraṃ. Phalacittaṃ. Nibbānaṃpana idha nalabbhatīti. Uttaraññācetta taṇhāttayaggāha vimuttiyā tisu lokesu apariyāpannabhāvoyeva. Soca apariyāpannabhāvo kesam dhammānaṃ adhiṭṭhāna bhūtoviya gayhatīti visum ekā catutthī avatthābhūmināmāti.

Catubbhūmivibhāgassa paramatthadīpanā niṭṭhitā.

21. Evaṃ cittaṃ bhūmibhedena hīnapaññā nukkamato catudhā niddisitvā idāni tadeva catubbidhaṃ cittaṃ yathāniddiṭṭhakkamena vibhajanto pathamaṃ kāmāvacaracittaṃ. Tatthaca hīnaṃ asobhaṇacittaṃ. Tatthaca sabbahīnaṃ akusalacittaṃ tāva dassetuṃ **somanassasaha gatanti**ādīmāha. Etthaca kāmāvacaracittassapi akusalāhetuka sahetukānukkamo hīna paññānukkamavasena vuttoti daṭṭhabbo.

[20] Vibhāvaniyaṃ pana

Upari vuccamānānaṃ bahūnaṃ cittānaṃ sobhaṇasaññākaraṇasukhatthaṃ appake pāpāhetukeyeva pathamaṃ dassentoti vuttaṃ. Taṃ na sundaraṃ.

Tadattho hi yathāvuttahīnādikkameneva siddhoti.

[21] Yañca tattha

Tesu tesuca bhavesu gahitappaṭṭisandhikassa sattassa ādīto vīthicittavasena lobhasahagata cittuppādāna meva sambhavato teyeva pathamanti vuttaṃ. Taṃpi nayujjati.

Ādīto vīthicittavasena manodvārā vajjanasseva sabbapathamaṃ uppajjanatoti. Akusalesu pana

lobhamūla cittaṃ bahukañca hoti. Dvīhi vaṭṭamūlehi yuttattā padhānaṃ pākaṭaṇca hotīti tadeva pathamaṃ vuttanti daṭṭhabbaṃ.

22. Tattha sundaraṃ manoti sumano. Siniddhacittaṃ. Na hi anavaṃjjaṭṭhena sundaratā idha yuttāti. Sundaraṃ mano etassābhivā sumano. Siniddhacittasamaṅgī puggalo. Sumanassa bhāvo somanassa. Mānasikasukhavedanāyetaṃ nāmaṃ. Etthaca sumanassa bhāvoti tasmim citta puggalevā sumanābhidhānassavā ayaṃ so sumanoti sumanabuddhiyāvā pavattinimittanti attho. Bhāvoti hi abhidhānabuddhīnaṃ pavattinimittaṃ vuccati. Bhavanti pavattanti abhidhānabuddhiyo etasminti katvā. Etasminti ca nimitte bhummaṃ. Yathā nāgo dantesu haññateti. Yathā hi tattha attano dantanimittaṃ dantayutte nāge hananappavatti hoti, evamidhapi taṃ vedanānimittaṃ vedanāyutte manasmim puggalevā abhidhānabuddhiyo pavattantīti. Bhavanti buddhisaddā etenāti bhāvotica vadanti. Etasmāti ca apare. Somanassena saha ekato gataṃ pavattanti somanassasahagataṃ. Somanassavedanāsampayuttanti attho. Dassanaṃ diṭṭhi. Sā pana sammādiṭṭhi, micchādiṭṭhivasena duvidhā. Idha micchādiṭṭhiyuttā. Akusalādhikārattā. Diṭṭhiyeva diṭṭhigataṃ. Yathā gūthagataṃ muttagatanti. Diṭṭhigatena samaṃ pakārehi yuttanti **diṭṭhigata sampayuttaṃ**. Diṭṭhigatena ekuppādatādīhi pakārehi samaṃ ekībhūta miva yuttaṃ saṃsaṭṭhanti attho. **Asaṅkhārikamekaṃ sasaṅkhārikamekanti** ettha saṅkhāroti pubbātisaṅkhāro. Soca duvidho payogo, upāyocāti. Tattha āṇattiyāvā ajjhesanāyavā tajjetvā vā idam karohīti parehi kato kāyavacīpayogo payogonāma. Āṇattādināpana vināva kammassa karaṇatthaṃ taṃ taṃ upāyaṃ pare ācikkhanti. Akaraṇe ādinavaṃ karaṇeca ānisaṃsaṃ dassenti, katikaṃvā karonti, daṇḍaṃvā thapenti, sayameva vā taṃ taṃ kāraṇaṃ anussarati, paccavekkhati. Evamādinā nayena upāyo anekavidho. So duvidhopi idha saṅkhāro nāma. Saṅkharoti attano pakatiyā kātuṃ anicchamānaṃ citta santānaṃ akātuṃ adatvā karaṇatthāya saṃvidahati tasmim tasmim kamme payojētīti katvā. Yopana paccayagaṇo tena saṅkhārena virahito hoti. So asaṅkhāro. Yopana tenasahito hoti. So sasaṅkhāroti. Vuttañhettaṃ aṭṭhakathāyaṃ –

Saha saṅkhārenāti sasaṅkhāro. Tena sasaṅkhārena sappayogena saupāyena paccayagaṇenāti atthoti.

Etthaca paccayagaṇoti ārammaṇādiko sādharmaṇo paccaya gaṇo aṭṭhakathāyaṃ vutto. Asādhāraṇopana kusalakammesu sappurisupanissayādiko akusalakammesu asappurisupanissayādiko paccayagaṇo visesetvā yojetuṃ yutto. Sopana yadā duvidhena saṅkhārena vinā sayameva cittaṃ asaṃsīdamānaṃ katvā uṭṭhāpeti samuṭṭhāpeti, tadā soasaṅkhāronāma. Yadāpana tena vinā sayameva cittaṃ uṭṭhāpetuṃ samuṭṭhāpetuṃ nasakkoti, saṅkhāraṃ sahāyaṃ labhitvāva sakkoti, tadā so sasaṅkhāronāma. Iti asaṅkhāro sasaṅkhārotica idam paccaya gaṇasseva nāmaṃ. Na cittassa. Cittaṃpana saṅkhārena suddhena paccayagaṇena uppannaṃ asaṅkhārikaṃ. Sasaṅkhārena paccayagaṇena uppannaṃ sasaṅkhārikaṃ, uppannatthe hi ayaṃ ikapaccayoti. Yasmim samaye akusalaṃ cittaṃ uppannaṃ hoti somanassasahagataṃ diṭṭhigatasampayuttaṃ sasaṅkhārenāti hi pāḷiyaṃ vuttanti. Etthaca sasaṅkhārena paccayagaṇena uppannaṃ hotīti yojetabbanti. Ayamettha asaṅkhārikasasaṅkhārikapadesu paramatthadīpanā.

[22] Tīkāsū pana

Imamatthaṃ asallakkhetvā cittameva asaṅkhāraṃ sasaṅkhāranti ca gahetvā yaṃ vuttaṃ, “natthi saṅkhāro assāti asaṅkhāraṃ. Tadeva asaṅkhārikaṃ. Saha saṅkhārena vattatīti sasaṅkhāraṃ. Sasaṅkhārameva sasaṅkhārikanti ca. So yassa natthi. Taṃ asaṅkhāraṃ. Tadeva asaṅkhārikaṃ. Saṅkhārena sahitaṃ sasaṅkhāri kanti ca”. Sabbametaṃ na yujjatiyeva.

[23] Yañca vibhāvaniyaṃ

Saṅkharoti cittaṃ tikkhabhāvasaṅkhātamaṇḍanavisesena sajjeti. Saṅkharīyatīvā taṃ etena yathāvuttanayena sajjīyatīti saṅkhāroti vuttaṃ. Taṃpi na sundaraṃ.

Evañhi sati sasāṅkhārikapi cittaṃ tikkhaṃnāma siyāti.

[24] Yañca **tattha**

“So pana attano pubbhāgappavatte cittasantāneceva parasantāneca pavattatīti taṃ nibbattito cittassa tikkhabhāva saṅkhāto viśesova idha saṅkhāroti” vuttaṃ. Taṃpi asaṅkhārika sasāṅkhārikapadānaṃ vacanattesu virajjhivā tadanu rūpassa saṅkhārassa parikappanāvasena vuttattā nayuttameva.

[25] Etena

Pubbappayogasambhūto, viśeso cittasambhapī;
Saṅkhāro taṃ vasenettha, hotyāsaṅkhārikādītīti.

Sādhakagāthāpi paṭikkhattā hotīti.

[26] Yañca **tattha**

“Athavā, sasāṅkhārikaṃ asaṅkhārikanti ce taṃ kevalaṃsaṅkhārassa bhāvābhāvaṃ sandhāya vuttaṃ. Natassa sahapavattisabbhā vā bhāvatoti. Bhinnasantānappavattinopi saṅkhārassa idhamatthitāya taṃ vasena nibbattaṃ cittaṃ saṅkhāro assa atthīti sasāṅkhārikaṃ. Salomako sapakkhakotyādīsuviya saha saddassa vijjamaṇatthaparidīpanato. Tabbiparītampana tadabhāvato vuttanayena asaṅkhārika”nti vuttaṃ. Taṃpi pāḷiatthakathāsiddhaṃ ujum visadaṃ atthaṃ muñcitvā attano parikappanā vasena vuttattā na gahetabbameva.

Etthaca attano icchāya vinā pasesaṃ āṇattiyāvā ajjhe sanāyavā yācanāyavā pavattitaṃ cittaṃ payogasamuṭṭhitaṃ nāma. Tathā attano icchāya vinā pasesaṃ bhayenavā lajjāyavā gāravenavā kathikāyavā daṇḍabhayenavā pavattitaṃ upāyasamuṭṭhitaṃ nāma. Sayamevavā attano līnaṃ cittaṃ ñatvā tena tena upāyena attānaṃ ovadītvāvā taṃ taṃ upāyaṃ anussarītvāvā pavattitaṃ cittaṃ upāyasamuṭṭhitaṃ nāma. Idañca nayadassanamevāti. Diṭṭhigatena vippayuttaṃ **diṭṭhigatavippayuttaṃ**. Udāsinabhāvena pekkhati anubhavanākārena ārammaṇaṃ passatīti **upekkhā**. Upapattito yuttito ikkhati passatītivā upekkhā. Yathāhi somanassa domanassāni ārammaṇaṃ adhimattato passanti. Yato somanassito puggalo tena ārammaṇena viyoge vikārapatto hoti. Domanassitoca tena ārammaṇena saṃyoge vikārapatto hoti. Na tathā ayaṃ, ayaṃ pana yuttitova passati na ārammaṇasaṃyoga viyogahetu puggalaṃ vikāraṃ pāpetīti. Kecipana upapattito yuttito ikkhatīti idaṃ idha nasambhavati. Na hi akusalaṃ yuttarūpaṃ nāma hotīti vadanti. Upekkhāya sahatanti samāso.

23. Etthaca kiñcāpi phassādayo vitakkādayo mohādayoca dhammā iminā sakalena aṭṭhavidhena cittena saha gatā sampayuttāca hontī, na pana te vedanāviya sayampi bhedavantā hontī. Naca diṭṭhisāṅkhārānaṃ viyatesaṃ imasmiṃ citte katthaci hontī katthacinahontīti ayaṃ vikappo atthi. Tasmāte imassacittassa bhedakarā nahontīti idha nagahitāti daṭṭhabbā. Lobhona aññehi imassa aṭṭhavidhassa bhedakaro hoti. Vedanādiṭṭhi saṅkhārāca imassa aññamaññassa bhedakarā hontīti teeva idha gahitāti daṭṭhabbā. Nanu pīti māna thinamiddhānipi bhedakarāni hontīti tānipi idha sapītikaṃ apītikanti mānasampayuttaṃ mānavippayuttanti thinamiddhasampayuttaṃ thinamiddhavippayuttanti ca gahetabbā nīti. Na. Tesu hi somanasse gahite pīti gahitāva hoti. Itarānica tīṇi aniyatayogīnica hontī, yevāpana kānicāti nagahitānīti.

[27] **Vibhāvaniyaṃ** pana

Phassādivitakkādīdhammā ito aññehipi citte hi yuttā hontīti nate aññehi imassa viśesaṃ karonti. Tasmā te idha na gahitāti iminā adhippāyena yaṃ vuttaṃ “kasmā panettha

aññesupi phassādīsu sampayuttadhammesu vijjamānesu somanassasahagatādibhāvova vuttoti. Somanassādīnameva asādhāraṇa bhāvototi. Phassādayohi keci sabbacitta sādhāraṇā keci kusalādi sādhāraṇā. Mohādayoca sabbā kusalasādhāraṇāti na tehi sakkā cittaṃ visesetu’’nti. Taṃ vicāretabbaṃ.

Evañhi sati somanassupekkhā saṅkhārāpi aññesu dissantīti tepi aññehi imassa visesaṃ nakaronti. Tasmā tepi idha nagahetabbā siyunti.

24. Etthaca somanassappaṭisandhikatā, agambhīrappakatitā, iṭṭhārammaṇasamāyogo, byasanamuttica somanassassa kāraṇaṃ. Somanassappaṭisandhikohi sadā bhavaṅgasomanassena paribhāvita santāno hotīti tassa cittaṃ uppajjamānaṃ yebhuyyena somanassasahagataṃ uppajjatīti. Agambhīrappakatikoca hīnajjhāsayo appakaṃpi mahantaṃ maññati. Hīnaṃpi paṇītaṃ maññati. Tasmā tassapi cittaṃ uppajjamānaṃ yebhuyyena somanassasahagataṃ hotīti. Iṭṭhārammaṇasamāyogoti attanā icchitena hīnenavā paṇītenavā ārammaṇena samāyogo. Byasanamuttīti nātibyasanādito mutti. Upekkhāpaṭisandhikatā, gambhīrappakatitā, majjhāttārammaṇasamāyogo, byasanamuttica upekkhāya kāraṇaṃ. Etthaca gambhīrappakabhītānāma mahajjhāsayatā. Tādiso hi puggalo mahantaṃpi appakaṃ maññati, paṇītaṃpi hīnaṃ maññatīti. Diṭṭhajjhāsayatā, diṭṭhivipannaṃpuggalasevanā, saddhammavimukhatā, micchāvitakkabahulatā, ayoniso ummujjanañca diṭṭhiyā kāraṇaṃ. Tattha diṭṭhajjhāsayatāti kāṇārīṭṭhassaviya sunakkhattassavīyaca purimabhava diṭṭhi gatikabhāvena āgatattā imasmiṃ bhavēpi sassatucchedāsaya bhāvo. Saddhammavimukhatāti ciraṃpi kālaṃ saddhammena vinā āgatattā. Micchāvitakkabahulatāti attano avisayesu sabbaññuvisayesu ṭhānesu attano pamāṇaṃ ajānitvā cintāpasutavasena micchāvitakkabahulabhāvo. Ayoniso ummujjananti attanādiṭṭhakāraṇameva sārato saccato ummujjanaṃ. Tabbiparītena diṭṭhivippayuttakāraṇaṃ veditabbaṃ. Asaṅkhārikakammajjanitappaṭisandhi katā, kallakāya cittatā, khanti bahulatā, purisakāresu diṭṭhānisamsatā, kammappasutattā, utubhojanādi sappāya lābhoti idaṃ asaṅkhārikakāraṇaṃ. Tattha khantibahulatāti sītuṅhādīnaṃ khamaṇabahulatā. Purisakāresūti purisehi kattabbesu kammesu. Kammappasutabhāti kammesu ciṅṇavasitā. Tabbiparī tena sasaṅkhārikakāraṇaṃ veditabbaṃ. Imesaṃpana cittānaṃ uppatti vidhānaṃ visuddhimagge gahetabbaṃ. Aṭṭhapīti pisaddena nesam labbhamānakammappathabhedato kāla santānā rammaṇādi bhedato ca anekavidhattaṃ sampiṇḍetīti.

Lobhamūlacittassa paramatthadīpanā niṭṭhitā.

25. Dosamūlacitte duṭṭhumanobhi dummano. Virūpaṃ cittaṃ. Duṭṭhumano etassātivā dummano. Virūpacittasamaṅgīpuggalo. Dummanassa bhāvo **domanassaṃ**. Mānasikadukkhavedanāyetaṃ adhivacanaṃ. Sā hi attanā sahagate cittevā taṃ samaṅgīpuggalevā dummanā bhidhānassavā ayaṃ so dummanoti dummanabuddhiyāvā pavattinimittaṃ hotīti. Sesam heṭṭhā vuttanayameva. Domanassena saha gatanti samāso. Paṭihaññatīti **paṭigho**. Doso. Sohi uppajjamāno sampayuttadhammepi paṭihanati. Lūkhe santatte karoti. Attano vatthumpi paṭihanati. Hodayappadesaṃ dahati. Taṃ puggalaṃ dummukhaṃ karoti, attano ārammaṇaṃpi paṭihanati. Taṃ bādhaya māno gaṇhāti. Tasmā paṭighoti vuccatīti.

26. Ettha siyā. Saṅkhāro tāva imassa cittassa bheda karoti tassa idha gahaṇaṃ yuttaṃ. Vedanā paṭighāpana bhedakarā na hontīti te idha na gahetabbāti. Vuccate, domanassaggahaṇaṃ tāva imassa cittassa kadāci aññavedanāyogatā pasaṅganivattanattanti. Yadāhi rājāno hasamānāyeva coravadham pesenti. Yadāca janā attano verīnaṃ maraṇe tuṭṭhiṃ pavedenti. Maraṇaṃ abhinandanti. Yadāca bālajānā hasamānāva migapakkhino mārenti. Tadā idaṃ nukho somanassena yuttanti attheva pasaṅgo. Upekkhāyogepana vattabbameva natthi. Tappasaṅganivattanattaṃ domanassaggahaṇanti. Paṭighaggahaṇaṃpi aññadhammasampayuttatā pasaṅganivattanattaṃ. Tathāhi ye natthikāhetukā kiriyamicchā diṭṭhikā pāṇavadhe apuññaṃnāma natthīti gaṇhanti. Yeca manussapāṇa vadheeva apuññaṃ hoti, tiracchānagatapāṇavadhe apuññaṃ natthīti gaṇhanti. Yeca pāṇavadhaṃ katvā yaññaṃ yajantānaṃ mahantaṃ puññaṃ hoti, dibbasamvattanikanti gaṇhanti. Te sakkāyādiṭṭhiyā vissaṭṭhā pāṇavadhaṃ

sayamvā karonti. Aññevā pesenti. Tadā idaṃ diṭṭhiyāpi sampayuttaṃ siyāti pasaṅgo hotiyeva. Yepana sammādiṭṭhikesu bālā abyattā, te kadāci tesam micchādiṭṭhikānaṃ laddhiṃ gahetvā paṇaṃ vadhantā ādito vematikajātāva honti. Tadātesam idaṃ vicikicchāyapi yuttaṃ siyāti pasaṅgo hoti. Tappasaṅga nivattanatthaṃ paṭighaggahaṇanti. Itarathā purima cittassa lobhasahagatabhāvoviya imassa paṭighasampayuttabhāvo cūlanigameneva siddhoti tesam gahaṇaṃ niratthakaṃ siyāti. Etthaca issāmacchariyakukkucānaṃ thinamiddhassaca aggahaṇaṃ purimacitte mānathinamiddhanayena veditabbaṃ. Ayamettha paramatthadīpanā.

[28] Vibhāvanīyaṃ pana mahāṭīkāyañca

“Asādhāraṇa dhammavasena cittassa upalakkhaṇatthaṃ domanassaggahaṇa”nti vuttaṃ. Tattha asādhāraṇadharmavasenāti idaṃ tāva nayujjati.

[29] Satipi imassa somanassupekkhāsahagatabhāve anaññasādhāraṇeneva domanassena imassa upalakkhaṇatthanti atthassa āpajjanato. Yathātaṃ satipi purimassa imassaca cittassa mohasahagatabhāve anaññasādhāraṇeneva lobhena paṭighenaca upalakkhaṇatthaṃ lobhasahagatapaṭigha sampayuttaggahaṇanti. Upalakkhaṇatthanti ca na vattabbaṃ.

Evañhi sati pākaṭena domanassena apākaṭānaṃ aññavedanā naṃpi idha laddhabhāvaṃ upalakkhetīti āpajjati. Yathā laddhātapatto rājakumāroti.

[30] Yañca vibhāvanīyaṃ

“Paṭighasampayuttabhāvopana ubhinnaṃ ekanta sahaṇitā dassanatthaṃ vutto”ti vuttaṃ. Taṃpi na sundaraṃ.

Imassa cūlanigameneva tadatthasiddhitoti.

27. Etthaca dosajjhāsayatā, agambhīrappakatitā, appassukatā, āghātavatthusamāyogovā, anīṭṭhārammaṇasamāyo govā domanassassa paṭighassaca kāraṇaṃ. Tattha dosa bahula bhāvato āgatavasena dosajjhāsayatā daṭṭhabbā. Agambhīrappakatitā hīnājjhāsayatā. Appassutassaca anīṭṭha loka dhammehi puṭṭhassa taṃkutetthalabbhāti paccavekkhanā natthīti. Imesampi dvinnaṃ uppattivīdhānaṃ visuddhimage gahetabbaṃ. Pisaddassa atthopi vuttanayoevāti.

Dosamūlacittassa paramatthadīpanā niṭṭhitā.

28. **Mohamūlacitte** vicikicchuddhaccānaṃ padattho upari āgamissati. Yasmāpana idaṃ cittaṃ mūlantaravirahena laddhokāseṇa suṭṭhubalavantena mohenaceva saṃsappamānavikkhipamānehi vicikicchuddhaccehi ca yuttaṃ hoti. Tasmā idha vedanāpi ārammaṇaṃ adhimattato anubhavituṃ na sakkotīti upekkhāvedanāva yuttā hoti. Evaṃ santepi idaṃ cittaṃ somanassa domanassa sahaṭānaṃpi anantare uppajjati. Tasmā tadubhayavedanāhipi idaṃ yuttaṃ siyāti pasaṅgo hotīti tappasaṅganivattanatthaṃ idha upekkhāgahaṇaṃ kataṃ. Anaññacittasādhāraṇena dhammena cittassa niyamanatthaṃ vicikicchāgahaṇaṃ. Uddhaccaṃ pana sabbākusalesu yuttaṃpi idha laddhokāsaṃ hutvā suṭṭhu balavaṃ hotīti dassanatthaṃ idheva gahitanti daṭṭhabbaṃ. Tenevahi dhammasaṅgaṇīyaṃ dhammuddesavāre uddhaccaṃ aññesu pāpacittesu sarūpato anuddharitvā yevāpanakabhāveneṇa vuttaṃ. Imasmiṃ antimacitteeva sarūpato uddhaṭanti daṭṭhabbaṃ. Yasmāca idaṃcittadvayaṃ sattānaṃ pakatisabhāvabhūṭanti payogena vā upāyena vā kenaci uppādetabbaṃ nāma natthi. Sabbakālampi bhavaṅgacittaṃviya anosakkamānaṃ asaṃsīdamānaṃ akicchena akasirena pavattati. Tasmā ekantena asaṅkhārikameva hotīti katvā idha saṅkhārabhedo na gahitoti daṭṭhabbaṃ. Tenevaca pāliyaṃpi purimacittesuviya idha sasāṅkhārenāti dutīyacittavāro navuttoti. Ayamettha paramatthadīpanā.

[31] Vibhāvanīyaṃ pana

Imāni dve cittāni atisammulhatāya aticañcalatāya ca sabbatthapi rajjanadussanarahitāni honti. Tasmā upekkhā sahatāneva pavattantīti vuttaṃ. Taṃ na sundaraṃ.

Rajjana sahitānaṃpi lobhamūla cittānaṃ upekkhā yogassa diṭṭhattāti.

[32] Yañca tattha mahāṭīkāyañca

“Tatoyevaca sabhāvatikkhatāya ussāhetabbatāyaca abhāvato sañkhārabhedopi nesaṃ natthī”ti vuttaṃ. Tattha sabhāvatikkhatāya abhāvatoti iminā imassa asañkhārikabhāvaṃ paṭikkhipati. Ussāhetabbatāya abhāvatoti iminā sasañkhārikabhāvaṃ paṭikkhipati. Tadubhaye pana idaṃ cittadvayaṃ sabbaso sañkhāravimuttaṃ hotīti dasseti. Taṃ aṭṭhakathāyapi tāva na sameti.

Paṭiccasamuppādavibhaṅgaatṭhakathāyañhi sañkhārabhedena avijjāya duvidhabhāvova vutto. Yadica idaṃdvayaṃ sañkhāramuttaṃ siyā. Evaṃ sati idha mohopi sañkhāramutto siyā. Soca avijjāyevāti tividhabhāvova avijjāya tattha vattabbo. Naca vuttoti. Evaṃ tāva aṭṭhakathāya nasameti.

[33] Yasmāca idha tikkhabhāvonāma vinā sañkhārena kevalaṃ pakati paccaya gaṇa vaseneva pavattanasamatthata vuccati. Idañca cittaṃ tattheva pavattati. Tasmā idaṃ sabhāvatikkhaṃ na hotīti na sakkā vattunti.

Laddhokāsenā mohena suṭṭhu muyhantīti mohamūhānīti vattabbe niruttanayena momūhānīti vuttaṃ.

29. Icevantiādi mahānigamaṃ. Tattha **icceva**nti iti evaṃ. Nipātasamudāyo hesa. Pacchimovā evaṃ saddo purimassa itisaddassa atthavacano. Icevantivā visuṃ eko nipāto. Sabbathāpi iminā somanassasahagatantiādinā vuttappakāre nāti attho daṭṭhabbo. Idañca dvādasāti ettha visesaṃ vedītabbaṃ. **Sabbathāpī**ti dhammasaṅgaṇīyaṃ vuttana pakārenāpi dvādaseva. Vibhaṅge vibhattena pakārenāpi dvādaseva. Dhātukathādīsu vuttana pakārenāpi dvādaseva. Tesu tesu suttantesu vuttana pakārenāpi dvādaseva. Kāladesa santānādi bhedabhinnena pakārenāpi dvādaseva. Kathaṃ dvādasevāti. Icevaṃ dvādasevāti yojetabbaṃ.

[34] Vibhāvanīyaṃ pana

Heṭṭhā vutto sampayogādi ākārova vibhāvito. Sopana iccevaṃti imināva siddhoti.

Akusalacittānīti kusalaapaṭiviruddhasabhāvattā evaṃ laddhanā māni cittāni. Etthaca ekantena saddhādayoeva kusalanāma. Mohādayoeva akusalā nāma. Cittaṃpana phassādayo viya aññasamānameva hoti, na hi ārammaṇa vijānaṃvā ekantena muyhānādiviya sāvajjaṃvā hoti. Saddahanādiviya anavajjaṃvāti. Taṃpana akusalehi yuttaṃ akusalanti vuccati. Kusalehi yuttaṃ kusalanti. Saddhādīnaṃpana mohādīnañca paṭiviruddhabhāvo yathākkamaṃ pahāyakapahātabbabhāvena vedītabbo. Akusaladhammāhi dubbalā honti. Suvaṇṇappaṭirūpakāviya pheggubhūtā abhāvanārahā punappunaṃ āsevīyamānāpi cañcalantiyeva vikkirantiyeva. Niyāmaṃ okkamantāpi ekasmiṃbhava eva apāyabhāgitāya okkamanti. Napana kusalamūlāni sabbaso pacchinditvā satte vaṭṭasotaniyate kātuṃ sakkonti. Kusaladhammāpana balavantā honti. Jātisuvaṇṇāviya sārabhūtā bhāvanārahā punappunaṃ āsevīyamānā thiratarapattā lokiyesu yāva iddhividhānā lokuttarevā yāva arahattamaggā vuddhivirulhīdhammā honti. Niyāmaṃ okkamantā apāyasotaṃvā vaṭṭaso taṃvā sabbaso samucchinditvā anupādisesanibbānabhāgitāya okkamanti. Tasmā kusala dhammāeva pahāyakānāma. Itarepana pahātabbāeva nāmāti vedītabbā. Apica kusaladhammānāma antamaso ālopabhikkhā

dānamattāpi lokebhesajjavidhānāniviyaakusalappahānāya eva paṇḍitehipaññapīyanti karīyanti ca, tasmā teeva pahāyakā. Akusaladhammāpana loke nānārogajātiyoviya sakalalokassa pakatisabhāvabhūtaeva hontīti te pahātabbāevāti. Samantato anavasesato ādiyiṃsu gaṇhiyiṃsūti samattāni. Apica **samattānīti** niṭṭhitāni paripuṇṇānivā. **Aṭṭhadhāti**adisāṅgahagāthā. Lobhomūlaṃ etesanti samāso. **Dvādasā kusalā siyunti** ettha siyunti nipātapadaṃ idha daṭṭhabbaṃ. Akusala cittāni dvādasā bhavanti attho.

Iti paramatthadīpaniyānāma abhidhammatthasaṅgahassa

Catutthavaṇṇanāya akusalacittassa

Paramatthadīpanā niṭṭhitā.

31. Evaṃ sabbanihīnaṃ akusalaṃ saṅgahetvā idāni ahetukaṃ saṅgaṇhanto tathaca sabbanihīnaṃ akusalavipākaṃ tāva dassetuṃ upekkhāsahagatantiādīmāha.

[35] **Vibhāvaniyaṃ** pana

Taṃ akusala vipākattāyeva akusalānantaraṃ pathamaṃ dassitanti adhippāyena yaṃ vuttaṃ “tesaṃ akusalavipākā divasena tividhabhāvepi akusalānantaraṃ akusalavipākeyeva vibhajitu”nti. Taṃ na sundaraṃ.

Evañhi sati kuslavipākānīpi kusalā nantareeva vattabbāni siyunti.

31. Cakkhusotādīnaṃ padattho upari āgamissati. Vijānātīti **viññāṇaṃ**. Yathāha-vijānāti vijānātīti kho bhikkhave tasmāviññāṇanti vuccatīti. Cakkuṃ nissitaṃ viññāṇaṃ **cakkhuvīññāṇaṃ**. Cakkhunāvā paccayabhūtena janitaṃ viññāṇaṃ cakkhuvīññāṇaṃ. Kammenavā cakkhussa upanītaṃ viññāṇaṃ cakkhuvīññāṇaṃ. Cakkhutovā jātaṃ viññāṇaṃ cakkhuvīññāṇaṃ. Cakkhussavā indriyabhāvena sāmi bhūtassa viññāṇaṃ cakkhuvīññāṇaṃ. Cakkhusmiṃvā uppannaṃviññāṇaṃ cakkhuvīññāṇaṃ. Esanayo sotaviññāṇādīsūpi. Pāḷiyampana mahā taṇhāsāṅkhayasutte –

Seyyathāpi bhikkhave kaṭṭhañca paṭicca aggī jalati. Kaṭṭhaggīteva saṅkhyāṃ gacchati. Sakalikañca paṭicca aggī jalati. Sakalī kaggīteva saṅkhyāṃ gacchati. Tiṇaṅca paṭicca aggī jalati. Tiṇaggī tveva saṅkhyāṃ gacchati. Gomayañca paṭicca aggī jalati. Gomayaggīteva saṅkhyāṃ gacchati. Thusaṅca paṭicca aggī jalati. Thusaggīteva saṅkhyāṃ gacchati. Saṅkārañca paṭicca aggī jalati. Saṅkāraggīteva saṅkhyāṃ gacchati. Evamevakhō bhikkhave cakkhuñca paṭicca rūpeca uppajjati viññāṇaṃ. Cakkhuvīññāṇanteva saṅkhyāṃ gacchati. Sotañca paṭicca sadde ca uppajjati viññāṇaṃ. Sotaviññāṇanteva saṅkhyāṃ gacchati. Ghānañca paṭicca gandheca uppajjati viññāṇaṃ. Ghānaviññāṇanteva saṅkhyāṃ gacchati. Jivhañca paṭicca raseca uppajjati viññāṇaṃ. Jivhāviññāṇanteva saṅkhyāṃ gacchati. Kāyañca paṭicca phoṭṭhabbeca uppajjati viññāṇaṃ. Kāyaviññāṇanteva saṅkhyāṃ gacchati. Manañca paṭicca dhammeca uppajjati viññāṇaṃ. Mano viññāṇanteva saṅkhyāṃ gacchatīti vuttaṃ.

Tathāti iminā upekkhāsahagatanti padaṃ ākaḍḍhati. Dukkhatīti **dukkhaṃ**. Sampayuttadhamme taṃ samaṅgipuggalaṃvā bādhati himsātīti attho. Duṭṭhuvā khanati kāyikasukhanti dukkhaṃ. Dukkarenavā khamitabbanti dukkhaṃ. Dukkaraṃ okāsadānaṃ etassatīvā dukkhaṃ. Kāyikadukkavedanāyeva nāmaṃ. Suṭṭhu paṭimukhañca icchatīti **sampaṭicchanaṃ**. Suṭṭhūti amuñcamānaṃ. Paṭimukhanti anaññāpekkhaṃ. Icchatīti kāmēti abhinandati paṭiggaṇhanti. Tenevahi bhāsitaṃ abhinanduntī ettha sampaṭicchimī sūti vaṇṇayiṃsu. Suṭṭhu tīreti tuletī vicāretīti **santīraṇaṃ**. Tīkāyaṃ tīreti niṭṭhāpetīti vuttaṃ. Vibhāvaniyaṃ tīreti vīmamsatīti vuttaṃ.

32. Etthaca cakkhussa asambhinnatā, āloka sannissayappaṭilābho, rūpānaṃ āpātāgamaṇaṃ, manasikāroti cattāro paccayā cakkhuvīññāṇassa uppattikāraṇāni. Sotassa asambhinnatā ākāsasannissayappaṭilābho, saddānaṃ āpātāgamaṇaṃ manasikāroti sotaviññāṇassa. Ghānaṃ asambhinnatā, vāsusannissayappaṭilābho, gandhānaṃ āpātāgamaṇaṃ manasikāroti ghānaviññāṇassa. Jivhāya asambhinnatā āposannissayappaṭilābho. Rasānaṃ āpātāgamaṇaṃ, manasikāroti jivhāviññāṇassa. Kāyassa asambhinnatā, pathavisannissayappaṭilābho, tiṇṇaṃ phoṭṭhabbānaṃ aññatarassa āpātāgamaṇaṃ, manasikāroti kāyaviññāṇassāti. Etthaca āloka ākāśādīnaṃ sannissayānaṃ gahaṇaṃ tehi vinā rūpādīnaṃ pasādesu āpātāgamaṇasseva abhāvatoṭi daṭṭhabbaṃ, na hi āloke sati rūpāni sannihitānīpi cakkhumhi āpātāmagacchanti. Esanayo sesesupīti. Yaṃpana aṭṭhakathāyaṃ -

Cakkhusmimpana asambhinnepi bahiddhārūpārammaṇe āpātāṃ anā gacchante cakkhuvīññāṇaṃ nuppajjati. Tasmim̐ pana āpātāṃ āgacchantepi ālokasannissaye asati nuppajjati vuttaṃ.

Taṃ vinā ālokena viññāṇuppattiyā abhāvadassanaparaṃ. Napana āpākāgamaṇaṃnāma āloke asatīpi sambhavatīti dassanaparanti daṭṭhabbaṃ. Itarathā rattandhakārepi rūpāni cakkhumhi āpātāṃ āgacchantīti āpajjati. Akusalassa vipākāni akusala vipākāni.

33. Etthā kenaṭṭhena **vipākamaṇāmāti**. Vipaccanaṭṭhena. Kiñca vipaccananti. Yathā loke ambaphalādīnaṃ taruṇabhāvaṃ atikkamma pariṇatabhāvappattivipaccananti vuccati. Evamevaṃ idhapi vipaccanaṃ veditabbanti. Ayañca attho catūhi samaṅgītāhi dīpetabbo. Catassohi samaṅgītānāma cetanāsamaṅgitā, kammāsamaṅgitā, upaṭṭhānasamaṅgitā, vipākāsamaṅgitā. Tattha pubbe taṃ taṃ kammāyūhanakāleyā kusalākusalacetanāya khaṇattayasamaṅgitā. Ayaṃ cetanāsamaṅgītānāma. Sāpana cetanā nirujjhamānā sabbaso abhāvaṃ patvā nanirujjhati. Āyatim̐pana vipākapaṭubhāvāya attano sabbākāraparipūraṃ kriyāvisesaṃ tasmim̐ cittasantāne nidahitvāva nirujjhati. Soca kriyāviseso yāva okāsaṃ nalabhati. Tāva kappasaṃtasahassaṃpi taṃsantānaṃ anugatoyeva hoti. Yaṃ sandhāya dhammapade -

Na hi pāpaṃ kataṃ kammaṃ, sajjukhīraṃva muccati;
Dahantaṃ bālaṃanveti, bhasmā channova pāvakoti vuttaṃ.

Sopana visuṃ eko paramatthadhammotipi saṅkhyāṃ nagacchati, anusayadhātuyoviyāti. Ayaṃ kammāsamaṅgītānāma. Sopana yadā attano anurūpe paccaye labhati. Tadā vipaccanaṭṭhāya okāsaṃ karoti. Kathaṃ karotīti. So āsannamaraṇassa sattassa attānaṃvā paccupaṭṭhāpeti. Attano nimittaṃvā paccupaṭṭhāpeti. Gatinimittaṃvā paccupaṭṭhāpeti. Soca satto taṃ amuñcamāno yadi gaṇhāti. Tadā okāsaṃ labhati. Ayaṃ upaṭṭhānasamaṅgītānāma. Taṃ amuñcivā cutassapana cutianantameva so kammasaṅkhāto kriyā viseso visuṃ eko sasampayutto paramatthadhammarāsi hutvā ekaṃ bhavaṃ pūrayamāno vipaccati, ekaṃ bhavaṃ pūrayamānotica yāva tāyukaṃ bhavaṅgacchantaṃ chasu dvāresu taṃ taṃ dvārikavipākakiccāni pariyoṣāne cutikiccañca sādhamānoti attho. Tattha purimā tisso samaṅgītā taruṇā vatthānāma honti. Pacchimā vipākāsamaṅgītā pariṇatāvattānāmāti veditabbā. Iti vipaccantīti vipākāni mudutaruṇāvattānaṃ atikkamivā pariṇakāvattānaṃvipakkabhāvaṃ āpajjantīti evamettha attho veditabbo. Evañca katvā pāḷiyāṃ kusalākusalakammāsamaṃpattānānaṃpi kaṭattārūpānaṃ vipākapaṭubhāvāya attano sabbākāraparipūraṃ kriyāvisesaṃ tasmim̐ cittasantāne nidahitvāva nirujjhati. Soca kriyāviseso yāva okāsaṃ nalabhati. Tāva kappasaṃtasahassaṃpi taṃsantānaṃ anugatoyeva hoti. Yaṃ sandhāya dhammapade -

Ye pana arūpabhāvena sarammaṇabhāvenaca kammena sadisa tāmattaṃ gahetvā arūpadhammānameva vipākattaṃ sādheti. Tesāṃ vipākāsaddo arūpadhammesu ruḷhīvasena pavattoti āpajjati. Yañca tattha sālīpījanibbattesu nālapattapupphaphalesu bījasadisānaṃ phalānameva sālīphalasālīpakkaṇānaṃ siddhaṃ viyāti upamaṃ dassenti, sāpi nasameti. Na hi phalānīpi taruṇakāle pākaṇānaṃ labhanti. Naca nālapattapupphānīpi pariṇatakāle pākaṇānaṃ nalabhanti. Tāni pihi tadā

nāḷaṃ pakkamaṃ, pattaṃ pakkamaṃ, pupphaṃ pakkanti na navuccantīti. Sukhayatīti sukhaṃ, sampayuttadhamme taṃsamaṅgīpuggalaṃvā laddhasātaṃ karotīti attho.

34. Suṭṭhuvā khanati kāyikadukkhaṃ. Sukhenaca khamitabbaṃ. Sukaraṃ okāsadānaṃ etassātivā sukhaṃ. Kusalassa vipākāni sampayutta hetuvirahato ahētukānicāti kusalavipākā hetuka cittāni.

[36] Vibhāvaniyaṃ pana

Pubbakammasahajātena nibbattakahetunāpi idha vipākassa sahetukatāpasaṅgokato. So na sundaro.

Na hi abhidhamme katthaci pubbakammasahajātena nibbattakahetunā vipākassa sahetukāhetukatā sambhavonāma atthi. Asatica sambhave byabhicārassapi abhāvato so pasaṅgo niratthakovāti. Tattha byabhicārassāti pasaṅgassa iccevattho. Etthaca akusalavipākānaṃ sayamaṃ abyākatadhammattā lobhādīhi akusalahetūhica sayamaṃ akusalavipākattā alobhādīhi anavajjahetūhica sahetukatā sambhavo natthi. Asati ca taṃ sambhave tesamaṃ ahētukabhāvo abyabhicāroyeva hotīti tattha ahētukaggahaṇaṃ na kataṃ. Kuslavipākānaṃ pana sayamaṃ kuslavipākattāyeva alobhādīhi kusalā byākatayogīhi anavajjahetūhi sahetukatā sambhavo atthiyeva. Satica tasmaṃ sambhave tesamaṃ ahētukabhāvo byabhicārasahito hotīti tattheva ahētukaggahaṇaṃ katanti daṭṭhabbaṃ.

35. Cakkhādike pañcadvāre uppannaṃ āvajjanaṃ **pañcadvārāvajjanaṃ**, tañhi pañcadvāre ghaṭṭitaṃ ārammaṇaṃ gahetvā āvajjanaṃ uppajjatīti. Bhavaṅgasāṅkhāte manodvāre uppannaṃ āvajjanaṃ **manodvārāvajjanaṃ**. Tañhi tasmaṃ āpātaṃ āgacchantaṃ ārammaṇaṃ gahetvā āvajjanaṃ pavattatīti. Etthaca manodvāranti sakalaṃ bhavaṅgacittaṃ daṭṭhabbaṃ.

[37] Yaṃpana ṭīkāyaṃ

Tāva “manodvāranti ettha āvajjanaṃ anantara paccayabhūtaṃ bhavaṅgacittaṃ manoti vuccati. Tadeva dvāraṃ āvajjanajavanādi thicitta pavattiyā mukhattā”ti vuttaṃ.

Yañca vibhāvaniyaṃ

“Āvajjanaṃ anantara paccayabhūtaṃ bhavaṅgacittaṃ manodvāraṃ, pīthiccittānaṃ pavattimukhabhāvato”ti vuttaṃ. Taṃ sabbampi na yujjatiyeva.

Yadihi yassa bhavaṅgassa anantaraṃ vīthiccittāni pavattanti. Tadeva ekantena tesamaṃ pavattimukhattā manodvāraṃnāma hoti. Na tato purimānīti ayamatto siyā. Evañcasati yesu cakkhādīsū rūpā dīnaṃ ghaṭṭitattā āvajjanādīni vīthiccittāni pavattanti. Tāneva ekantena tesamaṃ pavattimukhattā dvārānīnaṃ honti. Na tato aññānīti ayamatto āpajjati. Naca tāni cakkhādīni nāma atthi. Yāni cakkhādīni dvārārūpānīnaṃ na hontīti. Sabbametaṃ upari dvāra saṅgahe āvibhavissatīti. Hasanaṃ hasitaṃ. Mukhassa pahaṭṭhākārappavatti. Taṃ uppādeti janetīti **hasituppādo**. Taṃvā uppādeti khīṇāsavā etenāti hasibhuppādo. Taṃvā uppajjati etenāti hasituppādo. Soeva cittanti samāso. Khīṇāsavānaṃ anolārikesu ārammaṇesu yena cittena sitaṃ pātukaronti, tassetamaṃ nāmaṃ. Na hi khīṇāsavā lokiya mahā janāvīya rajjanīyādi bhāvena olārikesu hasaniya vatthūsu hasantīti. Ṭīkāsu pana cittaṃ apekkhitvā hasituppādanti niddiṭṭhaṃ siyāti. Vuttanayena ahētukānica tāni vipaccana vipākuppādana kiccarahitattā taṃ taṃ kriyāmatlabhūtāni cittānicāti ahētukakriyacittāni. Etthaca vīthimuttacittāni kiccadubbalattā pañcaviññānāni vatthudubbalattā sampaṭicchanaṇānīnaṃ kiccaṭṭhānadubbalattā attano ussāhena vinā kevalaṃ vipaccanamattena pavattantīti tāni sabbāni vipākānieva honti. Yānipana balavakiccattā attano ussāhena pavattanti. Āyatimca vipākuppādanatthaṃ ussāhasahitāni honti. Tāni kusalākusalānīnaṃ honti. Yāni pana cittāni vipaccanamattaṃ atikkamma attano ussāheneva pavattanti. Tesu āvajjanadvayaṃ vipākasantānato laddhapaccayattā thokaṃ dubbalabhāvato itarānica nirānusayasantāne pavattattā sabbaso vipākuppādanatthaṃ ussāharahitānieva

hontīti tāni sabbāni kriyānināma jātānīti datṭhabbam.

36. Idāni ādito paṭṭhāya vedanāvicāraṇā vuccati. Tathāhi cakkhaviññāṇādīnaṃ tāva vatthūnica ārammaṇānica upādārūpāneva honti, upādārūpānaṃ vicuṇḍakānaṃ viya aññaṃaññaṃ saṅghaṭṭanaṃ dubbalamevāti tāni iṭṭhe anīṭṭheca ārammaṇe upekkhā saḥagatāneva hontīti. Kāyaviññāṇassa pana ārammaṇāni mahābhūtāni hontīti yathā adhikaraṇimatthake thapitaṃ picuṇḍakaṃ ayokūṭena paharantānaṃ ayokūṭassa picuṇḍakaṃ atikkamma akhikaraṇighaṭṭanaṃ balavataraṃ hoti. Tathā tesam ārammabhūtānaṃ kāyavatthum atikkamma kāyanissaya bhūtesu saṅghaṭṭanaṃ balavataraṃ. Tasmā kāyaviññāṇaṃ iṭṭhe sukhasahagataṃ anīṭṭhe dukhasahagataṃ hotīti. Sampaṭicchanaṃ cittaṃ pana sabbadubbalānaṃ pañcaviññāṇānaṃ anantaraṃ uppajjati niccaṃ dubbalaṃ hutvā sabbattha upekkhāsahagatamevāti. **Vibhāvaniyaṃ** pana asamānanissaye hi tehi laddhapaccayatāvasena ayamattho vibhāvito, santīraṇaṃ pana sayampi balavavatthum nissāya pavattati. Tādīsenaca balavavatthunissayena purimacittena laddhapaccayaṃ hotīti thokaṃ balavaṃ hoti. Tasmā taṃ kusalavipākaṃ iṭṭhe upekkhāsahagataṃ abhiṭṭhe somanassasahagataṃ hoti. Akusalavipākaṃ pana anīṭṭhepi abhianiṭṭhepi upekkhāsahagatameva hoti. Kasmā itice. Yadihi taṃ atianiṭṭhārammaṇavasena vedanā bhedayuttaṃ siyā. Dukkhenavā domanassenavā yuttaṃ siyā. Tattha dukkhena tāva na yujjati, kasmā, ekanta kāyikattā dukkhassāti. Domanassenapi na yujjati. Kasmā, paṭighena paṭihaññattāeva domanassabhāvaṃ pattā domanassavedanā paṭighena vinā nappavattati. Ekantākusalabhūtena paṭighena niccayogino domanassassa abyākatesu asambhavatoti. Āvajjanadvayaṃ pana santīraṇatopi thokaṃ balavaṃ hoti. Vipākānaṃ hi pavattitum pi attano ussāhabalaṃ natthi. Balavantehi pana kammā dipaccayehi jātāni balavantānināma honti. Dubbalehi jātāni dubbalāni nāmāti. Evaṃ santepi taṃ āvajjanadvayaṃ kammānubhāvato ca mucchivā vipākasantānatoca paccayaṃ gahetvā utṭhitattā dubbalameva hotīti sadāpi upekkhāsahagatamevāti.

[38] Vibhāvaniyaṃ pana

Pañcadvārāvajjanaṃ pubbe kenaci aggahite ārammaṇe ekavā rameva pavattattā manodvārāvajjanaṃ visadisacittasantānāparāvattanavasena byāpārantarasāpekkhattā ārammaṇarasam adhimattato anubhavitum nasakkotīti sabbatthapi majjhatta vedanāyuttamevāti vuttaṃ. Tattha byāpārantarasāpekkhattāti idaṃ na yujjati.

Na hi cittānaṃ balavadubbalatāvisesoattanopacchā pavattassa cittassa vasena sakkā vattum. Attanopana paccayehiva so sakkā vattunti. Itarathā santīraṇassapi byāpārantarasāpekkhattā siyā. Taṃpi hi visadisacittasantānaṃ attanāparaṃ vatteti yevāti.

37. Imāni cittāni attano pakati paccayaḥ samāyoge sati nuppajjantīti natthi. Tasmā asaṅkhārikānevāti vadanti. Mūlaṭṭikāyaṃ pana vipākuddhāre –

Ahetukavipākānaṃ aparibyattakiccattā asaṅkhārika kamma viruddho asaṅkhārikabhāvopi natthi. Asaṅkhārikakammaviruddho asaṅkhārikabhāvopi natthi. Tasmā tesam ubhayakammenapi uppatti therena anuññatīti vuttaṃ.

Etena tiṇṇaṃ kriyacittānaṃpi tadubhayabhāvābhāvo vutto hoti. Tānīpihi aparibyattakiccāniyevāti. Athavā. Rūpadassa na saddassavanādīni sattā kadāci attano icchāya karonti. Kadāci parehi ussāhitā karontīti paccakkhatova siddhametaṃ. Tattha yadā attano icchāya karonti. Tadā pañcadvārāvajjanādīni sabbāni vīthiccittāni asaṅkhārikānināma honti. Yadā parehi ussāhitā karonti. Tadā asaṅkhārikānināma honti. Dvāra vimuttasupana dvāsu upekkhāsantīraṇesu aṭṭhamahāvīpākesuviya vattabbo. Iti sabbāni ahetukacittāni tena pariyāyena saṅkhārabhedena paccekaṃ bhinnānieva honti. Evaṃ santepi aparibyattakiccattāyeva tesam saṅkhārabhedo pāṭiyam navuttoti veditabbo.

38. Yasmā pana hetuyonāma mahantadhammā honti. Tasmā te dubbalakamma nibbattesu

dubbalavatthukiccaṭṭhānesuca imesu cittesu nuppajjanti. Tattha sabbaṃ pāpakammaṃ vikkhepayuttaṃ sayampi cañcalati dubbalaṃ hoti. Tasmā taṃ kappatṭhitikaṃpi samānaṃ kālantare hetuyuttaṃ vipākaṃ janetuṃ nasakkoti. Tihetukakammaṃpi samānaṃ dubbalesu cakkhādivatthūsuca dassanādīsu kiccaṭṭhānesuca hetuyuttaṃ vipākaṃ janetuṃ nasakkoti. Āvajjanahasanaṃ nica dubbalakiccānieva honti. Tasmā imāni sabbāni sampayuttaheturahitāni jātānīti daṭṭhabbaṃ.

39. Sabbathāpīti padassa attho heṭṭhā vuttanayeneva veditabbo.

[39] Vibhāvaniyaṃ pana

Sabbathāpīti akusalavipāka kusalavipāka kriyabhede nāti vuttaṃ. Taṃ na sundaraṃ.

Sohi bhedo iccevaṃ imināva gahitoti. Saṅgahagāthāyaṃ akusalavipākāni vatthukiccabhedenā satta, puññapākāni vatthukiccavedanābhedenā aṭṭhadhā, kriyacittāni kiccadvārabhedena tīṇīti ahetukacittāni aṭṭhārasa hontīti yojanā. Etthaca puññapākesu vedanābhedopi vattabbo. Itarathā santīraṇassa abhedo siyā. Tathā kriyāsu dvārabhedopi vattabbo. Aññathā āvajjanassa abhedo siyāti. Tīkāsūpana so na vuttoti.

Ahetukacittassa paramatthadīpanā.

40. Idāni heṭṭhā vuttānaṃ cittānaṃ asobhaṇānāmaṃ upari vuccamānānañca sobhaṇānāmaṃ thapento gāthamāha. Upari vuccamānānañhi sobhaṇatte vutte heṭṭhā vuttānaṃ asobhaṇatā avuttāpi siddhā hotīti. Tattha **pāpāhetukamuttānīti** pāpehi ahetukehica muttāni ekūnasatṭhicittāni. Athavā. Ekanavuticittānīpi sobhaṇānīti vuccare vuccantīti yojanā. Tattha pāpehīti akusalehi. Akusalānīhi attasamaṅgino satte anicchanteveva apāyaṃ pāpentī. Tasmā pāpānīti vuccantī. Etena puññānaṃpi sugatipāpanaṭṭhena pāpatā pasaṅgo nivattito hoti. Na hi icchantānaṃ pāpane pāpanabyāpāro pākato hotīti. Lāmaṅkaṭṭhena vā tāniyeva pāpānīti vuccantīti. Sobhaṇehi saddhādiguṇadhammehi yuttīyā tatoyeva ca sayampi sobhagapattiyā sobhaṇānīti.

41. Idāni tāni sobhaṇāni hīna paṇīta nukkamena dassento **somanassasahagatanti**ādīmāha. Tattha jānātīti nānaṃ, yāthāvato paṭivijjhatīti attho. Nānena sampayuttaṃ vippayuttanti samāso. Natthi saṅkhāro assāti asaṅkhāro. Saṃvijjati saṅkhāro assāti sasaṅkhāro. Sappurisupaniṣṭha yādiko kusaluppattiyā pakatipaccayaṅgaṇo. Sohi yadā duvidhena saṅkhārena vinā kevalaṃ attano balena kusalacittaṃ samuṭṭhāpeti. Tadā asaṅkhāronāma. Soyeva yadā attano balena kusalacittaṃ samuṭṭhāpetuṃ na sakkoti. Saṅkhārasahāyaṃ labhitvāva taṃ samuṭṭhāpeti. Tadā sasaṅkhāronāma. Asaṅkhārena uppannaṃ **asaṅkhārikam**. Sasaṅkhārena uppannaṃ **sasaṅkhārikanti** sabbaṃ heṭṭhā vuttameva. Etthaca somanassādīnaṃ uppattikāraṇaṃ heṭṭhā vuttameva. Apica saddhāsampatti dassanasampatti deyyadhamma paṭiggāhaka sampattīti evamādi somanassakāraṇaṃ, tabbiparītaṃ upekkhākāraṇaṃ. Yānīca pītisambojjhaṅgassa upekkhāsambojjhaṅgassaca kāraṇāni aṭṭhakathāsu vuttāni. Tānīpi imasmim̃ ṭhāne vattabbānīti. Paññā saṃvattanika kammupaniṣṭhatā, abyāpajjalokupapattitā indriyaparipākātā, kilesadūratāca nāṇuppattiyā kāraṇaṃ. Tihetukapaṭisandhikatā, amohajjhāsayatā, paññavantaṭṭhāpuggalasevanā. Sutacintāpasutātipivattuṃ yujjati. Yānicadhammavicayasambojjhaṅgassa kāraṇāni aṭṭhakathāsu vuttāni. Tānīpi idha vattabbāni. Tabbiparītaṃ nāṇavippayuttakāraṇaṃ. Saṅkhārakāraṇaṃpi pubbe vuttameva. Yānīca vīriyasambojjhaṅgassa passaddhisambojjhaṅgassaca kāraṇāni aṭṭhakathāsu vuttāni. Tānīpi idha vattabbānīti. Imesaṃpi uppatti vidhānaṃ visuddhimagge gahetabbanti.

42. **Aṭṭhapīti** ettha pisaddo sampiṇḍanatto. Tena imesaṃ idha vuttappakārato aññehi pakārehi anekavidhataṃ sampiṇḍeti. Tatrāyaṃ nayo. Imāni aṭṭhacittāni dasahi puññakriyāvattūhi guṇitāni asīti hontī. Puna tāni chahi ārammaṇehi guṇitāni cattārisatānīceva asīti ca hontī. Puna tāni tīhi kammehi guṇitāni sahasaṃ cattāri satāni cattālīsaṃca hontī. Puna tāni tīhi hīnamajjhimaṇītehi guṇitāni cattāri

sahassāni tīṇi satāni vīsatica hontī. Tāni imāni suddhikānīti katvā dvīsu ṭhānesu thapetabbāni. Tato ekaṃ ṭhānaṃ gahetvā dvidhā karontassa ṇāṇasampayuttāni dvesahassāni sataṃ saṭṭhica hontī. Tathā ṇāṇavippayuttānīti. Puna tatha ṇāṇasampayuttāni catūhi adhipatīhi guṇitāni aṭṭhasahassāni chasatāni cattālīsamca hontī. ṇāṇavippayuttānipana vīmaṃsāvajjitehi tīhi adhipatīhi guṇitāni chasahassāni cattārisatāni asītica hontī. Puna tadubhayāni sampiṇḍitāni dasasahassaṃ pañcasahassāni sataṃ vīsatica hontī. Puna tāni pubbe viṣuṃ thapitehi suddhikehi sampiṇḍitāni dasasahassaṃ navasahassāni cattāri satāni cattālīsāṇca hontīti. Yaṃpana ṭīkāyaṃ idha vuttanayena suddhikānica ṇāṇavippayuttāni ca viṣuṃ akatvā sabbāni puññakriyādīhi samaṃ guṇitāni sattarasa sahasāni dve satāni asītica hontīti vuttaṃ.

[40] Yañca vibhāvanīyaṃ

Suddhikāni viṣuṃ akatvā ṇāṇavippayuttānieva viṣuṃ katvā tathā guṇitāni vīsa satādhika pannarasa sahasāni hontīti vuttaṃ. Taṃ sabbam na yuttaṃ.

Evañhi sati imāni kāmāvacarakusalāni niccaṃ sādhipatikāni hutvā niyatādhipatikānināma bhaveyyuṃ. Naca imāni upari mahaggata kusalāni viya lokuttarāni viya ca niyatā dhipatikāni hontīti. Ṭīkānayanapana ṇāṇavippayuttānipi vīmaṃsāsahagatānīti āpajjātīti. Yathāvā kosallasambhūtaṭṭhena kusalātietha ṇāṇavippayuttānipi kosallena nānāvajjanavīthiyaṃ pavattena upanissayañāṇena sambhūtattā kusalāni eva nāma hontī. Evamidhapi tāni teneva vīmaṃsādhipatibhūtena sambhūtattā vīmaṃsādhipateyyānipi nāma hontīti na nasakkā vattunti iminā adhippāyena tāni viṣuṃ akatāni siyunti. Evaṃsantepi kāmakusalānināma adhipativimuttāni eva bahutarāni hontī. Tasmā nasakkā sabbāni kāmakusalāni vīmaṃsādhipatimūlikāni bhavitunti.

43. Kāmāvacarānica tāni kusalāni cittānicāti viggaho. Tattha kenaṭṭhena kusalānīti. Ārogyaṭṭhena, sundaraṭṭhena, chekaṭṭhena, anavajjaṭṭhena, sukhavipākaṭṭhenacāti. Rāgādayohi dhammā cittasantānassa rujjanaṭṭhena rogānāma. Ahitaṭṭhena asundarā nāma. Anipuṇaṭṭhena achekānāma. Gārayhaṭṭhena vajjānāma. Aniṭṭha vipākaṭṭhena dukkhavipākānāma hontī. Imānipana tehi vuṭṭhitattā kusalānināma arogāni nāmāti attho. Tappaṭipakkhattāca sundarāni chekāni anavajjāni sukhavipākāni ca nāma hontīti. Kucchite pāpadhamme salayanti cāleni kampenti viddhamsentīti **kusalāni**. Kucchitenavā ākārena sattasantāne senti anusentīti kusā. Rāgādayo. Te lunanti chindantīti kusalāni. Kusaṃvā vuccati ṇāṇaṃ kucchitānaṃ sānaṭṭhena tanukaraṇaṭṭhena antakaraṇaṭṭhena vā. Kusena lātabbānīti kusalāni. Kusāvīya hatthappadesaṃ saṃkilesapakkhaṃ lunantītivā kusalāni. Apica, kucchite pāpadhamme saranti hiṃsantīti kusalāni. Rakārassa lakāro. Kosallasambhūtaṭṭhena vā kusalānīti.

44. Mahāvīpākesu padatthato vattabbaṃ natthi. Vedanābhedo ārammaṇavasena vattabbo. Tānihi atītiṭṭhe iṭṭhamajjhatte ca ārammaṇe yathākkamaṃ somanassena upekkhāya ca yuttānīti. Sampayogabhedo kammavasena javanavasena vattabbo. Tānihi balavakammena janitāni ṇāṇasampayuttāni hontī. Dubbalakammena janitāni ṇāṇavippayuttāni. Kadācipana tadārammaṇavasena pavattikāle yebhuyyena tihetukajavanānubandhāni ṇāṇasampayuttāni hontī. Itarajavanānubandhāni ṇāṇavippayuttānīti. Saṅkhārabhedopi kehici ācariyehi kammavaseneva kathito. Asaṅkhārikakammajanitāni asaṅkhārikāni. Sasaṅkhārikakammajanitāni sasaṅkhārikānīti. Saṅgahakārenapana sannihitapaccayavasena vutto. Tānihi paṭisandhiyaṃ purimabhava maraṇāsannakāle ṇātakādīhi tena tena payogena upaṭṭhāpitāni kammādīni ārammaṇāni gahetvā pavattāni sasaṅkhārikānināma hontī. Tādisena payogena vinā sayameva kammabalena upaṭṭhīṭāni gahetvā pavattāni asaṅkhārikānināma hontī. Tadārammaṇa kālepana asaṅkhārikajavanānubandhāni asaṅkhārikānināma. Sasaṅkhārika javanānubandhāni sasaṅkhārikāni nāmāti. Etthapi sampiṇḍanatho viśaddo. Tena ārammaṇachakka hīnattikavaseneva kāladesa santānādivasena tesaṃ anekabhedattaṃ sampiṇḍeti. Yasmā panetāni dānādivasena kāyakammādivasena chandādīni dhuraṃ katvā ca na pavattanti. Tasmā tāni puññakriyāvattānaṃ kammādhipatīnaṇca vasena vaḍḍhanaṃ nalabhantīti.

[41] Vibhāvanīyaṃ pana

Imāni viññattisamuṭṭhāpanābhāvato kammadvāra vasena na pavattanti. Avipākasabhāvatoca kammavasena napavattantīti vuttaṃ. Taṃ vicāretabbaṃ.

Heṭṭhāhi kusalesu kammattikavaseneva vaḍḍhanaṃ vuttaṃ. Napana viṣuṃ kammadvāravasena. Kammattikañcaṇāma tividha kammadvāra vaseneva siddhanti. Nanu aṭṭhakathāyaṃ yohi kāmāvacarakusalesu kammadvāra kammapatha puññakriyāvattubhedo vutto. So idha natthi. Kasmā. Aviññattijanakato avipāka dhammato tathā appavattiyācāti vuttanti. Saccam. Tattha pana aviññattijanakato kammadvāra bhedo idha natthīti etena kāyakammaṃ vacīkammaṃ manokammanti evaṃ bhedassa abhāvaṃ vadati. Avipākadhammato kammapathabhedo idha natthīti etena dasavidhassa kammapathabhedassa abhāvaṃ vadati. Idhapana kusalesupi kammapathabhedaṃ aggahetvā tividhakammadvāra bhedabhinnaṃ kammattikameva gahitaṃ. Tañca viññatti samuṭṭhāpanā bhāvato tividhakammadvāravasena napavattantīti imināva siddhaṃ. Yadica heṭṭhā kusalesupi dasavidhakammapathabhedavasena viṣuṃ vaḍḍhanaṃ vuttaṃ siyā. Evaṃsati idhapi avipākasabhāvato kammapathavasena napavattantīti idam vattabbamevāti.

45. Mahākriyacittesupi mahāvīpākesuviya ārammaṇa vaseneva vedenābhedo upari sayameva vakkhati. Ñāṇasampayutta, vippayutta, asaṅkhārika, asaṅkhārikabhedopana yathārahaṃ kusalesu vuttanayena veditabbo.

[42] Vibhāvaniyaṃ pana

Tathā avicāretvā kriyacittānaṃpi kusale vuttanayena yathārahaṃ somanassa sahaḡatādītā veditabbāti vuttaṃ. Taṃ na yujjati.

Icevaṃ sabbathāpīti padānaṃ attho heṭṭhā vuttoyeva. **Sahetuka kāmāvacara kusala vipāka kriya cittānīti** ettha sahetu kaggahaṇaṃ kusala sadda sambandhe bhūtakathana visesanaṃ. Tenevahi taṃ kusalacittānaṃ cūlanigamena gahitaṃ. Vipāka kriya saddasambandhepana byavacchedakavisesanaṃ daṭṭhabbaṃ.

[43] Vibhāvaniyaṃ pana

Sakkharakathalikaṃpi macchagumbaṃpi tiṭṭhantaṃpi carantaṃpi passatīti suttapade viya idha yathālābha yojanāti vuttaṃ. Taṃ na sameti. Tatthahi sakkharakathalikaṃnāma nacaratīti yuttaṃ. Idhapana kusalaṃ sahetukaṃ nahotīti nayuttametanti.

46. Saṅgahagāthāyaṃ **vedanā ñāṇa saṅkhāra bhedenāti** vedanābhedena, ñāṇabhedena, saṅkhārabhedenaca. Tattha vedanā bhedenāti vedanābhedasiddhena cittabhedena, ñāṇabhedenāti ñāṇayogā yogasiddhenacittabhedena. Saṅkhārabhedenāti saṅkhārena vinā sahaca pavattapaccayagaṇabhedasiddhena cittabhedenāti attho. Idañhi samāsapadānaṃ sāmattiyaṃ, yadidaṃ suviññātānaṃ nānāppakārānaṃ padatthānaṃ appakena byañjanena dīpanasamatthatāti.

[44] Etena vibhāvaniyaṃ

Sayaṃ abhinnānaṃ ñāṇasaṅkhāraṇaṃ bhedavacane cittassa bhedakara bhāve ca codanāya anokāsata sādhitā hotīti.

Tatrāyaṃ yojanā. Sahetu kāmāvacara puññapākakriyā vedanāñāṇasaṅkhārabhedena yathākkamaṃ chaca dvādasaca catuvīsati ca matāti. Etthaca –

Vedanāñāṇasaṅkhāra, bhedenetāni aṭṭhadhā;
Puññapākakriyābheda, catuvīsatividhā makā tīpi.

Vattabbā. Evañhi sati atthagatica visadā hoti. Upari vakkha, mānāhica saṅghagāthāhi saddhim sameṭṭi.

47. Kāmetiādi sabbesaṃ kāmaccittānaṃ saṅghagāthā. Tattha kāme kāmabhūmiyaṃ pākāni sahetukāhetukavasena sabbāni vipākacittāni tevīsa. Puññāpuññāni kusalākusalacittānīca vīsati. Kriyāca sahetukāhetukavasena sabbāni kriyacittāni pana ekādasa honti. Icevaṃ sabbathāpi catuppaññāsa hontīti yojanā. Sabbathāti cetha visaddo lutta niddiṭṭho. Dhammasaṅgaṇiyaṃ vuttana sabbappakārenapi catuppaññāsaeva. Vibhaṅge vibhāttena sabbappakārenapi catuppaññāsa evātiadinā tassa attho heṭṭhā vuttoyevāti.

[45] Etena vibhāvaniyaṃ

Idha vuttānaṃ kusalādīnaṃ antogadhabhedavasena tassa atthavibhāvanā paṭisiddhā hoti.

[46] Yañca vibhāvaniyaṃ

Kāme bhaveti vuttaṃ. Taṃpi vicāretabbaṃ.

Bhavasaddo hi kusalākusalakammesu kammanibbattesuca vipāka kaṭattārūpesu vattamāno abhidhamme diṭṭho. Na tadaññesu nāmarūpadhammesūthi. Bhūmipariyāyoca idha kāmasaddo. Bhūmītica saḥokāso indriyā nindriyabaddhadhammasamūho vuccatīti kāme kāmabhūmiyanti ayamatto daṭṭhabbo. Bhavotivā bhūmieva vuccati suttantapariyāyena bhavanti ettha sattā saṅkhārācāti katvā. Esanayo paratthapīti.

Iti paramatthadīpaniyānāma abhidhammatthasaṅghassa

Catutthavaṇṇanāya kāmaccittassa

Paramatthadīpanā niṭṭhitā.

48. Evaṃ kāmaccittasaṅghaṃ dassetvā idāni yathānuppattaṃ rūpacittasaṅghaṃ dassento **vitakkavicārapītisukhekaggatāsahitantiādimāha.** Vitakkoca vicāroca pītica sukhañca ekaggatācāti dvando. Tāhi sahitanti samāso. Vitakkavicārapītisukhe kaggatā saṅkhātenasamuditenapathamajjhānena sampayuttaṃkusalacittaṃ **pathamajjhānakusalacittaṃ.** Tattha kenatṭhenapathamam, kenatṭhenaca jhānanti. Ādito paṭipajjitabbatā **pathamaṃ.** Kasiṇādikassa ārammaṇassa aniccādilakkhaṇassaca upanijjhāyanato paccanīkadhammānañca jhāpanato dayhanato **jhānaṃ.** Imesu dvīsu atthesu ekaggatāeva sāti sayayuttāti daṭṭhabbā. Sāhi ekattārammaṇasaṅkhāto eko aggakoṭikoṭṭhāsovā assāti atthena ekaggasaṅkhātassa cittassa tathāpavattane ādhipaccaguṇayogena **ekaggatāti** ca vuccati. Sāyeva cittaṃ nānārammaṇesu vikkhipituṃ adatvā ekasmiṃ yevārammaṇe paṭipakkhadhammānaṃ dūrībhāvena sammāca ādhiyati thapeti. Indriyānañca samabhāvaṃ katvā tattheva līnuddhaccābhāvāpādanena samañca ādhiyati thapetīti atthena samādhītica vuccati. Sāyeva pāliyaṃ avikkhepo avisāhāro saṅghiti avaṭṭhīti niddiṭṭhāti. Vitakkādayopi pana tassā sātisaṃ upakāraṇatā jhānanteva vuttā. Tathā hi vitakko tāva cittaṃ thinamiddhavasena osakkituṃ adatvā daḷhaṃ ārammaṇābhimukhameva karoti. Ārammaṇābhiniropana lakkhaṇohi vitakko. Thina middhanīvaraṇassaca ujuppaṭipakkhoti. Vicāroca naṃ vicikicchāvasena saṃsappituṃ adatvā daḷhaṃ ārammaṇānubandhameva karoti. Ārammaṇānumajjanalakkhaṇo hi vicāro paññāpakatiko. Vicikicchānīvaraṇassaca ujuppaṭipakkhoti. Pītica cittaṃ byāpādasena ukkaṅghituṃ adatvā ārammaṇe parituttameva karoti. Ārammaṇasaṃpi yāyanalakkhaṇā hi pīti. Byāpādanīvaraṇassaca ujuppaṭipakkhāti. Tathā sukhañca naṃ uddhacca kukkucavasena avūpasamituṃ adatvā ārammaṇe laddhasātaṃ upabrūhitaṃ karoti. Sākalakkhaṇāñhi sukhaṃ, uddhaccakukkucanīvaraṇassaca ujuppaṭipakkhanti.

Upekkhāca santasabhāvattā sukheeva saṅgahitāti. Evaṃ karontāca te dhammā tasmim̄ ārammaṇe tassa cittassa suṭṭhu ekaggabhāvattāyaca honti. Ekaggabhāvotica ekaggatāyeva. Sāca ekaggatā tehi dhammehi tathā anuggahitā suṭṭhu balavatī hutvā sayam̄ kāmaccchandavasena nānārammaṇesu cittavidhāvanam̄ nivāretvā kasiṇanimittādike tasmim̄ ārammaṇe niccalaṃ ṭhatvā tam̄ārammaṇam̄ upagantvā nijjhāyati oloketi. Tasmā te sabbepi dhammā upanijjhāyanaṭṭhenapi jhānanti vuttāti. Tesuca tathā pavattamānesu tappaccanikā nīvaraṇadharmā okāsam̄ alabhitvā manasmim̄pi pariyuṭṭhitum̄ nasakkonti. Jhāpitānāma honti. Tasmā te paccanikajjhāpanaṭṭhenapi jhānanti vuttāti. Evaṃ santepi yasmā jhāna magga sambodhisāṅkhātesu tīsu ṭhānesu dhammasāmaggī padhānam̄ hoti. Aṅgānam̄ samaggabhāveeva appanāpattivasena upanijjhāya nādi kiccasaṃsiddhito. Yasmāca ete dhammā vuttanayena visum̄visum̄ attano kiccaṃ karontāpi cittassa ārammaṇe niccalappavatti saṅkhātam̄ ekameva upanijjhānakiccaṃ sādheti. Tasmā rathāṅgānam̄ samudāyeeva rathavohāroviya tesam̄ samudāyeeva jhāna vohāro siddhoti veditabbo. Aparepana pañcannam̄pi tesam̄ ārammaṇābhiniropanādīni yathāsakaṃ kiccāniyeva visum̄ visum̄ upanijjhānakiccānināma hontīti paṭṭhāne jhānapaccayaṃ patvā sabbepete visum̄ visum̄ jhānapaccayaṃ sādhetiyeva. Tasmā te visum̄ visum̄pi jhānāniyeva hontīti sakkā vattum̄. Yathāca pañcaṅgikaṃ sīlam̄ dasaṅgikaṃ sīlanti ettha pañcasamuditādīni tesam̄ sīlānam̄ pañcaṅgikā dināmalābhasseva kāraṇāni honti. Na sīlabhāvassa. Na hi pañātipātā veramaṇādikaṃ ekam̄pi samānam̄ sīlam̄nāma na hotīti. Evamevaṃ idhapi pañcasamuditādīni pañcaṅgikādi bhāvasseva pathamajjhānādi bhāvassevacca kāraṇāni. Napana jhānabhāvassāti nasakkā viññātum̄. Itarathā jhānapaccaye jhānaṅgāni paccaniyāniyeva siyuntipi vadanti. Ettāvātā satipi imassa cittassa phassādīhipi sahitabhāve tesam̄ tathāvidhakiccavisesābhāvā idha aggahaṇantipi siddham̄ nahotīti. Vicārapītisukhekaggatā saṅkhātena dutīyajjhānena sampayuttam̄ kusalacittam̄ dutīyajjhāna kusalacittam̄, evaṃ sesesupi.

49. Ettha siyā. Kenapana imesaṃ jhānānam̄ aṅgabhedo katoti. Puggalajjhāsayena katoti. Yohi vitakkasahāyo hutvā pañcaṅgikaṃ pathamajjhānam̄ uppādetvā tattha vasībhāvam̄ katvā punavitakke nibbindati. Tassa vitakkaṃ samatikkamitvā avitakkaṃ caturaṅgikaṃ jhānam̄ adhigantum̄ ajjhāsayo saṅṭhāti. Tadā so tameva pathamajjhānam̄ pādakabhāvattāyā daḷham̄ samāpajjitvā vuṭṭhāya tena ajjhāsayena saheva punabhāvanam̄ anuyuñjanto avitakkaṃ caturaṅgikaṃ jhānam̄ adhigacchati. Tattha sā bhāvanāsayaṃ vitakkayuttāpi tena ajjhāsayena paribhāvitattā vitakkavirāga bhāvanānāma hoti. Tassā bhāvanāya. Balena tam̄ jhānam̄ uppajja mānam̄ avitakkaṃ caturaṅgikaṃ uppajjati. Sesajjhānādhigamesupi esevanayoti. Evaṃ puggalajjhāsayena tesam̄ jhānānam̄ aṅgabhedo katoti veditabbo. Etthaca uttaruttarajjhānā dhigamane pādakabhāvattāyā purimapurimajjhānassa samāpajjanaṃ avassaṃ icchitabbaṃ. Heṭṭhimam̄ heṭṭhimam̄ paṇḍajjhānam̄ uparimassa uparimassa padaṭṭhānam̄ hotīti aṭṭhakathāyaṃ vuttaṃ. Ajjhāsaya balenapana uttarajjhānam̄ uppajjamānam̄ pādakajjhānasadisam̄ nahoti. Pādakajjhānatohi puggalajjhāsayova balavataro. Tenāha bhagavā ijjhāti bhikkhave sīlavato cetopaṇidhi visuddhattāti. Ayañca attho upari lokuttaracittam̄ patvā āvi bhavissatīti.

50. Ettha siyā. Kasmā idha saṅkhārabhedo navuttoti. Pāḷiyameva avuttattā. Kasmāca so pāḷiyam̄ avuttoti. Paṭipadā bhedavacaneneva siddhattāti. Tathāhi sabbesaṃpi lokiya lokuttarajjhānānam̄ sukhappaṭipadabhāve siddhe asaṅkhārikabhāvo siddhoyeva hoti. Dukkappaṭipadabhāveca siddhe tesam̄ sasaṅkhārikabhāvo siddhoyeva hotīti. Kathaṃ viññāyatīti ce. Aṭṭhakathādassanato. Vuttañhetam̄ aṭṭhasāliniyam̄ -

Yo ādito kilese vikkhambhento dukkhena sasaṅkhārena sappayogena kilamanto vikkhambheti. Tassa dukkhā paṭipadā hoti. Yo kilese vikkhambhento sukhena akilamanto vikkhambheti. Tassa sukhāpaṭipadā hotīti.

Tathā sammohavinodanī visuddhimaggasupīti. Etthaca pubbavākye dukkhena sasaṅkhārena sappayogenāti diṭṭhattā paravākyepi sukhe na asaṅkhārena appayogenāti diṭṭhameva hoti. Tattha sasaṅkhārena sappayogenāti saṅkhārappayogasahitena kāmādīnavadassanādīnā paccayagaṇenāti attho. Etena sabbesaṃ dukkhappaṭipadajjhānānam̄ sasaṅkhārikabhāvo vutto hoti. Asaṅkhārena appayogenāti

saṅkhārappayogarahitena teneva paccayagaṇena. Etena sabbesaṃ sukhappaṭipadajjhānānaṃ asaṅkhārikabhāvo vutto hotīti. Khippābhiññajjhānānaṃpihi dukkhappaṭipadabhāve sati asaṅkhārikatāva viññāyati. Dandhabhiññajjhānānaṃpi sukhappaṭipadabhāve sati asaṅkhārikatāva viññāyatīti. Yadvivaṃ paṭipadārahitānaṃ magga siddhaupapattisiddhajjhānānaṃ kathaṃ saṅkhārabhedo siddhoti. Tesampi vaḷaṅjanakāle samāpattippaṭibandhakānaṃ paccayānaṃ sannihitā sannihitavasena dukkhasukhappaṭipadabhāvasambhavo hotiyevāti. Tattha maggasiddhajjhānaṃnāma suddhavipassanāyānikānaṃ maggappaṭilābhena saheva siddhajjhānaṃ. Taṃ duvidhaṃ heṭṭhimamaggasiddhaṃ, arahattamaggasiddhanti. Tattha mahāsamayasutte āgatānaṃ pañcasatānaṃ bhikkhūnaṃ jhānaṃ heṭṭhima maggasiddhaṃ. Ānandattherassa jhānaṃ arahattamaggasiddhaṃ. Yaṃpi anāgāmīnaṃ ajānantānaññeva satthena hanitvā sahasā marantānaṃ uppannaṃ. Taṃpi maggasiddhagatikaṃ. Yopana aṭṭhasamāpattiyō bhāvetvā aññatarasmiṃ rūpi brahmaloke nibbatti. Tassa tā samāpatti yo tattha pākātikāeva honti. Idaṃ upapattisiddhanti. Ekasmiṃ bhāvepi hi laddhajjhānāni vaḷaṅjanakāle sannihitapaccayavasena nānāpaṭipadāyuttāni hontīti. Jhānuppattippaṭipadā rahitattāvā asaṅkhārikajjhānesu tesam saṅgaho yutto siyāti. Apica, nettipāliyaṃ sabbesaṃ lokiya lokuttarasamādhīnaṃ saṅkhārabhedo sarūpatova niddiṭṭho. Yathāha-dve samādhayo asaṅkhāro samādhī asaṅkhāro samādhīti. Aṭṭhakathāyañca sukhappaṭipadā pubbakānaṃ dvinnānaṃ dandhābhiññakhippābhiññasamādhīnaṃ asaṅkhārabhāvo dukkhappaṭipadā pubbakānaṃ dvinnānaṃ asaṅkhārabhāvoca vuttoti. Ettāvātā sabbesaṃ mahaggatalokuttarajjhānacittānaṃ asaṅkhārika asaṅkhārikavasena viṣuṃ viṣuṃ duvidhabhāvo siddho hoti. Yasmāpana ayaṃ saṅkhāravohāro akusalānaṃpi sādharmaṇo. Paṭipadāvohāropana viṣesena paṭipattidhammesveva pākāṭo. Mahaggata lokuttaradhammāca ekantaṃ paṭipattidhammāeva. Tasmā tesam bhedaṃ saṅkhāravasena avatvā paṭipadāvaseneva dhammasaṅgaṇi pāliyaṃpi vuttoti daṭṭhabbo. Ayamettha paramatthadīpanā.

51. [47] Yaṃpana **vibhāvaniyaṃ**

“Sabbassapi jhānassa parikammasaṅkhātapubbābhisaṅkhārena vinā kevalaṃ adhikāravasena anuppajjanato asaṅkhārikantipi. Adhikārenaca vinā kevalaṃ parikammābhisaṅkāravaseneva anuppajjanato asaṅkhārikantipi nasakkā vattu”nti vuttaṃ. Tattha parikammasaṅkhāta.La. Asaṅkhārikantipi nasakkā vattunti idaṃ tāva nayujjati.

Na hi parikammasaṅkhāta pubbābhisaṅkhāro imasmiṃ saṅkhārabhede saṅkhāro evanāma hoti. Kasmā, jhānuppattiyā pakatipaccaya bhūtattā, tathāhi loke sāsaneva sabbampi kusalākusala kammaṃ attano anurūpena parikammasaṅkhāta pubbābhisaṅkhārena vinā uppannaṃnāma natthi. Antamaso ālopabhikkhādānamattaṃpīti. Yañca cittaṃ yena attano anurūpena parikammasaṅkhātapubbā bhisaṅkhārena vinā na uppajjati. So tassa cittassa pakatipaccayagaṇeevaanto gadho hoti. Jhānānica lokiya lokuttara bhūtāni sabbāni attano anurūpena parikammasaṅkhāta pubbabhāgabhāvanā bhisaṅkhārena vinā uppannānināma natthīti so tesam pakatipaccayagaṇesueva antogadho hotīti. Itarathā sabbampi kusalākusala kammaṃ asaṅkhārikaṃ nāmanatthīti āpajjati.

[48] Yañca **tattha**

Adhikārenaca vinā kevalaṃ.La. Sasaṅkhārikantipi nasakkā vattunti vuttaṃ. Taṃpi na yujjatiyeva.

Na hi lokiyajjhānānināma adhikārena vinā nuppajjantīti atthi. Kevalaṃpana pubbe samathakammesu katādhikārassa sukhappaṭipadajjhānaṃ uppajjati. Akatādhikārassapana dukkhappaṭipadajjhānanti evameva aṭṭhakathāsu āgataṃ. Vuttañhi tattha yoca samathe akatādhikāro. Tassa dukkhā paṭipadā hoti. Katādhikārassasukhāti. Apica, purimabhāve siddhaṃ adhikāraṃ gahetvā idha saṅkhārabhedavicāraṇāpi nayuttāeva. Kusalakriyajjhānesu hi sanni hitapaccayavaseneva tabbicāraṇā yuttāti.

[49] Ettāvatā

Athavātiādiko pacchima vikappopi paṭikkhitto eva hotīti.

52. Ettha jhānaṃ anuyuñjantassa nimittuppādato pubbaṃ paṭipadāya khettaṃ, pacchā abhiññāya khettaṃ. Tattha pubbe viruddhapaccayānaṃ sannihitena kilamantassa sato paṭipajjantassa bhāvanā paṭipadā dukkhānāma hoti. Akilamantassa sukhā. Pacchāca dandhaṃ appanaṃ pattassa bhāvanābhiññā dandhābhiññānāma hoti. Khippaṃ pattassa khippābhiññānāma. Tattha pubbe dukkhā paṭipadā pacchā dandhaṃvā khippaṃvā uppannaṃ jhānaṃ dukkhappaṭipadaṃnāma karoti. Sukhāpana sukhappaṭipadaṃnāma karotīti. Dutīyajjhānādīsupana purimajjhāne nikanti vikkhambhanassa dukkhasukhatāvasena paṭipadābhedo veditabbo. Yopana etarahi gahaṭṭhovā pabbajitovā pubbabhave akatādīkāropi antarāyikadhammamutto kalyāṇapaṭipattiyāṃ tīto chinnapalibodho pahitatto jhānaṃ bhāveti. Tassa jhānabhāvanā nasampajjatīti natthīti niṭṭhamettha gantabbanti. [Kusalajjhānaṃ]

53. Vipākajjhāne kāmakusalaṃ appanaṃ apattaṃ mudubhūtaṃ dubbalaṃ hoti. Parittesu nānākiccaṭṭhānesuca hīnesupi attabhāvesuca vipaccati. Tasmā taṃ attanā asadisampi vipākaṃ janeti. Mahaggatakusalaṃpana appanāpattaṃ tikkhaṃ balavaṃ hoti. Uḷāre brahmattabhāve bhavaṅgaṭṭhānesuyeva vipaccati. Tasmā taṃ sadāpi attanā sadisameva vipākaṃ janeti. Teneva vitakkavicārapīti sukhekaggatā sahitantiādinā vipākampi sabbaso kusala sadisameva dasseti.

[50] Anantarabhaveyeva phaladānattā taṃ attanā sadisameva vipākaṃ janetītica vadanti, taṃ na sundaraṃ.

Evañhi sati kāmakusalaṃpi sattamajavanaṃ attanā sadisavipāka meva janeyyāti. Yasmāca kusalameva niranusayasantāne pavattaṃ kriyajjhānaṃ nāma hoti. Tasmā kriyacittaṃpi kusala sadisameva dasseti.

54. Pañcadhātiādisaṅgahagāthā. Tattha **jhānabhedenā**ti pathamajjhānādīhi pañcahi jhānehi sampayogabhedenā. Rūpāvacaramānasāṃ jhānabhedenā pañcadhā hoti. Pathamajjhānikaṃ, dutīyajjhānikaṃ, tatīyajjhānikaṃ, catutthajjhānikaṃ, pañcamajjhānikanti evaṃ pañcavidhaṃ hotīti attho. Tameva puññapākakriyābhedenā pañcadasadhā bhaveti yojanā.

[51] Vibhāvaniyaṃ pana

Jhānabhedenāti jhānaṅgehi sampayogabhedenāti vuttaṃ. Taṃ na sundaraṃ.

Añño hi jhānabhedo. Añño jhānaṅgabhedo. Tattha pathamaṃ jhānaṃ dutīyaṃ jhānantiādi jhānabhedo. Pathamajjhāne pañca āṅgāni. Dutīyajjhāne cattārītiādi jhānaṅgabhedo. Tesu idha jhānabhedova adhippeto. Na jhānaṅgabhedo. Cittañhi jhānabhede neva pañcavidhaṃ hoti. Najhānaṅgabhedena. Jhānameva pana jhānaṅgabhedena pañcavidhanti.

[52] Yañca tattha

“Pañcadhāti pañcaṅgikaṃ caturaṅgikaṃ tivaṅgikaṃ duvaṅgikaṃ puna duvaṅgikanti pañcavidhaṃ hotī”ti vuttaṃ. Taṃpi na sundaraṃ.

Jhānameva hi pañcaṅgikādi hoti. Na cittanti.

Rūpāvacara cittassa paramatthadhīpanā.

55. Idāni yathānuppattam arūpacittam niddisanto ākāsānañcā yatanakusalacittantiādi māha. Tattha bhuso kāsati dibbatīti **ākāso**. So hi sayam sarūpato anupalabbhamānopi candasūriyobhāsādīnam vasena ativijjotamānoviya khāyatīti. Nakassati chedana bhedana vasena na vilekhīyatīti akāso. Akāsoeva ākāso tīpi vadanti. So pana ajaṭākāso paricchinākāso kaṣiṇuggghāṭimākāso rūpakalāpāparicchedākāsoṭi catubbidho hoti. Tattha idha kaṣiṇuggghāṭimākāso adhippeto. So hi anantena ajaṭākāsena saha ekībhūtoviya hoti. Yogināca anantabhāvena pharīyati. Tasmā ananto ākāsoti ākāsānanto. Nāssa uppādantovā vayantovā paññāyatīti anantotīpi vuttam. Soyeva ākāsānañcam. Sakatthe yakārena saha siddhattā. Yathā pana devānam adhiṭṭhānavatthu devāyatananti vuccati. Tathā idhapi tasmim appanāpattassa sasampayuttassa jhānassa adhiṭṭhānaṭṭhena tadeva āyatanantīpi vuccati. Iti ākāsānañcam āyatanamassāti ākāsānañcāyatanam. Cittacetāsikarāsi.

Ākāsānañcā yatananti ākāsānañcā yatanam samāpannassavā upapannassavā diṭṭhadhammasukhavihārissavā citta ceta sikādharmāti hi vibhaṅge vuttam.

Ākāsānañcāyatanane pavattam kusulacittanti **ākāsānañcāyatanakusalacittam**. Viññānañcāyatananti ettha viññānañcāyatanacittameva. Tampana sayam uppādādi antavantaṃpi anantasaññite ākāse pavattanato anantanti vuccati. Koṭṭhāsathovā antasaddo. Attano uppādādisu koṭṭhāsesu ekadese aṭṭhatvā sakalassa pharaṇavasena tadārammaṇāya bhāvanāya pavattanato anantanti vuccati. Anantasaññitevā ākāse pavattanato anantanti evam tadārammaṇāya bhāvanāya pavattattā anantanti vuccati. Anantasaññitevā ākāse attano pharaṇākāra vasenapi anantanti vuttam yujjatiyeva. Anantam viññānanti viññānañcāyatanam. Tameva viññānañcāyatanam niruttinayena, viññānañcāyatanam assāti **viññānañcāyatanam**. Viññānañcāyatanana saṅkhāte cittacetāsikarāsimhi pavattam kusulacittantisamāso.

Viññānañcāyatananti viññānañcāyatanam samāpannassavā upapannassavādiṭṭhadhammasukhavihārissavācittacetāsikādharmātihi vibhaṅge vuttam.

[53] Vibhāvanīyam pana mahāṭīkāyañca

“Dutīyā rупpa viññānañcāyatananti viññānañcāyatanam samāpannassavā upapannassavādiṭṭhadhammasukhavihārissavācittacetāsikādharmātihi vibhaṅge vuttam. Tam pāliya na sameti.

Anantam viññānanti tadeva viññānañcāyatanam phutṭham manasikaroti, anantam pharati. Tena vuccati anantam viññānantītihi vuttam. Etena ca tamviññānañcāyatanam ekantena anantavisesanayuttam hotīti viññāyatīti. Tameva ākāsantīpi pāṭho. Ākiñcaññāyatananti ettha kiñci kiñcananti atthato ekam appamattakassa nāmam. Natthi kiñcanam appamattakam antamaso bhaṅgamattampi avasiṭṭham assa pathamā ruppaviññānañcāyatananti akiñcanam. Akiñcanassa bhāvo **ākiñcaññam**. Pathamāruppaviññānañcāyatananti viññānañcāyatanam. So hi natthi kiñcīti manasikāra vasena tamnāmam labhatīti. Ākiñcaññam āyatanamassātiādi vuttanayameva. **Nevasaññā nāsaññāyatananti** ettha oḷārika saññam sandhāya nevatthi saññā assāti nevasaññam. Sukhumasaññam sandhāya naca natthi saññā assāti nāsaññam, nevasaññānañcāyatanam nāsaññācīti nevasaññā nāsaññam majjhe dīgham katvā, citta cetāsikarāsiyeva. Tameva yogino sukhavisesānam adhiṭṭhānaṭṭhena āyatananti nevasaññā nāsaññāyatanam. Tasmim pavattam kusala cittanti samāso. Athavā. Saññāyeva paṭusaññācikkassa abhāvato nevasaññāca hoti. Saṅkhārāvasesa sukhumabhāvena vijjamānattā asaññāca nahotīti katvā nevasaññānā saññānāma, sāyeva āyatanam, tenaca sampayuttam kusala cittanti samāso. Etthaca yasmā ādito paṭṭhāya oḷārike nīvaraṇadhamme vitakkādikeca pajahitvā sesadhamme bhāvanā balena uparuparī sukhumabhāvam pāpetvā anukkamena paṭipajantā sukhumaṭṭhena lokiyadhammesu muddhabhūtam imam samāpattim pāpuṇanti. Tasmā idha cittampi nevacittanācittameva hoti. Phassopi neva phassanāphassoeva hoti, tathā vedanādayopīti. Tasmā idhasaññāggahaṇam desanāsīsamattanti daṭṭhabbam. Vipākesu viññānañcāyatananti ettha viññānanti pathamāruppakusala viññānameva. Tañca atītānantarabhāve pavattam daṭṭhabbam. Akiñcana bhāvoca tasseva natthi bhāvoti. Kriyacittesu pana viññānañcāyatanam nāma kusulabhūtam kriyabhūtañca duvidham pathamāruppaviññānañcāyatanam veditabbam. Akiñcanabhāvoca tasseva duvidhassa viññānañcāyatanam abhāvo yevāti.

56. Saṅgahagāthāyaṃ ārammaṇappabhedenāti ālambi tabbānaṃ kasiṇuggahāṭimākāsādīnaṃ catunnaṃ ārammaṇānaṃ pabhedena. Duvidhaṃhi idha ārammaṇacatukkaṃ, atimikkatabba catukkaṃ, ālambi tabba catukkaṃca. Tattha pathamāruppe rūpapañcamajjhānassa ārammaṇa bhūtaṃ. Kasiṇanimittaṃ atikkami tabbaṃnāma. Taṃ ugghāṭetvā laddhaṃ ākāsaṃ ālambitabbaṃ nāma. Dutiyāruppe pathamāruppassa ārammaṇabhūtaṃ ākāsaṃ atikkamitabbaṃnāma. Pathamāruppaviññānaṃ ālambi tabbaṃnāma. Tatīyāruppe taṃpathamāruppaviññānaṃ atikkamitabbaṃnāma. Tassa natthibhāvo ālambitabbaṃnāma. Catutthāruppe so natthi bhāvo atikkamitabbaṃ nāma. Tatīyāruppaviññānaṃ ālambi tabbaṃ nāmāti. Tattha kiñcāpi imaṃ āruppamānasaṃ catunnaṃ atikkami tabbānaṃpi bhedena catubbidhaṃ hoti, tathāpi ākāsaṇācāya tanantiādinā idha ālambitabbānaññeva sarūpato gahitattā tesāṃ bhedena imassa bhedo pākaṭoti daṭṭhabbaṃ. Āruppamānasaṃ ālambaṇappabhedena catudhā ṭhitā. Tadeva puññapāka kriyabhedena dvādasadhā ṭhitanti yojanā.

Arūpacittassa paramatthadīpanā.

57. Idāni yathānuppattaṃ lokuttara cittaṃ dassento **sotāpattimaggacittantiādimāha.** Tattha savati sandati anivattagamanavasena pavattatīti soto, gaṅgādīsu jalappavāho. Sohi pabhavato paṭṭhāya yāvamaḥāsamuddā antarā anivatta māno savati sandati pavattatīti. Sotoviyāti soto. Aṭṭhaṅgiko ariyamaggo, yathāha-yokho āvuso ariyo aṭṭhaṅgiko maggo. Seyyathidaṃ, sammādiṭṭhi. La. Sammāsamādhi. Ayaṃ vuccatāvuso sototi. Ayaṃpihi yadā uppajjati. Tato paṭṭhāya ānubhāvapharaṇavasena yāvaanupādisesanibbānadhātuyā antarā anivattamānoyeva hutvā savati sandati pavattatīti. Yathāha -

Seyyathāpi bhikkhave yākāci mahānadiyo. Seyyathidaṃ. Gaṅgā, yamunā, aciravatī, sarabhū, mahī. Sabbā tā samuddaninnā honti samuddapoṇā samuddapabbhārā. Evameva kho bhikkhave bhikkhu ariyaṃ aṭṭhaṅgikaṃ maggaṃ bhāvento bahulikaronto nibbānaninno hoti nibbānapoṇo nibbāna pabbhāroti.

Etthaca tena tena maggena pahīnānaṃ kilesānaṃ puna anupagamana vasena saddhādīnaṃ indriyānaṃ anukkamena paripākagamanavasenaca anivattagamaṇaṃ daṭṭhabbaṃ. Yathāha -

Seyyathāpi bhikkhave ghaṭo nikkujjo vamateva udakaṃ. Nopaccāvatī. Evamevakho bhikkhave ariyaṃ aṭṭhaṅgikaṃ maggaṃ bhāvento bahulikaronto vamateva pāpake akusale dhamme. Nopaccāvatīti. Yathācāha-sotāpatti maggaññāṇena ye kilesā pahīnā, te kilese napuneti napaceti napaccāgacchatītiādi.

Yathāca puthujjanā pahīnepi kilese puna upagacchanti. Tihe tukabhūtāpi puna dvihetukāhetukabhāvaṃ gacchanti. Yato te uparibhavagge nibbattāpi puna apāyesu sandissanti. Sīlavantāpi puna dussīlā honti. Samāhitāpi puna ummattakāvā khittacittāvā honti. Paññāvāpi puna duppaññā eḷamūgā honti. Natathā ariyā. Tepana tena tena maggena pahīne kilese puna naupagacchanti. Puthujjanabhāvaṃvā heṭṭhimāriya bhāvaṃvā na gacchanti. Anukkamena saddhādīnaṃ indriyānaṃ paripakkabhāvameva upagacchantīti. Sabbañcetaṃ ariyamaggasseva ānubhāvena siddhanti sototināmaṃ mūlappabhavabhūte tasmīṃ maggeva nirulhanti daṭṭhabbaṃ. Tassa sotassa ādito pajjanaṃ pāpuṇaṃ sotāpatti. Sotāpattiyā adhiḡamamāno maggo sotāpattimaggo. Athavā, dhammasota samāpanno ariyoti pavuccatīti vuttattā sabbe ariyasantānagatā lokiya lokuttarabhūtā bodhipakkhiyadhammā upari sambodhiparā yanatāvasena anupādisesanibbāna parāyanatāvasenaca anivatta gatiyā pavattamānā yathāvuttana atthena sototi vuccanti. Taṃ sotaṃ ādito pajjanti pāpuṇanti etāya paṭipadāyāti sotāpatti. Sotāpattica sā maggocāti sotāpattimaggo, pathamamaggasaṅkhātāya sotāpattiyā āṅganti sotāpatti yaṅgantihi aṭṭhakathāyaṃ vuttaṃ, maggotica patho upāyo. Nibbānaṃ maggeti, nibbānatthikehi maggīyati, kilese mārento gacchatīti maggotica vadanti.

[54] Vibhāvaniyaṃ pana

Ariyamaggasotassa ādito pajjanam etassāti sotāpatti. Puggaloti vuttam. Tam na sundaram.

Na hi puggale pavatto sotāpattisaddo katthaci diṭṭhoti.

[55] Etena tassa maggo sotāpattimaggoti idampi paṭikkhittam hoti.

Sotāpattimaggena sampayuttam cittam sotāpattimagacittam.

[56] **Ṭikāsu** pana

Sotāpattiyā laddham maggacittam sotāpatti maggacittanti vuttam. Tam na sundaram.

Na hi cittasaddasambandho sotāpattisaddo katthaci pāḷiyam diṭṭhoti.

58. Paṭisandhivasena sakim imamlokam āgacchati sīlenāti **sakadāgāmī**. Dutīyaphalaṭṭho. So hi asamucchinnakāma rāgānusatā kāmālokāgamana kilesasabbhāvena tam sabhāvanāti vattanato upari bhavagge ṭhitopi paṭisandhivasena puna imam kāmādhātum āgamanappakatikoeva hotīti. Vuttañhetam catukkanipāte -

Idha sārīputta ekaccassa puggalassa orambhāgiyāni saṃyojanāni appahīnāni honti, so diṭṭhevadhamme nevasaññānāsaññāyatanaṃ upasampajja viharati. So aparihīno kālam kurumāno nesaññānāsaññā yatanupagānam devānam saḥabyatam upapajjati. So tato cuto āgāmī hoti āgantvā itthattam. Idha pana sārīputta ekaccassa puggalassa orambhāgiyāni saṃyojanāni pahīnāni honti, so diṭṭheva.La. So tato cuto anāgāmī hoti anāgantvā itthattanti.

Aṭṭhakathāyañca itthattanti imam kāmāvacara pañcakkhandha bhāvanti vuttam. Ayañca attho kilesagativasena vutto. Na puggala gativasena. Na hi brahmabhūtā sotāpanna sakadā gāmīno paṭipāṭisandhivasena heṭṭhimampi brahmalokam āgacchanti. Kuto kāma lokam. Katham viññāyatīti ce. Anusayayamake –

Kāmādhātuyā cutassa rūpadhātum arūpadhātum upapajjantassa kassaci sattaanusayā anusenti, kassaci pañcaanusayā anusenti, kassaci tayo anusayā anusenti vatvā rūpa dhātuyā arūpadhātuyā cutassa kāmādhātum upapajjantassa satteva anusayā anusenti.

Vuttattā viññāyati. Tattha purimavākye puthujjanassa vasena satta. Dvinnaṃ sotāpannasakadāgāmīnam vasena pañca. Anāgāmīssa vasena kayoti vuttam, pacchimavākyepana brahmabhūtānam sotā panasakadāgāmīnam paṭisandhivasena kāmālokam gamanassa natthitāya kevalam puthujjanasseva vasena sattevāti vuttam. Dhammahadaya vibhaṅgaṭṭhakathāyañca –

“Rūpāvacare nibbattā sotāpannasakadāgāmīno napuna idhā gacchanti, tattheva parinibbāyanti. Etehi jhānaanāgāmīno nāmā”ti ca. “Navasu brahmalokesu nibbattaariya sāvakanam tatrūpa pattipi hoti uparūpapattipi. Naheṭṭhu papatti. Puthujjanānampana tatrūpapattipi hoti uparūpapatti heṭṭhupapattipi”ti ca.

Vuttam. Tañcakhō anāgamanam maggasahāyena jhānānubhāveneva siddham. Namaggānubhāvenāti. Etthaca imam lokanti padassa imam manussalokanti vā imam kāmāvacaralokantivā dvidhāpi attho aṭṭhakathāsu vutto. Tattha purimasmim atthe sati āgacchatīti etassa devalokato āgacchatīti attho. Pacchimasim pana brahmalokatopi ca āgacchatīti. Pāḷiyampana pacchimatthova vuttoviya dissati. Vuttañhetam puggalapaññattiyam anāgantvā itthattam anāgāmī tena daṭṭhabbo. Āgantvā itthattam sotāpannasakadā gāmīno tena daṭṭhabbāti. Etthaca anāgantvā itthattanti iminā imam kāmāvacaralokam na āgacchatīti anāgāmīti attham dasseti. Āgantvā itthattanti imināpana

dvepi sotāpannasakadāgāmino sakim puna imam kāmāvacaralokaṃ āgacchantīti sakadāgāminoti atthaṃ dasseti. Kasmā, nirantaravākyesu t̥hitānaṃ dvinnamitthatta saddānaṃ nānāthā sambhavato. Majjhimapaññāseca kaṇṇakattha sutte -

Yo so mahārāja brahmā sabyāpajjho, so brahmā āgantā itthattaṃ. Yoso brahmā abyāpajjho, so brahmā anāgantā itthattanti.

Bhagavatā vuttaṃ. Tattha sabyāpajjhoti etena puthujjanena saha sotāpannasakadāgāmibhūtā brahmāno gahitā honti. Tehi paṭighānusayassa appahīnattā cetasikadukkhasaṅkhātā byāpajjhampi apahīnamevāti sabyāpajjhānāma. Āgantā itthattanti imam kāmālokaṃ paṭisandhivasena puna āgamanasīlo āgamanappakatikoti attho. Tabbiparītena pacchimassa vākyassa attho veditabbo. Tesupana dvīsu sakadāgāmīsu purimassa anaññasā dhāraṇeneva sabbapathamam ariya magga sotādhī gamana guṇena sotāpanno tveva nāmaṃ siddhanti daṭṭhabbaṃ. Puggalagativasena panettha brahmaloke t̥hitānaṃ sattakkhattuparamatādibhāvoviya sakadāgāmibhāvopi natthi. Pathamadutiyaphalaṭṭhāpihi tattha anāgāmisaṅkhyameva gacchanti. Tasmā sakadāgāmīti idaṃ kāmājātikā nameva dutiyaphalaṭṭhānaṃ siddham nāmanti katvā tesam kāmāloke eva heṭṭhuparupapatti vasena sakim āgamaṇam aṭṭhakathāsu vuttanti daṭṭhabbaṃ. Evañca katvā pāḷiyampi pañcannaṃ idha niṭṭhā sattakkhattuparamassa kolaṃkolassa ekabījissa sakadāgāmīssa yoca diṭṭheva dhamme arahāti vuttanti. Sopana chabbidho hoti. Idhapatvā idhāparinibbāyī, tattha patvā tattha parinibbāyī, idhapatvā tattha parinibbāyī, tattha patvā idha parinibbāyī, idhapatvā tatthanibbattitvā idha parinibbāyī. Tatthapatvā idhanibbattitvā tatthāparinibbāyīti. Tattha idha patvā idha parinibbāyīti idha manussabhāve sakadāgāmimaggam patvā idhamanussa bhāveveva arahattamaggam labhitvā parinibbāyanadhammo. Tattha patvā tattha parinibbāyīti tasmimdevaloke sakadāgāmimaggam patvā tasmim devalokeveva arahattamaggam labhitvā parinibbāyanadhammo. Nibbattitvāti paṭisandhiggahaṇavasena uppajjitvā. Yesam pana imam lokanti padassa imam manussalokanti attho. Tesam so pañcavidhoyeva vutto, na chaṭṭho puggalo.

Vibhāvaniyaṅca

“Pañcasu sakadāgāmīsu pañcamakova idhādhippeto, so hi ito gantvā puna sakim idha āgacchatī”ti vuttaṃ.

Mahāparinibbāna suttaṭṭhakathāyaṃ pana mahāvagga saṃyuttaṭṭhakathā yaṅca sopi chaṭṭho puggalo sakim āgamaṇaṭṭhena āgatoyeva. Yasmāca sabbaññubuddhāpi yāva uparimaggo nāgacchati. Tāva pathamaphalaṭṭhabhūtā sattakkhattu paramatāyaṃviya dutiyaphalaṭṭhabhūtā sakim āgamaṇappakatiyaṃ saṅghitāyeva honti. Tasmā idha koci dutiyaphalaṭṭho sakim āgamaṇaṭṭhena nippariyāyena sakadā gāmīnāma na nahotīti sabbopi so chabbidho puggalo idha nippariyāyena sakadāgāmīyevanāma hotīti daṭṭhabbo. Sakadā gāmiṃsa maggo sakadāgāmimaggo. So hi sayam janakabhūto sakadāgāmīnaṃ janetabbaṃ janetīti idha janetabba janakasambandhena visesana visesitabbatā nāyāgatā eva hoti. Yathā tissamātā phussamātāti.

[57] Vibhāvaniyaṃ pana

Sāñyāgatāeva nahoti. Payojanaṃ pana kiñci atthi. Payojanavasena aviruddhā hotīti iminā adhippāyenayaṃ vuttaṃ “kiñcāpi maggasamaṅgino tathāgamaṇāsambhavato phalaṭṭhoyeva sakadāgāmīnāma. Tassapana kāraṇabhūto purimuppanno maggo maggantarāvachedanattaṃ phalaṭṭhena visesetvā vuccati sakadāgāmimaggoti. Evaṃ anāgāmimaggo”ti. Taṃ na yujjati.

Sakadāgāmimaggena sampayuttaṃ cittanti samāso.

59. Orabbhāgiyasamyojanānaṃ sabbaso samucchinnattā paṭisandhivasena puna imam kāmālokaṃ na āgacchatīti **anāgāmī**. Ekantena brahmalokaparāyanoeva hotīti attho. Idañca kevalam imassa

maggassa ānubhāvavaseneva vuttaṃ. Uparimagga vipassanāya pana āgatāya so tasmim̐ ṭhāneyeva arahatta maggaparāyanopi hotiyeva. Anāgāmissa tatīyaphalaṭṭhassamaggo. Tena sampayuttaṃ cittanti viggaho.

60. Mahapphalakāritāguṇayogena pūjāvisesaṃ arahatīti **arahā**. Khīṇāsavo catutthaphalaṭṭho. Arahato bhāvo arahattaṃ, catutthaphalaṃ. Tassa maggo. Tena sampayuttacittanti nibbacanaṃ. Pisaddena pāḷiyaṃ vibhatte maggacittappabhede sampiṇḍeti. Tattha dhammasaṅgaṇiyaṃ tāva pathamamagge jhānanāmena vuttesu pañcasu vāresu pathame suddhikapaṭipadāvaredvinnaṃ catukkapañcakanayānaṃ vasena navacittāni honti. Tathā suddhikasūññatāya suññatappaṭipadāya suddhikappaṇihite appaṇihitappaṭipadāyacāti pañcasu vāresu dasannaṃ nayānaṃ vasena pañcacattālīsacittāni honti. Tathā maggasatipaṭṭhānādīhi ekūnavīsatiyā nāmehi vuttesu paccekaṃ pañcasu vāresūti vīsatiyā nāmehi vutte vārasate dvinnaṃ nayasatānaṃ vasena navacittasatāni honti. Puna catūhi adhipatīhi yojetvā vuttesu catūsu vārasatesu aṭṭhannaṃ nayasatānaṃ vasena tīṇi sahasāni chasatānica hontīti. Evaṃ pathamamagge naya sahasavasena cattāricittasahasāni pañcacitta satānica honti. Tathā sesamaggesupīti evaṃ catūsu maggesu catunnaṃ naya sahasānaṃ vasena aṭṭhārasa magga citta sahasāni honti. Saccasatipaṭṭhāna vibhaṅgesu pana vīsatinaya sahasānaṃ vasena navutimaggacittasahasāni. Maggavibhaṅge aṭṭhavīsatiyā naya sahasānaṃ vasena satasahasamaṃ chabbīsatisahasāni ca maggacittāni hontīti. Aṭṭhakathāsūpana nayabhedāeva vuttā. Nacitta bhedāti.

[58] Yaṃpana **vibhāvaniyaṃ**

Pisaddena saccavibhaṅge āgataṃ saṭṭhisahasabhedaṃ nayaṃ saṅgaṇhātīti vuttaṃ. Taṃ imasmim̐ kusalanigame na vattabbaṃ.

Sohi saṭṭhisahasabhedo nayo vipākaṭṭhāneeva aṭṭhakathāyaṃ āgatoti.

[59] Yañca **tattha**

Paṭipadābhedaṃ anāmasitvā kevalaṃ suññato appaṇihīti totī dvidhā vibhattoti vuttaṃ. Taṃ nayujjati.

Pāḷiyañhi paṭipadābhedo ādimhiyeva āgatoti. Naca ādimhi suññato appaṇihitoti dvidhā vibhatto nirantaravāro atthīti.

[60] Yañca **tattha**

Suññato eko nayo, appaṇihito eko, paṭipadā visiṭṭhā suññatā cattāro, appaṇihitā cattāroti katvā dasanayā hontīti adhippāyena evaṃ jhāna nāmena dasadhā vibhattoti vuttaṃ. Taṃpi na yujjatiyeva.

Na hi suññatādayo idha nayānāma honti. Tesu pana eke kasmim̐ dve dve catukkapañcakanayāeva idha nayānāmāti. Etena tathā maggasatipaṭṭhāniccādikaṃpi sabbaṃ paṭikkhattaṃ hotīti. [Maggacittaṃ]

61. Phalacitte **phalanti** vipākabhūto aṭṭhaṅgika maggo. Sampayuttadhammasamūhovā. Sotāpattiyā adhigataṃ phalaṃ. Tena sampayuttaṃ, tattavā pariyāpannaṃ cittanti sotāpatti phala cittaṃ. Esanayo dutīyatatīyesupī. Arahattañca taṃ phalañcāti **arahattaphalaṃ**. Tena sampayuttaṃ, tasmim̐vā pariyāpannaṃ cittanti nirutti.

62. Saṅgahagāthāyaṃ **catummaggappabhedenāti** catukkhattuṃ pattabbattā catubbidhānaṃ aṭṭhaṅgikamaggānaṃ pabhedena. Kasmāpana te catukkhattuṃ pattabbātī. Vuccate. Sotāpattimagge tāva saddhādīni indriyāni mudūni honti, tasmā so diṭṭhivicikicchāeva samucchinditūṃ sakkoti. Aññeṇa

kāmarāgabyāpādepi tanubhūtepi kātuṃ nasakkoti. Dutīyamagge tāni thokaṃ paṭūni honti. Tasmā so kāmarāgabyāpāde tanubhūte kātuṃ sakkoti. Samucchindituṃ pana nasakkohiyeva. Tatīyamagge tāni paṭutarāni honti. Tasmā so kāmarāgabyāpāde samucchindituṃ sakkoti. Rūpārūpa rāgamānuddhaccāvijjāyopana samucchindituṃ nasakkohiyeva. Catuttha maggepana tāni indriyāni paṭutamāni honti. Tasmā so tāca aññeca sabbepi pāpadhamme samucchindituṃ sakkoti. Evaṃ catukkhattuṃ pavattamāneva pariniṭṭhitakiccattā te maggā catukkhattuṃ pattabbā hontīti. Kusalaṃ cittaṃ catumaggappabhedena catudhā matam. Pākampi tassa catubbidhassa kusalassa phalattā tathā catudhāmatam. Iti anuttaram cittaṃ aṭṭhadhā matanti yojanā. Natthi attano uttaram adhikaṃ etassāti **anuttaram**.

63. Kasmā panettha kriyacittaṃnāmana gahitanti, kriyānuttarassa abhāvāti, kasmā panassa abhāvoti. Maggacittassa ekacittakkhaṇikattāti. Yadi hi taṃ lokiyakusalaṃviya nānākkhaṇesu pavatteyya. Tadā niranusayasantānepi pavattitvā kriyā nuttaramnāma siyāti. Kasmāpana taṃ ekacittakkhaṇikameva hotīti. Maggassa mahānubhāvattāti. Kathañca mahānubhāvoti. Vuccate. Ariyamaggohi nāma sakim pavattamānoyeva attanā pahātabbe kilese puna anuppādadhammatam āpādetvā pajahati. Ayamassa eko ānubhāvo. Vipākāñca kusalakriyajanamaṃviya javanakicca yuttaṃ yadā kadāci samāpajjanakkhamañca katvā attano anantarato paṭṭhāya janeti. Ayamassa dutīyo ānubhāvo. Tasmā tassa kilesappahānatthāyapi puna uppādetabbakiccaṃnāma natthi. Tathā samāpatti atthāyapīti. Sacepi hi koci ahaṃ phalaṃ samāpajjituṃ na icchāmi. Pubbe laddhaṃ maggameva samāpajjissāmīti parikkammaṃ kareyya. Tadā pubbe sakim uppajjivā niruddhamaggacetanānubhāvena phalacittameva pavatteyya. Na maggacittaṃ. Kasmā, appaṭibāhi yānubhāvattā maggassa. Ayañhi maggānubhāvonaṃ kenaci chandena vā vasenavā ajjhāsavenavā parikkammenavā paṭibāhituṃ asakkuṇeyyoyeva hotīti.

64. Dvādasākusalānevantiādi sabbesaṃ catubbhūmaka cittānaṃ jātivaseṇa saṅgaho. Evaṃ iminā vuttappakāreṇa akusa lāni dvādasevahonti. Kusalāni ekavīsatieva. Vipākānichattim seva. Kriyacittāni vīsatievāti ṭikāyaṃ yojīyati. Kecipana kusalānaṃ vipākānañca uparivaḍḍhamānattāevasaddaṃ ādiantapadesveva yojesuṃ. **Catupaññāsadhā**tiādi bhūmivasena saṅgaho. Kāmeperiyā pannāni cittāni catupaññāsadhā irāye katheyya. Rūpe pannarasa. Arūpe dvādasa. Tathā anuttare pariyāpannāni cittāni aṭṭhadhā irāyati yojanā. Etthaca anuttareti lokuttara bhūmiyaṃ. Sā pana duvidhā saṅkhatabhūmi, asaṅkhatabhūmīti. Saṅkhatāpi catubbidhā. Yathāha –

Yasmiṃ samaye lokuttaram jhānaṃ bhāveti pathamāya bhūmiyā pattiyā.La. Dutīyāya.La. Tatīyāya.La. Catutthāya bhūmiyā pattiyāti.

Tattha bhūmīti sāmāññaphalaṃ adhippetanti vuttaṃ. Pathamamaggaphalaya gaḷaṃvā pathamabhūmi.La. Catuttha maggaphala yugaḷaṃ catutthabhūmīti evaṃpi yujjatiyeva. Atthatopana rāgattayapariḡgahavimuttīyā tebhūmakadhammesu apariyāpannatā saṅkhātena avatthā visesena yutto dhammaviseso. Soca kilesappahāna visesena catubbidho jātoti.

[61] Vibhāvaniyaṃ pana

Itarabhūmiyoviya lokuttarabhūmināma visuṃ natthi. Nava vidhadhammasamūhoeva tesam bhūmipariyāyoti katvā yaṃ vuttaṃ. “Katthaci apariyāpannāni navavidhalokuttara dhammasamūhekadesabhūtāni rukkhe sākhā tyādīsu viya anuttare cittānīti vuttānī”ti. Taṃ nayujjati.

Duvidhāhi bhūmi avatthābhūmi, okāsabhūmīti. Tattha avatthā bhūmieva nipariyāyabhūmi. Na itarā. Sā hi okāsabhūmināma dhammānaṃ taṃ taṃ avatthāvisesavaseneva siddhāti. Taṃ taṃ avatthā visesotica heṭṭhā vuttanayena kāmāvacaratādi avatthā viseso daṭṭhabbo. Apica ekattimśabhūmiyopi kusalākusaladhammānaṃ hīnapañītaoḷārikasukhumatā saṅkhātehi avatthāvisesehieva sijjhanṭīti.

65. Evaṃ catubbhūmaka cittāni saṅkhepato niddisitvā idāni puna vitthārato niddisanto itthantiādīgāthamāha. Tatrāyaṃ yojanā. Athavāpana itthaṃ yathāvuttappakārena ekunanavutippabhedam mānasam cittaṃ ekavīsasataṃ katvā vicakkhaṇā paṇḍitā vibhajantīti.

[62] Ṭīkāsu pana

Gāthāya pubbaddham purimagāthānaṃ nigamaṇaṃ katvā aparaddhameva ārabhantaraṃ katvā yojenti. Taṃ kathamekūna navutividham cittaṃ ekavīsasataṃ hotīti iminā nasametīti.

Idāni taṃ ekavīsasatavibhāgaṃ dassento kathaṃ.La. Hotīti pucchitvā vitakkavicārapīti sukhekaggatā sahitantiādīmāha. Tattha **pathamajjhāna sotāpattimaggacittanti** ettha pañcaṅgikena pathamajjhānena yutto sotāpattimaggo pathamajjhānasotāpattimaggo. Tena sampayuttaṃ cittanti samāso.

[63] Ṭīkāsu pana

“Pathamajjhānaṅca taṃ sotāpattimaggacittaṅcā”ti yojenti. Taṃ na yuttaṃ.

Na hi jhānaṃ cittaṃ hoti. Naca cittaṃ jhānaṃ. Aññañhi jhānaṃ, aññaṃ cittanti.

[64] Yañca vibhāvaniyaṃ

“Jhānaṅgavasena pathamajjhāna sadisattā pathamajjhānaṅcā”ti vuttaṃ. Tampi na yuttaṃ.

Na hi pañcaṅgikaṃ lokuttarajjhānaṃ pathamajjhānasadisatṭhena pathamajjhānasaññaṃ labhatīti sakkā vuttaṃ. Tañhi sayameva attano pañcaṅgikabhāvena nippariyāyato pathamajjhānaṃnāma hotīti. Idañhi jhānaṃnāma lokiyaṃvā hotu lokuttaraṃvā. Yaṃ pañcaṅgikaṃ hoti. Taṃ sayameva pathamajjhānanti siddham. Yaṃ caturaṅgikaṃ. Tiyaṅgikaṃ. Duvaṅgikaṃ. Puna duvaṅgikaṃ. Taṃ sayameva pañcamajjhānanti siddhanti. Lokuttarevā dutiyādibhāvassa uppattikkamavasena asiddhattā evaṃ vuttanti daṭṭhabbam.

[65] Yañca tattha

Sadisabhāveneva lokuttare tesam pañcaṅgikādīnaṃ jhāna vohārasiddhatādīpanattham.

“Pādakajjhāna sammasitajjhāna puggalajjhāsayesu hi aññataravasena taṃ taṃ jhānasadisattā vitakkādiṅgapātubhāvena cattāropi maggā pathamajjhānādi vohāraṃ labhantā paccekam pañcadhā vibhajantī”ti vuttaṃ. Tampi nayujjatiyeva.

Na hi maggā pathamajjhānādi vohāraṃ labhanti. Añña hi maggo, aññaṃ jhānanti. Apica, yadi upanijjhāyanaṭṭhena paccanīkajjhāpanaṭṭhenaca jhānaṃnāma siyā. Tadā lokuttarajjhānānieva sātisayato jhānānīnāma siyuṃ. Na itarāni. Tāni hi kasiṇādinimittamattaṃ upecca nijjhāyanti. Paccanīkadhammeca vikkhambhanamattena jhāpentī. Lokuttarāniyevapana atigambhīraṃ abhiduddasaṃ nibbānaṃ upecca nijjhāyanti. Paccanīkadhammeca samūle sānusaye sabbaso samucchindanavasena jhāpentīti. Etthaca appanājjhānānaṃ pañcaṅgikabhāvonāma pakatīyā eva siddho hotīti na pathamajjhānikesu maggaphalesu pādakajjhā nādinā paccayavisesena kiccaṃ atthi. Caturaṅgikādi bhāvo pana tena paccayavisesena vinā na sijjhati. Asatihi tasmim sabbampi jhānaṃ pañcaṅgikameva bhavissatīti. Tattha yathā lokiyajjhānesu ādikammikakāle tassa tassa dutiyādikassa jhānassa upacārabhūtā bhāvanā sayam vitakkādiyuttā samānāpi vitakkādīsu ādīnavadassanaññāṇenaceva idāni avitakkam jhānaṃ uppādessāmi, idāni avicāraṃ jhānaṃ uppādessāmīti evamādinā pavattena ajjhāsaya visesenaca yuttattā kāci vitakkavirāgabhāvanānāma hoti. Kāci vicāra virāgabhāvanā nāma. Kāci pītivirāgabhāvanā nāma. Kāci sukhavirāgabhāvanānāma. Kāci rūpavirāgabhāvanānāma. Asaññigāmīnaṃ pana

saññāvirāgababhāvanānāma hoti. Sā attano attano jhānaṃ avitakkaṃvā avicāraṃvā appītikaṃvā upekkhāsaha gataṃvā kātuṃ sakkoti. Jhānesu vasībhūtakālepana ādīnavadassanaññānena vinā kevalaṃ ajjhāsayaṃmattena yaṃyaṃ jhānaṃ icchati. Taṃ taṃ jhānaṃ samāpajjatiyeva. Evamevaṃ idhapi tassa tassa maggassa upacārabhūtā vuṭṭhānagāmini vipassanāsaṅkhātā bhāvanā sayāṃ vitakkādiyuttā samānāpi nānāsattiyuttā hoti. Kāci vitakkavirāgababhāvanānāma. Kāci vitakkavicāravirāgababhāvanā nāma. Kāci vitakkavicārapīti virāgababhāvanānāma. Kāci vitakkavi cārapītisukhavirāgababhāvanānāma. Tattha yā vitakkaṃ virājetuṃ atikkāmetuṃ sakkoti. Sā vitakkavirāgababhāvanānāma. Esa nayo sesāsūpīti.

66. Kassapana balena sā vipassanā nānāsatti yuttā hotīti. Vuccate, pādakajjhānabalenāti eko theravādo. Sammasitajjhāna balenāti eko. Puggalajjhāsaya balenāti eko. Tattha yaṃ yaṃ jhānaṃ tassā vipassanāya pādakatthāya āsanne samāpajjīyati. Taṃtaṃ pādakajjhānaṃnāma. Taṃce pathamajjhānaṃ hoti. Vipassanā pākatikāeva. Sace dutīyajjhānaṃ hoti. Vipassanā vitakkavirāgasattiyuttā hoti. Magge avitakkaṃ jhānaṃ niyāmetuṃ sakkoti. Esanayo sesesupi pādakajjhānesūti ayaṃ pādakavādo. Pādakajjhāne sati taṃsadisameva magge jhānaṃ hoti. Asatipana magge pathamajjhānameva hoti. Sammasi tajjhānaṃvā puggalajjhāsayaovā magge jhānaṅgaṃ niyāmetuṃ nasakkotīti adhippāyoti. Pādakajjhāne sati taṃvā aññaṃvā yaṃyaṃ jhānaṃ sammasīyati. Taṃce pathamajjhānaṃ hoti. Vipassanā pākatī kāeva. Sace dutīyajjhānaṃ hoti. Vipassanā vitakkavirāgasatti yuttā hoti. Magge avitakkaṃ jhānaṃ niyāmetuṃ sakkoti. Esanayo sesesupi sammasitajjhānesūti ayaṃ sammasitavādo. Vipassanāya ārammaṇabhāvena saha caritattā sammasitajjhānameva pādakajjhānato ajjhāsayaṃto ca balavataranti adhippāyoti.

Vibhāvanīyaṃ pana

Vipassanāpādakaṃ kiñcijjhānaṃ natthīti imasmiṃ vāde vuttaṃ. Taṃ aṭṭhakathāya na sameti.

Pādakajjhāne sati taṃvā aññaṃvā magge yaṃyaṃjhānaṃ icchati. Taṃtaṃ jhānaṃ ijjhati. Vipassanāpi icchānurūpaṃ vitakkavirāgādibhāvaṃ pattā hotīti puggalajjhāsaya vādo. Yathā lokiyajjhānesu āsanne vuṭṭhitajjhānaṃ uparijjhānupacāra bhāvanāya upatthambhakamattaṃ hoti. Na pana uparijjhāne jhānaṃ attasadiṣaṃ kātuṃ sakkoti. Ajjhāsayaeva uparijjhāne jhānaṅgaṃ niyāmeti. Evamevaṃ idhapi pādakajjhānaṃ vipassanāya tikkha visadabhāvatthāya balavupaniṣsa yo hoti. Ajjhāsayaeva vipassanaṃ vitakkavirāgādibhāvaṃ pāpetvā magge jhānaṅgaṃ niyāmetīti adhippāyoti. Yo panettha vuṭṭhānagāminivipassanāeva magge jhānaṅgaṃ niyāmetīti mahāṭṭhakathā vādo. Tatthapi puggalajjhāsayaṃviseṣabalena vitakkavirāgādisatti viṣesayuttā vuṭṭhānagāmini vipassanāevāti attho vedītabbo. Kāmañcetha aṭṭhasālinīyaṃ imesaṃ tiṇṇaṃ theravādānaṃ aññaṃaññaṃ avirodho vuttoviya dissati. Imepana vādā aññaṃaññaṃ saṃsanditvā pavattā nahonti. Paccemaṃ sabbāṃ lokuttarajjhānaṃ paripuṇṇaṃ katvā pavattā. Tasmā nasakkā tesāṃ aññaṃaññaṃ virodho pariharitunti. Etthaca jhānalābhīnaṃ vipassanākamma pādakajjhānasamā pajjanaṃnāma bhagavatāeva suṭṭhuvihitaṃ. Vuttañhetāṃ cūlasuññatasutte –

Idhānanda bhikkhu vivicca kāmehi vivicca akusalehi dhammehi pathamaṃ jhānaṃ upasampajja viharati. Dutīyaṃ jhānaṃ. Tatīyaṃ jhānaṃ. Catutthaṃ jhānaṃ upasampajja viharati. So ajjhataṃ suññataṃ manasikaroti. Tassacejjhattaṃsuññatāya cittaṃ napakkhandati. Napasīdati. Tena bhikkhunā tasmīyeva purimasmiṃ samādhinimittē ajjhattameva cittaṃ santhape tabbaṃ, sannisādetabbaṃ, ekodī kātābbaṃ, samādahātabbantiādi.

Tattha suññataṃ manasikarotīti vipassanākammaṃ vuttaṃ. Tasmīyeva purimasmiṃ samādhinimittēti pādakajjhānasamādhī nimittē. Navanipāteca –

Pathamaṃ pāhaṃ bhikkhavejhānaṃ nissāya āsavānaṃ khayāṃ vadāmi.La.
Nevasaññānāsaññāyatanāṃ pāhaṃ bhikkhave jhānaṃ nissāya āsavānaṃ khayāṃ vadāmīti

vuttam.

67. Imesupana tīsvādesu puggalajjhāsayaavādo balavataroviya khāyati. Lokiyajjhānesupi hi pādakajjhānaṃnāma icchitabbameva. Tañca uparijjhānassa upacārabhāvanāya tikkhavisada bhāvattāyaeva hoti. Ajjhāsayo evapana upacāra bhāvanāya vitakkavirāgādibhāvaṃ sādheti. Upacārabhāvanāeva uparijjhāne jhānaṅgaṃ niyāmeti. Evamevaṃ idhapi pādakajjhānabalena tikkhavisada bhāvapattā vuṭṭhānagāmini vipassanāeva ajjhāsaya visesabalena vitakkavirāgādisattivisesayuttā hutvā magge nānājjhānāni sādheti. Asati pana ajjhāsaya visese taṃtaṃ pādakajjhānānurūpaṃ ajjhāsaya sāmāññaṃsaṅghāti. Tasmā ajjhāsaya visese asati pādakajjhānameva pamāṇaṃ hoti. Satipana tasmim soeva pamāṇanti yuttam. Icchi ticchita lokiyajjhāna samāpajjana sadisañhi sabbajjhānesu ciṇṇavasābhūtānaṃ maggesu icchitajjhāna nibbattananti. Yo panettha pādakajjhānādivasena pavatto viseso. So sabbopi vipassanā visesattāya eva hoti. Vipassanā visesoeva magge jhānaṅgaṃ niyāmetīti katvā aṭṭhasālīniyaṃ visuddhi maggeca vipassanāva pamāṇaṃ katvāvuttā. So sabbopi viseso pādakajjhānena vinā nasijjhatīti katvā maggavibhaṅgamaggasamuyuttatṭha kathāsu pādakajjhānaṃ eva pamāṇaṃ katvā vuttanti vedittabbaṃ. Yasmā pana pāḷiyam –

Idha gahapati bhikkhu vivicca kāmehi. La. Pathamaṃ jhānaṃ upasampajja viharati. So iti paṭisañcikkhati. Idampi kho pathamajjhānaṃ abhisāṅkhatam abhisāñcehayitam yaṃkhopana kiñci abhisāṅkhatam abhisāñcetayitam. Tadaniccaṃ. Taṃ nirodhadhammanti pajānāti so tattha ṭhito āsavānaṃ khayam pāpuṇāti. La. Dutīyaṃ jhānaṃ, tatīyaṃ jhānaṃ, catutthaṃ jhānaṃ, mettā cetovimuttim. Karuṇā, muditā, upekkhāceto vimuttim, ākāśānañcā yatanam. La. Ākiñcaññā yatanam upasampajja viharati. So iti paṭisañcikkhati. Ayaṃpikho ākiñcaññā yatanasamāpatti abhisāṅkhatā abhisāñcetayitā. Yaṃ khopana kiñci abhisāṅkhatam. La. Khayam pāpuṇatīti.

Evamekādasanipāte –

Idhānanda bhikkhu vivicca kāmehi vivicca akusalehi dhammehi savitakkaṃ savicāraṃ vivekaṃ pītisukkaṃ pathamaṃ jhānaṃ upasampajja viharati. So yadeva tattha hoti rūpagataṃ vedanāgataṃ saññāgataṃ saṅkhāragataṃ viññānagataṃ, te dhamme aniccato dukkhato anattato samanupassati. So tattha ṭhito āsavānaṃ khayam pāpuṇāti. No ce āsavānaṃ khayam pāpuṇāti. Teneva dhammarāgena tāya dhammanandiyā pañcannaṃ orambhāgiyānaṃ samyojanānaṃ parikkhaya upapātiko hoti. Tattha parinibbāyī anāvattidhammo tasmā lokāti.

Ādinā mālukya puttasutta anupadasuttādīsuca anekesu suttantesu aṭṭhasu samāpattīsu ekekāya samāpattiyā vuṭṭhāya vuṭṭhitasamāpattidhammasammasanameva āgataṃ. Napana aññajjhāna sammasanaṃ. Tasmā satipi yogīnaṃ icchāvasena pādakajjhānato aññajjhānasammasane pādakajjhānameva pamāṇanti sakkā viññātunti. Ettāvataṃ sammasitavādo sabbadubbaloti siddho hotīti. Yepana aṭṭhasamāpattilābhini opī jhānaṃ pādakaṃ akatvāva maggaṃ uppādentī. Pathamajjhānamevavā pādakaṃ katvā ajjhāsaya visesaṃ akatvā maggaṃ uppādentī. Pathamajjhānamattalābhinovā hutvā tameva pādakaṃ katvā maggaṃ uppādentī. Yeca sukkhavipassakā hutvā maggaṃ uppādentī. Tesam pathamajjhānikova maggo hotīti vedittabbo. Apica ye pakatiyāva aṭṭhasu samāpattīsu ciṇṇavasābhūtā hontī. Te vināpi āsanna pādakena yaṃyaṃ jhānaṃ icchantī. Taṃtaṃ jhānaṃ tesam maggesu nasamijjhatīti navattabbaṃ.

66. [66] Yaṃpana vibhāvaniyaṃ

“Sacepana puggalassa tathāvidho ajjhāsayo natthi. Heṭṭhimahetṭhimajjhānato vuṭṭhāya uparuparijjhānadhamme sammasitvā uppāditamaggo pādakajjhānaṃ anapekkhitvā sammasitajjhānasadiso hotīti vuttam. Taṃ vicāretabbaṃ.

Na hi āramaṇamattabhūtaṃ sammasitajjhānaṃ uparimaṃpi samānaṃ āsanne vuṭṭhitajjhānato

balavataraṃ bhavituṃ arahati. Āsanne vuṭṭhitasseva cittasantānaṃ visesetuṃ samatthabhāvato. Tato yevahi so sammāsītavādo sabbaaṭṭhakathāsu kecivādapakkhe eva thapitoti. Nanu puggalajjhāsayaṇādopi tathāthapitoevāti. Saccaṃ, sopana lokiyajjhānānaṃ uppattividhānena saha saṃsandikattā yuttataroeva hotīti.

[67] Etena yaṃ **tattha** vuttaṃ.

“Uparuparijjhānato pana vuṭṭhāya heṭṭhima heṭṭhimajjhāna dhamme sammāsītavā uppāditamaggo sammāsītajjhānaṃ anapekkhitvā pāda kajjhānasadiso hoti. Heṭṭhimahēṭṭhimajjhānatohi uparu pariijjhānaṃ balavatara’nti. Taṃpi paṭikkhittaṃ hoti.

Na hi pādakajjhānaṃ uparima bhūtattāyeva balavataraṃ hoti. Pādakabhūtattāyeva pana balavataraṃ hotīti.

[68] Yañca **tattha**

Magge vedanāniyamopana pādakajjhānādīnaṃ vasena nasiddho. Aññathā vipassanā yāyakāyavedanāya yuttā hutvā tehi niyamitāya ekekāya maggavedanāya saddhiṃ ghaṭi yeyyāti iminā adhippāyena “vedanāniyamopana sabbatthapi vuṭṭhānagāmini vipassanāniyamena hoti”ti vuttaṃ. Taṃpi na yujjati.

Pādakajjhānādīnaṃ vaseneva vipassanāya saha vedanāniyamassa siddhattā. Tathāhi taṃtaṃ pādakajjhānato vuṭṭhāya vipassantassa vipassanā ādito kadāci somanassasahagatāvā hoti. Kadāci upekkhāsahagatāvā. Maggavuṭṭhānakālepana yadipādakajjhānaṃ somanassajjhānaṃ hoti. Vipassanā ekantena somassasaha gatāva hutvā maggena saddhiṃ ghaṭiyatīti. Vuttañhettaṃ saḷāyatana vibhaṅgasutte

Tatra bhikkhave yā cha nekkhammassitā upekkhā. Tā nissāya tā āgamma yāni cha nekkhammassitāni somanassāni. Tāni pajahatha. Tāni samatikkamatha. Evametesam pahānaṃ hoti. Evametesam samatikkamo hotīti.

Aṭṭhakathāyañca aṭṭhasu samāpattīsu pathamādinica tīṇijhānāni suddhasaṅkhāreca pādake katvā vipassanaṃ āraddhānaṃ catunnaṃ bhikkhūnaṃ pubbabhāga vipassanā somanassasahagatā vā hoti. Upekkhāsaha gatāvāvuṭṭhānagāminīpana somanassasahagatāva hoti. Catutthajjhānādīni pādakānikatvā vipassanaṃ āraddhānaṃ pañcannaṃ bhikkhūnaṃ pubbabhāgavipassanā purima sadisāva. Vuṭṭhānagāminīpana upekkhāsahagatāva hoti. Iduṃ sandhāyayā chanekkhammassitā.La. Pajahathāti vuttaṃ. Ajjhāsayaṇavisesena saha maggavuṭṭhānepi eseṇaṇayo. Balavavipassanākāle hi vipassanāratināma suṭṭhu paṇītatarā hoti. Sakalasarīraṃ pharamānā ajjhottharamānā pavattati. Yathāha –

Suññāgāre pavīṭṭhassa, santacittassa bhikkhuno;
Amānusi rati hoti, sammadhammaṃ vipassatoti.

Tasmā tadā pādakajjhānavisesenavā ajjhāsayaṇavisesena vā vinā vipassanā upekkhāsahagatā na hoti. Ekantena somanassasahagatāva hotīti. Etthapana sabbajjhānesu vasībhūtassa yaṃkiñci ekaṃ jhānaṃ pādakaṃ katvā taṃ pā aññaṃvā maggeyaṃyaṃ jhānaṃ icchati. Maggavuṭṭhānakāle ajjhāsayaṇabalena taṃtaṃjhānānurūpaṃ vipassanāyaca maggeca vedanā pariṇāmo vedītabbo. Napana vedanāniyāmonāma viṣuṃ vattabboti.

67. Saṅgahagāthāyaṃ anuttaraṃ aṭṭhavidhaṃ cittaṃ jhānaṅgayogabhedena ekekaṃ pañcadhā katvā cattālīsavidhanti ca vuccatīti yojanā. Idāni sabbāni mahaggaṭā nuttaracittāni pañcavidhe jhāna koṭṭhāse saṅgahetvā dassetuṃ yathāca rūpāvacarantiādīmāha. Yathā rūpāvacaraṃ cittaṃ

pathamādiḥhānabhede gayhati. Jhāna bhedasiddhe pathamajjhānikacittādiḥhe pañcavidhe cittabhede saṅgayhati, tathā anuttarañca cittaṃ pathamādiḥhānabhede saṅgayhati. Āruppañcaccittaṃ upakkhekaggaṭā saṅkhātena pañcamajjhānena yuttatā pañcame jhāne pañcamajjhānikacittabhede saṅgayhati. Tasmā ekekaṃ patamādikāṃ pathamajjhānikacittādikāṃ jhānaṃ jhānacittaṃ ekādasavidhaṃ hoti. Antetu antimabhūte pañcamajjhānikacittabhede pana jhānaṃ cittaṃ tevīsatividhaṃ bhaveti yojanā. Etthaca jhānasaddena taṃsampayuttaṃ cittameva vuccati. Na hi jhānaṃ ekādasavidhamvā tevīsatividhamvā hotīti.

[69] Yaṃpana vibhāvaniyaṃ

“Rūpāvacaracittaṃ pathamajjhānantiādinā vuccatītica āruppañcāpi pañcamajjhānavohāraṃ labhatī”ti ca vuttaṃ. Taṃ na yujjati.

Na hi cittaṃ pathamajjhānaṃ hoti. Naca pañcamajjhānavohāraṃ labhatīti.

[70] Yāca imissāgāthāyaṃ aparāpi yojanā vuttā. Sāpi na yuttāeva.

Tathā saddassa pathamādiḥhānabhedeṭi padassa purato paṭhitattāti. Evaṃ yathā vibhajitabbe ekadese vibhatte sabbaṃ ekūnanavutividhaṃ cittaṃ ekavīsasataṃ katvā vibhattaṃnāma hoti. Tathā vibhajitvā idāni taṃsaṅgahaṃ dassento antimagāthamāha. Puññaṃ sattatiṃsavidhaṃ hoti. Tathā pākaṃ dvipaññāsavidhaṃ hoti. Iti ekūnanavutividhāni cittāni ekavīsasataṃ katvā budhā paṇḍitā āhu kathesuṃ. Kathentivā vibhajanti vicakkhaṇāti vuttaṃ hotīti.

Iti paramatthadīpaniyānāma abhidhammatthasaṅgahassa

Catutthavaṇṇanāya cittaṃsaṅgahassa

Paramatthadīpanā niṭṭhitā.

Cetasikaṅgaha paramatthadīpanī

68. Evaṃ cittaṅgahaṃ dassetvā idāni anupattaṃ cetasika saṅgahaṃ dassento catūhi sampayogalakkhaṇehi saha vacanattañca sarūpatthañca tāva dassetuṃ ādi gāthamāha. Tattha **ekuppādanirodhācaekālambaṇavattukā**ti catussampayogalakkhaṇadassanaṃ. **Ceto yuttā**ti vacanattadassanaṃ. Cetasiyuttā cetasāvā yuttā cetasikāti dassanato. **Dvipaññāsadhammā**ti sarūpadassanaṃ. **Cetasikā**ti pana siddhapada dassanaṃ. Tattha dhammānaṃ anāgatabhāvasaṅkhātā pubbantato uddhaṃ pajjanaṃ gamanaṃ sarūpato pātubhavanaṃ uppādo. Jātīti vuttaṃ hoti. Sabbepihi saṅkhata dhammā anāgatabhāvapubbā eva honti. Tato paccayasāmaggiṃ labhitvā paccuppannabhāvaṃ gacchanti. Tato nirujjhivā atītabhāvaṃ gacchantīti. Nirujjhaṇaṃ nirodho. Sarūpavināso bhaṅgo aniccata maraṇanti vuttaṃ hoti. Yā cittassa jāti, sāyeva phassādīnaṃ. Yā cittassa jarā, yaṃ cittassa maraṇaṃ, yaṃ cittassa ārammaṇaṃ vatthu. Tadeva phassādīnantiādinā heṭṭhā vuttanayena eko uppādo etesanti ekuppādā. Eko nirodho etesanti ekanirodhā. Ekuppādāca te ekanirodhācāti ekuppādanirodhā. Uttarapade ekasaddassa lopo. Evaṃ paratthapi. Ekaṃ ālambaṇaṃ etesanti ekālambaṇā. Ekaṃ vatthu etesanti ekavattukā. Ekālambaṇāca te ekavattukācāti ekālambaṇavattukā. Ālambaṇaṃ panettha ekacittassapi bahudeva hoti. Ekattaṃpana upanetvā ekaṃ ālambaṇanti vuttanti daṭṭhabbaṃ.

[71] Vibhāvaniyaṃ pana

“Ekato uppādoca nirodhoca yesaṃ, te ekuppādanirodhā”ti vuttaṃ. Taṃ na sundaraṃ.

Na hi ekakkhaṇe ekato uppādamattena ekuppādatā idha adhippetā. Athakho vuttanayeneva adhippetā. Vuttañhetam mūlaṭṭikāyaṃ –

Ekakalāpapariyāpannānaṃ rūpānaṃsahevauppādādippavattito
Ekassakalāpassauppādādayo ekekāva hontīti.

Tatrāyaṃ yojanā. Ekuppādanirodhāca ekālambaṇavattukā ca hutvā yedhammā cetoyuttā. Te dvipaṇṇāsadhammā cetasiḱā matāti. Bhāvapadhānaṃpivā ettha yuttaṃ. Visesaneca nissakkavacanaṃ. Ekuppādanirodhābhāvena ekālambaṇa vatthuka bhāvenaca yedhammā cetoyuttā. Te dvipaṇṇāsadhammā cetasiḱānāma matā ñātāti. Etthaca ye cetoyuttā. Te cetasiḱāti vutte cittassa sahaḱātapaccayuppannarūpānipi tadāyattavuttitāya ekantena cittasambandhīni hutvā cetoyuttāni cetasiḱāni nāma siyuṃ. Tasmā tesam nivattanattham ekuppādanirodhāca, ekā lambaṇavattukāti vuttaṃ. Tānihi cittena khaṇato sahuppannānipi bhinnasantānattā yā cittassa jāti, sāeva tesanti imaṃ lakkhaṇampi nānubhonti. Aññaṃhi rūpasantānaṃ. Aññaṃ arūpasantānanti. Phassādīnaṃpana uppādamattameva cittena saha ekaṃ nahoti. Athakho nirodhopi ālambaṇampi vatthupi sabbam ekamevāti ñāpanattham eka nirodhādiggahaṇam vuttanti daṭṭhabbam. Na hi evam avutte sakkā tathā jānitunti. Yasmāpana yathā bahujanasantako eko goṇo tissassa goṇo dattassa goṇoti evam visuṃ visuṃpi vattabboyeva hoti. Evamevam uppādo nirodhoca ekasmiṃ rūpārūpakalāpe ekovasamānopi phassassa uppādo vedanāya uppādo pathavidhātuyā uppādo āpodhātuyā uppādoti evamādinā nayena visuṃ visuṃpi vattabboyeva. Tasmā suttantesu –

Vedanāya uppādo paññāyati. Vayo paññāyati. Ṭhikāya aññattham paññāyati. Saññāya. Saṅkhārānaṃ. Viññāṇassa. La. Paññāyatīti vuttaṃ. Tathā yo bhikkhave pathavidhātuyā uppādo ṭhitiabhinibbatti pātubhāvo. Dukkhasseho uppādo rogānaṃ ṭhiti jarā maraṇassa pātubhāvo. Yo bhikkhave āpodhātuyā. Yo bhikkhave tejo dhātuyā. Yo bhikkhave vāyodhātuyā. Yo bhikkhave cakkhussa. La. Manassa uppādo. La. Jarāmarāṇassa pātubhāvoti.

Vuttanti daṭṭhabbam. Itarathā jīvitindriyādīnapi ekasmiṃ kalāpe bahubhāvo vattabbo siyā. Yo arūpīnaṃ dhammānaṃ āyu ṭhiti avatṭhitīti hi vuttaṃ. Tathā vikārarūpānaṃ. Sabbesampivā cakkhādīnaṃ upādārūpānaṃ. Catunnaṃ caḱābhūtānaṃ upādāyarūpāntica catunnaṃ mahābhūtānaṃ upādāya pasādotica vuttanti. Kāyalahutā cittalahutādayopana atthavisesadīpanattham dvidhā bhinditvā vuttā. Soca atthavisesoupari āvi bhavissatīti. Ayametthaparamatthadīpanā.

[72] Vibhāvaniyaṃ pana

Imamattham asallakkhetvā yaṃ vuttaṃ “yadi ekuppādamatteneva cetoyuttāti adhippetā. Tadā cittena saha uppajjamānānaṃ rūpadhammānampi cetoyuttatā āpajjeyyāti eka nirodhaggahaṇam. Evampi cittānuparivattino viññattidvayassa pasāṅgo nasakkā nīvāretuṃ. Tathā ekato uppādo vā nirodhovā etesanti ekuppādanirodhāti parikappentassa puretaramuppajjitvā cittassa bhaṅgakkhaṇe nirujjhamānānampi rūpadhammānanti ekālambaṇaggahaṇam. Ye evam tividhalakkhaṇā. Te niyāmato ekavatthukā yevāti dassanattham. Ekavatthukaggahaṇanti. Alamatipapañcenā”ti. Sabbam tam niratthakameva.

69. Kathaṇca dvipaṇṇāsa hontīti pucchitvā pathamaṃ dvipaṇṇāsa sarūpaṃ tīhi rāsīhi vibhajitvā dassento kathantiādīmāha. Tattha phusatīti **phasso**. Phusanti sampayuttakā dhammā etenāti phasso. Phusanamattamevavā etanti phasso. Phusanañcettha ārammaṇassa itṭhāniṭṭharasaṃ āhacca upahacca gahaṇam daṭṭhabbam. Yato tadanubhavanti vedanā pātubhavati. Phassapaccayā vedanāti hi vuttaṃ. Svāyaṃ phusanalakkhaṇo. Nanucāyaṃ arūpadhammo. Naca arūpadhammā appaṭighasabhāvā kiñci phusantīti. Saccaṃ, ayaṃpana phusanā kārenaca pavattati. Yañca phusantehi sādhetabbam. Tañca kiccaṃ sādheti. Tasmā ayaṃ phassotica phusanalakkhaṇotica vutto. Kiṃpana sādhetīti. Ārammaṇarasānurūpaṃ cittassa vikārapatti. Vedanāvisesuppattimvā. Ayañca attho ambikhādādi

disvā aparassa kheḷuppadādīsu pākaṭoti.

[73] **Vibhāvaniyaṃ** pana

“Kheḷuppadādiviya daṭṭhabbo”ti vuttaṃ. Evañcasati idaṃ upamā mattaṃ siyā.
Atipākaṭāyapana phassappavattiyā dassana midanti daṭṭhabbaṃ.

70. Vedayatīti **vedanā**. Ārammaṇarasam anubhavati. Aviditaṃvā ārammaṇarasam sampayuttānaṃ taṃsamaṅgipuggalānaṃ vā viditaṃpākaṭaṃ karotīti attho. Vindantiva etāya sattā sātāṃvā asātāṃvā labhantīti vedanā. Vedayitamattamevavā etanti vedanā. Pāḷiyaṃpana –

Vedayati vedayatīti kho bhikkhave tasmā vedanāti vuccati. Kiñca vedayati, sukhaṃpi vedayati. Dukkhaṃpi vedayati. Adukkhamasukhaṃpi vedayatīti vuttaṃ.

Nanu sabbepi cittacetasikā dhammā ārammaṇarasānubhavanappa katikāevāti tepi vedanānāma siyunti. Nasiyuṃ. Tehi kiccantarabyāvaṭā honti. Ārammaṇarasam ujum anubhavituṃ nasakkonti. Attano attano kiccaṃ karontāva ekadesamattena anubhavanti. Vedanāyevapana anaññakiccatāya anubhavanakicce āhipaccayogātāyaca issarabhāvena anubhavatīti sāeva vedanānāma bhavituṃ arahatīti. Evañcatvā rājaggabhajana rasānubhavane tesam sūdasadisatā vedanāyaevaca rājasadisatā vuttāti.

71. Sañjānātīti **saññā**. Puna jānanatthaṃ saññāṇaṃ karotīti attho. Ayañhi pubbe gahitasaññānena sañjānanakālepi puna jānanatthaṃ saññāṇaṃ karotiyevāti. Sāhi evaṃ punappunaṃ saññāṇaṃ katvā uppajjamānā thirasaññābhāvaṃ patvā yāvatāyukampi bhavantaraṃ patvāpi sattānaṃ appamuṭṭhabhāvaṃ sādheti. Micchā bhinivesasaññābhāvaṃ patvāca ime satte sabbaññu buddhehipi bodhetuṃ asakkuṇeyye karotīti. Tathāhi sā puna sañjānanatthaṃ nimittakaraṇe dārutacchakasadisātica. Yathāgahita nimittavasena abhinivesakaraṇe hatthidassaka andhasadisātica. Upaṭṭhitavisayaggahaṇe tiṇapurisakesu migapotakasadisātica vuttāti. Pāḷiyaṃpana –

Sañjānāti sañjānātītikho bhikkhave tasmā saññāti vuccati. Kiñca sañjānāti. Nīlampi sañjānāti. Pītakaṃpi sañjānātītiādi vuttanti.

72. Cetayatīti **cetanā**. Sampayuttadhamme tasmim tasmim ārammaṇevā kiccevā abhisandahati punappunaṃ ghaṭeti, tattha pabandhavasena nirantaraṃ pavattamāne karotīti attho. Pakappeti vā te. Saṃvidahati ārammaṇapaṭilābhāyavā kammaśiddhiyā abhisankharoti. Āyūhativā te. Ārammaṇe sampiṇḍeti ekato samo sarante karotīti attho. Tathāhi sā āyūhanarasāhica saṃvidhānapaccupaṭṭhānātica vuttā. Tāyahi tasmim nirantaraṃ ussukkana byāpārasena pavattamānāya taṃ sampayuttāpi attano attano kiccaṃ kurumānā tasmim tatheva pavattantīti. Teneva sā sakicca parakicca sādhaṃka jeṭṭhasissa mahāvaḍḍhaki ādisadisāti vuttāti.

[74] **Vibhāvaniyaṃ** pana

Ceteti saṅkhatābhisaṅkharāṇe byāpāramāpajjatīti vatvā tadatthasādhanatthaṃ yaṃ vuttaṃ
“vibhaṅge suttantabhājanīye saṅkhā rakkhandhaṃ vibhajantena saṅkhatamatisaṅkharontīti saṅkhārāti vatvā”ti. Taṃ na yujjati.

Na hi vibhaṅge suttantabhājanīye saṅkhatama bhisaṅkharontīti saṅkhārāti vuttaṃ atthi.
Khandhasaṃyuttake panetaṃ vuttanti.

73. Ekattārammaṇasaṅkhāto aggo koṭṭhāso koṭi vā etassāti ekaggaṃ. Cittaṃ, tassa bhāvo **ekaggatā**. Ārammaṇaṃhi nāma ekampi nānāsabhāvaṃ hoti. Tasmā tassa ekassapi nānāsabhāvesu vikkhepaṃ

apatvā ekasmiṃ sabhāve khaṇamattampi pavattassa cittaassa yoniccālākāro atthi ayaṃ tasmim̐ ekaggābhīdhānassa ekaggabuddhiyāca pavattihetubhāvena gayhatīti. Te neva hi sā nivāte dīpaccīnaṃ ʘhitiviya cetaso ʘhitīti daṭṭhabbāti vuttā.

[75] **Vibhāvaniyaṃ** pana

“Ekaṃ ārammaṇaṃ aggaṃ imassāti ekagga”nti vuttaṃ. Tatthapi aggasaddo koṭṭhāsevā koṭiyamvā pavattoti yutto. Kecipana ārammaṇe pavattoti vadanti. Taṃ na sundaraṃ.

Na hi aggasaddo ārammaṇapariyāyo katthaci diṭṭhoti.

74. Jīvanti sampayuttādhammā etenāti jīvitaṃ. Indoti issaro. Idha pana issarabhāvo vuccati. Indaṃ issarabhāvaṃ kāretīti indriyaṃ. Jīvitañca taṃ indriyañcāti **jīvitindriyaṃ**. Tañhi mayā vinā tumhākaṃ jīvitaṃ natthi. Tasmā tumhākaṃ jīvanakicca maṃ issaraṃ karothāti vadantamiva saha jātadhamme abhibhavivā pavattatīti. Tathā hi taṃ pavattasantatādhipateyyanti ca padumuppa lānupālakamudakaṃ viyātica vuttaṃ. Tattha yāva khandhapariniḃbānā anuppabandhavasena pavattamānā cittasantati pavattasantatināma. Adhipatibhāvo ādhipateyyaṃ. Pavattasantatiyaṃ ādhipateyyaṃ assāti samāso. Punappunaṃ niruddhaṃpi hi cittasantānaṃ tassa balena punappunaṃ jīvantaṃ hutvā yāva khandhapariniḃbānā punappunaṃ pavattatiyeva.

Na hi jīvitarahitesu anindriyabaddhadhammesu tādiso pavattasantati visesonāma atthīti.

75. Manasmiṃ ārammaṇaṃ asuññaṃ manaṃvā ārammaṇe niccaninnaṃ karotīti **manasikāro**. So pana tividho vīthipaṭipādako javanaṭipādako ārammaṇaṭipādakoti. Tattha pañcadvārāvajjanaṃ vīthi paṭipādako nāma. Tañhi pañcadvārika cittasantatiṃ ārammaṇe paṭipādeti yojetīti. Manodvārāvajjanaṃ javanaṭipādako nāma. Taṃpi javana santatiṃ ārammaṇe paṭipādeti yojetīti. Idameva dvayaṃ tattha tattha yoniso manasikārotica ayoniso manasikāro tica vuttaṃ. Tañhi pakatiyā samudāciṇṇaninnaniyāmitādīhi paccaye hi upatthambhitaṃ hutvā cittasantānaṃ yoniso ayonisovā ārammaṇe ninnāṃ karotīti. Paṭisandhicittato pana paṭṭhāya pavattamānā cittasantati ārammaṇaṃ muñcivā nirujjhivāpi puna uppajjamānā yassa dhammassa vasena tasmim̐yeva ārammaṇe uppajjati asati kāraṇavisese. So ārammaṇaṭipādakonāma. Ayamidhā dhippeto. Ayañhi ārammaṇaṃ citte cittaṃvā ārammaṇe paṭipādeti yojetīti. Tathā hi ayaṃ sāraṇa lakkhaṇoti ca sampayuttānaṃ ārammaṇena sampayojanarasotica ārammaṇaṭipādakaṭṭhena sampayuttānaṃ sārathīviya daṭṭhabbotica vutto. Tattha sārāṇalakkhaṇoti sārathīviya assānaṃ sampayuttadhammānaṃ ujum ārammaṇābhimukhaṃ pavattayanalakkhaṇoti attho. Samaṃ dhārentiti sādharmaṇā. Sabbesaṃ cittānaṃ sādharmaṇā sabbacittasādharmaṇā.

76. Vitakketīti **vitakko**. Tathā tathā saṅkappetvā ārammaṇaṃ ārohatīti attho. Tasmim̐ pana taṃ kathā ārohante sampayuttadhammāpi taṃ ārohanti. Tadā soyeva te ārammaṇaṃ abhinropentonaṃ hotīti katvā ārammaṇā bhiniropanalakkhaṇo vitakkoti vutto. Rājavallabhaṃ nissāya janapadagāsino rājagehārohanañcetta nidassanaṃ. Avitakkaṃpi hi cittaṃ savitakkadhammasantāne vitakkena saha pavattaparicaya balena ārohanato vitakkena atinirovitamevanāma hotīti. Apica, avitakkaṃpi pañcaviññānaṃ vatthārammaṇa saṅghaṭṭanavasena ārohati. Dutīyajjhānādīnica upacārabhāvanāvasena ārohanti. Majjhimaṭṭhakathāyaṃ pana kiṃvā etāya yuttiyāti vatvā imamatthaṃ dasseti. Cittaṃpi hi ārammaṇaṃ āruhatiyeva. Tassa pana niccaṃ sahāyo manasikāro. Tasmīñhi asati taṃ niyāmakarahi tā nāvāviya yaṃvātaṃvā ārammaṇaṃ gahetvā pavatteyyāti. Iti pañcaviññānaṃ manasikārasahāyaṃ hutvā attano ārammaṇavijānanasattivaseneva ārammaṇaṃ ārohati. Akusalaṃ patvā pana cittaṃpi lobhādayopi ārammaṇāruhane thānavatā eva honti. Pāpasmim̐ ramate manoti hi vuttaṃ. Dutīyajjhāna cittaṃdīnica manasikāra vīriyassatīnaṃpi vasena ārohanti. Vitakko pana tathā tathā saṅkappetvā attasahite dhamme ārammaṇāruhane suṭṭhutaṃ balavante karoti. Iti tasmim̐ kicca aññesaṃ sābhisayabyāpārātāyeva ayaṃ vitakkoti vuttoti. Evaṃ pana vattabbaṃ. Nanu aññepi arūpadhammā sārammaṇasabhāvā ārammaṇaṃ

ārohanti. Atha ca pana kasmā ayameva vitakkoti vuttoti. Aññesaṃ pana āruhanaṃ kiccantarayogavaseneva siddhaṃ. Imassa pana ito aññaṃ kiccaṃ nāma natthi. Tasmā ayameva tathā vuttoti.

77. Vicaratī vicāro. Vicāretivā sampayuttakedhamme, te vā dhammā vicaranti etenāti vicāro. Vicaraṇaṅcetta vitakkā rulhe tasmiṃyeva ārammaṇe sabhāvākārapātubhāvattaṃ punappunaṃ anumajjanavasena pavattanaṃ daṭṭhabbaṃ. Etthaca vitakko oḷariko pubbaṅgamo ārammaṇe cittassa pathamābhiniṇipātabhūto ca hotīti ghaṇḍābhigāto viya daṭṭhabbo. Vicāro sukhumo anucaro tasmiṃyeva ārammaṇe cittassa anubandhanabhūto ca hotīti ghaṇḍānuravoviya daṭṭhabboti.

78. Adhimuccanaṃ adhimokkho. Ārammaṇe evaṃ nukho no nukhoti evaṃ pavattaṃ saṃsappanaṃ adhibhavivā vicchindivā pakkhako mucchanavasena cittassa pavattīti vuttaṃ hoti. Evañca katvā so ārammaṇe sannitṭhānalakkhaṇoti ca ārammaṇe niccalabhāvena indakhīlasadisotica vutto.

79. Vīrassa kammasūrassa bhāvo kammavā vīriyaṃ. Taṃsamaṅgī puggalo hi kammasūro hoti. Mahantaṃpi kammaṃ appakato gaṇhāti. Dukkaraṃpi sukarato, bhāriyaṃpi abhāriyato gaṇhāti. Attakilamathaṃ nagaṇeti. Kammasiddhiyā niccaṃ paggaḥita kāya cittova hoti. Tasmā taṃ tassa puggalassa tathāpavattiyā hetubhāvoceva tathāpavattassa ca tassa puggalassa kāya cittakriyābhūtaṃ hotīti. Vidhināvā nayena upāyena vīriyavato kiṃ nāmakammaṃ na sijjhatītiādikena pubbābhisankhārena īrayitabbaṃ pavattayitabbanti vīriyaṃ. Visesanavā sakaparahitahetu īranti kampanti taṃ samaṅgino etenāti vīriyaṃ. Etthaca vīriyu patthambhitā sampayuttadhammā sadā anikkhattadhurā paggaḥitasīsāviya hutvā attano attano kiccasampattiyā niccaṃ ussāhajātāva hontī, tesuca tathāhontesu taṃsamaṅgino puggalāpi attanovā paresaṃvā hitahetu niccaṃ byāvaṭakāyacittā hontī. Tasmā īranti kampantīti vuccantīti. Tathā hi taṃ upatthambhanalakkhaṇanti ca paggaḥalakkhaṇanti ca ussāhalakkhaṇanti ca gehassa thūṇupatthambhana sadisanti ca sammā āraddhaṃ sabbasampattīnaṃ mūlanti ca vuttanti.

80. Vinayati kāyacittaṃ tappeti, tuṭṭhaṃ suhitaṃ janeti, supupphitapadumaṃviyavā vaḍḍhetīti pīti, vinantivā etāya taṃ samaṅgino puṇṇacandoviya virocamaṇā kāyacittā hontīti pīti. Sā pañcavidhā khuddikā pīti, khaṇikāpīti, okkantikā pīti, ubbegā pīti, pharaṇāpīti.

81. Chandanaṃ chando. Icchā patthanā abhisandhīti vuttaṃ hoti. Sopana duvidho taṇhāchando, kattukamyatā chandoti. Idha kattukamyatā chando adhippeto. Etthaca kattaṃ kāmeti icchatīti kattukāmo. Chandasamaṅgipuggalo. Tassa bhāvo kattukamyāṃ. Tadeva kattukamyatā, yathā devoyeva devatāti. Etthaca kattusaddo sabbesaṃ dhātusaddānaṃ atthe saṅgahetvā pavatto. Tasmā kattukamyatāti etena kathetukamyatā cintetukamyatā daṭṭhukamyatā sotukamyatāti evamādīni sabba kriyāpadāni saṅgahitāni hontīti daṭṭhabbaṃ. So pana ārammaṇaṃ icchantopi taṇhā viya assādana rajjana laggana vasena naicchatī. Yena yena pana atthiko hoti. Taṃ taṃ atthaṃ ārādhetu kāmatāvaseneva icchati. Yathā rañño issāsā dhanenavā yasenavā atthikā rājaverīnaṃ vijjanavasena chaḍḍitabbayuttakepi sare bahū icchantiyeva. Evamevaṃ ayampi parassa vissajjitabbayutta kānīpi dānavatthūni aladdhānīpi laddhum icchati. Laddhānīpi rakkhituṃ icchatīti. Ayañca attho vibhāvanīyaṃpi vuttoyeva.

Vuttañhi tattha

Dānavatthuvissajjanavasena pavattakālepi cesa vissajji tabbena tena atthikoyeva.
Khipitabbausūnaṃ gahaṇe atthiko issāsoviyāti.

Tattha yadaggena dānaṃ dassāmīti dānavatthupariyesanādivasena pavattā pubbabhāgacetanā dānavatthuvissajjana sankāte dāne saṅgahitā hoti. Tadaggena tassā pubbabhāgacetanāya pavattikālo idha dānavatthuvissajjanavasena pavatta kāloti veditabbo. Vissajjitabbenāti vissajjitabba yuttakena. Tena atthikoyeva parassa vissajjanatthāyāti adhippāyo. Khipitabbausūnaṃ gahaṇeti tesam akatānaṃ karaṇavasena aladdhānaṃ pariyesanavasena gahaṇe. Ettha pana keci issāso usūnikhipitvāpi labhamāno

tehi usūhi atthikoyevāti eva matthaṃ vadanti. So nayujjati. Evañhi sati khipitausūnanti vuttaṃ siyā. Yathā kathitaṃ lapitaṃ tathāgatenāti. Tathā vissajjitabbe nāti etthapīti. Keci issāso usūhi anattiko khipanto nahoti. Atthikoyeva samāno aññaṃ ānisaṃsaṃ icchanto khipatīti evaṃ atthaṃ vadanti. Sopi nayujjati. Evañhi sati usūhi atthikoyeva tāni khipanto issāsoviyātivuttaṃ siyāti. Atthato pana tadubhayampi avahasitabbameva hotīti. Yasmāca chandasampayuttaṃ cittaṃ ārammaṇaṃ gaṇhantaṃ chandavasena ati icchamānaṃ viya viluppamānaṃ viya gaṇhāti. Tasmā ayaṃ ārammaṇaggahaṇe cetaso hatthappasāraṇaṃviyāti vutto. Etthaca hatthappasāraṇaṃviyāti idaṃ abhūtaparikappavacanaṃ daṭṭhabbaṃ. Na hi cittassa hatthonāma atthi. Atthavisesapākaṭatthaṃ pana abhūtaṃ bhūtaṃ viya kappetvā vuttanti daṭṭhabbaṃ. Apica, ayaṃ chandonāma thāmapatto taṇhāya balavataro hoti. Tathā hesa adhipatibhūto iddhipādabhūto ca hotīti. Yadi hi so taṇhāya samānabalo siyā. Ime sattā taṇhāya hatthe ṭhitā taṇhā pariggahitāni dhanabhogaraḥṣasukhāniva dibbabrahmasampattiyovā chaḍḍetvā vaṭṭadukkhatto niyyātumaṃ nasakkhissanti yevāti.

82. Sobhaṇā sobhaṇesu cītesu pakirantīti pakiṇṇā. Keeva **pakiṇṇakā**. Aññehi aññesaṃvā samānā **aññasamānā**. Yadā sobhaṇacītesu yuttā, tadā tehi asobhaṇato aññehi samānā. Yadā asobhaṇacītesu yuttā, tadā tehi sobhaṇato aññehi samānā sadisāti vuttaṃ hoti.

Aññasamānarāsīmhi paramatthadīpanā.

83. Idāni akusalarāsīm dassento mohotiādīmāha. Tattha muyhatīti **moho**. Muyhanti sattā etenātivā moho. Muyhanamattaṃvā moho, caturaṅgamassa viya cakkhussa sabbaso kalyāṇapakkhaṃ paṭicchādetvā cittassa andhabhāvakaṇṇanti vuttaṃ hoti. Pāpapakkaṃ pana patvā so ñāṇagatiko hotīti daṭṭhabbo. Tathā hesa pāliyaṃ micchāñāṇanti vutto. Aṭṭhakathāsuca micchāñāṇanti pāpakriyāsu upāyacintāvasenapavatto mohoti vuttaṃ. Avijjāyaca appaṭipatti micchāpaṭipattivasena duvidhabhāvo vutto. Etthaca appaṭipattīti kalyāṇapakkhe aññānameva vuccati. Micchāpaṭipattīti pāpapakke micchāñānameva vuccatīti, tathā hi pāpapakkaṃ patvā pañcadhammā ñāṇagatikā honti moho, lobho, diṭṭhi, vitakko, vicāroti. Cītena pana saddhiṃ chabbidhā honti. Tehi pakatiyā viññūjātikesu sutapariyattisampannesuca uppannā pāpakriyāsu taṃ taṃ upāyadassanavasena tesam taṃ tatha chekabhāvaṃ paṭibalabhāvaṃca sādhetīti.

84. Nahiriyati kāyaduccaritādīhi nalajjati najigucchatīti ahirī. Hirippaṭipakkhāvā ahirī, sāeva **ahirikaṃ**. Tañhi pāpa kriyāsu paccupaṭṭhitāsu hiriyā okāsaṃ adatvā tāsu ruciṃ uppādetvā pavattatīti. Tathā hi taṃ kāyaduccaritādīhi ajigucchanalakkhaṇantica alajjalakkhaṇantica vuttaṃ.

85. Naottappatīti anottappaṃ. Kāyaduccaritādīhi nabhāyati nautrasatīti attho. Ottappappaṭipakkhaṃvā **anottappaṃ**. Taṃpi hi tāsu paccupaṭṭhitāsu ottappassa okāsaṃ adatvā cittaṃ tāsu asārajjamānaṃ katvā pavattatīti. Tathā hetam kāyaduccari tādīhi asārajjalakkhaṇanti ca anuttāsalakkhaṇanti ca vuttaṃ. Vuccati ca –

Ajegucchī ahiriko, pāpāgūthāva sūkarō;
Abhīruca anottappī, salabho viya pāvakāti.

86. Uddharatīti uddhaṭam. Pāsāṇapiṭṭhe vaṭṭetvā vissatṭha geṇḍuko viya nānārammaṇesu vikkhittaṃ cittaṃ, uddhaṭassa pana cittassa uddharaṇākārapavattiyā paccayabhūto dhammo **uddhaccaṃ**. Taṃ pana vāteritaṃ jalaṃ viya dhajapaṭākā viyaca daṭṭhabbaṃ.

87. Lubbhātīti **lobho**, lubbhanti sampayuttā dhammā ete nāti lobho, lubbhanamattamevavā etanti lobho. Etthaca lubbhanamāna ārammaṇābhisaḥṣaṇaṃ daṭṭhabbaṃ. Sopana ārammaṇe lagga naṭṭhena makkaṭālepoviya abhikaṅkhaṭṭhena tattakapāle khittamaṃsa pesi viya aparicāgaṭṭhena telañjana rāgoviya taṇhānadibhāvena vaḍḍhitvā sattānaṃ apāyāvahaṭṭhena sabbāni sukkhakaṭṭha sākāpalāsa tiṇakasatāni mahāsamuddaṃ vahantī sīghatotā nadī viya daṭṭhabbo.

88. Dassanaṃ diṭṭhi. Dhammānaṃ yāthāvasabhāvesu ñāṇadassanaṃ viya tesameva ayāthāvasabhāvesu micchādassananti vuttaṃ hoti. Sāhi ekaccānaṃ paṇḍitamānīnaṃ micchāvittakabhulānaṃ uppānā thāmagatā ayāthāvapakkhe paṭivedhaññāṇagatikā hotīti. Sāpana micchābhinivesalakkhaṇā paramaṃvajjanti daṭṭhabbā.

89. Maññatīti māno. Ahaṃ loke eko puggalo asmi. Na kaṭṭhakalīngaroviya avamaññanārahoti evaṃ attānaṃ daḷhaṃ paggahevā samanupassatīti attho. Sopana jāti kuladhana bhoga yasa issariyādīhi ceva sīla suta lābhasakkārā dīhica guṇehi upatthambhito atirekataraṃ vaddhitvā attānaṃ janamajjhe ketuṃviya accuggaṃ maññati. Tasmā so unnaṭilakkhaṇotica ummādoviyātica vutto.

90. Dussatīti doso. Sopana caṇḍikkatṭhena pahatā siviṣoviya visappaṇatṭhena asanipātoviya attano nissaya dahanatṭhena dāvaggiṃviya dussanatṭhena laddhokāso sapattoviya sabbaso ahitarāsi bhāvaṭṭhena viṣa saṃsaṭṭha pūtimuttaṃ viya daṭṭhabbo.

91. Issatīti issā. Parasampattiṃ ussūyatīti attho. Sāhi paresaṃ pakatiyā laddhasampattiṃ disvā vā sutvāvā nasahati. Tassā sampattiyā vipattiṃ icchati ākaṅkhati. Asuko idaṃnāma labhissatīti sutvāpi nasahati. Tassa alābhaṃ icchati ākaṅkhati. Tasmā sā parasampattīnaṃ ussūyanalakkhaṇāti vuttā.

92. Mama eva idaṃ guṇajātaṃvā vatthuvā hotu. Mā aññassatīti evaṃ attano sampattihetu avipphārikatāvasena caratī pavattatīti maccharaṃ, tathā pavattaṃ cittaṃ. Maccharassa bhāvo **macchariyaṃ**. Idaṃca issā viya duvidhaṃ attanā laddhasampatti labhitabbasampatti vasena. Tattha pakatiyā laddhasampattiyā tāva taṃ parehi sā dhāraṇaṃvā yena kenacivā kāraṇena attasantakabhāvato mucchitvā paresaṃ santakabhāvaṃ gamissamānaṃ disvā vā sutvāvā cintetvā dukkhī dummano hoti, labhitabbasampattiyāpi asukasmim̐ dese vākālevā idaṃnāma bhavissatīti sutvāvā cintetvāvā taṃ attanāva laddhuṃ icchati. Aññesaṃ lābhaṃ naicchati. Aññe labhissatīti sutvāvā cintetvāvā dukkhī dummano hotīti. Tathā hetuṃ laddhānaṃvā labhitabbānaṃvā attano sampattīnaṃ nigguhanalakkhaṇanti vuttaṃ. Etthaca labhitabbasampattiyā yassa lābhaṃ naicchati. Solabhatītivā labhissatītivā sutvāvā cintetvāvā cittavighāto issānāma. Yaṃ yaṃ attanā laddhuṃ icchati. Taṃ taṃ attanā alabbhamānaṃ cintetvā cittavighāto macchariyaṃnāma. Na hi ete dve ekato uppajantīti.

93. Kukkuccanti ettha kiriyā kataṃ. Kucchitaṃ katanti kukataṃ. Kucchitakiriyāti attho. Paṇḍitehi ekantena ninditabbo cittappavattivisesoti vuttaṃ hoti. Atthato pana akataṃ vata me kalyāṇaṃ kataṃ pāpanti evaṃ anusocanavasena pavatto kukkucca sampayuttacittuppādoyeva, so hi tathā pavattamānopi pubbe akataṃvā kalyāṇaṃ puna kataṃ kātuṃ na sakkoti. Pubbe kataṃ vā pāpaṃ puna akataṃ kātuṃ nasakkoti. Athakho kusaladhammesu cittapariyādānāyeva saṃvattati. Tasmā kucchitakiriyā mattattā kukatanti vuccatīti. Vuttañhetuṃ aṭṭha kathāyaṃ katākatassa sāvajjānavajjassa abhimukhagamaṇaṃ paṭisāronāma. Yasmā paneso kataṃvā pāpaṃ akataṃ nakaroti. Akataṃvā kalyāṇaṃ kataṃ nakaroti. Tasmā virūpo kucchito vā paṭisāroti vipaṭisāroti. Etthaca vipaṭisāroti kukkucca meva. Kukkuccena kucchite sati taṃ sampayuttacittuppādopi kucchitoyeva. Yenaca kāraṇena kukkuccaṃ kucchitaṃnāma hoti. Teneva kāraṇena so cittuppādopi kucchitonāma hotīti katvā so cittuppādova kukatapade gahetuṃ yuttoti veditabbo. Sudinnakaṇḍaṭṭhakathāyaṃ pana ayamatto ujukato vutto. Yathāha-viññūhi akattabbatāya kucchitakiriyābhāvato kukkuccanti.

[76] Vibhāvaniyaṃ pana

Imamatthaṃ asallakkhetvā yaṃ vuttaṃ “kucchitaṃ katanti kukataṃ. Katākata duccharitasucarita”nti. Taṃ na yujjatiyeva. Etena yañca **tattha** vuttaṃ “akataṃpi hi kukatanti voharanti. Yaṃ mayā akathaṃ. Taṃ kukatantica. Idha pana katā kataṃ ārabha uppanno vipaṭisāraccittuppādo kukata”ntica. Taṃpi sabbhaṃ paṭikkhittameva hotīti.

Kukatassa yathāvuttacittuppādassa tathāpavatti hetubhāvo kukkuccaṃ. Apica, dhātupāṭhesu

kucasaddaṃ saṅkocana mano vilekhanatthesu paṭhantiyeva. Tasmā kucchitena ākārena kocati saṅkocati na pāpajigucchanākārenāti kukkucō. Kucchitenavā ākārena kocati vilikhati nakilesasallīkhanā kārenāti kukkucō. Tathā pavattadhammasamūho. Sohi kucchitena akataṃ vata me kalyāṇaṃ kataṃ pāpanti evaṃ pavattena anutthunanākārena saṅkocati. Kusaladhammasamādāne cittaṃ namitumpi nadeti. Manaṃvā vilekhati. Saddhādīnaṃ sāraddhammānaṃ tanukaraṇena cittaṃ kusalaadhammasamādāne pariyaḍinnathāmabalaṃ karoti. Tasmā kukkucoti vuccati. Yena pana dhammena yuttatā so tathā pavatto hoti. So kukkuccaṃnāma kukkucassa bhāvoti katvā. Taṃ pana yasmā pubbe akataṅca kalyāṇaṃ kataṅca pāpaṃ ārabba pacchā anutāpanavasena anusocanavasena pavattati. Tasmātaṃ pacchānutāpalakkhaṇaṃ katākatānuyocana rasanti ca vuttaṃ. Etthaca pacchānutāpalakkhaṇanti pubbe kalyāṇaṅca akatvā pāpaṅca katvā āgatattā pacchime kāle anutāpalakkhaṇanti attho. Tena kukkucassa ekantena atītārammaṇatā siddhā hoti. Paccuppannānāgatārammaṇatāca paṭisiddhāti. Katākatā nusocanarasanti ettha kataṅca pāpaṃ akataṅca kalyāṇanti yo jetabbaṃ. Vuttañhettaṃ mahāniddeṣe –

Dvīhākārehi kukkuccaṃ uppajjati katattā ca akatattā ca. Kathaṅca dvīhā.La. Akatattāca. Akataṃ me kāyasu caritaṃ. Kataṃ kāyaduccaritanti uppajjati kukkuccaṃ. Akataṃ me vacīsucaritaṃ.La. Kataṃ manoduccaritanti uppajjati kukkuccaṃ. Akatāme pāṇātipātā veramaṇī. Kato pāṇāti pātoti uppajjati kukkuccaṃ.La. Akatā me sammādiṭṭhi. Katā micchāmiṭṭhīti uppajjati kukkuccanti.

Etena pana akatasucaritā rammaṇatāya kataduccaritā rammaṇatāyaca vasena kukkucassa dvidhābhāvoyeva siddho hoti. Dvīhākārehi hi vuttaṃ. Soca kho pubbe pāpaṃ katvā pacchā apāyabhayaatajjitānaṅceva apāyesu patitvā pubbe attanā katakammaṃ anussarantānaṅca hoti. Naaññesaṃ, akataṃ me kāyasucaritaṃ. Kataṃ kāyaduccaritanti hi vuttaṃ. Yathā pana māno duvidho hoti yāthāvamāno ayāthāvamānoti. Tathā kukkuccaṃpi, yāthāvakukkuccaṃ, ayāthāva kukkuccanti duvidhaṃ hoti. Tattha ayāthāva kukkuccaṃpi uppajjamānaṃ dvīhākāreho uppajjati akataṃ vata me kalyāṇaṃ kataṃ pāpanti. Katamaṃ pana tanti. Yaṅca pubbe kalyāṇakammepi pāpasaññī pāpadiṭṭhi akatvā pāpakammepi kalyāṇasaññī kalyāṇadiṭṭhi katvā pacchā anusocanavasena uppajjati. Yaṅca pubbe kalyāṇe kalyāṇasaññī katvā pacchā pāpasaññīno pāpeca pāsaññī akatvā pacchā kalyāṇasaññīno uppajjati. Idaṃ ayāthāvakukkuccaṃnāma. Anavajje sāvajjasaññī, kappiye akappiyasaññī, anāpattiyāṃ āpattisaññītiadināpi yojetabbaṃ. Idaṅca sabbaṃ uppajjamānaṃ dvīhā kāreheva uppajjati. Tasmā dvīsueva saṅgahitanti daṭṭhabbaṃ. Yaṃ pana mahāniddeṣeyeva hatthakukkuccakaṃpi kukkuccaṃ. Pādakukkuccakaṃpi kukkuccaṃ. Hatthapādakukkuccakaṃpi kukkuccanti niddiṭṭhaṃ. Taṃ asaṃyata kukkuccaṃnāma. Yaṃ pana taṃ bhikkhu kukkuccāyantā napaṭiggaṇhiṃsūti vinaye āgataṃ. Yaṅca kathaṃ kukkuccappakatatāya āpajjati kappiye akappiyasaññītā akappiye kappiyasaññītāti āgataṃ. Taṃ vinayakukkuccaṃnāma. Taṃpana vinayaṃsayoeva. Soca kho attano avisaye kappati nukho nonukhoti saṃsappanākārena pavatto kusala kriya cittuppādo. Sopana yesaṃ uppajjati. Tesu ye sikkhākāmā, te taṃkammaṃ nakaronti. Te sandhāya kukkuccāyantā napaṭiggaṇhiṃsūti vuttaṃ. Ye pana karontiyeva. Te kappiyavattusmiṃpi āpattiṃ āpajjanti. Te sandhāya kukkuccappakatatāya āpattiṃ āpajjati vuttaṃ.

94. Thiyaticittaṃ mandamandaṃ katvā ajjhottharatīti **thināṃ**. Thiyiyanā thiyitattanti hi pāliyaṃ niddiṭṭhaṃ.

95. Medhati cetasike dhamme akammaññabhūte katvā vihiṃ satīti **middhaṃ**. Tathā hi ārammaṇe vipphāravasena taṃ taṃ iriyā pathaṃ sandhāretvā pavattamānesu sampayuttadhammesu muggarena pothetvā viya te ārammaṇato oliyāpetvā iriyāpathaṃpi sandhāretuṃ asamatthe katvā thināṃ cittaṃ abhibhavati. Middhaṃ cetasiketi.

96. Vicikicchāti ettha. Cिकicchanāṃ cिकicchā. Nāṇappaṭikā roti attho. Tikicchituṃ dukkaratāya vigatā cिकicchā etāyāti vicikicchā. Sabhāvaṃ vicināntā kicchanti kilamanti etāyātivā vicikicchā. Vicikicchativā dvelhakahāvena pavattatīti vicikicchā. Sā nīvaraṇabhūtā, paṭirūpakāti duvidhā. Tattha

buddhādīsu aṭṭhasu vatthūsu vimativasena pavattamānā nīvaraṇabhūtā. Tato aññāpana asabbaññūnaṃ tesu tesu ārammaṇesu kathaṃ nukho evaṃ nukho idaṃnukhoti vematikabhāvena pavattā sabbā vicikicchā paṭirūpakānāma. Sā pana kusalāpi hoti, akusalāpi khīṇā savānaṃ uppanna kriyābyākatāpīti. Idha pana ekantākusalabhūtā nīvaraṇavicikicchāva adhippekāti.

Akusalarāsimhi paramatthadīpanā.

97. Saddahatīti saddhā. Yathā acchaṃ pasannaṃ nisinnaṃ udakaṃ canda sūriyādīni rūpanimittāni suṭṭhu attani dahati. Evaṃ ayaṃ buddhaguṇā dīni suṭṭhu attani dahati dhāreti thapetivāti attho. Saddahantivā etāyāti saddhā. Saddahanamattamevavā etanti saddhā. Sāpi buddhā dīsu saddheyyavatthūsu akālussiyabhāvena pavattamānāeva idha adhippetā. Tato aññāpana titthiyesuvā titthiyadhammesu vā evarūpesu asaddheyyavatthūsu saddahanavasena pavattā okappanā saddhā paṭirūpakānāma hoti. Sā pana atthato micchādhimokkko yevāti. Yathā pana manussā hatthe asati ratanāni disvā pi-gahetuṃ na sakkonti. Vitte asati tesam sabbabhogā na sampajjanti. Bīje asati sassādīni nasampajjanti. Evaṃ saddhāya asati puññakriyāvatthūni nasampajjanti. Tasmā esā hatthavittabīja sadisāti vuttā.

98. Saratīti sati. Attanā katāni kattabbāni ca kalyāṇakammāvā buddhaguṇādīnivā appamajjanavasena upagacchatīti attho. Sāpi sammāsati micchāsati duvidhā hoti. Tattha sammāsati idha adhippetā. Itarā pana satiyeva na hoti. Katassa kattabbassaca pāpakammasa appamajjanavasena pavatto satipaṭirūpako akusalacittuppādoyeva. Yasmā panesā cittaṃ sabbehi akusaladhammehica rakkhituṃ kusaladhammehica yojetuṃ sakkoti. Tasmā sā rañño sabbakammika mahāamacco viya daṭṭhabbāti. Satimkhvāhaṃ bhikkhave sabbatthikaṃ vadāmīti hi vuttaṃ.

99. Hiriyaṭīti hiri. Kāyaduccaritādīhi lajjati jigucchati ukkaṇṭhatīti attho.

100. Tehiyeva ottappatīti ottappaṃ. Ubbijjātīti attho. Etthapi hiriottappappaṭirūpakānāma atthi, vuttañhi –

Lajjitabbe nalajjanti, alajjiyesu lajjareti ca;
Bhāyitabbe nabhāyanti, abhaye bhayadassinoti ca.

Yasmā pana sappurisā hiriyā attani ottappenaca paresu ārakkhadevatādīsu gāravaṃ uppādetvā pāpato vajjetvā suddhaṃ attānaṃ pariharanti. Tasmā ime dve lokapāladhammāti vuttā.

101. Lobhappaṭipakkho alobho. So hi yesu attano hitasaññitesu ārammaṇesu lobho lagganavasena pavattati, tesveva taṃ lobhaṃ vidhamitvā lobhavatthubhūtā bhavabhogasampattiyo gūtharāsimviya hīletvā jigucchitvā ekānekkamma dhātunāma hutvā pavattatīti.

102. Dosappaṭipakkho adoso. Sopi hi yesu attano ahitasaññitesu ārammaṇesu doso dussanavasena pavattati. Tesveva taṃdosam vidhamitvā diṭṭhadiṭṭhesu sattesu puññacandasadisam sommahadayam uppādetvā ekā abyāpādadhātu nāma hutvā pavattatīti. Ayamevaca brahmavihāresu mettāti vuttā. Amohopi idha vattabbo. Mohappaṭipakkho amoho. Sopi hi yesu dhammesuvā atthesuvā catūsu ariyasaccesuvā moho andhakāraṃ katvā pavattati. Tesveva taṃ mohaṃ vidhamitvā candasūriyasahasam uṭṭhāpentoviya vijjānāma hutvā pavattatīti.

103. Tatramajjhataṭīti ettha attā vuccati sabhāvo. Līnuddhaccādīnaṃ ubhinnaṃ visamapakkhānaṃ majjhe pavatto attā etassāti majjhataṭīti. Samappavatto sampayuttadhammasamūho. Tassa bhāvo majjhakkatā. Tesu tesu sampayuttadhammesu dissamānā majjhataṭīti tatramajjhataṭīti tesu tesuvā hitakammesu cittacetasikānaṃ majjhataṭīti tatramajjhataṭīti. Tathā hi sā samappavattānaṃ sampayutta dhammānaṃ ajjuhekkhanavasena samappavattānaṃ ājāneyyānaṃ

ajjuhekkhanasārathīviya daṭṭhabbāti vuttā. Ayamevaca brahmavihāresu upekkhāti vuttā.

104. Kāyappassaddhādīsu kāyoti vedanādikkhandhattaya saṅkhāto cetasikasamūho vuccati. Cittanti sobhaṇacittaṃ. Kāyassa passaddhi **kāyappassaddhi**. Cittassa passaddhi **cittappassaddhī**iādīnā samāso. Passambhaṇaṃ passaddhi. Santasītalabhāvoti attho. Yesaṃ idaṃ dvayaṃ dubbalaṃ hoti. Te puññakammesu cittaasukhaṃ napindanti. Bahiddhāeva nesam cittaṃ pakkhandati. Santatte pāsānapiṭṭhe thapitamacchoviya hoti. Yesaṃ pana balavaṃ hoti. Teyeva tattha taṃ vindanti. Tesam cittaṃ sītale uduke pakkhitta maccho viya hoti.

105. Lahubhāvo **lahutā**. Agarutā adandhatāti attho. Yesaṃ idaṃ dubbalaṃ. Tesam cittaṃ puññakammesu napasāreti saṅkocati. Tattapāsāne pakkhittapadumapupphaṃ viya hoti. Yesaṃ pana balavaṃ. Tesam cittaṃ tattha pasāreti. Sītale uduke pakkhitta padumapupphaṃ viya hoti.

106. Mudubhāvo **mudutā**. Yesaṃ idaṃ dubbalaṃ. Tesam cittaṃ puññakammesu thaddhaṃ hoti. Verīnaṃ majjhe gatamahāyodhoviya hoti. Yesaṃ pana balavaṃ. Tesam cittaṃ tattha mudu hoti. Viyaññātīnaṃ majjhe gatamahāyodho viya hoti.

107. Kammani sādhu kammaññaṃ. Tadeva **kammaññatā**. Yesaṃ idaṃ dubbalaṃ. Tesam cittaṃ puññakammesu yathicchitaṃ thapetuṃ nalabbhati, vikkirati. Paṭivāte khittathusamuṭṭhiviya hoti. Yesaṃ pana balavaṃ. Tesameva taṃ tattha yathicchitaṃ thapetuṃ labbhati navikkirati. Paṭivāte khittasuvaṇṇakkhandhoviya hoti.

108. Paṇaṇassa bhāvo pāguññaṃ. Tadeva **pāguññatā**. Yesaṃ idaṃ dubbalaṃ. Tesam cittaṃ puññakammesu vikampati vihaññati. Gambhīre uduke khittavānaroviya hoti. Yesaṃ pana balavaṃ, te saṃ taṃ tattha navikampati navihaññati. Gambhīre uduke khitta kumbhilo viya hoti.

109. Ujueva ujukaṃ, ujukassa bhāvo **ujukatā**. Yesaṃ idaṃ dubbalaṃ. Tesam cittaṃ puññakammesu visamagahikaṃ hoti. Kadāci līnaṃ. Kadāci uddhaṭaṃ. Kadāci onataṃ. Kadāci unnataṃ. Surāmadamattassa maggagamaṇaṃ viya hoti. Yesaṃ pana balavaṃ, tesam taṃ vuttavipariya yena veditabbanti.

110. Etthaca siddhesupi cittappassaddhādikesu vuttasu viṣuṃ kāyappassaddhādīnaṃ vacanaṃ tesam vasena rūpakāyassapi passaddhādī dīpanatthanti veditabbaṃ. Tattha taṃ taṃ suttantaṃ sutvā gelaññavuṭṭhā nādīsu rūpakāyassa passaddhabhāvo pākaṭo iddhimantānaṃ iddhiyā ākāsagamaṇādīsu lahu bhāvo. Kāyaṃ khuddakaṃ vā mahantaṃ vā katvā nimminanesu mudubhāvo. Antopathaviyaṃ vā antopabbate suvā asajjamānaṃ katvā gamaṇādīsu kammaññabhāvo. Nāgavaṇṇaṃ vā garuḷavaṇṇaṃ vā katvā nimminanādīsu paṇaṇabhāvo tesveva sabbesu yathānimmitavasena cirappavattibhāvesu ujukabhāvo pākaṭo hotīti veditabbo. Samaṃ dhārentīti sādharmaṇā, sabbehi sobhaṇacittehi, tesam vā sādharmaṇā **sobhaṇa sādharmaṇā**.

111. Sammāvācāti ettha tividhā sammāvācā kathā, cetanā, virativasena, tattha atthadhammappaṭisaṃyuttā subhāsītā vācā kathā sammāvācānāma. Taṃsamuṭṭhāpikā kusalakriyacetanā cetanāsammāvācānāma. Yā pana musāvādā veramaṇādīni sikkhāpadāni samādiyantassavā adhiṭṭhahantassavā sampattaṃ vatthuṃ avītikamantassavā pāpaviramaṇākārena cittassa pavatti. Ayaṃ viratī sammāvācānāma. Sā idha adhippetā. Sammā vadanti etā yāti sammāvācā. Etāyāti cettha karaṇatthe hetuatthe vā karaṇavacanaṃ daṭṭhabbaṃ. Tattha vācāya sikkhāpadāni samādiyantassa samādānavacanaṇi sandhāya karaṇattho hetuattho ca yujjati. Tato yathāsamādinānīvā yathādhiṭṭhitānīvā sikkhāpadāni suṭṭhurakkhāmāti yāni anavajjānieva vacanāni vadantā vicaranti. Tāni sandhāya karaṇatthānukūlo hetu atthoyeva yujjatīti. Athavā, tathā vadantuvā māvā. Ayaṃpana vadamānesu sati tesam sammā vattumeva deti. Namicchā vattunti katvā sammā vācātveva vuccati. Apica, ayaṃ vacīduccarītānaṃ pajahanavasena pavattamānā vacīdvārasuddhiyā eva hotīti sammāvācāti

vuccatīti.

112. Sammākammantopi tividho kriyā, cetanā, virati vasena. Tattha yaṃkiñci anavajjaṃ kammaṃ karontassa kāyikakriyā kriyākammantonāma. Taṃsamuttāhāpikā cetanā cetanākammanto nāma. Yā pana pāṇātipātā veramaṇādāni sikkhāpadāni samādi yantassavā adhiṭṭhahantassavā sampattaṃ vatthuṃ avītikkamantassavā pāpaviramaṇākārena cittassa pavatti. Ayaṃ virati sammākammanto nāma. Sammā karonti etenāti sammākammaṃ, tadeva sammā kammanto suttanto vanantoviya. Sesamettha vuttanayameva.

113. Sammāājīvopi vīriya, virativasena duvidho. Tattha pakatiyā anavajjāni kasikkammādāniva bhikkhācariyādāniva katvā jīvitam kappentānaṃ uttāhābalasāṅkhāto vāyāmo vīriyasammāājīvonāma. Yā pana ājīvasuddhiṃ apekkhitvā attano ājīvasīlavipattikāraṇāni kāyavacīduccarītāni pajahantānaṃ pāpaviramaṇākārena cittassa pavatti. Ayaṃ virati ājīvonāma. Ayamidhādhippeto. Sammā ājīvanti jīvitam pavattenti etenāti sammāājīvo. Sesamettha vuttanayamevāti.

114. Ekekāpi cettha sampatta virati, samādāna virati, samucchavedavirativasena tividhā. Tattha yā sikkhāpadāni asamā diyitvāvā samādinānīpivā tāni anapekkhitvā kevalam hiri ottappabaleneva sampattaṃ vatthuṃ avītikkamantānaṃ uppannā virati. Ayaṃ sampattaviratināma. Sā paccuppannārammaṇāyeva. Pañcasikkhā padā paccuppannārammaṇāti hi vuttaṃ. Yā pana sikkhāpadāni samādi yantassavā adhiṭṭhahantassavā yathāsamādinānīvā yathādhiṭṭhitāni vā sutthurakkhāmīti sampatta vatthuṃ apītikkamantassavā uppannā. Ayaṃ samādanaviratināma. Sā pana paccuppannārammaṇāvā hoti anāgatārammaṇāvā. Tathā hi pañcasikkhāpadā paccuppannārammaṇāti idaṃ sampattavirativasena vuttanti aṭṭhakathāyaṃ vuttaṃ. Maggakkhaṇe pana sabbaduccarītānaṃ paccayasamucchavedavasena uppannā samucchavedaviratināma. Sā pana nibbānārammaṇāyeva. Phalaviratipi ettheva saṅgahitāti. Tattha lokiyaviratiyo jīvitindriyādāni vītikkamitabbavatthūni ārammaṇam katvā pāṇātipātādāni viramitabbavatthūni pajahanti. Lokuttaraviratiyo pana nibbānaṃ ārammaṇam katvā tāniyeva viramitabbavatthūni pajahantīti daṭṭhabbam.

115. Paradukkhe sati kāruṇikānaṃ hadayakhedaṃ karotīti **karuṇā**. Kirativā paradukkham vikkhipati, kiṇātivā paradukkham hiṃsatīti karuṇā. Kiriyati dukkhitesu pasāriyatītivā karuṇā. Apica kali uṇāti chedo. Kalīti dukkham vuccati, yathā-kali sambhave bhaveti. Kalītivā pāpapi parājayopi vuccati. Pāpe kali parājayeti hi vuttaṃ. Sabbañcetam kāruṇikā naṃ kāruṇīahetubhūtaṃ hoti. Iti kalim dukkhamvā pāpamvā sabbasampattito parājayaṃvā sattehi avanti rakkhanti, sattevā tato vidhakalito avanti rakkhanti kāruṇikā janā etāyāti karuṇā.

116. Parasampattiṃ disvā modanti etāyāti **muditā**. Natthi pamāṇam etesanti appamāṇā, sattā. Appamāṇesu bhavāti **appamaññā**. Etāhi ettakesuyeva sattesu pavattetabbā. Na ito aññesūti evaṃ paricchaddappamāṇassa abhāvā ekasmiṃ satte pavattāpi appamaññāevanāma hontīti.

[77] **Ṭikāsu** pana

Appamāṇasattā rammaṇattā appamāṇā. Tāeva appamaññāti vuttaṃ. Tam na sundaram.

117. Paññindriyanti heṭṭhā vutto amohoeva. So hi pajānanaṭṭhena paññā, adhipatiyaṭṭhena indriyañcāti katvā paññindriyanti vuccatīti.

Sobhaṇarāsīmhi paramatthadīpanā.

118. Ettāvātītiādi tiṇṇam rāsīnaṃ saṅgaho. Evaṃ dvipaññāsa sarūpaṃ dassetvā idāni cetoyuttappakāram dassento tesantiādīmāha. Ito cetasiṅkānaṃ sarūpadassanato param tesam cittāvīyuttānaṃ citta aviyuttānaṃ cetasiṅkānaṃ cittuppādesu paccekam sampayogo tathāyogaṃ

vuccateti yojanā. **Cittuppādesūti** cittesu icceva attho. Uppajjanti cetasikā etesūti uppādā. Cittānieva uppādā cittuppādāti katvā. Dvipañcaviññānānam sabbadubbalatā tesu cha pakiṇṇakā nuppajjanti. Bhāvanābalena pahīnattā vitakko dutiyajjhānikādīsu, vicāro tatīyajjhānikādīsu, pīti catutthajjhānikādīsu nuppajjati. Sanniṭṭhānasabhāvattā adhimokkho asanniṭṭhānasabhāve vicikicchā citte nuppajjati. Vīriyaṃ balanāyakattā dubbalesu pañcadvārāvajjanā dīsu soḷasacittesu nuppajjati. Pīti sampiyāyanasabhāvattā domanassupekkhā sahagatesu nuppajjati. Chando icchāsabhāvattā icchārahitesu ahetukesu momūhacittesuca nuppajjatīti āha **pakiṇṇakesupana vitakko.La. Momūhavajjitacittesūti**. Te pana cittuppādā pakiṇṇakavivajjitā sapakiṇṇakāti sambandho.

119. Akusalesūti akusalacetasikesu. Sabbākusala sādharmaṇānāma. Tasmā sabbesupi dvādasākusalacittesu labbhantīti yojanā.

[78] Vibhāvanīyaṃ pana

Pacchimaṃ purimassa samatthanavacananti adhippetam. Tam na sundaram.

Idaṅhi ṭhānaṃ cittesu labbhamānatādassanapadhānanti. Yasmā pana sabbāni akusalacittāni imehi catūhi vinā nuppajjanti. Na hi tāni pāpesu ādīnavaṃ passivā ṭhitānaṃ uppajjanti. Naca tehi lajjāyavā bhayenavā ukkaṅṭhitānaṃ. Nāpi kusalesu dhammesu samāhitānanti. Tasmā te sabbesu tesu labbhantīti. Yasmāca diṭṭhimānā khandhesu assādaṃ amuñcivāva tesu tathā tathā āmasitvā pavattanti. Tasmā te lobhamūlacittesveva uppajjanti. Tattha uppajjantesu pana tesu diṭṭhi khandhesu attaggāhaṃ daḷhaṃ gahetvā taṃ attam niccatādīhi micchāsabhāvehieva parāmasantī pavattati. Māno pana khandhe ahanti daḷhaṃ gahetvā taṃ gahitākāraṃ seyya tādīhieva āmasanto pavattati. Tasmā te āmasanākārato asadisavuttinoeva hontīti āha. **Diṭṭhicatūsu.La. Vippayuttēsūti**. Ye pana diṭṭhigatikā diṭṭhiyā yathāgahitaṃ attānameva ahanti gaṅhanti. Tesampi diṭṭhimānā āmasanākāraṃ patvā asadisavuttikāeva hontīti. Na hi mānassa viya diṭṭhiyā atta saṃpaggaḥaṇe byāpāro atthi. Na ca diṭṭhiyā viya mānassa dhammānaṃ ayāthāvapakkhaparikkappaneti. Teneva hi ahaṅgāho māno anāgāmīnampi pavattati. Attaggāhabhūtā pana diṭṭhi puthujjanāna mevāti.

[79] Vibhāvanīyaṃ pana

“Mānopi ahaṃmānavasena pavattanato diṭṭhisadisova pavattatīti diṭṭhiyā saha ekacittuppāde napavattatī”ti vatvā kesara sīho pamāya taṃ atthaṃ sādheti. Tam na sundaram.

Sadisappavatti hi nāma sahapavattiyā eva kāraṇanti. Macchariyaṃ pana attasampattīsu lagganalobhasamuṭṭhitampi tāsam parehi sādharmaṇabhāvaṃ asahanākārena pavattattā ekantena paṭighasampa yuttameva hotīti vuttaṃ **dosu.La. Cittēsūti**. Akammañña lakkhaṇaṃ thinamiddhaṃ kammaññasabhāvesu asaṅkhārikesu nasambhavatīti vuttaṃ **thinamiddhaṃ pañcasu sasaṅkhārika cittēsūti**. Cattāro sabbā kusalasādharmaṇā. Tayo lobha diṭṭhimānā. Cattāro dosādayo. Dvayaṃ thinamiddhaṃ. **Vicikicchā cittedātī** casaddo avadhāraṇe. Vicikicchācittēvāti attho. Catuddasa akusala cetasikā.

120. Sobhaṇēsūti sobhaṇacetasikesu. Lokuttare aṭṭhaṅgikamagge tīsu khandhesu paññākkhandhe sammāsaṅkappo nāma sammādiṭṭhipacchimakova hoti. Tasmā pādakajjhānādivasena tasmiṃ asatipi paññākkhandho nāparihāyati. Sīlasamādhikkhandhadhammesu pana eko ekassa kiccaṃ nasādheti. Tasmā lokuttara maggo sattaṅgikato heṭṭhā napavattatīti āha **viratiyo pana tissopi.La. Labbhantīti**. Niyatāva ekatova sabbathāpi labbhantīti yojanā. Tattha **niyatāvāti** na lokiyesuviya kadācieva labbhanti. Athakho sabbadāpi niyatā hutvāva labbhanti. Kasmā, lokuttaradhammānaṃ niccaṃ sīlesu paripūrakāritāvasena pavattattā. Na hi te lokiyā viya kadāci dānavasena kadāci sutapariyattivasena kadāci kasiṇabhāvanādivasena pavattantīti. Ekato vāti nalokiyesu viya visuṃ visuṃ labbhanti. Athakho tissopi ekato hutvāva labbhanti. Kasmā, abhinnārammaṇattā. Na hi te lokiyā viya

vītikkamitabbavatthusankhātāni jīvitindriyādīni nānārammaṇāni ārabba pavattanti. Ekampana nibbānameva ārabhapavattantīti. **Sabbathāpīti** na lokiyesu viya ekade sappahānavasena labbhanti. Athakho tissopi anavasesa ducarita durājivappahānākārena labbhanti. Lokiyesuhi sakim uppanā sammāvācā catubbidhāni vacīduccarītāni sabbāni ekato pajahitum nasakkoti. Musāvādavirati musāvādameva pajahitum sakkoti. Na itarāni. Musāvādampi samūlam sānusayam pajahitum nasakkoti. Tathā piṣuṇavācā virati piṣuṇavācameva pajahitum sakkoti. Na itarāni. Piṣuṇavācampi samūlam sānusayam pajahitum na sakkoti. Sabbam vitthāretabbam. Lokuttaresu pana sakim uppanā sammāvācā sabbāni vacīduccarītāni samūlāni sānusayāni pajahati. Sakim uppano sammāājīvo sabbāni ājīvahetukāni kāyavacīduccarītāni samūlāni sānusayāni pajahati. Iti tisso lokuttaresueva sabbathāpi labbhantīti. Visaddo avayavasampiṇḍanattho. Sakim uppanā ekā sammāvācā musāvādappahānavasenāpi labbhanti. Nakevalaṅca tappahānavaseneva. Athakho piṣuṇavācāpahānavasenāpi labbhantīti sabbam vattabbam. Etthaca ducarītāni samūlāni sānusayānīti ettha kāyavacīcopana bhāgiyāni kāmarāgānusayādīni uparimaggavajjhāni kilesajātāni arūpasekkhānaṃpi santiyeva. Kāmarūpasekkhānaṃ pana vattabbameva natthi. Tasmā tesam pajahanavasena uparimagga phalaviratīnaṃ ducaritappahānaṃ daṭṭhabbam. Kāmāvacarakusalesveva, napana kāmāvacaravipākakriyacittesu, nāpimahaggatacittesūti adhippāyo. Kāmāvacarakusalesupi kāmabhūmiyam uppannesueva, narūpārūpabhūmiyam uppannesu. Na hi brahmānaṃ viramitabbavattu sankhātāni kāyavacīduccarītānīnaṃ atthi. Naca lokiyaviratiyo viramitabba vatthurahitesu puggalesu pavattantīti. Upari chakāmāvacaradeve supi napavattantīti vadanti. Tam kathāvatthumhi vicāritameva. Yadi evam manussalokepi tisu heṭṭhimaphalaṭṭhesu tāsam appavatti āpajjati. Na hi tesampi pānātipātādīni viramitabbavattūnīnaṃ atthīti. Saccam, idha pana sattavidhaāpattikkhandhāpi viramitabbavattūṭṭhāne ṭhitā. Tathā tivīdhakuhānavattūnica. Tānica kānici tesam phalaṭṭhānaṃpi sādharmaṇīneva. Manussānaṅca yāni kānici tassa tassa samādinna sikkhāpadassa vatthūnīpi viramitabbavattūnīneva. Yānīpi kāmasekkhānaṃ kāyavācā vipphanākarāni kilesajātāni samucchadaviratīnaṃ vatthubhūtāni santi. Tāni tesam tadanā viratīnaṃpi vatthūnīevāti. **Kadāci sandissantīti** samādānasampattaviratīnaṃ aññataravasena pavattakāleeva sandissanti. Evam sandissa mānāpi bhinnārammaṇattā naekato hutvā sandissantīti vuttam **visum visuntīti**. Visumvisum sandissamānāpi ekekaducaritappahānavaseneva sandissanti. Na lokuttaresu viya sabbathāpīti daṭṭhabbam.

121. Appanāpattānaṃ appamaññānaṃ somanassasahagatabhāvova vibhaṅge vuttoti vuttam **pañcamajjhānavajjitamahaggatacittesūti**. Etāhi parasattānaṃ hetu adhimattabyāpārā honti, tasmā atisantāya nibyāpārāya pañcamajjhānupekkhāya saha napavattantīti. Appanāpubbabhāgabhūtānaṃ pana tāsam upekkhāvedanāyapi sampayogo aṭṭhakathāyaṃ anuññātoyevāti vuttam **kāmāvacara.La. Cittesucāti. Kadācīti** kāruññāppakatikassa anissukinoca paresam vipattisampattidassanakāle. **Nānāhutvā jāyantīti** tesam vipattidassanakāle anukampanavasena karuṇā eva jāyati, namuditā. Sampattidassanakāle pana modanavasena muditāya jāyati, nakuṇṇāti evam visum visum hutvā jāyantīti attho. Yasmā panetā dosasamuṭṭhitānaṃ vihiṃsā aratīnaṃ nissaraṇabhūtāti suttantesu vuttā. Domanassapaṭipakkhaṅcaso manassameva hoti. Tasmā tāsam appanāpubbabhāgabhūtānaṃpi niccam somanassayogameva keci icchantīti vuttam **upekkhāsahagatesu.La. Keci vadantīti**. So pana tesam vādo aṭṭhakathāyapi saha viruddho. Tasmā tam bahū viññuno na sampaṭicchantīti katvā sovādo therena kecivādonāma kato. Yasmāca sabbesaṃpi lokiya lokuttarajjhānānaṃ pubbabhāga bhāvanā nāma appanāsannakāleeva somanassajjhānānaṃ pubbabhāgā somanassasahagatā honti. Upekkhājjhānānaṃ pubbabhāgā upekkhāsahagatā honti. Anāsannakāle pana sabbesaṃpi tesam pubbabhāgā kadāci somanassasahagatā, kadāci upekkhāsahagatāhontīti. Tasmā so vādo kecivādova katum yuttoti. Etthaca sabbānīpi samathavipassanābhāvanācittānīnaṃ ādimhi yebhuyyena upekkhāsahagatāneva bhavyeyum, yadiyī tāni āditoyeva paṭṭhāya somanassasahajātāni siyum. Tadā ime sattā so manassajātesu kammesu anabhiratānāma natthīti aññam kammaṃ chaḍḍetvā bhāvanākammeva anuyūñjeyyuntīti. Pacchā pana attano bhāvanāya pubbāpariyavisesadassanakāleeva somanassa sahajātāni bhavanti. Paṭikūlā rammaṇesu pana asubhabhāvanācittesu dukkhasattārammaṇesuca karuṇābhāvanācittesu vattabbameva natthi. Apica imā karuṇāmuditānāma pakatikālepi uppajjantiyeva. Tāsu pana muditā tāva iṭṭhasampattivisayāti

sāyebhuyyena somanassa sahaajātāti yuttametam. Karuṇā pana anīṭṭhavipattivisayāti sā yebhuyyena upekkhāsahajātā eva siyā. Naca etā parasattahetu adhimatta byāpārāti katvā upekkhāvedanāya saha viruddhāevāti sakkā vattum. Sā hi appanaṃ apattā vedanupekkhānāma ārammaṇarasānubhavaneeva nibyāpārāhoti. Na aññakiccesu. Tathā hi sattā upekkhāsahagata cittehi adinnaṃpi ādiyanti, dānaṃpi denti, aññānīpi mahantāni puññāpuññakammāni karontiyevatī. Tasmā appanā pattānāññeva tasmaṃ vedanupekkhāya saha viruddhabhāvo vattum yuttoti.

[80] Ettāvatā yaṃ vuttaṃ **vibhāvaniyaṃ**

“Karuṇā muditā bhāvanākāle appanāvīthito pubbe paricayavasena upekkhāsahagatacittēhi pari kammaṃ hoti. Yathātaṃ paguṇagantham sajjhāyantassa kadāci aññavihi tassāpi sajjhāyanaṃ, yathāca paguṇavipassanāya saṅkhāre sammasantassakadāci paricayabalena ñāṇavippayuttacittēhi sammasananti upekkhā sahatākāmvacaresu karuṇā muditānaṃ asambhavavādo kecivādo kato”ti. Taṃ paṭikkhittaṃ hotīti daṭṭhabbamaṃ.

Kiñcāpi kasiṇanimittādinī ārammaṇāni agambhīrānieva honti. Tathāpi yogakammabalena cittasamādhānabalena kilesa dūrībhāvenaca tadārammaṇesu jhānacittesu ñāṇaṃ ekantena pavatta tiyevatī āha **sabbesupi pañca.La. Cittesucāti.**

122. Tayo viratidhammā. Dvayaṃ appamaññāyugaḷaṃ. Evaṃ so bhaṇacetāsikā sobhaṇesveva cittesu catudhā catūhi pakārehi sampayuttāti yojanā. Idāni sabbesaṃpi ceto yuttānaṃ niyatā niyatayogivibhāgaṃ dassetum issātiādimāha. Karuṇā ādi yassāti karuṇādi. Appamaññā dvayaṃ. Issāmaccherakukkucānīca viratīyoca karuṇādi **issāmacche rakukuccaviratīkaruṇādayo.** Te nānāca jāyanti, kadācīca jāyanti. Mānoca kadācieva jāyati. Thīnamiddhañca tathā kadāci eva jāyati. Jāyamānaṃ pana aññamaññā saheva jāyati. Nanānāti yojanā. Etthaca appamaññāvīratīnaṃ nānā kadāci yogo heṭṭhāca vutto. Uparīca vakkhati. Issādīnaṃca uparī vakkhati. Mānathīnamiddhānaṃ pana idha vattabbotī. Tattha māno catūsu dīṭṭhivippayuttesu labbhamānōpi kadāci tesam seyyo hamasmītiādinā pavattakāleeva labbhati, naaññadā. Thīnamiddhaṃ pañcasu saṅkhārikesu labbhamānaṃpi kadāci tesam niddatībhūtavasena akammaññātāya pavattikāleeva labbhati. Na aññadā. Tadā labbhamānaṃpana dvayaṃ saheva labbhati. Na nānāti.

[81] **Vibhāvaniyaṃ** pana

“Thīnamiddhaṃ kadāci issāmaccherakukkuccehīceva mānenaca saha jāyati. Kadāci tehi tenaca nānā jāyatī”ti yojanā vuttā. Sā sārato na paccetabbā.

Na hi tehi tenaca tassa sahabhāvo nānābhāvoca kiccārammaṇavīrodhāvīroddhabhāvena siddhoti.

Yāca **ṭīkāyaṃ**

Mānoca thīnamiddhañca kadāci nānā jāyati. Kāraṇaṃ vuttameva. Yojanā vuttā. Sāpi na sundarā. Kadāci saha jāyatīti.

Yathāvuttānusārenāti sattaṣabbatthayujjantītiādinā vuttappakāraṃ anusārena **sesāti** ekādasahī aniyata yogīni avasesā ekacattālīsadhammā. Te yathāvuttānusārena attanā labbhamāna cītuppādesu aniyatayogīno veditabbāti yojanā.

123. Evaṃ cetāsikānaṃ yogaṭṭhānaparicchīdanavasena sampayoganaṃ dassetvā idāni yuttadhammārāsīparicchīdanavasena saṅgaha nayaṃ dassento **saṅghaṅcātīdi**dimāha. Idāni tesam saṅghaṅcā yathārahaṃ pavakkhāmīti yojanā. **Chattimsāti**ādi saṅghanayassa uddesagāthā. Sattapaññātarammaṇā appamaññā nibbānā rammaṇesu nalabbhantīti vuttaṃ **appamaññāvājjitāti** tathā

aṭṭhasu dutīyajjhānikacittesu vitakkavajjā aññasamānā dvādasaceta sikā appamaññāvajjitā tevīsati sobhaṇacetasikāceti pañcattimsa dhammā saṅgahaṃ gacchantītiādinayaṃ tathāsaddena niddisati. **Teevāti** vitakka vicāra pītisukhavajjā upekkhāsahagatā te eva tettimsadhammā. **Aṭṭhasūti** ettha aṭṭhaca aṭṭhaca aṭṭhāti ekasesaniddeso, vicchālopaniddeso vā daṭṭhabbo. **Pañcakajjhāna vasenāti** pāliyaṃ pañcakanayena vuttassa jhānabhedassa vasena, catukkanayena vuttassa jhānabhedassa vasena pana catudhāva saṅgaho hotīti adhippāyo. Dvīsu rūpapaṭhamajjhānalābhīsu dutīyajjhānaṃ uppādesu mando vitakkamo atikkamituṃ sakkoti. Tassa caturaṅgikaṃ dutīyajjhānaṃ uppajjati. Tikkhapañño pana vitakka vicāre ekato atikkamituṃ sakkoti. Tassa tiyaṅgikaṃ dutīyajjhānaṃ uppajjatīti ayaṃ tesam nayānaṃ viseso.

124. Kiccārammaṇaviruddhattā viratiyo mahaggatesu nuppajjantīti āha **viratittayavajjitāti**. Viratiyo hi kāyavacī visodhanakiccā honti. Mahaggatajjhānāni pana suvisuddhakāyavacī payogasseva cittavisodhanakiccāni. Viratiyoca vītikkamitabba vatthuṃvā nibbānaṃvā ārabba pavattanti. Mahaggatajjhānāni pana paññatti yovā mahaggatadhammevāti.

125. Kiccārammaṇavi ruddhattāyeva viratiappamaññāyo ekasmiṃ citte dve nalabbhantīti vuttaṃ. **Appamaññā viratiyo panettha.La. Yojetabbāti**. Viratiyo ekantena dussilyappahāna kiccattā tappahāna kiccarahitesu lokiyābyākatesu nalabbhantīti vuttaṃ **virativajjitāti**. Pañcasikkhāpadā kusalāyevāti hi pāliyaṃ vuttaṃ. Idañca lokiyasikkhāpadāni sandhāya vuttanti daṭṭhabbaṃ. Appamaññānaṃ sattapaññattārammaṇattā mahāvīpākānañca ekanta parittārammaṇattā tāsam tesu sambhavo natthīti vuttaṃ **appamaññā virativajjitāti**. Nanu kāmakusalaṃ sattapaññattādi ārammaṇaṃpi hotīti tabbipākenapi tena sadisā rammaṇena bhavitabbanti. Na. Vikapparahitattā. Paññattiyo hi avijjamānattā mahaggatānuttaradhammāca saṅhasukhumadhammattā tathā tathā vikappetvāvā paṭivijjhītvāvā gaṇhantānaṃ kusalādīnaṃ eva ārammaṇabhūtā honti. Kānavīpākāni pana sayam atidubbalatāya ārammaṇaṃ vikappetvā vigahetuṃ nasakkonti, kuto paṭivijjhītvā gahetuṃ. Tasmā tāni paññattiyovā mahaggatānuttaradhammevā ālambituṃ na sakkontīti daṭṭhabbaṃ. Mahaggatavīpākāni pana vikapparahitānīpi appanāpattakammavise sanibbattattā bhāvanābalanimmitāni paññattivisesāni ālambituṃ sakkontīti.

[82] Vibhāvaniyaṃ pana

Kāmatanḥhādhinakammajjanitattā kānavīpākāni kāmatanḥhāya ārammaṇabhūte kāmadhammeva ālambituṃ labhantīti adhippāyena “kāmatanḥhādhinassa phalabhūtattā”ti vatvā dāsiputtopamāya tadatthaṃ vibhāveti. Taṃ vicāretabbaṃ.

Evañhi sati mahaggatavīpākānīpi rūpārūpatanḥhādhiṇa kammajjanitāni eva hontīti tānīpi rūpārūpatanḥhānaṃ ārammaṇabhūte mahaggata dhammeva ālambeyyunti. Apica, kāmatanḥhāpi kāmadhammeva ārammaṇaṃ karoti. Na paññattidhammeti natthi. Naca itthipurisādi hattha pādādi paññattīsu assādasasena pavattā taṅhā kāmatanḥhā nāma nahotīti atthi. **Subheti** kusale. **Maneti** niddhāraṇe bhuttaṃ. Subhe kriye pāketi niddhāraṇīyaṃ daṭṭhabbaṃ. Sahetu. La. Mane dvādasadhāva saṅgahotivā yojetabbaṃ. **Navijjantetthāti** vajjitānaṃ saṅgaho. **Etthāti** sobhaṇacittesu. **Dvayanti** viratiappamaññādukaṃ. **Anuttareti** visesakānaṃ saṅgaho. **Jhāna dhammāti** vitakkādayo. Majjhime mahaggate appamaññāca jhānadhammā ca. Parittesu kāmasobhaṇesu appamaññāca virati nānapīti yoca visesakā, saṅghanaya bheda kārakāti attho.

126. Sattarasadhammā lobhadīṭṭhīhi saddhiṃ ekūnavīsati hutvā saṅgahaṃ gacchantīti yojanā. Pītivajjitā aññasamānā dvādasa cetasikā akusalasādhāraṇā cattārocāti soḷasadhammā lobhadīṭṭhīhi saha aṭṭhārasa hutvā saṅgahaṃ gacchantīti yojanā. Issāmacchāriya kukkucāni kiccato ārammaṇato ca bhinnāni hontīti vuttaṃ **issā.La. Yojetabbānīti**. Sabbesupi akusalacittuppādesu sampayuttadhammā dhammato asadisāeva honti. Gaṇanato pana ekacce ekaccehi sadisā eva hontīti vuttaṃ **dvādasa.La. Saṅgahitābhavantīti**. Etthaca pañcasu asaṅkhārikesu pathamadutīyesu ekūnavīsati. Tatīyacatutthesu

aṭṭhārasa. Pañcame vīsati. Pañcasu sasañkhārikesu pathamadutīyesu ekavīsati. Tatīyacatutthesu vīsati. Pañcame dvāvīsati. Momūhadvaye pannarasāti evaṃ akusalesu satta saṅgahā bhavanti. Tenāha ekūnavīsatiādiṃ. **Sādhāraṇā**ti sabbā kusalasādhāraṇā. **Samānā**ti aññasamānā. **Apareti** chandapītiadhimokkhe thapetvā ekacce.

127. Hasanacitteti hasituppādacitte. **Voṭṭhabbaneti** manodvārāvajjane. **Sukhasantīraṇeti** somanassa santīraṇe. **Mano dhātuttikā hetuka paṭisandhi yugaḷeti** pañcadvārāvajjana sampaṭicchanaadvayasañkhāte manodhātuttikeceva upekkhā santīraṇa dvayasañkhāte ahetuka paṭisandhiyugaḷeca. Sabbattha sabbesu ahetukesu satta, tato sesā pakiṇṇakā pana yathārahaṃ yujjanti, iti tettiṃsa vidhasaṅgaho mayā vuttoti yojanā.

128. Idāni ayaṃ cetasikaniddesoti katvā cittassa viya ekassapi cetasikassa bhūmijāti sampayogādi bhedenā vibhāgo kathetabboti taṃ dassetuṃ antimagāthamāha. Itthaṃ iminā yathāvuttappakārena cittāviyuttānaṃ cetasikānaṃ soḷasavidhaṃ sampayogaṅca tettiṃsavidhaṃ saṅgahaṅca ñatvā tesam yathā yogaṃ cittaena samaṃ bhedaṃ uddiseti yojanā. Phasso tāva ekūnavutiyā ekavīsasatesuvā cittesu yuttattā ekūnavuti ekavīsasatavidhevāti evaṃ dvipañāsacetāsike visuṃ visuṃ uddharitvā yathāyogaṃ bhūmijātisampayogādibhedeḥi tesam vibhāgaṃ katheyvāti attho.

Iti paramatthadīpaniyānāma abhidhammatthasaṅgahassa

Catutthavaṇṇanāya cetāsika saṅgahassa

Paramatthadīpanā niṭṭhitā.

Pakiṇṇaka saṅgaha paramatthadīpanī

129. Evaṃ visuṃ visuṃ cittacetāsikānaṃ niddesaṃ dassetvā idāni puna ubhinnaṃ niddesaṃ dassento **sampayuttāyathāyogantiādimāha**. Yathāyogaṃ sampayuttā sabhāvato tepaññaṃsa cittacetāsikā ye dhammā mayā visuṃ visuṃ niddiṭṭhā. Idāni yathā rahaṃ tesam ubhinnaṃ saṅgahonāma niyyateti yojanā. Tattha attano attano bhāvo sabhāvo. Dhammānaṃ āvenikalakkhaṇanti vuttaṃ hoti. Cittaṃ tāva bhūmijātisampayogādibhedena ekūna navutividhaṃpi attano ārammaṇa vijānanaśaṅkhātena āvenikalakkhaṇena ekameva hoti. Phassopi bhūmijātisampayo gādibhedena ekūnavutividhopi phusanalakkhaṇena ekova hoti tathā vedanāsaññādayoti evaṃ sabhāvato tepaññaṃsa eva hontīti. Vedanāhetuto kiccadvārālambaṇavattuto pavatto saṅgahoti sambandho. Tattha **vedanāhetutoti** vedanābheda hetubhedato. Evaṃ kiccadvārālambaṇa vatthutoti etthapi. **Cittuppādavasenevāti** cittavaseneva niyyateti sambandho. Evasaddena cetāsike nivatteti. Ettāvatā channaṃ pakiṇṇakasāṅgahānaṃ vacanatto idheva tāva therena dassito hoti vedanābhedenā cittacetāsikānaṃ saṅgaho vedanāsaṅgaho, hetubhedena cittacetāsikānaṃ saṅgaho hetusaṅgahotiādinā.

[83] Vibhāvaniyaṃ pana

Cittuppādasaddena cetāsikadhammepi gahetvā aññaṃ nivatte tabbaṃ apassanto “na katthaci taṃvirahenā”ti vadati. Taṃ nayujjatiyeva.

Na hi idha ettakā cetāsikā sukhasahagatā, ettakā dukkha saḥagatātiādinā ekopi saṅgaho cetāsikehi nīto nāma atthi. Sukhasahagataṃ kusalavipākaṃ kāyaviññāṇamekamevātiādinā pana cittaenaeva nīhoti. Citte pana siddhe ceta sikāpi siddhāevāti katvā cittuppādavasenevāti idaṃ vuttanti daṭṭhabbaṃ.

130. Tatthāti tesu chasu saṅgahesu. Vedanābhedenā taṃsampayuttānaṃ cittacetāsikānaṃ saṅgaho **vedanāsaṅgaho**.

[84] Vibhāvaniyaṃ pana

“Sukhādivedanānaṃ taṃsahagatacittuppādānañca vibhāgavasena saṅgaho vedanāsaṅgaho”ti vuttaṃ. Tattha casaddena vedanāsaṅgahoca vedanāsaṅgata cittuppāda saṅgahocāti imasmiṃ atthe vedanāsaṅgahoti ekasesaniddeso hotīti dasseti. Taṃ na sundaraṃ.

Idha hi vedanābhedo imassa saṅgahassa nissayadhammapariggahatthameva vutto. Na vedanānaṃca visuṃ saṅgahadassanattanti. Tatthati**vidhā vedanā**ti kasmā vuttaṃ. Nanu saṃyuttake dvepi tissopi pañcapi chapī aṭṭhārasapi chattiṃsapi aṭṭhasatampi vedanā vuttāti. Saccamaṃ. Anubhavanalakkhaṇena pana vedanā tividhāeva hoti. Ye hi keci yaṃkiñci ārammaṇaṃ anubhavanti. Te taṃ sātatoṃva anubhavanti asātatoṃva majjhataṃtoṃva. Tato añño pakāro natthīti. Añña pana pabhedā tena tena pariyāyena vuttā. Tattha hi dve kāyikacetāsikavasena vuttā. Yathāha-katamāca bhikkhave dve vedanā kāyikāca cetāsikācāti. Sukhadukkha vasenavā upekkhaṃ sukhe saṅgahetvā. Yathāha-dve vedanā vuttā bhagavatā sukhāvedanā dukkhāvedanā. Yāyaṃ bhante adukkha masukhā vedanā. Santasmiṃ esāpaṇīte sukhe vuttā bhagavatāti.

Vibhāvaniyaṃ pana

Anavajjapakkhikaṃ upekkhaṃ sukhe sāvajjapakkhikañca dukkhe saṅgahetvā dve vuttāti vuttaṃ. Taṃ pāḷiyaṃ anāgataṃpi yujjatiyeva.

Indriyabhedavasena pañca. Phassabhedavasena cha. Upavicārabheda vasena aṭṭhārasa. Cha gehassitāni cha nekkhammassitānīti evaṃ paccekaṃ dvādasannaṃ somanassa domanassaupekkhānaṃ vasena chattiṃsa. Tāyeva kālattayavasena aṭṭhasatamaṃ vedanā vuttāti. Yañca katthaci sutte yaṃkiñci vedayitaṃ sabbaṃ taṃ dukkhasmīti vuttaṃ. Taṃ saṅkhāradukkhatāvasena vuttanti. Heṭṭhā pana cittaniddese cittāni indriyabhedavasena niddiṭṭhānīti katvā idhapi indriyabhedavaseneva cittāni saṅgahetuṃ puna **sukhaṃ.La. Pañcadhā hotīti** vuttaṃ. Ettha ca yesu dhammesu ādhi paccavasena sukhadukkhaṇi indriyāni nāma honti. Tesamaṃ kāyika mānasikavasena duvidhattā tānīpi sukhindriyaṃ somanassindriyaṃ dukkhindriyaṃ domanassindriyanti dvidhā vuttāni. Upekkhāya pana ādhipaccaṭṭhānabhūtā dhammā mānasikāeva hontītīsā upekkhindriyanti ekadhāva vuttāti. Apica, tepi pariyāyena duvidhā honti. Cakkhādīpasādakāya nissitānaṃpi sabbhāvato. Vedanāpana ekarasattā ekadhāva vuttāti.

Vibhāvaniyaṃ pana

“Kāyika mānasika sātābhedato sukhadukkhaṇi dvidhā vuttānī”ti vuttaṃ.

Tattha sabhāvato iṭṭhāniṭṭhaphoṭṭhabbā nubhavanalakkhaṇāni sukha dukkhāni. Sabhāvatoṃva parikkappanatoṃva iṭṭhāniṭṭhamajjhataṃnubhavana lakkhaṇāni itarānīti. **Sesānīti** yathāvutta sukhadukkhatō manassa domanassayuttehi sesāni bāttiṃsa kāmāvacaracittāni tevīsati pañcamajjhānikacittānicāti sabbāni pañcapaññāsacittāni. **Ekattā**ti ekasmiṃ citte. Itarā hi upekkhāvedanā.

131. Hetūnaṃ bhedena taṃsampayuttānaṃ cittacetāsikāna saṅgaho **hetusaṅgaho**.

[85] Vibhāvaniyaṃ pana

“Lobhādīhetūnaṃ vibhāgavasena taṃsampayuttadhammavasēnaca saṅgaho hetusaṅgaho”ti vuttaṃ. Taṃ na sundaraṃ.

Kāraṇaṃ vuttameva. Hetūnāma chabbidhā bhavanti sambandho. Tattha hetukiccaṃnāma ārammaṇe sampayuttadhammānaṃ suppatiṭṭhitabhāva sādhanamaṃ. Yathā hi rukkhasa mūlāni sayamaṃ anto

pathaviyaṃ vaddhitvā pathaviraseca āporaseca gahetvā rukkhaṃ yāva aggā abhiharanti. Vātevā mahoghevā āgate rukkhaṃ suṭṭhu ākaḍḍhitvā tiṭṭhanti, evaṃ rukkho vuddho viruḷho vipulo ciraṭṭhitikoca hoti. Evamevaṃ imepi dhammā sayāṃ ārammaṇesu thirapattā hutvā sampayuttadhamme tattha vuddhe viruḷhe vipule ciraṭṭhitikeca sādhetīti. Ahetukacittānipana jalatale amūlakasevā lāni viya ārammaṇe suṭṭhu paṭiṭṭhitāni na hontīti daṭṭhabbaṃ. Apare pana dhammānaṃ kusalādibhāvasādhanāṃ hetukiccanti vadanti. Evamsante yesaṃ sahaḷātaḷetu natthi. Tesāṃ akusalabhāvo abyākatabhāvoca nasampajjeyya. Yānica laddhahetupaccayāni rūpāni. Tesañca kusalādibhāvo āpajjeyyāti vatvā taṃvādaṃ paṭipakkhipanti. Yathā pana loke andhakāronāma kenaci paccaya visesena sādhetabbo na hoti. Yattha āloko natthi. Tattha so attano dhammatāya siddho hoti. Evamevaṃ dhammesu muyhanakriyābhūto mohandhakāropi attano dhammatāya eva akusalo bhavituṃ arahati. Tathā hi icchānāma atthi. Sāmuhanakriyāya yuttā lagganabhāvaṃ patvā lobho akusalo nāma hoti. Saddhāya yuttā pana dhammacchandabhāvaṃ patvā kusalacchandonāma hoti. Tathā akkhantīnāma atthi. Sāpi muyhana kriyāya yuttā paṭiḡhabhāvaṃ patvā doso akusalonāma hoti. Saddhāya yuttā pana uppannaṃ kāmavitakkaṃ nādhivāsetītiadinā nayena pāpadhamma pāpārammaṇa virodhabhāvaṃ patvā alobho kusalonāma hoti. Muyhanakriyā pana asukena yuttā akusalonāma. Asukena yuttā kusalonāmāti natthi. Ambilatthāya aññena saṃyogakiccarahito jātiambilaraso viya ekantaakusalajātikāeva hotīti. Yoca dhammo kusalo akusaloca na hoti. So abyākatoti ettakameva dhammānaṃ abyākatabhāvasiddhiyā kāraṇaṃ. Tasmā ahetukacittānaṃ rūpanibbānānañca abyākatabhāvopi attano dhamma tāyaeva siddho. Tattha moho sesamūlānaṃpi mūlaṃ hoti. Rajjanadussanānīpi hi muyhananisandānieva hontī. Alobhādīnañca kusalabhāvo avijjānusayena saheva siddhoti. Tāni pana lobhādīni lobhasahagatādīnaṃ visesamūlāni hontī. Rajjanādi nisandāni hi diṭṭhimānādīni. Arajjanādinisandāni ca saddhādīnīti. Yasmā pana hetuyonāma sampayuttesu padhānadhammā hontī. Tasmā sahetukavipākakriyānaṃ abyākatabhāvo pana hetu mukhenapi vattuṃ yutto.

[86] Ettāvatā yaṃ vuttaṃ vibhāvaniyaṃ

“Apare pana kusalādīnaṃ kusalādibhāvasādhanāṃ hetu bhāvo”ti vadanti. Evam sati hetūnaṃ attano kusalā dibhāvasādhanā añño hetu maggitabbo siyā. Atha sesasampayuttahetupaṭibaddho tesāṃ kusalādibhāvo, evampi momūha cittasampayuttassa hetuno akusala bhāvo appaṭibaddho siyā. Atha tassa sabhāvato akusalabhāvopi siyā. Evamsati sesahetūnaṃpi sabhāvato kusalādibhāvoti tesāṃ viya sampayutta dhammānaṃpi so hetupaṭibaddho nasiyā, yadica hetupaṭibaddho kusalādibhāvo. Tadā ahetukānaṃ abyākatabhāvo nasiyāti alaminippiḷānenāti taṃ paṭikkhattaṃ hoti.

Yathāca laddhajjhānapaccayesu rūpārūpadhammesu jhānaṅgāni arūpadhammesueva upanijjhānaṭṭhaṃ pharanti, na rūpadhammesu. Te pana jhānadhamma samuṭṭhi tattāeva jhānapaccayuppannesu vuttā. Evameva hetuyopi arūpa dhammesueva kusalādibhāvaṃ pharanti. Na rūpadhammesu. Te pana hetu samuṭṭhitattāeva hetupaccayuppannesu vuttāti na tesāṃ rūpadhammānaṃ kusalādibhāvāpatti codetabbāti.

[87] Yañca vibhāvaniyaṃ

“Kusalādibhāvo pana kusalākusalānaṃ yoniso ayoniso manasikārapaṭibaddho”ti vuttaṃ. Taṃpi vicāre tabbaṃ.

Tathā hi sūriyāloke āgate divā balānaṃ haṃsādīnaṃ okāso hoti. Rattandhakāle āgate rattibalānaṃ ulūkādīnaṃ okāso hoti. Naca te ālokandhakārā tesāṃ vaṇṇādivisesaṃ sāmentī. Taṃ pana tesāṃ yoniyoeva sādheti. Tattha āloko viya yonisomanasikāro daṭṭhabbo. Andhakāro viya itaro. Te sattā viya kusalākusalā. Vaṇṇādiviseso viya kusalādibhāvo. Yoniyo viya hetuyo daṭṭhabbāti. Abyākatānaṃ panāti sabbaṃ yo dhammo kusalo akusaloca na hoti. So abyākatoti vuttapakke patatiyevāti. **Tatthāti** hetusaṅgahe. Sahetukānaṃ pariggahasukhatthaṃ idha vajjetabbānīpi ahetukāni pathamaṃ uddhaṭāni.

Tenāha **sesāni pana. La. Sahetukā nevāti.** Tesamvā ahetukanāmampi hetūnaṃ vaseneva visum siddhanti tesampi idha saṅgahaṇaṃ aviruddhaṃ hoti. Tenāha **ahetu kātthārasekātiādi.** Sabhāva bhedena chabbidhāpi hetuyo kusalā kusalā byākatajātibhedena navadhā hontīti vuttaṃ **lobho dosocātiādi.**

132. Cuddasannaṃ kiccānaṃ bhedena taṃkiccavantaṇaṃ cittacetāsikānaṃ saṅgaho **kiccasaṅgaho.**

[88] Vibhāvaniyaṃ pana

“Paṭisandhādīnaṃ kiccānaṃ vibhāgavasena taṃkiccavantaṇaṃ paricchedavasena saṅgaho kiccasaṅgaho”ti vuttaṃ. Taṃ na sundaraṃ.

Yena ekakammena eko upapattibhavanibbattati. Tasmim sarasenavā laddhavibādhanenavā parikkhīṇe so bhavo nirujjhati. Ekassa kammassa okāso hoti. Tasmā tato nibbatta bhavato cutassa antarā khaṇamattaṃpi aṭṭhatvā laddhokāsenā ekena kammena puna bhavantarādi paṭisandhāna vasena abhinibbatti **paṭisandhikiccaṃ.** Tathā nibbattassa upapattibhavasantaṇassa yāva taṃ kammaṃ nakhiyyati. Tāva aviccheda pavattipaccayaṅgabhāvena pavatti **bhavaṅgakiccaṃ.** Tassa hi tathā pavattiyā sati āyupabandhāca usmā pabandhāca pavattantiyevāti ete tayo dhammā imaṃ kāyaṃ abhijjamānaṃ rakkhantīti. Yathāha –

Āyu usmāca viññāṇaṃ, yadā kāyaṃ jahanti maṃ;
Apaviddho tadā seti, niratthaṃva kaliṅgaranti.

Āvajjanaṃ cittasantaṇassa āvaṭṭanaṃ, taṃvā āvajjeti āvaṭṭeti, āvaṭṭativā taṃ ettha etenātivā **āvajjanaṃ.** Bhavaṅga vīthito okkamitvā ārammaṇantarābhikammaṃ pavattatīti attho. Āvajjetivā ārammaṇantare ābhogaṃ karotīti āvajjanaṃ. Dassanādīni pākaṭāni. **Voṭṭhabbananti** visum avacchinditvā thapanāṃ idaṃ nīlantivā pītakantivā subhantivāsubhantivā asaṅkaratothapanāṃ niyamananti vuttaṃ hoti. Javanantivā javotivā vegotivā atthato ekaṃ. Asaninipāto viya vegasahitassa ekekassa pittassa pavatti **javanakiccaṃ.**

[89] Yaṃpana vibhāvaniyaṃ

“Ārammaṇe taṃtaṃkiccāsādhana vasena anekakkhattuṃ ekakkhattuṃvā javamānassa viya pavatti javanakicca”nti vuttaṃ. Taṃ na sundaraṃ.

Na hi javamānassa cittassa ekavāramattena nivattināma atthi. Maggātiññājavānānīpi hi ekāvajjanaparikkammacittato paṭṭhāya ekavegena pavattajavamānacittasantaṇapatitāni eva honti. Na pana tāni visum siddhena javena javantīti.

[90] Tattha ca

Javamānassa viya pavattīti etena visum visum uppajjitvā niruddhā naṃ khaṇikadhammānaṃ sīghagamanasaṅkhāto javonāma visum natthi. Bahukkhattuṃ pavattivasena pana sīghagacchantapurisa sadisattā eva javananti vuccatīti dassitaṃ hoti. Taṃpi na sundaraṃ.

Asaninipāto viya vegasahitassa ekekassa cittassa pavattijavanakiccanti hi heṭṭhā vuttaṃ. Bhavaṅgacittaṅhi dīghaṃ addhānaṃ pūretvā pavattaṃpi nadisote vuyhamānaṃ sukkhapaṇṇaṃ viya vegarahitaṃ hoti. Javanacittaṃ pana ekamekaṃpi samānaṃ indena vissaṭṭha vajiraṃ viya vegasahitameva pavattatīti daṭṭhabbaṃ. Taṃ ārammaṇaṃ etassāti **tadārammaṇaṃ.** Yaṃ javanena gahitaṃ, tadevassa ārammaṇanti vuttaṃ hoti. Yaṃ javanena gahitārammaṇaṃ, tasseva gahitattā tadārammaṇaṃ nāmāti hi vuttaṃ. Tassavā javanassa ārammaṇaṃ assa ārammaṇanti tadārammaṇaṃ.

Idha pana tadārammaṇabhāvo adhippeto. Nibbattamānabhavato vacanaṃ muccanaṃ parigaḷanaṃ **cuti**. Idāni tāni kiccāni aniyamato na pavattanti. Tḥānaniyameneva pavattantīti dassetuṃ tḥānabhedo vutto. Tiṭṭhati pavattati taṃtaṃ kiccavantaṃ cittaṃ etthāti **tḥānaṃ**. Okāso. Taṃtaṃ antarākāloti vuttaṃ hoti. Kālopi hi kālavantānaṃ pavattivisayattā tḥānanti vuccati. Paṭisandhiyā tḥānaṃ paṭisandhiṭṭhānaṃ. Paṭisandhakālo paṭisandhikkhaṇoti vuttaṃ hoti. Evaṃ sesesupi.

[91] Vibhāvaniyaṃ pana

“Paṭisandhiyā tḥānaṃ paṭisandhiṭṭhānanti vatvā kāmaṃ paṭisandhivini muttaṃ tḥānaṃnāma natthi. Sukhaggahaṇatthaṃ pana silā puttakassa sarīrantiādīsu viya abhedepi bhedaraparikkappaṇāti daṭṭhabba”nti vuttaṃ. Taṃ na gahetabbaṃ.

Kālo hi nāma sabhāvato avijjamānopi cittassa visuṃ ārammaṇabhūto eko paññattidhammo. Tathā hi aṭṭhakathāyaṃ imesaṃ aṭṭhannaṃ mahāvīpākacittānaṃ vipaccanaṭṭhānaṃ veditabbaṃ. Etāni hi catūsū tḥānesu vipaccanti. Paṭisandhiyaṃ bhavaṅge cutiyaṃ tadārammaṇeti vatvā taṃ vitthārentena paṭisandhiggahaṇakāle paṭisandhihutvā vipaccanti. Asaṅkhyeyyaṃpi āyu kālaṃ bhavaṅgaṃ hutvā maraṇa kāle cuti hutvāti kālova vuttoti. Itarathā kiccāni viya tḥānānīpi cuddasavidhānieva vattabbāni siyunti. Tḥānānaṃ vitthārabhedo pana upari dvīsu pavattisaṅgahesu cittapavattividhānānusārena veditabboti. Yasmā omakaṃ dvihetukakusalaṃ sayāṃ so manassayuttaṃpi samānaṃ atidubbalattā somanassa paṭisandhiṃ dātuṃ nasakkoti. Tasmā somanassasantīraṇaṃ paṭisandhiṭṭhānaṃ nagacchatīti vuttaṃ **dveupekkhāsahagatasantīraṇānicevāti**. Tathā hi paṭṭhāne pītisahagatatike paṭicavāre hetupaccanike taṃ paṭi sandhiṭṭhānena uddhaṇanti. Manodvārāvajjanaṃ parittārammaṇevā avibhūtā rammaṇevā dvattikkhattuṃ pavattamānaṃpi vipāka santānato laddhapaccayabhāvena dubbalattā javanavegarahitameva hotīti vuttaṃ **āvajjana dvaya vajjitānīti**.

[92] Vibhāvaniyaṃ pana

“Ārammaṇarasānubhavanā bhāvato”ti kāraṇaṃ vuttaṃ. Taṃ a kāraṇaṃ.

Na hi ārammaṇa rasānubhavanaṃ javanakicca siddhiyā javananāma lābhassaca kāraṇaṃ hoti. Taṃ pana javanakiccāsiddhiyā phalame vahotīti. Yasmā pana phalacittaṃ āsevanabhāvarahitaṃpi magga cetanāya mahānubhāvattā parikkammabhāvanābalena ca pavattattā ārammaṇe vegasahitameva patatīti tassajavanesu gahaṇaṃkataṃ.

[93] Vibhāvaniyaṃ pana

Maggābhiññājavānānaṃ ekavārameva pavattattā javanakiccaṃ na sampajjatīti adhippāyena “ekacittakkhaṇikaṃpi lokuttara maggāditaṃ taṃsabhāvavantaṭāya javanakiccaṃ nāmā”ti vatvā sabbaññutaññāṇopamāya tamatthaṃ vibhāveti. Taṃ na yujjatiyeva.

Idāni samānakiccagaṇānāni cittāni saṅgahetvā dassetuṃ tesu panātiādīmāha. Paṭisandhādayo nāma cittuppādāti sambandho.

[94] Vibhāvaniyaṃ pana

Nāmakiccabhedenātipi yojeti. Taṃ na sundaraṃ.

Nāmabhedassa visuṃ vattabbābhāvototi. Ekakiccaṭṭhāna dvikiccaṭṭhāna tikiccaṭṭhāna catukiccaṭṭhāna pañcakiccaṭṭhānāni cittāni yathākkamaṃ aṭṭhasaṭṭhica tathā dveca navaca aṭṭhaca dveca niddiseti yojanā.

133. Cakkhādīnaṃ dvārānaṃ bhedenā cittacetāsikānaṃ saṅgaho **dvārasaṅgaho**.

[95] Vibhāvaniyaṃ pana

“Dvārānañca dvārapavattacittānañca paricchēdavasena saṅgaho dvārasaṅgaho”ti vuttaṃ.
Taṃ na sundaraṃ.

Dve janā aranti gacchanti etenāti dvāraṃ. Nagarassa anto janā bahijānāca yena chiddamaggena nikkhamanti pavisantīca, tassetāṃ nāmaṃ. Dve janā aranti gacchanti etthāti dvārantiṃ vadanti. Apica, duvidhaṃ dvāraṃ ākāsadvāraṃ maṇḍadvāranti. Tattha ākāsadvāraṃnāma yathāvutto chiddamaggo. Maṇḍadvāraṃnāma ādāsa paṭṭamayo ālokaṃ maggo. Taṃ pana puññavantānaṃ gehesu yojjīyati. Yathā ca tesu, tathā sattānaṃ sarīresupi dveeva honti. Navadvāro mahāvaṇoti hi chiddadvāraṃ vuttaṃ. Navanavuttilomakūpasahassā nipi chiddadvārānieva. Idha pana ādāsapattasadiṣaṃ maṇḍadvāraṃ adhippetāṃ. Taṃpi hi ārammaṇikadhammānaṃ ārammaṇadhammānañca niggamana pavisana mukhapathabhāvato dvārasadisattā dvāranti vuccatīti. Taṃ pana rūpamaṇḍa dvāraṃ arūpamaṇḍadvāranti duvidhaṃ. Rūpamaṇḍadvāraṃpi kammavisesamahābhūta visesasiddhena maṇḍabhāvavisesena pañcavidhanti dassetuṃ cakkhudvārantiādīmāha. Tattha **cakkhumevacakkhudvāranti** yasmīṃ cakkhumhi canda maṇḍalādīni rūpa nimittāni paññāyanti. Āvajjanādīna yamhi paññātāni tāni nimittāni gaṇhanti. Tasmā tadeva cakkhu tesāṃ dvinnaṃ visayavisa yibhāvupagamānaṃ mukhapathabhūtattā cakkhudvāraṃnāmāti attho. Athavā, yena cakkhumaṇḍena bahiddhā candamaṇḍalādīni rūpāni anto āvajjanādīnaṃ visayabhāvaṃ upagacchanti. Yenāca anto āvajjanādīni bahiddhā tesāṃ rūpānaṃ visayibhāvaṃ upagacchanti. Tameva yathāvutta kāraṇena cakkhudvāraṃ nāmāti attho. Evaṃ sesesupi.

[96] Tīkāsu pana

“Āvajjanādīnaṃ arūpadhammānaṃ pavattimukhabhāvato dvārasadisattā dvārāni”ti vuttaṃ.
Taṃ na sundaraṃ.

Rūpādīnaṃ ārammaṇānaṃpi pavattimukhabhūtattā. Vakkhati hi chabbidhā visayapavattiyoti. Etthāca visayānaṃ rūpādīnaṃ ārammaṇānaṃ dvāresu āpātā gamana saṅkhātā pavattiyoti **visayapavattiyoti** vuccantīti. Tattha cakkhumeva cakkhudvāranti etena cakkhussa dvāraṃ cakkhudvāranti atthaṃ nivatteti. Tathā **sotādayo sota dvārādīnīti** etena sota meva sotadvāraṃ.La. Manoeva manodvāraṃ. Na manānaṃ dvāraṃ manodvāranti imamattaṃ atidissati. Tassa pana manassa bahuviddhattā idha adhippetāṃ maṇḍaṃ dassento **manodvāraṃ pana bhavaṅganti pavuccatīti** vuttaṃ.

[97] Vibhāvaniyaṃ pana

“Āvajjanādīnaṃ manānaṃ dvāranti manodvāra”ntipi vuttaṃ. Taṃ na sundaraṃ.

Kāraṇaṃ vuttameva. Tattha sabbaṃ ekūnanavutividhaṃpi cittaṃ manodvāra mevanāma hoti. Idha pana upapattidvārameva adhippetanti katvā bhavaṅganti pavuccatīti vuttaṃ. Paṭisandhito paṭṭhāya yāvātāyukaṃ nadīsotamiva pavattamānaṃ ekūnavīsati vidhaṃ bhavaṅgacittameva idha manodvāranti vuccati, kathīyatīti attho.

[98] Vibhāvaniyaṃ pana

Yathā gāmaṃ dvāraṃnāma gāmanantameva hoti. Evaṃ āvajjanādīnaṃ manānaṃ pavattimukhatṭhena dvāraṃnāma āvajjanānantaraṃ bhavaṅgameva siyā. Na tato purimāni bhavaṅgānīti adhippāyena yaṃ vuttaṃ “bhavaṅganti āvajjanānantaraṃ bhavaṅga”nti. Taṃ na gahetabbaṃ.

Evañhi sati yesu cakkhupasādādīsu rūpādīni āpātaṃ nāgacchanti. Tānīpi āvajjanādīnaṃ vīthīcittānaṃ pavattimukhāni eva na hontīti katvā dvārānīnaṃ nasiyumaṃ. Na ca tathā sakkā vattumaṃ. Pāliyaṃeva tesamaṃ dvārārūpabhāvassa vuttatā. Idhaca vakkhati pasādaviññattisaṅkhātamaṃ sattavidhampī dvārārūpaṃnāmāti.

[99] Yañca tattha

Sāvajjanaṃ bhavaṅgantu, manodvāranti vuccatīti –
Sādhakavacanaṃ āhaṭaṃ; Taṃpi idha nayujjatiyeva.

Taṃhi āvajjanaṃpi manodvārapakkhikaṃ katvā dīpetīti. Yattha pana cakkhuñca paṭicca rūpeca uppajjati cakkhuviññānaṃ. Sotañca. La. Manañca paṭicca dhammecca uppajjati manoviññānanti vuttamaṃ. Tattheva taṃ yuttamaṃ. Tattha hi cakkhuviññānuppattiyā catūsu paccayesu cakkhurūpāni eva sarūpato vuttānīti itare āvajjanañca sampayuttakkhandhā cāti dve paccayā casaddena gahitā, evamaṃ sotaviññānādīsūpi. Manoviññāṇe pana manañcāti ettha bhavaṅgacittena saha āvajjanaṃ gahetvā casaddena sampayuttakkhandhā gahitā. Evañhi sati cattā ropaccayā hontīti. Vuttañhetamaṃ dhātuvibhaṅgaṭṭhakathāyamaṃ paṭiccāti nāma āgataṭṭhāne āvajjanaṃ visumaṃ nakātabbamaṃ. Bhavaṅganissitakameva kātabbanti. Tasmā idha manoti sahāvajjanakamaṃ bhavaṅgaṃ. Mano viññānanti javanamano viññānanti. Etthaca paṭiccātināma āgataṭṭhāneti etena aññattha pana āvajjanaṃ dvārapakkhikaṃ nakātabbanti siddhamaṃ hoti. Paṭiccāti āgatattāyevaca bhavaṅgaṃpi āvajjanā nantaram bhavaṅgadvayameva imissaṃ pāliyaṃ gahetabbamaṃ. Sannihitapaccayānaṃ eva tattha adhippetattāti. Idha pana dvārābhāvā rahassa sabbassa upapattidhammassa pariggahitattā sabbamaṃ bhavaṅgaṃ adhippetamaṃ. Na hi kiñci bhavaṅgaṃ nāma atthi. Yaṃ manodvārābhāvārahamaṃ na siyāti niṭṭhamettha gantabbanti. **Tatthāti** niddhāraṇe bhummaṃ, tesu chasu dvāresu cakkhu dvāreti sambandho. **Yathārahanti** ārammaṇabhūmipuggalamanasikārā dīnaṃ anurūpavasena. **Sabbathāpīti** visumaṃ visumaṃ chacattālīsa bhedasaṅkhātena sabbapakārenapi agahita gahaṇa vasena, catupaññā sāti sambandho. Sabbathāpītivā āvajjanādi tadārammaṇa pariyo sāvāsena anekakiccabhedayuttena sabbapakārenapi, kāmvācarānevāti sambandho. Yāni āvajjanādīni kiccāni dvārāvikāraṃ paṭicca pavattanti, taṃ kiccavantānieva dvāre niyuttānīti atthena dvārānīnaṃ honti. Paṭisandhi bhavaṅga cuti kiccānipana dvārāvikārena vinā kevalamaṃ kammavaseneva sijjhanti. Tasmā taṃkiccavantāni dvārānīnaṃ nahontīti vuttamaṃ **ekūna.La.** **Dvārāvimuttānīti** ettha ca dvārāvikāronāma attani ārammaṇānaṃ āpātāgamanavasena bhavaṅgassa calanaṃ, cakkhādīnañca attani viññānuppādāna sattivisesa yogo daṭṭhabbo.

[100] Vibhāvaniyaṃ pana

“Cakkhādīdvāresu apavattanato manodvārasaṅkhāta bhavaṅgato ārammaṇantaragahaṇavasena apavattitoca dvārāvimuttāni”ti vuttamaṃ, taṃ aṭṭhakathāyapi saha nasameti.

Paṭisandhi bhavaṅga cuti vasenāti hi vuttamaṃ. Etena hi kiccāsīseva cittānaṃ dvārāka dvārāvimuttabhāgo therena dassito. Teneva hi heṭṭhāpi **pañcadvārāvajjana.La.** **Tadārammaṇavasenāti**ādīnā kiccāsīseva cittānaṃ cakkhudvārākaḍḍhābhāvo vuttoti. Nanu cakkhādīdvāresu apavattanatotī iminā etadatthova vuttoti ce. Na. Adhippetatthavirahassa apasaṅga nivattakassaca saṃvaṇṇanā vākyassa payojanābhāvatoti. Chadvārākaḍḍhā santīraṇa tadārammaṇakiccānaṃ vasena dvārāvimuttānika paṭisandhādīkiccānaṃ vasenāti adhippāyo. Pañcadvārākaḍḍhā chadvārākaḍḍhā **pañcachadvārākaḍḍhāni.** Kadāci chadvārākaḍḍhā tāni kadāci dvārāvimuttānicāti **chadvārākaḍḍhāvimuttāni.** Dvārāsaddo cetthaadhikārasena yojjyati.

[101] Vibhāvaniyaṃ pana

“Chadvārākaḍḍhā vimuttānicā”tipi vuttamaṃ. Taṃ na sundaram.

Heṭṭhā cuṇṇiyavākye tathā asutattāti. Ekadvārikacittāni. La. Sabbathā dvāravimuttānīca yathākkamaṃ chattimsati. La. Navadhā ceti pañcadhā paridīpayeti yojanā.

134. Rūpādīnaṃ ārammaṇānaṃ bhedenā cittacetāsikānaṃ saṅgaho **ārammaṇasaṅgaho.**

[102] **Ṭīkāsu** pana

“Ārammaṇānaṃ sarūpato vibhāgato taṃvisayacittato ca saṅgaho ārammaṇasaṅgaho”ti vuttaṃ. Taṃ na sundaraṃ.

Ayañhi cittacetāsikānaṃ eva saṅgaho. Na ārammaṇānanti. Rūpādīnaṃ vacanattho upari āgamissati. Dubbalapurisena daṇḍādiviya cittacetāsikehi ālambīyati amuñcamānehi gaṇhīyatīti ālambaṇaṃ. Ārammaṇasadda pana sati cittacetāsikāni āgantvā ettha ramantīti ārammaṇaṃ.

[103] Yaṃpana **vibhāvaniyaṃ**

“Dubbalapurisena daṇḍādiviya cittacetāsikehi ālambīyati. Tānivā āgantvā ettha ramantīti ālambaṇa”nti vuttaṃ. Taṃ na sundaraṃ.

Viṣuṃ siddhāni hi etāni padānīti. **Rūpamevāti** vaṇṇāyatanameva. Pañcārammaṇavimuttaṃ yaṃkiñci dhammajātaṃ vijjamānaṃpiavijjamānaṃpi bhūtampi abhūtampi dhammārammaṇameva. Taṃ pana sabhāga koṭṭhāsato saṅgayhamānaṃ chabbidhaṃ hotīti vuttaṃ **dhammārammaṇaṃ pana. La. Chadhā saṅgayhatīti. Tatthāti** tesu rūpādīsu chasu. Cakkhudvāre ghaṭṭayamāna rūpānusārenea uppannāni cakkhudvārikacittāni aññāni ārammaṇāni ālambitūṃ nalabhanti. Rūpānīpi ghaṭṭanarahitāni atītānāgatāni ālambitūṃ nalabhantīti vuttaṃ **cakkhudvārikacittānaṃ sabbesaṃpi rūpameva ārammaṇaṃ. Tañha paccuppannanti. Sotadvārikā dīsupi esevanayo.** Tattha taṃ taṃ kāraṇaṃ paṭicca uppannaṃ paccuppannaṃ. Vattamānanti attho. **Chabbidhampīti** rūpādivasena chabbidhampī. Atikkantabhāvaṃ itaṃ gataṃ pavattanti **atītaṃ.** Āgacchati āgacchitthāti āgataṃ. Paccuppannaṃ, atītañca. Na āgantanti **anāgataṃ.** Uppādajātikā saṅkhatadhammāeva tīsu kālesu anupatanti. Tasmā uppādarahitā asaṅkhatabhūtā nibbānapaññattiyo kālavimuttaṃnāmāti veditabbā.

[104] **Vibhāvaniyaṃ** pana

“Vināsābhāvato atītādīkālavasena navattabbattā nibbānaṃ paññattica kālavimuttaṃnāmā”ti vuttaṃ. Taṃ vicāretabbaṃ.

Sabbepi hi saṅkhatadhammā anāgatabhāva pubbakāeva hontī. Tasmā te yadā paccayasāmaggiṃ labhitvā uppajjissantīti vattabbapakke tiṭṭhanti, tadā anāgatānāma. Yadā paccayasāmaggiṃ labhitvā uppannā, yadā paccuppannānāma. Yadā niruddhā, tadā atītānāma. Evaṃ uppādajātikānaññeva uppādamūlikā tekālikatā siddhā. Uppādarahitānaṃ pana anāgatāvattahāpi natthi. Kuto paccuppannātītā vatthāti. Tasmā nibbānapaññattīnaṃ kālattaya vimuttatā hotīti. Vināsābhāvatoṭi idaṃ pana atītākālavimuttiyāeva kāraṇanti na tena tāsāṃ itarakālavimuttiṃ sādhetīti daṭṭhabbaṃ. Yathārahavibhāgo pana idheva tesūtiādīnā pacchā āgamissati. Dvāravimuttānañca chabbidhampī ārammaṇaṃ hotīti sambandho. Yathā pana āvajjanādīnaṃ chadvārikacittānaṃ ārammaṇaṃ bhavantarepi imasmiṃ bhavēpi purimabhāge kenaci dvārena gahitaṃpi agahitaṃpi hoti. Na tathā imesanti dassetuṃ **bhavantare chadvāragahitanti** vuttaṃ. Bhavavisesañhi patthetvā kammaṃ katvā tattha nibbattānaṃ ārammaṇaṃ bhavantarepi kenaci dvārena gahitaṃpi hoti yevāti.

[105] **Vibhāvaniyaṃ** pana

“Taṃ pana nesāṃ ārammaṇaṃ na āvajjanassa viya kenaci agahitameva gocarabhāvaṃ

gacchatīti dassetuṃ chadvāra gahitanti vutta’’nti vuttaṃ. Taṃ na yujjati.

Pañcadvārā vajjanassapi hi ārammaṇaṃ pubbe kenaci dvārantarena gahitaṃpi agahitaṃpi hotiyeva. Tathā hi idaṃ nāma labhissāmi bhūñjissāmi passissāmīti pubbe gahitaṃ pacchā āvajjanassa ārammaṇaṃ na na hotīti. Naca ekāvajjanavīthiyaṃ pubbe kenaci cittena agahitabhāvo idha pamāṇanti. Yathā ca pañcadvārikacittānaṃ ārammaṇaṃ ekantapaccuppannameva hoti. Yathā ca manodvārikacittānaṃ ārammaṇaṃ tekālikamvā kālavimuttasā maññaṃvā hoti. Na tathā imesanti dassetuṃ **paccuppannamatītaṃ paññattibhūtaṃvā**ti vuttaṃ. Yathā ca chadvārikacittānaṃ ārammaṇaṃ āgamasiddhavohārayuttaṃpi tabbohāravanimuttaṃpi hoti. Na tathā imesanti dassetuṃ **kamma kamma nimitta gatinimitta sammatanti** vuttaṃ.

[106] Vibhāvaniyaṃ pana

“Nāpi nesam ārammaṇaṃ maraṇāsannato purimabhāgajavanānaṃ viya kammakammanimittādivasena āgamasiddhavohāravanimuttanti dassetuṃ kamma.La. Sammatanti āhā’’ti vuttaṃ. Taṃpi na sundaraṃ.

Maraṇā sannato purimabhāgepi hi sattā attanā katakammaṃvā cetiyādīni kamma, pakaraṇānivā ārammaṇaṃ karontiyeva. Tadāpi hi kammaṃ kammameva, kammupakaraṇānica kammanimittāniyeva. Kamma siddhiyānimittaṃ kāraṇaṃ kammanimittanti katvā. Kamma nimittaṃ ārammaṇaṃ kammanimittanti vadanti. Ajātasatturājā viyaca supinadassanādivasena gatinimittāni ārammaṇaṃ karontiyeva. Rājā hi dvīsu bhavesu pītaṃ māreti. Māritakālatoca paṭṭhāya tassa niddāyantassa gatinimittāni upaṭṭhahantīti. Tattha **yathāsambhavanti** taṃ taṃ paṭisandhādīnaṃ chadvāragahitādivasena sambhavantassa ārammaṇassa anurūpato. Yathāsambhavavibhāgo pana upari maraṇuppattiyaṃ āgamissati. **Yebhuyenā**ti bāhullena. **Bhavantare**ti atītānantarabhavate tathaca maraṇāsannakāle. **Chadvāra gahitanti** chahi dvārehi maraṇāsannajavanehi gahitaṃ. Ettha ca yebhuyenāti etena bhavantare chadvāragahitanti imassa vidhānassa anekamaṃsabhāvaṃ viseseti. Kasmā. Agahitassapi sambhavato. Yañhi asaṅñibhavato cutānaṃ kamma kammanimitta gatinimitta sammatam arūpabhavato cutānaṃ gatinimittasammataṃ kāmapaṭisandhi bhavaṅgacutīnaṃ ārammaṇaṃ. Taṃ bhavantare kenaci dvārena agahita meva hotīti. Etthaca yasmā paṭṭhāne arūpabhavate duvidhopi purejātapaccayo paṭisiddho. Aṭṭhakathāsuca tato cutānaṃ kāmapaṭisandhiyā paccuppannagatinimittārammaṇatāpi vuttā. Gatinimittānaṃ nāma rūpārammaṇameva dīpentī. Tasmā tesam kāmapaṭisandhiyāpi gatinimittasammataṃ bhavantare kenaci dvārena agahitameva hotīti veditabbaṃ. Apica, maraṇāsannakāle kammabalena kammādīnaṃ upaṭṭhānaṃnāma yebhuyena saṃmulhamaraṇena marantānameva hoti. Itaresam pana paresam payogabalenapi attanā pakatiyā suṭṭhu āsevitānaṃ anussaraṇabalenapi dhammikaupāsakādīnaṃ viya devalokato āgantvā gaṇhantānaṃ devānaṃ ānubhāvenapi hotiyeva. Nirayapālāpi nirayato āgantvā gaṇhantiyeva. Revativimānañcetha vattabbaṃ. Tañhi dve nirayapālā gahetvā pathamaṃ tāvatīmaṃsabhavanaṃ netvā pacchā nirayaṃ nayīmsu. Te hi yakkha jātikattā vessavaṇaparīsāviya tāvatīmaṃsā bhavanaṃpi gantuṃ sakkontiyeva. Yamassa dūtā dve yakkhāti hi pāḷiyaṃ vuttaṃ. Vessavaṇadūtā idha yamassa dūtāti vuttātipi vadanti. Tasmā ye kaṣiṇāsabhādīni samathanimittāni suṭṭhu āsevitvā upacārajjhāne ṭhatvā tāneva nimittāni gahetvā maranti. Tesampi kāmapaṭisandhiyā ārammaṇaṃ bhavantare kenaci dvārena agahitameva siyā. Upacārajjhānabaleneva brahmalokato idhauppajjantānaṃpi esevanayoti.

Yaṃpana vibhāvaniyaṃ

“Kevalaṃ kammabaleneva tesam asaṅñibhavato cutānaṃ paṭisandhiyā kammanimittādikam ārammaṇaṃ upaṭṭhātī’’ti vuttaṃ.

Tattha kammanimittādikanti ettha ādisaddena kammaṃpi gahetabba meva. Na hi tassa agahaṇe kāraṇaṃ atthīti. Tāni pana sabbāni kevalaṃ paṭisandhijanakassa kamma ānubhāveneva

paṭisandhiyaṃ upaṭṭhahantīti veditabbaṃ. Anāgataṃ pana nimittaṃ upaṭṭhahamaṇaṃ gatinimittameva siyā. Naca tassa viṣuṃ upaṭṭhātabbakiccaṃ atthi. Paccuppanna gatinimittamā siddhameva hotīti vuttaṃ **paccuppannamatītaṃ paññatti bhūtaṃvāti.**

[107] Vibhāvaniyaṃ pana

“Anāgataṃnāma atītaṃ viya anubhūtañca na hoti. Naca paccuppannagatinimittamā viya āpātamāgata”nti kāraṇamā vuttaṃ. Tamā akāraṇamā.

Pasaṅgassa anivattitattā. Gatinimittañhi nāma paccuppannaṃpi anubhūtamā na hoti. Tamāpi kammabaleneva āpātamāgataṃ. Evaṃsante anāgataṃpi kammabalena āpātamāgatameva siyāti ayaṃ pasaṅgo pākatikoeva hotīti. **Tesūti** yathāvuttasu ārammaṇikacittesu. Rūpādīsu pañcasu ekekaṃ ārammaṇamā etesanti samāso. Rūpādīni pañca ārammaṇāni etassāti viggaho. **Sesānīti** pañcaviññāṇasamāpācchana dvayato sesāni santīraṇa mahāvīpākāni. **Sabbathāpi kāmāvacarā lambaṇānevāti** paṭisandhādīhi nānakiccehi rūpādīsu nānārammaṇesu pavattena sabba pakārenāpi kāmāvacarālamāṇikāniyeva. Tāni hi sabbaññubuddhānamā uppannānīpi vikappasattirahitattā avijjamāne paññattidhammecca sukhume mahaggatadhammecca gambhīre lokuttaradhammecca ālambitumā na sakkontīti. Tattha santīraṇattayamā tāva santīraṇakiccavasena rūpādīpañcālamāṇe pavattati. Tadārammaṇādivasena pana sabbānīpi ekādasavīpākāni chasu parittārammaṇesu pavattantīti.

[108] Vibhāvaniyaṃ pana

“Vīpākāni tāva santīraṇādivasena rūpādīpañcālamāṇe”ti vuttaṃ. Tattha santīraṇādivasenāti navattabbaṃ. Santīraṇavasena icceva vattabbanti.

Yo panettha cittānamā ārammaṇesu pavattivībhāgo vattabbo. So aṭṭhakathākaṇḍe gahetabbo. Lokuttaradhammā atigambhīrattā ṇāṇasseva visayabhūtāti vuttaṃ. **Akusala.La. Lokuttara vajjita sabbā rammaṇānīti.** Tattha tāni laddhasamāpatīnamā uppannakāleeva mahaggatārammaṇāni. Tesuca dve dosamūlacittāni parihīnājjhānāni ārabha uppannakāleti daṭṭhabbaṃ. Ṇāṇamāpi anadhigatāni lokuttarāni ālambitumā na sakkontīti vuttaṃ **ñāṇasampayutta.La. Vajjitasabbā rammaṇānīti.** Tattha ṇāṇasampayuttakāmakusalāni puthujjanānamā ajjhānalābhīnamā uppannakāle paññattiyā saha kāmāvacarārammaṇāni. Tāneva sotāpattimaggaṃ pure gotrabhukkhaṇe puthujjanānamā nibbānārammaṇāni. Jhānalābhīnamā tāneva abhiññākusalañca mahaggatārammaṇānīpi. Heṭṭhimaphalaṭṭhānamā attanā adhigata maggaphalanībbānā rammaṇānīpīti veditabbāni. Yathā cettha ariyā attanā adhigata maggaphalāniyeva ālambitumā sakkonti. Tathā jhānalābhīnīpi attanā adhigatajjhānānieva ālambitumā sakkontīti veditabbaṃ. Ettha siyā-ye ca jhānāni patthenti. Jhānaparikammaṃpi karonti. Yeca jhānasuttāni saṃvaṇṇenti. Te alābhīno mahaggatajjhānāni ālambitumā sakkonti, nasakkontīti. Na sakkonti. Te hi jhānānīnāma evamā mahānubhāvāni evamā mahānisamsānīti sutvāvā sutapariyattibalena siddhe ākāra sallakkhaṇāññāṇe ṭhatvā vā anumānavaseneva tāni patthenti. Parikammaṃpi karonti. Suttānīpi saṃvaṇṇentīti. Itarathā puthujjanāpi lokuttaradhamme patthenti, maggaparikammaṃpi karonti. Maggaphala nibbānavacanānīvikathenti saṃvaṇṇentīti tesamāpi te ārammaṇabhūtā eva siyuntī. Tesamā pana cittāni jhānādīnamā paññattiguṇe eva anubhontīti veditabbāni. Paññatidhammānāhi paññattiyopi pañitarūpāeva hontīti. Mahiddhīko hi paracittavidū. Māro deva puttopi rūpajjhānacittamā vaṭṭanissitameva passatī. Vivaṭṭanissitamā na passatī. Arūpajjhānacittamā pana vaṭṭanissitamāpi napassatīti aṅguttare navanīpāte aṭṭhakathāyamā vuttaṃ. Ye pana aggamaggaphalāni paṭivijjhanti. Tesamā uppannāniññāṇasampayuttakāmakriyājavānāni kriyābhīññājavānañca puggalānurūpamā paññattiyā saha catubbhūmakadhammesu kiñci ārammaṇamā kātumā nasakkontīti natthi. Tathā tesamā purecāri kamanodvārāvajjanañcāti vuttaṃ **ṭhāṇasampayutta.La. Sabbathāpisabbā rammaṇānīti.** Tattha **sabbathāpīti** sabbakāmāvacara sabbamahaggata sabbalokuttara sabbapaññattī sabbapaccuppannādi pakārenāpītiattho. Idañca sabbaññubuddhānamā uppannāni sandhāya vuttaṃ. Itarāni pana pacceka buddhānamā uppannānīpi padesasabbārammaṇānieva hontī. Tāni hi ekaṃ pathavidhātumāpi

sabbehi anavasesapakārehi jānitum nasakkontīti. Āruppesu dutīyacatutthāni pathamatatīyārūppa viññānā rammanattā mahaggaṭā rammanāni. **Sesānīti** abhiññā dvaya dutīyacatutthāruppehi avasesāni sabbānīpi ekavīsatividhāni mahaggatacittāni kasiṇādi paññattārammanānīti attho. **Pañcavīsāti** pañcadvārāvajjana tevīsati kāmavipāka hasanacittāni sandhāya vuttaṃ. **Parittamhīti** kāmāvacarā lambaṇe evāti attho. Tañhi appānubhāvato paṭibandhakadhammehi parisamantato dīyati avakhaṇḍīyati nittejabhāvaṃ pāpīyatīti parittanti vuccati.

135. Cakkhādīnaṃ vatthūnaṃ bhedenā tabbatthukānaṃ cittacetasi kānaṃ saṅgaho **vatthusāṅgaho**.

[109] Vibhāvaniyaṃ pana

“Vatthuvibhāgato tabbatthukacittaparicchedavasenā saṅgaho vatthusāṅgaho”ti vuttaṃ. Taṃ na sundaraṃ.

Vasantipatiṭṭhahanti cittacetasi kētesūtivatthūni, cakkhuvatthūca. La. Kāyavatthuca hadaya vatthucātiyojanā. Cakkhumeva **cakkhuvatthu** tathā sotādīniyeva sotavatthādīni. Vākyasaṅkhepo hesa pāṭho. Peyyālanayotipi antadīpakanayotipi vuttum yujjati. Keci pana dvandasamāsaṃ maññanti. Tesam casaddo nayujjati. Parato vatthusaddo casaddoca pubbapadesu ānetabbotipi vadanti. Tesam hadaya vatthūti samāsapadaṃ nayujjati. Avibhattikaniddesotipi apare. **Tāni kāmaloke sabbānīpi labbhantīti** kāmataṅhā dhina kammanibbattānaṃ atabhāvānaṃeva paripuṇḍindriyatā sambhavato sabbānīpi tāni cha vatthūni kāmalokeyeva labbhanti. Tathā hi cakkhādīsū vatthūsū santesū evarūpādīnaṃ paribhogo sampajjati. Tasmā rūpādīsū kāmavatthūsū abhiratā kāmataṅhā sadā cakkhādīnaṃ pañcannaṃ vatthūnaṃpi sampattiṃ patthetiyeva. Yathāca sabbakammiko amacco sadā rañño icchameva pūrayamāno sabbāni rājakammāni sampādeti. Evameva kāmāvacarakammaṃpi sadā kāmataṅhāya icchameva pūrayamānaṃ paripuṇḍindriyaṃ atabhāvaṃ nibbatteti. Tasmā kāmataṅhādīnaṃ kammanibbattā kāmāvacarānaṃ paripuṇḍindriyā hontīti. Yathā ca dassanasavanānuttariya dhammabhūtāni cakkhusotāni buddhadassana dhammassavanā divasena sattānaṃ visuddhiyāpi hontīti, na tathā ghānādittayaṃ. Taṃ pana kevalaṃ kāmāparibhogatthāyaeva hoti. Tasmā taṃ kāmāvirāgabhāvanā kammanibbattesu brahmattabhāvesu naupalabbhatīti vuttaṃ **rūpaloke pana ghānādittayaṃ natthīti**. Idañca pasādarūpattayaṃ sandhāya vuttaṃ. Sasambhāraghāna jivhā kāya saṅghānānīpana suṭṭhuparipuṇḍāniyeva hontīti. **Arūpalokepana sabbānīpi nasamvijjantīti** rūpavirāga bhāvanā kammanibbatte tasmīṃ loke ajjhatabhādhāsantānesupī sabbena sabbaṃ rūpāpavattiyāeva abhāvato. Tattha nibbattā hi sattā suddhe ākāśataleeva cittapabandhamattā hutvā tiṭṭhantīti. Imasmīṃ saṅgahe pana cittāni sattaviññāna dhātuvāsena gahetuṃ **tattha pañcaviññānadhātuyotiādi** vuttaṃ. **Tatthāti** tesu chasu vatthūsū. Pañcaviññānāni eva nisattanijīvaṭṭhena dhātuyoti viggaho. Evaṃ sesesupī. Vijānanakiccābhāvato mananamattā dhātūti **manodhātu**. Pañcadvāre āvajjanamatta sampañcchanamatta kiccāni hi visesajānana kiccāni nahontīti. Pañcaviññānāni pana paccakkhato dassanādivasena thokaṃ visesajānanakiccāni hontīti. Avasesā pana santīraṇādayo ārammaṇasabhāva vicāraṇā divasena atireka viṣiṭṭhajānanakiccayuttattā na manodhātuyo viya mananamattā hontīti. Nāpi pañcaviññānadhātuyoviya vijānana mattā. Athakho mananaṭṭhena manoca taṃ vijānanaṭṭhena viññānañcāti katvā manoviññānadhātuyonāma. Atisaya visesajānana dhātuyoti attho. Pariyāyapadānañhi visesana samāse atisayattho viññāyati. Yathā padaṭṭhānanti.

[110] Vibhāvaniyaṃ pana

“Manoyeva viññānaṃ manoviññānanti vā. Manaso viññānaṃ manoviññāna”nti vā vuttaṃ. Tattha manoyeva viññānanti idaṃ tāva na yujjati.

Na hi aññamaññaṃ visesetvā abhirekaṭṭhadīpake padaṭṭhānantiādi ke visesanasamāse avadhāraṇa viggaho katthaci dissati yujjaticāti.

[111] Manaso viññāṇanti idampi nayujjatiyeva.

Manasoti hi manodhātuttikasaṅkhātassa manassa. Tattha sampāṭicchanadvayaṃ santīraṇādikassa manoviññāṇapabandhassa paccayabhūtaṃ hoti. Pañcadvārāvajjanaṃ pana parato dvārantare pavattamānaṃ tasseva manoviññāṇapabandhassa paccayuppannabhūtaṃ hotītikatvā ādimhi paccayabhūtaṃ ceva ante dvārantare paccayuppannabhūtaṃ ca manassa sambandhiviññāṇanti attho. Athavā, pañcaviññāṇavajjitāni sabbāni viññāṇāni mananakiccattā manonāma. Ārammaṇe pana abhinipāta mattāni pañcaviññāṇāni mananakiccāni nahontīti dassanādīni eva nāma. Pañcadvārāvajjanaṃ manato jātampi manassa paccayo nahoti. Dassanādīnaṃ eva paccayo. Sampāṭicchanadvayaṃ manassa paccayo hontampi manato jātaṃ nahoti. Dassanādito eva jātaṃ. Santīraṇādīni pana attano pure pacchāpavattānaṃ dvinnaṃ dvinnaṃ manānaṃ eva majjhe jātānti attano paccaya paccayuppannabhūtaṃ manassa sambandhiviññāṇanti attho. Evaṃ sati pañcaviññāṇampi dvinnaṃ manodhātūnaṃ antare pavattattā manaso paccaya paccayuppannabhūtaṃ sambandhiviññāṇaṃ manoviññāṇanti vattabbameva siyāti.

[112] Ṭikāyaṃ pana

Manato jātaṃ viññāṇanti vuttaṃ. Taṃpi vuttanayena nayujjatiyeva.

Avasesā pana manoviññāṇadhātusaṅkhātāca santīraṇa.La. Pannarasarūpāvacaravasena tiṃsadhammā hadayaṃ nissāyeva pavattantīti yojanā. Casaddo panettha avasesānaṃ chasattati dhammānaṃ manoviññāṇadhātubhāvaṃ sambhāveti.

[113] Vibhāvaniyaṃ pana

Sampiṇḍanatthaṃ gahetvā ‘na kevalaṃ manodhātuyevā’ ti vuttaṃ. Taṃ na yujjati.

Evañhi sati avasesāca manoviññāṇadhātusaṅkhātāti vuttaṃ siyāti.

[114] Yāca ṭikāsu

Santīraṇa.La. Rūpāvacaravasena pavattā, avasesā manoviññāṇa dhātusaṅkhātāca tiṃsa dhammāti yojanā. Sāpi na sundarā.

Atthagatīyā avisadattāti. Tattha kasmā te nissāyeva pavattantīti. Āruppesu anuppajjanato, kasmāca tattha nuppajjantīti vuccate. Santīraṇamahāvīpākāni tāva tattha nuppajjanti pañcannaṃ dvārānaṃ attano kiccānaṃca tattha abhāvato. Paṭighacittadvayaṃpi nuppajjati. Anīvaraṇāvattassa paṭighassa abhāvato. Ekanta nīvaraṇānaṃca jhānabhūmīsu asambhavato. Ettha pana yadi anīvaraṇāvatto paṭigho natthi. Pāḷiyaṃ dutiyajjhāneeva domassindriyassa aparisesanirodhavacanaṃ aṭṭhakathāsuca dutiyajjhānūpacāre tassa uppattisambhavavacanaṃ viruddhaṃ siyā. Tasmā attano sahāyapaccaya bhūtassa olārikassa kāmarāgassa jhānabhūmīsu abhāvato paṭighacittadvayaṃ tattha nuppajjantīti yuttantīpi vadanti. Ṭikākārāpana dutiyajjhānūpacāre tassa uppattisambhava vacanaṃ parikappavacanamattanti katvā purimakāraṇameva icchanti. Yadi panetaṃ parikappavacanamattaṃ siyā pāḷivacanaṃpi parikappavacanamattameva siyā. Tasmā pacchimakā raṇameva yuttarūpanti amhākaṃ khanti. Hasanacittampi nuppajjati arūpīnaṃ hasanakiccassa abhāvato. Kāyābhāvatotipi yujjati. Sotāpattimaggacittampi nuppajjati. Paratoghosābhāvena tathuppannaṃ puthujjanaṃ dhammābhisaṃmayābhāvato buddhapaccekaṃ buddhānaṃca tattha anuppajjanato. Teneva hi tathuppanno puthujjano aṭṭhasu akkhaṇayuttesu vuttoti. Rūpāvacaracittāni tattha nuppajjanti rūpavirāgabhāvanāya rūpanimittārammaṇānaṃ tesam samatikkantattāti.

Avasesā manoviññāṇadhātusaṅkhātā kusalākusalakriyānuttaravasena dve cattālīsadhammā

hadayaṃ nissāyavā anissāyavā pavattantīti yojanā. Nissāyavā pañcavokāre anissāyavā catuvokāreti adhippāyo. Kusalānica akusalānica kriyānica anuttarānicāti viggaho. Tattha **kusalānīti** pañcarūpa kusalato avasesāni dvādasalokiyakusalāni. **Akusalānīti** pañighadvayato avasesāni dasaakusalāni. **Kriyānīti** pañcadvārāvajjana hasana pañcarūpakrito avasesāni terasakriyacittāni. **Anuttarānīti** pathamamaggato avasesāni sattaanuttaracittāni. Kāme chavatthum nissitā sattadhātuyo matā. Rūpe tivatthum nissitā catubbidhā dhātuyo matā. Āruppe kiñcivatthum anissitā ekā dhātu matāti yojanā. **Tecattālisāti** pañcaviññāṇa manodhātuttikehi saddhiṃ santīraṇādike tiṃsadhamme sandhāya vuttanti.

Iti paramatthadīpaniyānāma abhidhammatthasaṅgahassa

Catutthavaṇṇanāya pakiṇṇakasaṅgahassa

Paramatthadīpanā niṭṭhitā.

Vīthi saṅgaha paramatthadīpanī

136. Evaṃ cittappabheda saṅgaho, cetasikappabheda saṅgaho, ubhayappabheda saṅgahoti cittacetāsikānaṃ kayopabheda saṅgahe dassetvā idāni vīthiccittappavattisaṅgaho vīthimutta cittappavattisaṅgahoti te saññeva dve pavattisaṅgahe dassetuṃ **cittuppādānamiccevantī**ādīmāha. Tattha uppajantīti uppādā. Tattha uppajanti. Aññassa asu tattācīte icceva labbhati. Iti cittaṅca citteuppādācāti cittuppādā. Cittacetāsikāti vuttaṃ hoti. Tesam cittuppādānaṃ. **Icevantī**ādito paṭṭhāya vuttappakārena. **Saṅgahamuttaranti** jātiniddeso yaṃ. Uttare uttame tayo pabhedasaṅgahe katvāti sambandho. **Bhūmipuggalabhedenāti** sahatthe karaṇavacanāṃ. Kāmāvacarādībhūmibhedena duhetukādi puggalabhedena saddhinti attho. **Pubbāparaniyāmitanti** āvajjanādi cakkhuvīññāṇādi pubba cittāparacittānukkamena niyāmitaṃ vavatthitaṃ. **Pavattisaṅgahamnamātipi** jātiniddesoyeva. Evaṃ nāmake dve pavattisaṅgaheti attho. **Paṭisandhipavattiyanti** paṭisandhipavattīsu. Vacanavipallāso hesa. Paṭisandhikālepavattikālecāti attho. Paṭisandhikāle pavattisaṅgahaṅca pavattikāle pavattisaṅgahaṅcāti dve saṅgahepavatti pavakkhāmīti vuttaṃ hoti. Ayaṅca attho uparisaṅgahe ārabba gāthāya pākaṭo. Keci pana niddhāraṇe bhummanti vadanti. Evaṃsati upari saṅgaho paṭisandhisāṅgahonāma siyā. Na pavatti saṅgaho nāma. Evaṅca sati upari vīthimuttasaṅgahe ārabba gāthāyaṃ sandhiyaṃ pavattisaṅgahonāma idāni vuccatīti iminā na sameti.

[115] **Ṭīkāsu** pana

“Uttaraṃ vedanāsaṅgahādivibhāgato uttama”nti vuttaṃ. Taṃ vicāretabbaṃ.

Evañhi sati pakiṇṇakasaṅgahova idha saṅgahasaddena gahito siyāti. Yasmāpana tiṇṇaṃ dvinnāṅca pabhedasaṅgahānaṃ majjhe ṭhatvā ayaṃ anusandhigāthā pavattā. Tasmā pubbe tayopi pabhedasaṅgahā idha saṅgahasaddena gahetuṃ yuttāti daṭṭhabbā. Ayaṃ pana pavattisaṅgaho vatthudvārālambaṅghi saddhiṃ yojetvā vutto suvuttoti tāni tīni chakkānīpi puna idha nikkhittāni.

[116] **Vibhāvaniyaṃ** pana

“Vatthudvārālambaṅga saṅgahā heṭṭhā kathitāpi paripuṇṇaṃ katvā pavattisaṅgahaṃ dassetuṃ puna nikkhittā”ti vuttaṃ. Taṃ na sundaraṃ.

Na hi sakalā vatthudvārālambaṅgasāṅgahā idha nikkhittāti. Visayānaṃ dvāresu pavatti **visayapavatti**. Etthaca pavattīti āpātāgamanameva vuccati. Vakkhati hi **ekacittakkaṅṇā tītānivātī**ādīṃ. Sā pana kāci sīghatamā, kāci sīghatarā, sīghā, dandhā, dandhatarā, dandhatamāti chadhā hotīti. Kammādīnaṃ visayānaṃ dvāresu pavatti paccupaṭṭhānaṃ āpātāgamaṃ visayappavatti. Vakkhati hi

kammaṃvā kammanimittaṃvā gatinimittaṃvā kammabalena channaṃ dvārānaṃ aññatarasmiṃ paccupaṭṭhātīti.

[117] Vibhāvanīyaṃ pana

“Visayesuca cittānaṃ pavatti visayappavattī”tipi vuttaṃ. Taṃ na sundaraṃ.

Evañhi sati atiparittārammaṇe visayappavattināma anupapannā āpajjātīti. **Tatthāti** tesu chakkesu. Dhātubhedam patvādātunānattaṃ pamāṇanti mananaṃ vijānana to visuṃ katvā manodhātu visuṃ vuttā. Viññābhedaṃ patvā pana yaṃkiñci mananaṃ vijānane anto gadhamevāti vuttaṃ **cakkhuvīññāṇaṃ.La. Chaviññāṇānīti** chavīthiyo pana dvārappavattā cittapavattīyo yojetabbāti sambandho. Cakkhudvāre pavattā vīthi **cakkhudvāravīthi**. Cakkhudvāravikāraṃ paṭicca pavatto cittappabandhoti attho. Evaṃ sesesu. Asādhāraṇena cakkhuvīññāṇena upalakkhitā vīthi **cakkhuvīññāṇavīthi**. Suddho pana manovīññāṇapabandho **manovīññāṇavīthi**.

Vibhāvanīyaṃ pana

“Cakkhuvīññāṇasambandhinī vīthi tena saha ekārammaṇa eka dvārikatāya saha caraṇabhāvato cakkhuvīññāṇa vīthī”ti vuttaṃ.

Dvārappavattāti dvāre uppannā. Taṃ taṃ dvāravikāraṃ paṭicca uppannāti attho. **Cittappavattiyoti** cittapabandhā. **Atimahantanti** sāmi atthe paccattavacanaṃ. Atimahantassa pañcālambaṇassa pavatti.La. Atiparittassa pañcālambaṇassa pavatticāti pañcadvāre catudhā. Manodvāre pana vibhūtassa chaḷārammaṇassa pavatti avibhūtassa chaḷārammaṇassa pavatticāti dvidhāti chadhāvisayappavatti veditabbāti yojanā. Atimahantādibhāvo cettha ālokādi paccaya vasenavā vatthu atimahantādivasenavā veditabbo. Tattha saṅhasukhumampi dūraṃpi rūpādīnaṃ adhiṭṭhānavatthunāma ālokādi paccaya sampattiyā sati atimahantameva. Tathā hi buddhassa bhagavato pathamāti nīhārakālādīsu loka vivaraṇa pāṭihāriyapavatti kāle avīcinirayepi akaniṭṭhepi paracakkavāḷesupi saṅhasukhumānica dūrānica rūpāni idha ṭhitāva passantī. Tadā hi uḷāro obhāso pāturahosi. Tassa vasena sabbepi pathavisineru cakkavāḷa siluccayādayo jātiphalikakkhandhā viya sampajjanti. Mahanto uḷāro obhāso pāturahosi atikammadevānaṃ devānubhāvanti hi vuttaṃ. Upapattidevabrahmādīnaṃ pana pasādanissayabhūtānaṃ obhāsajātātāyapi pathavipabbatādayo cakkhurūpādīnaṃ antaraṃ kātum nasakkontīti. Tathā dūrepi pabbatādirūpāni vatthu atimahantatāya candasūriya tārakādi rūpāni visaya vatthu mahantatāya obhāsa jātātāya ca atī mahantāni nāma hotīti. Ālokādi paccayānaṃ pana adhiṭṭhānavatthūnaṃ dubbala dubbalatara dubbalatamānukkamena mahantādibhāvo vattabboti. Yāni pana pañcālambaṇāni ekacittakkhaṇaṃ atikkamma āpātaṃ āgacchantī, tāni atimahantārammaṇānīnaṃ. Yāni dvatticittakkhaṇāni atikkamma, tāni mahantārammaṇāni. Yāni catu pañca cha satta aṭṭha nava cittakkhaṇāni atikkamma, tāni parittārammaṇāni. Yānipana dasekādāsadvāda terasa cuddasa pannarasa cittakkhaṇāni atikkamma āpātaṃ āgacchantī. Tāni atiparittā rammaṇānīti. Pakkhatīca **ekacittakkhaṇātītānīvātīdi**. **Vibhūtassāti** pākāṭassa, **avibhūtassāti** apākāṭassa. Evaṃ chachakkāni sarūpato niddisīvā idāni tāni sabbāni ekato yojetvā vīthiccittappavattim vitthārento kathanti pucchivā rūpārūpānaṃ tāva addhānaparicchedam dassetuṃ **uppādaṭṭhitīti** māha. Tattha **kathanti** kena pakārena vīthiccittappavatti hotīti attho.

[118] Vibhāvanīyaṃ pana

“Kathanti kena pakārena atimahantādivasena visaya vavattānaṃ hotīti pucchivā cittakkhaṇavasena taṃ pakāsetuṃ uppādaṭṭhitīti āradhā”nti vuttaṃ. Taṃ yuttaṃ viya na dissati.

Evañhi satiādito pañcannaṃ chakkānaṃ okāsonāma nasiyā. Naca uppādaṭṭhiti.La.

Rūpadhammānamāyūti idaṃ visaya vavatthānatthameva vuttanti sakkā viññātunti. Uppajjanam uppādo. Sabhāva paṭilābhoti attho. Ṭhānam ṭhiti. Yathāladdhasabhāvassa anivattīti attho. Bhañjanam bhaṅgo. Tassa parihāyivā antaradhānanti attho. **Ekacittakkhaṇaṃnāmā**ti ekassa cittassa khaṇonāma. So pana khaṇo accharāsaṅghāṭakkhaṇassa akkhinimmilanakkhaṇassaca anekakoṭi satahassabhāgo daṭṭhabbo. Accharāsaṅghāṭakkhaṇe anekakoṭisatasahassasaṅkhā vedanā uppajjantīti hi aṭṭhakathāyaṃ vuttam. Ācariyānandattheramatena panettha uppādabhaṅga vasenakhaṇadvayaṃ ekacittakkhaṇaṃnāmāti vattabbaṃ. Yathā hi loke vijjunāma vaddhanānantarameva bhijjati. Na panassā vaddhanassa bhijjanassaca antarā ṭhitināma visuṃ paññāyati. Yathā ca uddham ujum khittam leḍḍu uppativā patati. Na pana uppattanassa patanassa ca antarā ṭhitināma visuṃ dissati. Tathā cittaṃpi. Taṃpi hi udaya bhāgānantarameva vayabhāge patati. Na panassa rūpadhammānam viya tesam dvinnam bhāgānam majjhe visuṃ eko gaṇanūpago ṭhitibhāgonāma upalabbhati. Evañca katvā yamakesu cittassa uppādabhaṅgāva tattha tattha vuttā. Visesato pana cittayamake uppannaṃ uppajjamānanti. Bhaṅgakkhaṇe uppannaṃ. No ca uppajjamānam. Uppādakkhaṇe uppannañceva uppajjamānañcātīdinā bhaṅguppādāva cittassa vuttā. Kathāvatthumhica ekaṃ cittaṃ divasaṃ tiṭṭhatīti āmantā. Upaddhadivaso uppādakkhaṇo. Upaddhadivaso vayakkhaṇoti. Na hevaṃ vattabbe. Ekaṃ cittaṃ dve divase tiṭṭhatīti āmantā. Eko divaso uppādakkhaṇo. Eko divaso vayakkhaṇoti nahevaṃ vattabbe. Ekaṃ cittaṃ cattāro divase tiṭṭhatīti āmantā. Dve divasā uppādakkhaṇo. Dve divasā vayakkhaṇoti na hevaṃ vattabbe. La. Māsam. Dve māse. Cattāromāse. La. Saṃvaccharaṃ, dve saṃvaccharāni. Cattāri saṃvaccharāni. La. Kappaṃ. Dve kappe. Cattāro kappetiadinā dve uppādavayabhāgāva cittassa vuttā. Na ṭhitibhāgo. Yadi so visuṃ upalabbheyya. Ekaṃ cittaṃ divasaṃ tiṭṭhatīti āmantā. Divasassa pathamo bhāgo uppādakkhaṇo. Dutīyo ṭhitikkhaṇo. Tatīyo vayakkhaṇoti evaṃ mahātherena vicārito siyā. Tayo divase tayo māse tīṇi saṃvaccharāni tayo kappeti imānīpi avajje tabbānieva siyunti. Ettha siyā, nanu suttantesu tīṇi māni bhikkhave saṅkhatassa saṅkhata lakkhaṇāni. Katamānītīni, uppādo paññāyati. Vayo paññāyati. Ṭhitassa aññathattaṃ paññāyatīti vuttam. Tathā vedanāya uppādo paññāyati. Vayo paññāyati. Ṭhitāya aññathattaṃ paññāyati. Saññāya. Saṅkhārānam. Viññānassa uppādo. La. Paññāyatīti vuttam. Tasmā cittassa tatīyo ṭhitibhāgo visuṃ upalabbhati yevāti. Na. Pabandhaṭṭhiyā eva tattha vuttattāti. Katham viññāyatīti ce, uppādavaye pathamaṃ vatvā pacchā puna visuṃ ṭhitassa aññathattaṃ paññāyatīti imassa vuttattāti. Itarathā uppādo paññāyati. Ṭhitassa aññathattaṃ paññāyati. Vayo paññāyatīti vuttam siyāti. Nanu pabandhaṭṭhi nāma paññatti hoti. Sāca asaṅkhatā, suttantānica saṅkhata lakkhaṇa visayāni. Tasmā sā pabandhaṭṭhi tattha vuttāti nasakkā viññātunti ce. Na na sakkā. Abhidhammepi saṅkhatadhammaniddesesu samūha saṅghāna santati paññattīhipi niddesassa diṭṭhattā. Tathā hi rūpāyatananiddesādīsu dīghaṃ rassaṃ saṅhaṃ thulaṃ vaṭṭam parimaṇḍalaṃ caturassaṃ chaḷaṃsaṃ aṭṭhaṃsaṃ soḷasaṃsaṃ ninnaṃ thalantiadinā, vibhaṅge ca kesā lomā nakhā dantātiadinā paññattisena saṅkhatadhammā niddiṭṭhāti. Suttantesu vattabameva natthi. Īdisesu hi ṭhānesu paññattivasena pavattāpi desanā saṅkhatadhammameva āhacca tiṭṭhati. Tasmā yathā uppādabhaṅgānam paccekam ekeko khaṇo cittassa labbhati. Na tathā ṭhitiyāti. Ayaṃ ācariyānandatthe rassa adhippāyo. Ayañca vādo saṃyuttaṭṭhakathāyaṃ eva āgato. Soca saṅgahakārena paṭikkhitto. Vuttañhi tattha, apare pana vadanti. Arūpadhammānam jarākhaṇonāma nasakkā paññāpetuṃ. Sammā sambuddhoca vedanāya uppādo paññāyati. Vayo paññāyati. Ṭhitāya aññathattaṃ paññāyatīti vadanto arūpadhammānaṃpi tīṇi lakkhaṇāni paññāpeti. Bhāniatthikkhaṇaṃ upādāya labbhantīti vatvā –

Atthitā sabbadhammānam, ṭhitināma pavuccati;
Tasseva bhedo maraṇaṃ; Sabbadā sabbapāṇinanti.

Imāya ācariyagāthāya tamatthaṃ sādheti. Athavā, santativasena ṭhānam veditabbantica vadanti. Imasmim pana sutte ayaṃ viseso natthi. Tasmā ācariyagāthāya suttaṃ appaṭibāhetvā suttameva pamāṇaṃ kātabbanti. Tattha jarākhaṇonāma uppādakkhaṇabhaṅgakkhaṇānam majjhe visuṃ jarāya khettabhūto ṭhitikkhaṇo vuccati. Aññathattanti jarāeva. Atthikkhaṇanti khaṇadvayameva. Paṭikkhittoṇi pana ayaṃ vādo kathāvatthu pāḷiyā saddhim suṭṭhu sametiyeva. Apica, uddham uppatitassa leṭṭussa uppattanivatti viya yā cittassa udayasaṅkhātassa vaḍḍhanassa nivattināma atthi. Na hi udaye anivattante vayoṇāma sambhavatīti. Sā eva udaya pariyaṃtamattabhūtā idha ṭhitipariyāyoti sakkā vuttam.

So pana visuṃ gaṇanūpago eko khaṇonāma nahotīti katvā abhidhamme dveeva khaṇā cittassa vuttā. Udayabhāgassa pana ādi koṭiṃ vayabhāgassaantakoṭiṇca thapetvā majjhebhāgadvayanissitā paripaccana lakkhaṇā jarānāma arūpadhammānaṃpi labbhatiyeva. Taṃ sandhāya dhātukathāyaṃ jarādvīhikhandhehisāṅgahitātivuttanti daṭṭhabbaṃ.

[119] Yaṃ pana vibhāvaniyaṃ

“Uppādabhaṅgavatthāhi bhinnā bhaṅgābhimukhāvattāpi icchitabbā. Sā ṭhitināmā”ti vuttaṃ. Taṃ kathāvattupāliyaṃ saha na sameti.

Upaddhadivaso uppādakkhaṇo. Upaddhadivaso vayakkhaṇo. Pathamo divaso uppādakkhaṇo. Dutīyo vayakkhaṇoti hi vicārentena uppādabhaṅgavatthā hi bhinnā tatīyā avattā tassāṃ pāliyaṃ paṭikkhattāyeva hotīti.

[120] Etena yaṅca tattha

“Pāliyaṃ pana veneyyajjhāsayaṃ nuromato nayadassanavasena sā na vuttā. Atidhammadesanāpi hi kadāci veneyyajjhāsayaṃurodhena pavattati. Yathā, rūpassa uppādo upacayo santatīti dvidhā bhinditvā desito”ti vuttaṃ. Taṃpi paṭikkhattaṃ hoti. Vibhāgārahassa hi dhammassa vibhāgakaraṇaṃnāma veneyyavasenātipi dhammavasenātipi yujjati. Vijjamāne sati visuṃ katvā vattabbassa abhidhamme avacanaṃ pana veneyyavasenāti na yuttametanti.

[121] Yampi tattha

“Sutteca tīṇi māni bhikkhave saṅkhatassa saṅkhatalakkaṇāni. Katamāni tīṇi. Uppādo paññāyati. Vayo paññā yati. Ṭhitassa aññathattaṃ paññāyatīti evaṃ saṅkhatadhammasseva lakkhaṇadassanattaṃ uppādādīnaṃ vuttattā nasakkā pabandhassa paññattisabhāvassa asaṅkhatassa ṭhiti tattha vuttāti viññātu”nti vuttaṃ. Taṃpi na gahetabbaṃ.

Abhidhammepi heṭṭhā vuttanayena paññattisīsenā saṅkhatadhammānaṃ niddesassa diṭṭhattāti.

[122] Yampi tattha

“Upasaggassaca dhātvattheyeva pavattanato paññāyatīti etassa viññāyatīti attho”ti vuttaṃ. Taṃpi na yuttaṃ.

Yathānulomasāsanañhi suttaṃ. Tasmā tattha vineyyānaṃ suṭṭhu paññāyanameva adhippetanti. Arūpaṃ arūpisabhāvattā lahupariṇāmaṃ. Rūpaṃ pana rūpidhammattāyeva dandhapariṇāmanti vuttaṃ **tānipana.La. Rūpadhammāna māyūti.**

[123] Vibhāvaniyaṃ pana

“Gāhakagahetabba bhāvassa taṃtaṃ khaṇavasena nippajjanato”ti kāraṇaṃ vuttaṃ. Taṃ akāraṇaṃ.

Na hi gāhakaṃ arūpaṃ gahetabbañca rūpaṃ gahaṇasampajjanattaṃ lahuṃ pariṇamati garuṃ pariṇapatīti sakkā vattuntī. Tāni tādisāni sattarasannaṃ cittānaṃ khaṇāni sattarasavā tāni cittakkhaṇāni rūpa dhammānamāyūti yojanā. Sattarasa cittakkhaṇasamapamāṇāni khaṇāni viññatti rūpalakkhaṇa rūpavajjanaṃ rūpadhammānaṃ āyunāmāti vuttaṃ hoti. Khaṇamattato pana aṭṭhakathāyena ekapaññāsakhaṇāni honti, mūlaṭṭikāyena dvattiṃsakhaṇāni. Tatthaca ādimhi dve khaṇāni

rūpadhammānaṃ ekaṃ uppādakkhaṇameva. Ante dve ekaṃ bhaṅgakkhaṇameva. Majjhe aṭṭhavīsa khaṇāni tesāṃ ekaṃ ṭhitikkhaṇamevāti daṭṭhabbaṃ. Na hi dandhaparīṇatānaṃ rūpānaṃ uppādabhaṅgāpi cittaṣṣa viya lahuḁā bhavituṃ arahantīti. Tattha viññattidvayaṃ ekacittakkhaṇikaṃ. Upacayasantatiyo uppādamattā aniccatā bhaṅgamattā. Jaratā rūpa dhammānaṃ ṭhitikkhaṇamattāti daṭṭhabbā. Mūlaṭṭikāyena panettha tāni pana soḁasacittakkhaṇāni rūpadhammānamāyūti vattabbaṃ. Ṭṭikācariyo hi paṭiccasamuppādavibhaṅge āgataṃ mahāṭṭhakathāvacanaṃ paṭiṭṭhapento soḁasacittakkhaṇāyukabhāvaṃ sambhāveti, evaṃ santepi khandha vibhaṅgeyeva tāva rūpānaṃ uppādanirodhavidhānassa mahāaṭṭhakathā vādassa yamakapāḁivirodhaṃ dassetvā saṅgahakārena paṭisiddhattā na sakkā taṃ paṭiṭṭhapetunti. Tasmim vāde hi paṭisiddhe tattha āgatā soḁasāyukatāvā atirekasoḁasāyukatāvā paṭisiddhāyeva hotīti.

[124] Yaṃ pana vibhāvaniyaṃ

Taṃ ṭṭikāyayaṃ tayidamasāranti paṭikkhipitvā tadatthaṃ sā dhentena “paṭisandhicittena sahuppannaṃ rūpaṃ tato paṭṭhāya sattarasamena saddhiṃ nirujjhati. Paṭisandhicittassa ṭhitikkhaṇe uppannaṃ rūpaṃ aṭṭhārasamassa uppādakkhaṇe nirujjhatītiādinā aṭṭhakathāyameva sattarasacittakkhaṇassa āgatattā” ti kāraṇaṃ vuttaṃ. Taṃ na sundaraṃ.

Yañhi saṅgahakārassa sattarasāyukavacanaṃ ṭṭikākārena vicāritaṃ. Tadeva dassetvā ṭṭikāyayo paṭikkhittoti na yuttame tanti. Ekacittassa khaṇaṃ viya khaṇaṃ ekacittakkhaṇaṃ. Atthato abhinnaṃ pi hi khaṇaṃ idaṃ cittaṣṣa idaṃ rūpānanti kappanāvasena bhinnaṃ viya katvā upacariyatīti. Ekacittakkhaṇaṃ atītaṃ etesanti **ekacittakkhaṇātīti**. Atimahantabhūtāni pañcārammaṇāni.

[125] Vibhāvaniyaṃ pana

“Etānivā taṃ atītānīti ekacittakkhaṇātīti kānī” ti vuttaṃ. Taṃ na sundaraṃ.

Na hi niruddhadhammavisayo atītasaddo kiñci atikkamitvā uddhaṃ āgatāni paccuppannarūpāni dīpetīti sakkā vattunti. Bahūni cittaṃkhaṇāni atītāni etesanti **bahucittakkhaṇātīti**. Mahantādi bhūtāni pañcārammaṇāni. Rūpadhammānaṃ pana rūpadhammesveva āpātāgamane thokaṃ balavantatā icchitabbā. Teca ṭhitikkhaṇeyeva paripuṇṇapaccayupaladdhā hutvā balavantā hontīti vuttaṃ **ṭhitipattānevāti**. Evasaddena ṭṭikākārassa vādaṃ nīvāreti. So hi uppajjamānameva rūpaṃ pasāde ghaṭṭetīti icchatīti. **Pañcālambaṇāni pañcadvāre āpātamāgacchantīti** ettha rūpasaddārammaṇāni asampatta vasena itarānica sampattavasena gocarabhāvaṃ upagacchanti. Ayañca visesoghaṭṭanavisesena veditabbo. Purimānihi dve nimittavaseneva ghaṭṭenti. Na vatthuvaseṇa. Pacchimāni pana tīṇi vatthuvaseṇa ghaṭṭenti. Na nimittamattavaseneva nimittaghaṭṭanañcānaṃ asampattānaññeva na sampattānaṃ. Vatthughaṭṭanaṃ pana sampattānaññeva. No asampattā hoti. Nanti. Yathā hi tīre gacchantānaṃsarīranimittāni pokkharāni yāudake dissanti. Tasmim uduke orohantānaṃ pana tāni tattha na dissanti. Evameva sampattāni rūpasaddārammaṇāni naghāṭṭenti. Kasmā, visayavisayīnaṃ majjhe ālokassa ākāsassaca abhāvena nimittokāsassa abhāvato. Asampattāniyeva pana attano nimittupaṭṭhāpanavaseneva ghaṭṭenti. Kasmā, nimittokāsassa laddhattā. Itarāni pana tīṇi yathājātavatthuvaseṇa ghaṭṭenti. Tasmā tāni sampattāniyeva ghaṭṭenti. No asampattānīti. Tattha yāni asampattāniyeva hutvā ghaṭṭenti. Tāni sayam dūre ṭhatvā nimitta appanāvasene ghaṭṭitattā ekekasmim pasāde candamaṇḁala sūriya maṇḁalādivaseṇa asanisaddamaṇḁala meṇḁasaddamaṇḁalādivaseṇa ca mahantānīpi bahūnīpi āpātamāgacchantiyeva. Itarāni pana tīṇi sampattāniyeva ghaṭṭentīti ekekasmim pasāde ekekameva āpātamāgacchantīti daṭṭhabbaṃ. Idañca pañcadvārasene vuttaṃ. Mano dvāre pana sabbānīpi ārammaṇāni asampattāniyeva āpātamāgacchantīti. Etthaca pañcadvāreti idaṃ asādhāraṇa dvāradassanavasene vuttaṃ. Tāni pana pañcālambaṇāni yadāsakasakadvāre ghaṭṭenti. Tadā manodvārepi apāta māgacchantiyeva. Ekekaṃ ārammaṇaṃ dvīsu dvīsu dvāresu apāta māgacchantīti hi aṭṭhakathāyayaṃ vuttaṃ. Tasmā yadā candamaṇḁala sūriyamaṇḁala pabbatamaṇḁala rukkhamaṇḁala yamañcivā passanti. Tadā ekekasmim cakkhupasāde ekekāni manodvāre ekanti anekāni candamaṇḁalādīni ekakhaṇe

upaṭṭhahanti, evaṃ sesārammaṇe sūti daṭṭhabbaṃ. Apātāgamañcetta lañchakānaṃ tālapaṇṇe lañchanakhandhaṃ thapetvā muggarena paharaṇakāle lañchanakhandhassa tālapaṇṇe āpātetvā akkharupaṭṭhāpanaṃ viya daṭṭhabbaṃ. Yato dvārānaṃ vikārapatti hotīti.

[126] Yaṃ pana vibhāvaniyaṃ

“Ābhogānurūpaṃ anekakalāpagatāni āpātaṃ āgacchantī”ti vuttaṃ. Tattha ābhogānurūpanti idaṃ vicāretabbaṃ.

Yattakāni hi pañcālambaṇāni cakkhādipathe ālokādi sahitāni hutvā ṭhitāni honti. Tattakāni sabbāni niddāyantassapi viśaṇṇi bhūtassapi aññavihitassapi yaṃkiñci jhānaṃvā phalaṃvā nirodhaṃvā samāpajjantassapi ābhogena vinā attano dvāresu āpātamāgacchantiyeva. Nakevalaṃ attanodvāresu eva. Athakho manodvārepi. Nakevalaṃ bhavaṅgamanodvāreeva. Āvajjanādīsu pana catubbhūmaka vīthiccittesupi āpātaṃ āgacchantiyeva. Ayaṃnāma mano manodvāraṃ nahotīti navattabboti hi dvārakathāyaṃ vuttaṃ. Ayañca attho pathamajjhānassa saddo kaṇṭakoti iminā pāṭhena dīpetabbo. Pathamajjhānaṃ samāpannaṃ hi saddo sotamhi ghaṭṭetvā jhānacittasankhāte manodvāre āpātamāgacchati. Tada jhānacitta santati calitvā vocchijjati. Jhānā vuṭṭhāti. Bhavaṅgapāto hoti. Taṃ saddārammaṇaṃ vīthiccittaṃ pavattatīti. Dutīyajjhānādīni samāpajjanto pana appakena saddena navuṭṭhāti. Adhimattasaddena pana vuṭṭhātiyeva. Na hi tāni āneñjapattānināma honti. Arūpajjhānānieva pana āneñjapattānināma honti. Tasmā tāni samāpajjanto adhimattasaddenapi navuṭṭhātiyevāti. Tesu pana tathā āpātamāgatesu tadārammaṇāni vīthiccittāni pavattantiyevāti navattabbaṃ. Bhavaṅga santatiyāvā javanasantatiyāvā vocchinnāya pavattanti. Avocchinnāya napavattanti. Pavattamānānipi ārammaṇā dhimattādivasena laddhapaccayavisesa ekekasmim ārammaṇeeva pavattanti. Na ekakkaṇṇe pañcasūti daṭṭhabbaṃ. Etthaca atthavasā vibhatti pariṇāmoti katvā ekacittakkhaṇātītāni ṭhitipattāneva pañcā lambaṇāni ekacittakkhaṇātīte ṭhitippatte eva pañcadvāre bahu cittakkhaṇātītāni bahucittakkhaṇātīteti yojetabbaṃ.

[127] Vibhāvaniyaṃ pana

“Te pana pasādā bhavaṅgacalanassa anantarapaccayabhūtena bhavaṅgena saddhim uppannā”ti vuttaṃ.

Evaṃ pana sati bahucittakkhaṇātītānipi pañcālambaṇāni ekacittakkhaṇātīteeva pañcadvāre āpātamāgacchantīti āpajjati. Eta rahi pana ekakkaṇṇe sahuppannānaññeva vatthārammaṇānaṃ ghaṭṭanaṃ icchanti. Sahuppannānivā pana hontu nānuppannānivā, balavabhāvoyeva pamaṇanti amhākaṃ khanti. Sabbaṃ vicāretvā gahetabbaṃ.

[128] Yaṃ pana vibhāvaniyaṃ

“Āvajjanaena saddhim uppannāti apare”ti vuttaṃ. Taṃ na yujjati.

Evañhi sati aññadeva pañcārammaṇānaṃ āpātāgamanavattu. Aññadeva pañcaviññānaṃ nissayavattūti evaṃ viruddhassa atthassa āpajjanatoti. Evaṃ pañcadvāre visayapavattiyā ādilakkaṇaṃ dassetvā idāni sabbapāripūraṃ visayapavattivibhāgaṃ vīthiccitapavattiñca dassento tasmātiādīmāha. **Tatoti** tasmā cakkhussa āpātāgamanapaccayā. Cakkhussa āpātāgamanena saheva bhavaṅgassapi āpātaṃ āgacchatiyevāti vuttaṃ **dvikkhattumbhavaṅgecaliteti**. Calanañcetta yathā gahitaṃ kammādi ārammaṇaṃ muñcivā idāni attani āpātaṃ āgacchantaṃ abhinavārammaṇaṃ gahetuṃ ussāhajātassa viya bhavaṅgasantānassa vikārapatti daṭṭhabbaṃ. Etthaca cakkhussa āpātāgamaṇaṃ cakkhuvīññānupattiyā eva kāraṇaṃ. Na āvajjanupattiyā. Bhavaṅgassa āpātāgamaṇameva pana āvajjanupattiyāpi kāraṇaṃ hotīti daṭṭhabbaṃ.

[129] Vibhāvanīyaṃ pana

Manodvārepi āpātāgamaṇaṃ viṣuṃ apatvā rūpādīnaṃ cakkhādisu ghaṭṭanaṃnāma yogyadesāvattāhānaṃ eva. Tamevaca bhavaṅgu pacchedassapi kāraṇaṃ hotīti katvā “pañcasu hi pasādesu yogyadesāvattāhāna vasena ārammaṇe ghaṭṭite pasādaghaṭṭanānubhāvena bhavaṅgasantati vocchijjamānāti” vuttaṃ. Taṃ tathā na daṭṭhabbaṃ.

Na hi yogyadesāvattāhānameva ghaṭṭananti sakkā vattaṃ. Yogyadesepana tathāva nimittaghaṭṭanavasena vatthughaṭṭanavasena ca asani nipātoviya pasādesu yujjanaṃ manthanaṃ khobhakaṇaṃ ghaṭṭananti ca āpātāgamananti ca vuccatīti daṭṭhabbaṃ. Ayañca attho heṭṭhā vuttoyeva. Etthaca ayaṃpi eko dhammaniyāmayevāti katvā nānā tṭhānīyesu dvīsu dvīsu dvāresu saheva āpātāgamaṇaṃ paccetabbaṃ. Rūpādīnā pasāde ghaṭṭite taṃ nissitasseva pañcaviññāṇassa calanaṃ siyā. Kathaṃ pana hadayavatthunissitassa bhavaṅgassāti na codetabbanti.

[130] Vibhāvanīyaṃ pana

Tameva codanaṃ samuṭṭhāpetvā taṃ pariharanto “santati vasena ekābaddhattā”tiādimāha. Tattha santativasenāti navattabbaṃ. Saṅghānavasenāti pana vattabbaṃ. Sabbañcetamaṃ sārato na paccetabbaṃ.

Kasmā, tādisassa anukkamacalanassa aṭṭhakathāyameva daḷhaṃ paṭikkhattā. Vuttañhi tattha ekekaṃ ārammaṇaṃ dvīsu dvīsu dvāresu āpātāgacchati. Rūpārammaṇaṃhi cakkhupasādaṃ ghaṭṭetvā taṅkhaṇeyeva manodvāre āpātāgacchati. Bhavaṅgacalanassa paccayo hotīti attho. Satta gandha rasa phoṭṭhabbesupi eseva nayo. Yathā hi sakuṇo ākāsenāgantvā rukkhagge nilīyamānova rukkhāsākaṇaṃ ghaṭṭeti. Chāyācassa pathaviyaṃ paṭihaññati. Sākhāghaṭṭana chāyāpharaṇāni apubbaṃ acarimaṃ ekakkhaṇeyeva bhavanti. Evaṃ paccuppannarūpādīnaṃ cakkhupasādādighaṭṭanañca bhavaṅgacālana samatthāyamanodvāreāpātāgamaṇaṃ apubbaṃ acarimaṃ ekakkhaṇeyeva hotīti. Evaṃ sakuṇopamāya saṭṭaṅkhaṇeyevāti ca apubbaṃacarimaṃ ekakkhaṇe yevātica vatvā daḷhaṃ paṭibhiddhattā taṃ anukkamacalanaṃ acintevā dhammaniyāmasena ekappahāracalanaṃ paccetabbanti. **Bhavaṅgasotaṃvocchinditvāti** bhavaṅgapavāhaṃ sabbaso avacchinnaṃ katvā. **Āvajjantanti** adisvāva kiṃnāmetanti āvajja mānaṃ. **Passantanti** atta paccakkaṃ kurumānaṃ. **Sampaṭicchantanti** muñcituṃ adatvā yathādiṭṭhaṃ rūpaṃ paṭi gaṇhantaṃ. **Santīrayamānanti** suṭṭhu tīrentaṃvicārentaṃ. **Vavatthapentanti** suṭṭhu asaṅkarato thapentaṃ sallakkhentanti attho. Yonisomanasikārādivasena laddhopaccayo yenāti **laddhapaccayaṃ**. Yaṃkiñci javanaṃ javatīti sambandho. Taṃ pana javanaṃ ārammaṇassa dubbalakālevā mucchā maraṇāsannakālesuvā chakkhattuṃ vā pañcakkhattumevavā javatīti vuttaṃ **yebhuyyenāti**. **Javatīti** asaninipātasadisena javena pavattati. Tattha pathamajavanaṃ aladdhā sevanattā sabbadubbalaṃ hoti. Tato dutīyaṃ balavaṃ. Tato tatīyaṃ. Tato catutthaṃ. Iduṃ pana sabbabalavaṃ muddhapattaṃ hoti. Ito paṭṭhāya anukkamena parihāyamānaṃ pavattati. Sattamavāre gate parikkhīṇajavaṃ hotīti veditabbaṃ. **Javanā nubandhāniti** yathā paṭisotaṃ gacchantiṃ nāvaṃ udakaṃ thokaṃ anubandhati anugacchati. Evaṃ javanaṃ anubandhāni. Dve tadārammaṇapākānīti dvikkhattuṃ tadārammaṇakiccāni vipākacittāni pavattanti. **Yathārahanti** ārammaṇajavana sattānurūpaṃ. **Bhavaṅgapātoti** imasmiṃ atihantārammaṇe āvajjanato pathamabhavaṅgacalanatoyevavā paṭṭhāya uṭṭhitaṃ samuṭṭhitaṃ cittasantānaṃ yāvacaṭṭhajanā samuṭṭhahitvā pañcamajavanaṃ paṭṭhāya patitameva hoti. Evaṃ santepi samuṭṭhitavegassa sabbaso aparikkhīṇatāya patitanti navuccati. Dutīyatadārammaṇato paraṃ pana samuṭṭhitavegassa sabbaso parikkhīṇattā tadā eva taṃcittasantānaṃ patitānāma hoti. Tasmā patanaṃ pāto. Bhavaṅgabhāvenacittasantānassa pāto bhavaṅgapāto, bhavaṅgaṃ hutvā pātoti attho daṭṭhabbo. Bhavaṅgakicce bhavaṅgaṭṭhāne bhavaṅgārammaṇeca pāto bhavaṅgapātotivā. Imasmiṃ tṭhāne dovārikopamā, gāmillopamā, ambopamāca vattabbā. Tāsabbāpi aṭṭhakathāyaṃ gahetabbā. Ettāvātā sattarassa cittakhaṇāni paripūrepāti sambandho. Etthaca chachakkayojanā vattabbā. Yattha hi rūntī rammaṇaṃ ghaṭṭeti. Taṃ cakkhuvatthūṃ nissāya tattha ghaṭṭitaṃ rūpārammaṇaṃ ārabha

cakkhuvīññāṇaṃ uppajjati. Itarāni pana āvajjanādāni mano viññāṇāni attano attano atītānantaracittena sahuppannaṃ hadayaavatthūṃ nissāya tamevārammaṇaṃ ārabha uppajjanti. Cakkhudvāra manodvārāni sabbesampi vīthiccittānaṃ dvārakiccaṃ sādheti. Ayañca vīthi cakkhudvāre uppānattā cakkhudvāravīthīti. Cakkhuvīññāṇena upalakkhitattā cakkhuvīññāṇavīthītica vuccati. Ekacittakkhaṇaṃ atikkamma ghaṭṭanasamatthe atibalavā rammaṇe uppānattā atimahantārammaṇa vīthītica vuccatīti. Etthaca yattakāni rūpārammaṇāni cakkhupathe uppajjitvā tītipattāni honti. Tāni tattakāni tītipattesu pubbāparabhūtesu ekūna paññāsaparimāṇesu cakkhupasādesu kismiṃci naghaṭṭentīti navattabbāni. Tesu pana yadeva ekaṃ cakkhu imissā vīthiyā yathārahaṃ vatthubhāvaṃ dvārabhāvañca sādheti. Yatthaca ghaṭṭitaṃ rūpaṃ ārabha ayaṃ vīthi pavattati. Etadeva kicca sādhanāṃ nāma hoti. Yaṃ majjhimāyukanti vadanti, itarāni pana mogha vatthūnināma honti, yānimandāyukānīti mandāyukānītica vadanti. Tānipana yathāvutta kicca sādhanato purimāni pacchimānīti duvidhāni honti, tadubhayānīpi cakkhuvīññāṇassa uppādakkhaṇe tītibhāvena labbhamānāni aṭṭhacattālīsamattāni vedittabbānīti. Avasesāni pana tato purimatarāni pacchimakarānica laddhaghaṭṭanānīpi vatthudvārakiccāsiddhibhāve anāsankitabbattā idha nagahitānīti. Ettha siyā imāya vīthiyā uppattisamaye so puggalo ahaṃ idaṃ nāma passāmīti jānāti, na jānātīti. Najānāti. Kadā pana jānātīti. Sallakkhaṇavīthiyā pavattamānāya. Tathā hi sabbapathamaṃ cakkhudvāravīthi pavattati. Tato tadanuvattikā manodvāravīthi. Tato samudāyagāhikā. Tato vaṇṇasallakkhaṇā. Tato vatthugāhitā. Tato vatthusallakkhaṇā tato nāmagāhikā. Tato nāmasallakkhaṇāti. Tattha vaṇṇasallakkhaṇāya pavattamānāya ahaṃ nīlavaṇṇaṃ passāmītiādīnā vaṇṇaṃ sallakkheti. Vatthusallakkhaṇāya saṅghānaṃ sallakkheti. Nāma sallakkhaṇāya nāmaṃ sallakkhetīti. Iti taṃtaṃtaṃ sallakkhaṇavīthi yā pavattamānāyaeva taṃtaṃtaṃ passāmīti jānātīti. Etthaca alātacakkassa gāhikāvīya purimāhi dvīhi vīthīhi punappunaṃ gahitānaṃ rūpānaṃ samudāyato gāhikā tatīyā manodvāravīthi samudāya gāhikānāma, na hi samudāyagahaṇena vinā paribyaṭṭavaṇṇagahaṇaṃ sambhavatīti. **Yāva tadārammaṇuppādā pana appahontātītakanti** dvikkhattuṃ yāva tadārammaṇuppādā pavattitūṃ appahontaṃ hutvā atītadvatticittakkhaṇikaṃ. Yassa hi dvevā tīṇivā cittakkhaṇāni atītāni honti. Taṃ yāva tadārammaṇuppādā pavattitūṃ nappahoti na sakkoti. Evaṃ appahontaṃ hutvā atītakanti attho. **Apātamaḡatanti** cakkhudvāre manodvāreca āpātaṃ āgataṃ. **Natthi tadārammaṇuppādoti** ettha yassa tīṇi cittakkhaṇāni atītāni honti. Tassa cuddasa cittakkhaṇāyukāvase sassa ārammaṇassa sattamajavanena saheva niruddhattā tasmiṃ natthi tadārammaṇuppādoti yuttametāṃ. Na hi ekāvajjanavīthiyaṃ cittāni dhammavasena viya kālavasenāpi nānārammaṇāni icchanti aṭṭhakathācariyāti. Yassa pana dve cittakkhaṇāni atītāni. Tasmiṃ sattamajavanato paraṃ ekacittakkhaṇāyukāvasese ārammaṇe ekena tadārammaṇena uppajjitabbanti ce.Na. Na hi tādisaṃ nirodhā sannaṃ ārammaṇaṃ ekavāraṃpi tadārammaṇuppattiyā paccayo bhavitūṃ sakkotīti. Tathā hi mahāaṭṭhakathāyaṃ vipākuddhāre cittappavattigaṇānāyaṃ tadārammaṇāni dveti dveeva tadārammaṇa vārā āgatāti.

Yaṃ pana vibhāvaniyaṃ

“Dvikkhattumeva hi tadārammaṇuppatti pālīyaṃ niyamitā”ti vuttaṃ. Tattha pālīyanti aṭṭhakathāntiṃ sandhāya vuttanti gahetabbaṃ. Na hi sā nāma pālī atthi, yattha dvikkhattuṃ tadā rammaṇuppatti niyamitāti.

Majjhimabhāṇakāpana tadārammaṇaṃ ekaṃpi icchanti. Saṅgahakārena pana taṃ paṭisiddhanti idhapi taṃ therena paṭikkhittanti daṭṭhabbaṃ. Yadi evaṃ kasmā paramatthavinicchaye sakimdvēvā tadālabanti therena vuttanti. Majjhimabhāṇakānaṃ matena vuttanti daṭṭhabbanti. Ācariyānandatthero pana ekaṃpi icchatīyeva. Yathā hi āgantukabhavaṅgaṃ ekaṃ pavattati. Tathā tadārammaṇaṃpi ekaṃ napavattatīti nasakkā vattuṃ. Yañca cittappavattigaṇānāyaṃ tadārammaṇāni dveti vuttaṃ. Taṃpi ukkaṭṭhaparicchedavasena vuttanti, na nasakkā vuttanti. Yāva javanuppādāpi pavattitūṃ appahontātītakanti sambandho. Yassa hi ārammaṇassa cattāri pañca cha satta aṭṭhanava vā cittakkhaṇāni atītāni honti. Taṃ yāva javanuppādā pavattitūṃ nappahoti. Evaṃ appahontaṃ hutvā atītakanti attho. **Javanampi anuppajjitvāti** javanassapi anuppajjanato. Ayañhi tvāpaccayo bhāvattheeva daṭṭhabbo. Na kattuatthe. Kasmā. Attano padhānakriyāya samānakattukatāya abhāvato.

[131] Vibhāvanīyaṃ pana

“Hetumhicāyaṃ tvāpaccayo”ti vuttaṃ. Taṃ na sundaraṃ.

Na hi bāhiratthabhūto hetuattho kitakapaccayānaṃ visayo hotīti. Tasmā idha bhāvattheeva tvāpaccayo. Tatoca hetuatthe paccattavacananti daṭṭhabbaṃ. Etena yā lakkhaṇe hetumhicamānantapaccayānaṃpi pavatti katthaci vuttā. Sāpipaṭikkhittā hoti. Nahi bāhiratthabhūtā lakkhaṇahetuyo tesam visayā hotīti. Etthaca yassa ārammaṇassa navacittakkhaṇāni atītāni honti. Tassa avasesa aṭṭhacittakkhaṇā yukassa dutīya voṭṭhabbanena saheva niruddhattā tasmim javanaṃpi anuppajjivāti yuttametam. Kāraṇaṃ vuttameva. Yassa pana cattāri.La. Aṭṭhavā cittakkhaṇāni atītāni. Tasmim javanena uppanna bhavitabbanti ce.Na. Avasesachacittakkhaṇāyukampi hi ārammaṇaṃ javanuppattiyā paccayo bhavitum na sakkoti. Javanañhi uppajjamānaṃ sattakkhattum pavattitum pahonake ārammaṇe eva uppajjati. Pakatiniyāmena javanassa sattakkhattu paramatāya sambhavatoti. Ettha pana yathā visaññikāla mucchākāla maraṇakālesu vatthussa avisadatāya dubbalatā yaca javanaṃ chapañcavārepi pavattati. Tathā pakatikālepi ārammaṇassa dubbalabhāve sati chapañcavārepi pavattatiyevāti. **Dvattikkhattunt** dvikkhattumvā tikkhattumvā. Tathā hi aṭṭhakathāyaṃ voṭṭhabbane ṭhatvā ekaṃvā dnevā cittāni pavattanti. Tato āsevanaṃ labhitvā javanaṭṭhāne ṭhatvā puna bhavaṅgaṃ otaratīti vuttaṃ. Ettha hi tato āsevanaṃ labhitvā javanaṭṭhāne ṭhatvāti etena tatīyassa voṭṭhabbanassa pavattim dasseti. Itarathā ekaṃvā dnevā cittāni pavattanti. Tato bhavaṅgaṃ otaratīti vuttaṃ siyāti. Ekaṃvāti pana vācā siliṭṭhamattam daṭṭhabbaṃ. Yathā diratta tirattamti. Athavā, **tatoti** ekacittatovā dvicittatovāti attho. Tattha pathamena dvikkhattum dutīyena tikkhattum voṭṭhabbanassa uppatti vuttā hotīti. Āsevanaṃ labhitvāti idam pana upacāravacanamattam daṭṭhabbaṃ. Na hi voṭṭhabbanassa āsevanatā paṭṭhāne vuttāti. Ācariyānandattherena panettha voṭṭhabbanato paraṃ catupañca cittakkhaṇāvasese ārammaṇe catupañcjavānuppattiyā eva parittārammaṇavāro icchito. Na voṭṭhabbanā pariyośānavasena. Paṭṭhānehi bhavaṅgaṃ āvajjanāya anantarapaccayena paccayo tvevavutto. Na pana vutto āvajjanā bhavaṅgassa anantarapaccayena paccayoti. Yathā ca mucchāmarāṇakālesu vatthudubbalatāya cha pañcjavānavārā icchitabbā. Tathā idhapi ārammaṇadubbalatāyāti na na sakkā vattuntī. Ettha ca santīraṇato paraṃ ekacittakkhaṇā vasese ārammaṇe ekaṃ voṭṭhabbanam dvicittakkhaṇāvasese dve taduttari tīṇīti yuttaṃ siyā. Etarahi pana dvivoṭṭhabbanikā chaparittārammaṇavīthiyoti voṭṭhabbanikā pañcāti yojesuṃ. Evaṃ sante kīdise parittārammaṇe dvivoṭṭhabbanikā, kīdise tivoṭṭhabbanikāti vicāretabbā siyuntī. Yaṃ pana ārammaṇaṃ dvattikkhattumvoṭṭhabbanuppattiyā appahonakaṃ hoti. Taṃ āvajjanappattiyāpi paccayo na hotīti vuttaṃ **tattha bhavaṅgacalanameva hoti. Natthi vīthiccittuppādoti.** Tattha **bhavaṅgacalanamevāti** dvikkhattum bhavaṅgassa calanamattameva hoti. **Icevaṃ cakkhuvāre**ti iti evaṃ yadi ekacittakkhaṇātītakam rūpārammaṇaṃ cakkhussa apātāmāgacchatītiadinā vuttanayena cakkhuvāre catunnaṃ vārānaṃ vasena catudhā visayappavatti veditabbā, tathā sotadvārādīsu cātīyojanā. Sabbathāpi catudhā veditabbāti sambandho. Atiparittārammaṇampi apātāgatamattena moghavārassa ārammaṇaṃnāma hoti. Na ārammaṇakaraṇavasena. Itarāni pana ubhayathāpi itaresam vārānaṃ ārammaṇānīnāma hotīti vuttaṃ **catunnaṃ vārānaṃ yathākkamaṃ ārammaṇabhūtāti.**

Vibhāvanīyaṃ pana

Ārammaṇabhūtāti imassa atiparittārammaṇaṃ sandhāya paccayabhūtāti attho vutto. Tañhi moghavāra paññā panāya paccayo hotīti.

Pañcadvārevīthiccittāni yathārahaṃ kiccavasena satteva. Cittuppādā cittānaṃ uppattikhaṇavasena catuddasa. Vitthārā cittasarūpavitthārato catupaññāsāti yojanā. **Etthāti** parittajavanavāre.

137. Manodvāre pana ārammaṇadhammā parittakhaṇāpi atītānāgatāpi kālavimuttāpi apātāṃ āgacchantiyeva. Tasmā tattha ekacittakkhaṇātītānivā bahucittakkhaṇātītānivā ṭhitippattāneva apātāmāgacchantīti idam vidhānaṃ natthīti vuttaṃ **manodvārepana yadvibhūtamālambaṇaṃ**

āpātamāgacchatīti. Tattha **manodvāreti** suddhamanodvāre. Cakkhādīsu hi ghaṭṭanena saheva yattha apātamāgacchati. Taṃ missakadvāranti vuccati. Idha pana suddhamevā dhippetanti. Taṃpi pañcadvārānubandhakaṃ viṣuṃ siddhanti duvidhaṃ hoti. Tattha yathā ghaṇḍe daṇḍakena ekavāraṃ pahāṭe ghaṇḍasarīrabhūtā rūpa kalāpā cirāṃpi kālaṃ aññaṃaññaṃ ghaṭṭetvā anuravasaddasantānaṃ pavattenti. Tathā pañcadvāre ārammaṇena ekavāraṃ ghaṭṭite pañca dvārikavīthiyā niruddhāyapi atītaṃ pañcālambaṇaṃ manodvāre yathā pātāgatameva hutvā anekasahassānipi manodvārikavīthiccitta santānāni pavattetiyeva. Tesāṃ pana dvārabhūtaṃ bhavaṅgasantānaṃ anubandhakaṃnāma hoti. Tānica cittāni anubandhakavīthiccittānīnāma honti. Yattha pana pañcadvāraghaṭṭanā nubandhabhāvena vinā kevalaṃ tathā tathā chaḷārammaṇadhammā āpātaṃ āgacchanti. Taṃ viṣuṃ siddhaṃ nāma hoti. Kathaṃ pana tasmīṃ viṣuṃ siddhe manodvāre ārammaṇa dhammā āpātaṃ āgacchantīti. Vuccate. Diṭṭhato diṭṭhasambandhato sutato sutasambandhato saddhāya ruciyā ākāraparivitakkena diṭṭhinijjhānakantiyā nānākammabalena nānāiddhibalena dhātukkhotā vasena devatopasaṃhāravasena anubodhavasena paṭivedhavasenāti evamādīhi kāraṇehi āpātaṃ āgacchantīti. Tattha diṭṭhaṃnāma pubbe pañcahidvārehi gahitaṃ pañcālambaṇaṃ. Taṃpi kālantare kāraṇālābhe sati suddhe manodvāre āpātaṃ āgacchatiyeva. Diṭṭhasambandhaṃnāma diṭṭhasadisāṃ vuccati. Pubbe hi kiñci disvā aññaṃ yaṃkiñci anumānentassa adiṭṭhaṃpi taṃsadisāṃ atītaṃpi anāgataṃpi paccuppannaṃpi bahuāpātaṃ āgacchatiyeva. Sutaṃnāma parato sutvā gahitaṃ chaḷārammaṇaṃ. Taṃ pana mahāvisayaṃ hoti. Sabbaññudesanaṃ sutvā gahitaṃ na kiñci anārammaṇaṃnāma atthīti. Sutasambandhaṃnāma sutasadisāṃ. Saddhānāma parassa saddahanā. Rucināma attano mati. Ākāra parivitakko nāma atthacchāyaṃ byañjanacchāyaṃ kāraṇacchāyañca nissāya tathā tathā parivitakkaṇaṃ. Diṭṭhinijjhānakantiyānaṃ paññāyavā attano laddhiyāvā punappunaṃ upaparikkhitvā evamevāti sanniṭṭhānaṃ pāpetvā gahaṇaṃ. Sesāṃ pākaṭameva. Etthaca anantarūpanissaya paccayabhāvonāma cittasantānassa mahāvippahāro hoti. Sakiṃpi ārammaṇaṃ suṭṭhu āsevitvā niruddhakālato paṭṭhāya vassasatepi vassasahassepī bhavantarepi taṃārammaṇaṃ paṭicca bhavaṅga calanassa paccayo hoti. Cittañcaṇāma diṭṭhādīhi yathāvuttakāraṇehi saṃvaddhitaṃ mahāvippahāraṃ hoti. Kiñci nimittaṃ labhitvā ekasmiṃ khaṇe anekasahassesupi diṭṭhādīsu ārammaṇesu pharamānaṃ pavattati. Tehica kāraṇehi niccaṃ codīyamānaṃ cittasantānaṃ kāyagelaññādiṅke cittadubbalapaccaye asati niccakālaṃpi bhavaṅgato voṭṭhātuṃ ajjhāsayaṃyuttaṃ hoti. Na hi cittaṃnāma avibhūte ārammaṇe ramati. Vibhūteeva ramati. Tasmā bhavaṅgasampayutto manasikāro punappunaṃ bhavaṅgaṃ cāletvā laddhapaccayesu ārammaṇesu punappunaṃ āvajjanaṃ niyojetiyeva. Tadā tāni ārammaṇāni tadabhininnākāra pavattamanasikāra sampayuttassa bhavaṅga cittassa āpātaṃ āgacchanti. Na hi aññaṃ ārammaṇaṃ gahetvā pavattamānassa cittassa ārammaṇantare abhininnākāronāma natthīti sakkā vattuntī. **Tadārammaṇapākāni pavattantīti** idaṃ kāmasattavasena vuttaṃ. Rūpārūpasattānaṃ pana vibhūtārammaṇepi tadārammaṇuppādo natthiyeva. Yathā cettha. Evaṃ pañcadvārepi rūpasattānaṃ atimahantārammaṇesu tadārammaṇuppādo natthīti. **Avibhūte panā lambaṇe javanāvasāne bhavaṅgapātova hotīti** idañca ukkaṭṭha paricchedavasena vuttanti daṭṭhabbaṃ. Ñṇāvibhaṅgaṭṭhakathāyaṃ pana dvattikkhattuṃ voṭṭhabbanappavattivasena avibhūte ālambaṇe voṭṭhabbanavāropi āgato. Yoca pañcadvārebhavaṅgacalanamattavasena moghavāro nāma catuttho vāro vutto. Sopi idha laddhuṃ vaṭṭatiyeva. Suddhamanodvārepi hi ārammaṇe āpātamāgate vīthiccittaṃ anuppajjitvā dvikkhattuṃ bhavaṅge calite nivattanakavārānaṃ pamāṇaṃ nabhavissatiyeva, visayeca āpātāgate bhavaṅgeca calite sati visayappavattināma na na hotīti. Iti imasmīṃ manodvārepi tadārammaṇa javana voṭṭhabbana moghavāra saṅkhātānaṃ catunnaṃ vārānaṃ yathākkamaṃ āraṇabhūtā visayappavattī catudhā veditabbāti. Tattha tadārammaṇavārassa ārammaṇabhūtā abhivibhūtānāma javana vārassa vibhūtānāma. Voṭṭhabbanavārassa avibhūtānāma. Moghavārassa ārammaṇabhūtā atīvibhūtānāmāti yojetabbā.

Etthaca ārammaṇassavā cittassavā atibalavatāya abhivibhūtātā veditabbā. Dubbalepi hi citte pathavipabbatādivasena atibalavantaṃ ārammaṇaṃ atīvibhūtaṃnāma hoti. Atibalavante ca citte atisukhumaṃpi nibbānaṃ atīvibhūtaṃnāma hotīti. Evaṃ sesesupīti. Vārabhedo panettha anubandhako, viṣuṃ siddhoti duvidho. Tattha anubandhako cakkhudvārānubandhakādivasena pañcavidho. Ekekasmiñcettha atītagahaṇaṃ, samudāya gahaṇaṃ, vatthugahaṇaṃ, nāmagahaṇanti cattāro cattāro vārā. Tesuca tadārammaṇavārādayo yathārahaṃ yojetabbā. Viṣuṃ siddho pana diṭṭha vāro, diṭṭhasambandhavāro, sutavāro, sutasambandhavāro, viññātavāro, viññātasambandhavāroti chabbidho

hoti. Etthaca saddhā ruci ākāra parivitakkādi vasena pavattavārā viññātavāro, viññāta sambandhavāroti vuttāti daṭṭhabbā. Aṭṭhasālīniyaṃ pana saddhāruciyaḍiva senagahitaṃ ārammaṇaṃ tathāpi hoti. Aññathāpi hoti. Tasmā aṭṭhakathāyaṃ na gahitanti vuttaṃ. Tathāvā hotu aññathāvā. Vīthiccittapavattiyā sati gahetabbameva. Tattha ekekasmimvāre tadārammaṇavārādivasena cattāro cattāro vārā. Tesuca kāma mahaggaṭā nuttara paññatti vasena paccuppannātītānāgatakāla vimuttavasena ārammaṇadhammā yathārahaṃ yojetabbāti. Etarahi pana atītabhavaṅgavasena tadārammaṇavasena ca vārabhedam kappenti. Tattha atītabhavaṅgavasena vārabhedakappaṇaṃ niratthakaṃ. Na hi manodvāre pañcadvāre viya ārammaṇānaṃ khaṇavasena balava dubbalatā sambhavo atthi. Tadā avijjamānānaṃpi atītānāgatānaṃ kālavimuttānaṃca tattha āpātāgamanatoti. Ettha siyā, ekāvajjanavīthiyā ārammaṇaṃnāma dhammatoca kālatoca abhinna meva icchanti aṭṭhakathācariyā. Imeca sattā taṃ taṃ ākāraṃ sallakkhetvā aññamaññassa cittaṃ jānantiyeva. Paracittaviduniyo pana devatā ākārasallakkhaṇena vināpi jānanti. Tattha paccuppannaṃ parassa cittaṃ jānanakāle āvajjanaṃ bhāvayaṃ parassa cittaṃ attanā sahuppannaṃ. Taṃ vā āvajjati. Udāhu parato taṃ taṃ javanena sahuppannaṃvā. Javanānica yaṃ āvajjanena sahuppannaṃ taṃ vā jānanti, paccekaṃ attanā sahuppannaṃvāti. Kiñcetha, yadi tāva āvajjanena sahuppannaṃ āvajjati jānanti. Evaṃ sati dhammato abhinnaṃ hoti. Kālato bhinnaṃ. Tañhi cittaṃ āvajjanassa paccuppannaṃ hoti. Javanānaṃ pana atītanti. Atha paccekaṃ attanā sahuppannaṃ āvajjati jānanti. Evañca sati kālato abhinnaṃ hoti. Dhammato bhinnameva. Athapi yaṃ paccekaṃ sahuppannaṃ jānanti. Tadeva āvajjati. Evaṃpi bhinnameva hotīti. Ettha aṭṭhakathāyaṃ tāva yaṃ āvajjanena sahuppannaṃ. Tadeva āvajjati jānanti cāti dhammato abhinnaṃ vatvā taṃ cittaṃ niruddhaṃpi addhāvasena santativasena gahitaṃ javanānaṃpi paccuppannameva hotīti vinicchitaṃ. Ācariyānandamatena pana parassa taṃ taṃ ākāraṃ sallakkhetvā taṃ taṃ adhippāyajānanakāle āvajjanajavanāni paccekaṃ attanā sahuppannaṃ cittaṃ āvajjati jānanti ca. Na cettha dhammato kālatoca bhinnaṃnāma hoti. Sabbesaṃpi hi ārammaṇaṃ cittameva hoti paccuppannañcāti. Naca javanāni nirāvajjanānināma honti. Āvajjanenapi hi cittanteva āvajjitaṃ hoti. Javanānica cittanteva jānanti. Yadi pana āvajjane na cittanti āvajjite javanāni rūpanti jānanti. Rūpantivā āvajjite cittanti jānanti, nīlantivā āvajjite pītanti jānanti. Evaṃ sati javanāni dhammato nirāvajjanāni nāma honti. Tathā atītanti āvajjite paccuppannanti. Evañca sati tāni kālato nirāvajjanānināma hotīti. Yasmā ca atīto dhammo paccuppannassa dhammassa anantarapaccayena paccayoti paṭṭhāne vutto. Tasmā idha khaṇavaseneva paccuppannaṃ vattum yuttaṃ. Na addhāsantati vasenāti. Itarathā sabba vīthiccittavāresupi ārammaṇānaṃ atītādibhāvo addhāsantativaseneva vattabbo siyāti. Gāthāyaṃ **tīnevāti** kiccavasena tīni eva. **Cittuppādā daseritāti** cittuppattikkhaṇavasena dasa īritāni kathitāni. **Vitthā renāti** cittasarūpavittiharena. **Etthāti** manodvāre. **Ekacattālīsāti** pañcaviññāṇamanodhātūhi vajjitānaṃ kāmāvacaracittānaṃ vasena ekacattālīsaṃ. **Etthāti** parittajavanavāre. [Parittavāro]

138. Vibhūtāvibhūtabhedo natthi ekaṃ vibhūtameva labbhatīti adhippāyo. Na hi avibhūte ārammaṇe appanānāma sambhavatīti. Tathā tadārammaṇuppādoca natthi. Na hi atisantataraṃ appanājavanaṃ tadārammaṇaṃ anubandhatīti. Tattha hi chabbīsati mahaggaṭa lokuttara javanesu yaṃkiñci javanaṃ appanāvīthimotarātīti sambandho. Nāṇarahitaṃ dvihetukajavanaṃ athirasabhāvattā appanāya anantarūpanissayo nahotīti vuttaṃ **nīṇasampayutta kāmāvacarajavanānamatṭhannanti**. **Parikammopacārānulomagotratanāmenāti** ettha indriyasamatādīhi paritobhāgehi appanā kariyati sajjīyati etenāti parikammaṃ. Appanaṃ upecca caratīti upacāro. Samīpacāroti attho. Samīpacaraṇañcetha āsanekāle appanāvahasamatthabhāvena daṭṭhabbaṃ. Yassa pavattiyā aciraṃ kālaṃ appanā sambhavo hotīti. Anulomanti appanāpavattiyā paccanīkadhammavidhamanena appanāya anukūlaṃ appanāhitam appanā vahanticeva attho, yassa pavattiyā appanā vibandhako paccanī konāma natthīti. Gamīyati bujjhiyati attho etenātivo. Abhidhānaṃ buddhica. Taṃ duvidhaṃpi gavaṃ tāyati rakkhatīti gottaṃ. Paritta jātisankhāto anvayo. Gottaṃ abhibhuyyati chijjati etthāti gotrabhu. Ettha ca cattāripi javanāni parikammajavanānīti vā upacārajavanānītivā anulomajavanānītivā vuccantiyeva. Gotrabhūti pana pacchimasseva nāmaṃ. Idha pana catunnaṃpi nāmānaṃ saṅgahaṇatthaṃ parikammo pacārānuloma gotrabhunāmenāti evaṃ vuttanti daṭṭhabbaṃ. Evañca katvā kasmā pathamameva parikammaṃnāma. Nanu itarānīpi appanaṃ parisaṅkharontiyevāti evamādikā codanā anokāsā hotīti. **Catukkhattum tikkhattumevavāti** catukkhattumevavā tikkhattumevavā. Tattha pathamena eva

saddena pañcamam gotrabhusambhavo paṭikkhitto hoti. Tadā hi javanam patitamnāma hoti. Pavedhati kampati. Kāmagottam abhikkamitvā uparibhūmantarappattiyā paccayo bhavitum na sakkotīti. Dutiyena dutiyam gotrabhu sambhavo paṭikkhitto hoti. Tadā hi aladdhāsevanam anulomam attano anantare cittaṃ gotrabhubhāvam pāpetum na sakkotīti. Eteneva pañcamato param catutthatoca oram appanāya asambhavo sādhitto hotīti. Vāsaddena pana mandapaññassa catukkhattumeva. Na tikkhattum. Tikkhapaññassa tikkhattumeva. Na catukkhattunti dassitam hoti. Aṭṭhasāliniyam pana mandamajjhima mahāpaññavasena tidhā bhinditvā pañcakkhattumpi parikammajavanānam uppatti anuññātā viya dissati. Itaraṭṭhakathāsu pana suṭṭhu vicāretvā paṭisiddhattā sā na gahetabbāvāti.

Yam pana vibhāvaniyam

“Chaṭṭham sattamam bhavaṅgassa āsannabhāvena papātāsannapuriso viya appanāvasena patiṭṭhātum na sakkotī”ti vuttam.

Tattha bhavaṅgassa āsannabhāvenāti bhavaṅgabhāvassa āsanna bhāvenāti attho. Pañcamajavanato hi paṭṭhāya javanasantānam anupubbena parikkhīṇajavam hoti. Bhavaṅgabhāvattāya pariṇamatīti. Evañca katvā papātāsannapurisopamāpi upapannā hotīti. **Niruddhānantaramevāti** niruddhe anantaramevāti padacchedo. Kassa anantaranti, aññassa asutattā niruddhassāti atthato laddhamevāti. Yasmā pana appanānāma uppajjamānā catutthatovā pañcamatovā paṭṭhāya uppajjati. Na chaṭṭhatovā sattamatovā. Sāhi vasībhūtāpi catuttha pañcomesu uppattim alabhamānā sabbaso nuppajjatiyeva. Labhamānā pana divasampi nirantaram pavattatiyeva. Tasmā catutthamvā pañcamamvāti idam ādimattaniyamanattham vuttanti daṭṭhabbam. Teneva hi **appanāvīthimotarātīti ca tatoparam appanāvasāne bhavaṅgapātova hotīti** ca vakkhatīti. Yadi pana pañcamato paṭṭhāya javanam patitam nāma hoti. Evaṃ sati kasmā tato paṭṭhāya patanakhetta appanājavanam pavattatīti. Vuccate, hatthe thapitaleddussa patanakhettaṃnāma hatthato muttamatte hoti. Evaṃ santepi hatthabalena khipitam leḍḍu dūrampi gacchatiyeva. Ettha ca leḍḍussa javonāma hatthajavamūlako hoti. Hatthajavoca sarīrabalamūlako. Tattha leḍḍu viya appanājavanam daṭṭhabbam. Leḍḍussa patanakhettaṃ viya catutthato pacchākālo. Hatthajavoviya gotrabhujavo. Sarīrabalam viya purimānam parikammajavanānam balaṃ daṭṭhabbam. Uttānaseyyassa bāladārakassa balaṃ viya ādikammikavīthiyam kāmajavanānam balaṃ. Vuddhipattassa purisassabalam viya samāpattivīthiyam kāmajavanānam balaṃ. Yathā ca bāladārakena khittam leḍḍu hatthato muttamattepi patati. Evaṃ ādikammikavīthiyam appanājavanam ekavāram javitvā patati. Yathāvuddhipattena khittam leḍḍu patanakhettepi apatitvā dūrampi dūratarampi gacchati. Tathā samāpattivīthiyam appanājavanam cirampi ciratarampi pavattatīti. Mūlaṭīkāyam pana appanājavanam patanakhetta pavattampi bhūmantarapattiyāvā ārammaṅantaraladdhiyāvā patitamnāma nahotīti vuttam. Ettha siyā, kasmā pañcamato paṭṭhāya javanam patitanti vuttam. Nanu apati tattā eva suṭṭhu balavabhāvato sattamajavanacetanā sīgham anantare bhava vipākadāyiniṇca ānantariyakammañca hoti. Majjhe pañcacetanā tathā balavabhāvabhāvato cirena tatīyabhavādīsu vipākadāyiniṇca honti, anantariyabhāvañca na gacchantīti. Nakho panetaṃ evam daṭṭhabbam. Yadi hi sīgham vipākadānāyā balavatīnāma siyā. Evaṃsati paṭhamacetanā sabbabalavatīnāma siyā. Sā hi imasmimyeva bhava vipākam detīti. Idam panettha sannīṭṭhānam. Eka vassajīvinam tiṇarukkhanam pariṇāmoviya pathamacetanāya pariṇāmo daṭṭhabbo. Dvivassajīvinam viya sattamacetanāya. Mahāsālānam viya majjhimacetanānanti. Tattha ekavassajīvino tiṇarukkhanāma asārā honti. Asārattāca dubbalā anaddhaniyā aciraṭṭhikā. Tasmā tesam sīghatarapariṇāmo hoti. Te hi sīghataram ruhanti. Vuddhim viruḷhim āpajjanti. Sīghataram pupphanti phalanti patanti antaradhāyanti. Ekam nidāghasamayam atikkamitum nasakkonti. Dutiyam vassam na pāpuṇanti. Etthaca nidāghasamayo viya maraṇakālo veditabbo. Dvivassajīvino pana thokam sārabhūtā honti. Sārabhūtattāca thokam balavantā addhaniyā. Tato yevacatesam cirapariṇāmo hoti. Te hi pathamam vassam ruhanti vuddhim viruḷhim āpajjanti. Pupphitumvā phalitumvā nasakkonti. Dutiyavasseva pupphanti phalanti patanti antaradhāyanti. Dutiyam pana nidāgha samayam atikkamitum na sakkonti. Tatīyam vassam na pāpuṇanti. Mahāsālā pana sabbasārabhūtā honti. Balavantā cirataratṭhāyino. Tasmā te saṅkameva pariṇāmam gacchanti. Te hi eka dve vassāni vidatthiratanamattāva honti. Vuddhim viruḷhim nāpajjanti.

Pupphitumvā phaliturvā na sakkoti. Aticiraṭṭhāyino pana honti. Cha pañca vassasatāni ṭhatvāva patanti. Evameva pathamajavanacetanā sabbaso aladdhāsevanatāya asārā abalā hoti. Visuṃ ekaṃ bhavaṃ nibbattetuṃ ekañca maraṇakālaṃ atikkamituṃ na sakkoti. Imasmiṃ bhaveeva vipaccitvāvā avipaccitvāvā khiyyati. Sattama javanacetanā pana laddhāsevanatāya thokaṃ sārabhūtā hoti. Visuṃ ekaṃ bhavaṃ nibbattetuṃ sakkoti. Sārabhūtattā yevaca saṅkameva pariṇāmaṃ gacchati. Imasmiṃ bhava vipaccituṃ na sakkoti. Bhavantaraṃ patvāva vipaccati. Patitajavanesu pana antima javanatāya dubbalattā dutīyaṃ maraṇakālaṃ atikkamituṃ na sakkoti. Dutīyabhaveeva vipaccitvāvā avipaccitvāvā khiyyati. Avasesānaṃ pana pañcannaṃ majjhimacetanānaṃ suṭṭhu laddhāsevanānaṃ saṅkika tara pariṇatabhāvo vuttanayānusāreṇa vedītabboti. Naṃ kevalañcetta tiṇa rukkho pamāya pāṇopamāyāpi ayamatto dīpetabbo. Yehikeci gabbhaseyyakā pāṇā appāyukajātikā honti. Te sīghataraṃ gabbhavasaṃ vasanti, sīghataraṃ vijāyanti. Aṅgamaṅgānica nesam sīghataraṃ thāmagatāni honti. Indriyānica sīghataraṃ paripākagatāni honti. Tadaheva utṭhahitvā gacchanti. Gocaraṃ gaṇhanti. Attano attano visaye sīghataraṃ viññuttaṃ āpajjanti. Sīghataraṃ jinnā honti maranti. Dīghāyukajātikānaṃ pana gabbhavāsādīni sabbāni saṅkika meva sijjhantīti. Etthaca mahaggata kusalāni sattama javanaṭṭhāne ṭhitāntīti vedītabbāni. Parikkammajavanāni hi ciraṭṭhitikaṭṭhena supakka sālīdhaññasadisāni. Appanājavanāni aciraṭṭhitikaṭṭhena supakka sālībhattasadisāntīti tānīpi acirataratṭhitikānieva honti. Dutīye bhava vipaccitvāvā avipaccitvāvā khiyyanti. Imasmiṃ bhavepi appakena kāmaccchandādinā paccanīkadhammena paṭibāhitāni sabbaso avipākabhāvaṃ āpajjanti. Tasmātāni tena pariyaēyena dubbalāni nāma hontīti.

Yasmā ca ānantariyakammānaṃ phaladānaniyatātānāma kālaniyamena vinā na sambhavati. Kālaniyamocanāma ekantena sattamajavanasseva hoti. Na majjhimajavanānaṃ. Tesāñhi asukasmim bhaveeva vipaccantīti evaṃ niyamo natthīti. Tasmā duvidhassa niyamassa siddhattā eva sattamajavanacetanāya anantariyakammāta siddhā hoti. Na balavataratāyāti niṭṭhametthagantabbanti. Mūlaṭṭikāyaṃ pana nanuca sattamajavanacetanāya balavatāya upapajjavedanīyabhāvo hoti ānantariyatāpīti codanaṃ samuṭṭhāpetvā tatthāyaṃ adhippāyo siyā. Paṭisandhiyā anantarapaccayabhāvino vipākasantānassa anantarapaccayabhāvena antimajavanacetanāya susaṅkhatattāsā sattamajaganacetanā upapajjavedanīyā ānantariyakāca hoti. Na apatitajavanacetanā viya balavatāyāti uttaraṃ vadati. Taṃ yuttaṃ viya na dissati. Evañhi sati pathamajavanacetanā kassa anantarapaccayabhāvena susaṅkhatattā dīṭṭhadhammavedanīyānāma jātāti vattabbā hotīti. Mahāṭṭikāyaṃ pana dubbalāpi antimajavana cetanā sannīṭṭhānakiccavisesayuttatāya phalavipaccane sattivise sayuttā hotīti upapajjavedanīyā ānantariyakāca sā hotīti vuttaṃ. **Yathārahanti taṃ taṃ puggalānurūpaṃ. Yathābhīnīhāra vasenāti** tassa tassa parikkammabhāvanā cittassa kaṣiṇanimittā dīsuvā aniccalakkhaṇādīsuvā abhīnīharaṇānurūpaṃ. **Appanāvīthinti** appanāpabandhaṃ. Idañca anekavāre pavattānaṃ appanājavanānaṃ saṅghaṇatthaṃ vuttaṃ. Tenevāha tatoparaṃ appanāvasāne bhavaṅgapātova hotīti. Tattha **tatoti** catutthatovā pañcamato vā. Imasmiṃ atthe sati pañcamevā chaṭṭhevā ekantena bhavaṅgapāto hotīti āpajjati. Tasmā puna **appanāvasāneti** vuttaṃ. Bhavaṅgapātovahoti. Natthi tadārammaṇuppādoti adhippāyo.

Vibhāvanīyaṃ pana

“Kathaci appanāvāre sattajavana paripūraṇatthaṃ appanāvasānepi kāmāvacarajavanappavattim vadantānaṃ nikāyantarikānaṃ vādo idha evasaddena nivattito”ti vuttaṃ.

Tatthāti tasmim appanājavanavāre. Nirantarapavattānaṃ javanānaṃ bhinnavedanatānāma natthīti vuttaṃ **somanassasahagata javanā nantarantiādi.**

[132] Vibhāvanīyaṃ pana

“Bhinnavedanānaṃ aññamaññaṃ āsevanapaccayabhāvassa anuddhaṭṭā”tikāraṇaṃ

vuttam. Tam na sundaram.

Na hi idha āsevanapaccayabhāvo pamāṇam. Kasmā, āsevana paccanikānam phalajavanānampi parikammajavanehi aññamaññaṇca abhinnavedanatāya icchitabbatī. **Pāṭikañkhittabbā**ti avassam icchitabbā.

[133] **Vibhāvanīyam** pana

“Pasamsitabbā”ti vuttam. Tam na sundaram.

Na hi tādiso saṃvaṇṇanāpadeso dissatī. Arahatta phale maggavīthiyam maggakusalānantaram pavattamānēpi ayam pubbāpara niyamo parikammajavanehi eva saha appanājavanānam hotīti katvā **kriyajavanānantaram arahattaphalañcā**ti vuttam. Sukhapuññamhā param dvattimsa appanājavanāni sambhavanti. Upekkhā puññamhā param dvādasa, sukhakriyato param aṭṭha. Upekkhā kriyato param cha appanājavanāni sambhavanti yojanā. Tatha **dvattimsā**ti arahattaphalasabbapañcamajjhānavajjitānam catunnam rūpakusalānam soḷasannam maggakusalānam dvādasannam heṭṭhimaphalānaṇca vasena dvattimsa. **Dvādasā**ti pañcamajjhānikānam rūpārūpamaggakusalānam heṭṭhimaphalānaṇca vasena dvādasa. **Aṭṭhā**ti pañcamajjhānavajjitānam catunnam rūpakriyānam catunnam arahattaphalānaṇca vasena aṭṭha. **Chā**ti pañcamajjhānikānam pañcannam rūpārūpakriyānam arahattaphalassaca vasena cha. Puthujjanānam sekkhānaṇca kāmāpuññātihetuto param catucattālīsa appanā sambhavanti. Vītarāgānam arahantānam tihetukāmakriyato param cuddasa appanā sambhavanti yojanā.

139. Sabbathāpīti atimahantādinā sabbapakārenapi. **Eṭṭhā**ti etesu yathāvuttesu pañcadvāra manodvāresu. Sabbathāpi pana anīṭṭhe tivā pāṭho. Teneva ṭikāsu sabbathāpīti pañcadvāra manodvārepīti vuttam. Icchitabbanti iṭṭham. Kena icchitabbanti. Lokiyamahājanena. Tatha ca atiukkattṭhe atiduggateca jane agahetvā majjhimakena mahājanena. Evañhi sati iṭṭhāniṭṭhānam suṭṭhuvavatthānam hotīti aṭṭhakathāyam vuttam. Yasmiṃ ārammaṇekusala vipākam uppajjati, tadeva iṭṭhamnāma. Yasmiṃ pana akusalavipākam uppajjati, tadeva anīṭṭhamnāma. Na hi sakkā iṭṭhamvā anīṭṭhamvā ārammaṇam vipākacittam vañcetuntica. Apica dvāravasenāpi iṭṭhāniṭṭhatā vedittabbāti ca vuttam. Tasmā indriyānindriyabaddhasantānagate eke kasmim rūpakalāpe vaṇṇādīsu rūpesu kiñci iṭṭham hoti. Kiñci anīṭṭham. Kadāci iṭṭham hoti. Kadāci anīṭṭham, tatha kiñci iṭṭham hoti kiñci anīṭṭhanti yathā kiṃsmimci ekasmim pupphe vaṇṇo iṭṭho. Gandho anīṭṭho, raso anīṭṭho, phoṭṭhabbo anīṭṭho, kharasamphasso. Kiṃsmimci vaṇṇopi iṭṭho, gandhopi iṭṭho, rasādayo anīṭṭhāyeva. Tathā buddhassa sarīragatepi ekasmim kalāpe vaṇṇo iṭṭho hoti. Gandho anīṭṭho. Matakaṇhasunakhassa uddhumātasarīrepi vaṇṇo iṭṭho hoti. Gandho anīṭṭho. So hi vaṇṇo yadi nivatthapārutassa vatthassa bhavēya. Tam vattham mahaggham hotīti. Kadāci iṭṭham kadāci anīṭṭhanti aggināma hemante iṭṭho sukhavipākassa paccayo. Gimhe anīṭṭho dukkhavipākassa paccayo. Sītudakam gimhe iṭṭham. Hemante anīṭṭham. Tathā sukha samphassam vattham pakatikāye iṭṭham hoti. Vaṇam patvā anīṭṭham. Tenavā saṇikam phusantassa iṭṭham, gālham phusantassa anīṭṭhanti. Naiṭṭhanti anīṭṭham. Tasmim anīṭṭhe. **Iṭṭheti** iṭṭhamajjhatte, kuslavipākāni pañcaviññaṇa sampaṭicchana santīraṇa tadārammaṇānīti sambandho. Santīraṇa tadārammaṇāni cettha upekkhāsahagatānieva vedittabbāni. Tenevāha atīṭṭhepanātiādi. Tatha **abhiṭṭheti** suvaṇṇa rajata maṇivaṇṇādike haritālavanṇādike koseyya vatthavaṇṇādi ke devaccharāvaṇṇādikeca ativiya lokiyamahājanena icchitabbe chaḷārammaṇe. Yasmā cettha anīṭṭhārammaṇa samāyogo akusalakammasseva vipaccanokāso hoti. Iṭṭhārammaṇasamāyogoca kusalakammasseva, tasmā anīṭṭhe akusalavipākāneva. Iṭṭhe kuslavipākānevāti ayam niyamo siddho. Vedanāniyamo pana ādāse mukhanimittassa viya attano ussāha balena vinā kevalam kammabalena nibbattānam vipākānam paridubbalattā tathā tathā kappetvā pakappetvā gahaṇā bhāvato yathārammaṇameva siddho hotīti datṭhabbam. Na kevalaṇca vipākānam eva. Athakho vipallāsarahite khiṇāsavasantāne pavattānam kāmakriyajavanānam viyathārammaṇameva vedanāyogo hotīti adhippāyena vuttam tatthāpi somanassasahagata kriyajavanāvasāne tiādi. **Tatthāpī**ti tesu vipākesupi. **Somanassasahagata kriya**

javanā vasāneti buddhavaṇṇādike atiiṭṭhārammaṇe pavattānaṃ somanassa sahaḡata kriyajavanānaṃ avasāne. **Upekkhāsahagata kriya javanā vasāneti** aniṭṭhe iṭṭhamajjhatteca pavattānaṃ upekkhāsahagatakriyajavanānaṃ avasāne. Ayañca kriyajavanāvasāne tadārammaṇaniyamo aṭṭhakathāyaṃpi vuttoyeva. Vuttañhi tattha kāmāvacara tihetuka somanassa sahaḡatakriyadvayaṃ tadārammaṇavasena pañcannaṃ somanassasahaḡata vipākānaṃ anantarapaccayotiādi. Idañca pakatinihārena pavattānaṃ kriyajavanānaṃ vasena vuttaṃ. Tathā rūpena pana cittātisañkhārena pavattānaṃ kriyajavanānaṃ iṭṭhepi upekkhāvedanāyogo aniṭṭhepi somanassa vedanāyogo hotiyeva. Yathāha –

Kathañcānanda ariyo hoti bhāvitindriyo. Idhānanda bhikkhuno cakkhunā rūpaṃ disvā uppajjati manāpaṃ uppajjati amanāpaṃ. Uppajjati manāpāmanāpaṃ. So sace ākañkhati paṭikūle appaṭikūlasaññi vihareyyanti. Appaṭikūlasaññi tattha viharati. Sace ākañkhati appaṭikūle paṭikūla saññi vihareyyanti. Paṭikūlasaññi tattha viharatīti.

Sabbaṃ uparipañāsake indriyabhāvanāsuttaṃ āharitabbaṃ. Tattha uppajjati manāpaṃ uppajjati amanāpaṃ. Uppajjati manāpāmanāpanti etena khīṇāsavānaṃ kāmakriyajavanānaṃ pakatinihārena iṭṭhe so manassayogo aniṭṭhe upekkhā yogo dassito hoti. Sosace ākañkhati paṭikūle appaṭikūlasaññi vihareyyanti. Appaṭikūlasaññi tattha viharatītiādinā pana tesam tathārūpe cittābhisankhāre sati iṭṭhepi upekkhāyogo aniṭṭhepisanassa yogo vutto hotīti. Yaṃ pana khīṇāsavānaṃ satatavihārasutte idha bhikkhunā rūpaṃ disvā neva sumano hoti. Na dummano. Upekkhako viharati sato sampajānotiādinā chasudvāresu somanassa paṭikkhipanaṃ vuttaṃ. Taṃpi tesam tathā rūpacittābhisankhārabāhullavasena vuttanti gahetabbaṃ. Yasmā vā khīṇālavāpi buddharūpadassanādīsu padhānasārappaṭṭhānadassanādīsu ca somanassitā hontiyeva. Tasmā kevalaṃ rāgādivatthu bhūtāni rūpārammaṇādīni iṭṭhāniṭṭhāni sandhāya idaṃ vuttanti yuttaṃ. Ettha ca. Kathaṃ paṭikūle appaṭikūlasaññi viharati. Aniṭṭhasmiṃ vatthusmiṃ mettāyavā pharati. Dhātutovā upasaṃharati. Evaṃ paṭikūle appaṭikūlasaññi viharati. Kathaṃ appaṭikūle paṭikūlasaññi viharati iṭṭhasmiṃ vatthusmiṃ asubhāyavā pharati. Aniccato vā upasaṃharati. Evaṃ appaṭikūle paṭikūlasaññi viharatītiādinā paṭisambhidāmagganayena idha tathārūpo cittābhisankhāro nāma veditabbo. Apare pana vadanti-khīṇāsavā yadā devaccharā vaṇṇādikaṃ atiiṭṭhārammaṇaṃ āpātamā gacchati. Tadā tattha asubhāyavāpharanti. Aniccato vā upasaṃharanti tattha aniṭṭhabhūtaṃ asubha lakkhaṇaṃvā aniccalakkhaṇaṃvā upekkhā kriya javanānaṃ ārammaṇaṃ hoti. Na atiiṭṭhārammaṇabhūtaṃ devaccharāvaṇṇādikaṃ.

Tathā yadā kudhibhakuṭṭhasarīrādikaṃ atianiṭṭhārammaṇaṃ āpātamāgacchati. Tadā tattha mettāyavā pharanti. Dhātutovā upasaṃharanti. Tattha iṭṭhabhūtaṃ averatāvādilakkhaṇameva somanassakriyajavanānaṃ ārammaṇaṃ hoti. Na atianiṭṭhabhūtaṃ kudhita kuṭṭhasarīrādikaṃ. Tasmā tāni javanāni kāmavipākāniviya sabbadāpi ārammaṇānurūpameva vedanāyuttāni hontīti. Taṃ nayujjati. Na hi tāni lakkhaṇāni devaccharāvaṇṇādīhi vinā viṣuṃ labbhanti. Tehi pana saheva labbhanti. Tasmā yathā ānisamsadassanena bhāvanāya pubbāpariyavisesadassanena uddhumātakādīsu atiiṭṭhesupi somanassuppatti aṭṭhakathāyaṃ vuttā. Yathāca mahā moggalānattherassa buddhasubuddhatādassanena attasampattidassanena aniṭṭhabhūtepi aṭṭhikañkalikapetarūpe somanassuppatti pāliyaṃ vuttā. Yathā ca mahākassapattherassa tathārūpena cittābhi sañkhārena kuṭṭhino hatthato laddhe aniṭṭhabhūte pūtikummāsepi somanassuppatti aṭṭhakathāyaṃ vuttā. Evamevaṃ idhapi asubhapharaṇādiko cittābhisankhāro atiiṭṭhe upekkhājavanānaṃ atianiṭṭheca somanassajavanānaṃ uppattiyā paccayo hotīti daṭṭhabbaṃ. Ayañhi ārammaṇānaṃ iṭṭhāniṭṭhabhāvōnāma lokiyamahājanānaṃ icchāvasena siddho hoti agambhīro vipallāsadhamaṇaṃ kilesānañca vatthubhūto. Yathāha-tattha katamaṃ rūpaṃ hīnaṃ. Yaṃ rūpaṃ tesam tesam sattānaṃ uññātaṃ avaññātantiādi. Ettha hi tesam tesam sattānanti etena ārammaṇadhamaṇaṃ iṭṭhāniṭṭhabhāvō nāma lokiyamahājana sammutiyā siddhoti dasseti. Tasmā yañca appahīnavipallāsānaṃ lokiyamahājanānaṃ devaccharāvaṇṇā dīsu atiiṭṭhesu atiiṭṭhākārato gahaṇaṃ. Yañca buddhavaṇṇā dīsu atiiṭṭhesu atiiṭṭhākārato gahaṇaṃ. Tadubhayampi tesam vipallāsavaseneva hoti. Yaṃpana paññavantānaṃ buddhasāvākānaṃ devaccharāvaṇṇādīsu atiiṭṭhākārato gahaṇaṃ. Yañca buddhavaṇṇādīsu atiiṭṭhākārato gahaṇaṃ. Tadubhayampi paññābaleneva hotīti veditabbaṃ.

[134] Yaṃ pana **vibhāvanīyaṃ**

“Kusalākusalānaṃ pana appahīnavipallāsesu santānesu pavattiyā atītiṭṭhepi iṭṭhamajjhattaaniṭṭhākārato aniṭṭhepi iṭṭhaiṭṭhamajjhattākārato gahaṇaṃ hotīti” vuttaṃ.

Yañca **tattha**

“Khīṇāsavānaṃ cittavipallāsābhāvena kriyajavanāni pi yathārammaṇameva pavattanti” ti vuttaṃ. Taṃ vicāretabbameva.

Ye hi te dhamma cakkhuraḥitā hontī. Teyeva vipallāsa vasena cittavasānugā ārammaṇavasānugāca hontīti kusalā kusalāniyeva yebhuyyena yathārammaṇaṃ pavattanti. Na pana kriya javanāni. Na hi khīṇāsavā lokiyamahājanasammatesu iṭṭhāniṭṭhesu cittavasānugā ārammaṇavasānugāca hontīti. Yathāha

Rūpā saddā gandhā rasā, phoṭṭhabbāca manoramā;
Iṭṭhadhammā aniṭṭhāca, na pavedhanti paṇḍitāti.

Tasmā somanassa kriya javanānantarampi tadārammaṇāni somanassupekkhā vedanāyuttāni eva siyuṃ. Tathā upekkhākriyajavanānantarampīti. Mūlaṭṭikāyaṃ panettha paṭṭhāne-kusalākusale niruddhe vipāko tadārammaṇatāuppajjati kusalakusalānantaraṃ eva tadārammaṇaṃ vuttaṃ. Na abyākatānantaraṃ naca katthaci kriyānantaraṃ tadārammaṇassa vuttaṭṭhānaṃ dissati. Vijjamāneca tasmim avacane kāraṇaṃnatthi. Bhavaṅgañcanāmetam nadisotoviya paṭisotagāmināvaṃ savipphārikaṃ evajavanaṃ anubandhatīti yuttaṃ. Na pana chaḷaṅgupekkhāvato khīṇāsavassa santavuttikriyajavanaṃ. Tasmā kriyajavanānantaraṃ tadārammaṇavidhānaṃ upaparikkhitabbanti vuttaṃ. Paṭṭhāne pana kusallatike pañhā vāre ārammaṇapaccayavibhaṅge tīsu abyākatapadāvasānavāresu sekkhaputhujjanānaṃ tadārammaṇameva padhānaṃ hoti. Na kusalā kusalajavanaṃ. Tasmā dvīsupi vāresu sekkhāvā puthujjanāvā kusalaṃ aniccato vipassanti kusalaṃ assādentītiādikaṃ vatvā punaca kusale niruddhe akusale niruddhe vipāko tadārammaṇatā uppajjati vuttaṃ. Arahato pana javanaṃpi tadārammaṇaṃpi padhāna meva hoti. Tasmā arahā kusalaṃ aniccato dukkhato anattato vipassati icceva vuttaṃ. Napana vuttaṃ kriyābyākate niruddhe vipāko tadārammaṇatā uppajjati. Yadi cetam vucceyya tadārammaṇameva padhānaṃ kataṃnāma siyā. Avuttepica tasmim vipassatīti iminā tadārammaṇaṃpi gahitameva hotīti. Tasmā yaṃ vuttaṃ paṭṭhāne kusalā.La. Uppajjati kusalākusalānantarameva tadārammaṇaṃ vuttaṃ. Na abyākatānantarantica. Vijjamāneca tasmim avacane kāraṇaṃ natthīti ca vuttaṃ. Taṃ na yujjatiyeva. Anantarapaccayavibhaṅgesu pana kusalaṃ vuṭṭhānassa akusalaṃ vuṭṭhānassa kriyaṃ vuṭṭhānassātica vipākadhammadhammā khandhā vuṭṭhānassa nevavipāka nāvīpākadhammadhammā khandhā vuṭṭhānassātica evamādinā kriyajavanānantaraṃ bhavaṅgena saha tadārammaṇassapi vuṭṭhānanāmena vuttaṭṭhānaṃ dissatiyeva. Tasmā yañca vuttaṃ na katthaci kriyānantaraṃ tadārammaṇassa vuttaṭṭhānaṃ dissati. Taṃpi na yujjatiyeva. Naca chaḷaṅgupekkhāva to khīṇāsavassa santavutti pi kriyajavanaṃ savipphārikaṃ na hoti. Kusalajavanaṃ viya tassapi oḷārikakāyavacī payogasamuṭṭhā panatoti.

[135] **Vibhāvanīyaṃ** pana

Ṭīkāvadassa uttaraṃ vadantena yaṃ vuttaṃ “yadi abyākatā nantarampi tadārammaṇaṃ vucceyya. Parittārammaṇe voṭṭhabbanā nantarampi tassa pavattiṃ maññeyyunti kriyajavanānantaraṃ tadā rammaṇaṃ na vutta” nti. Taṃ na sundaraṃ.

Na hi paṭṭhāne imasmim vutte idaṃnāma maññeyyunti avuttaṃnāma atthi. Na ca arahā kusalaṃ aniccato dukkhato anattato vipassatītiādinā vipassanācāravasena vuttaṭṭhāne pañcadvārika parittārammaṇa vārapasaṅgo atthīti. **Domanassa.La. Upekkhā sahatāneva bhavanti.** Na

somanassasahagatāni. Kasmā, somanassa domanassānaṃ aññamaññaviruddhattā. Teneva hi paṭṭhāne tesam itarītānantarapaccayatā navuttāti. Etthaca kriyajavana domanassajavanāna meva anantaram tadārammaṇa niyamaṃ dassentena therena itaresam kusalākusalajavanānaṃ anantaram pana tādiso niyamo natthīti dassito hoti. Tasmā aṭṭhannaṃ kāmakusalānaṃ aṭṭhannaṃ lobhamūlānaṃ dvinnam mohamūlānanti aṭṭhārasannaṃ javanānaṃ anantaram ārammaṇānurūpaṃ sabbāni tadārammaṇāni bhavaṅgāni ca pavattanti. Yebhuyyena pana akusalajavanānantaram tadārammaṇam ahetukameva. Dvihatukajavanānantaram dvihatukameva. Tihatukajavanānantaram tihatukamevāti ayam yebhuyyaniyamo. Yassa pana dvihatukānivā tihatukānivā kusalajavanāni bahulam samudācaranti. Tassa kadāci akusalajavanesu javitesu akusalānantarampi dvihatukānivā tihatukānivā tadārammaṇāni pavattanti. Yassa akusalajavanāni bahulam samudācaranti. Tassa kadāci dvihatukesuvā tihatukesuvā kusalajavanesu javitesu kusalānantarampi ahetukatadārammaṇāni pavattanti. Vuttañhetam paṭṭhāne-ahetuke khandhe aniccato.La. Domanassam uppajjati. Kusalākusale niruddhe sahetuko vipāko tadārammaṇatā uppajjati. Ahetuko vipāko tadārammaṇatā uppajjati. Ekānihi tadārammaṇānīnaṃ paṭisandhijanakena ekena kammena nibbattānīpi nānāvīthīsu nānāppakārāni honti. Pavatti vipākajanakehi pana nānākammehi nibbatthesu vattabbameva natthīti. **Tasmāti** yasmā domanassānantaram somanassuppatti nāma natthi, tasmā. **Somanassapaṭisandhikassāti** catūsu somanassamahā vipākesu ekamekena gahita paṭisandhikassa sattassa. **Tadā rammaṇasambhavoti** tadārammaṇuppatti kāraṇam. Tadārammaṇuppatti yevavā. **Yaṃkiñcīti** iṭṭhāniṭṭhabhūtesu rūpārammaṇādīsu yaṃkiñci. **Paricita**pubbanti imasmim bhaveyeva taṅkhaṇato purimakhaṇesu gahaṇa bahulatā vasena paricitaṃ. Abhiṅhasevanti attho. **Parittārammaṇanti** parittadhammabhūtam ārammaṇam. **Ārabbhāti** ālambitvā. **Upekkhāsahagata santīraṇanti** dvīsu upekkhāsahagatasantī raṇesu iṭṭhe kusalavipākaṃ anīṭṭhe akusalavipākaṃ upekkhā sahagata santīraṇam. Yesam pana pakatiyā itarāni cattāri upekkhāsahagata vipākāni bahulam pavattanti. Tesam tānīpi āgantukabhavaṅgam nahontīti na vattabbāni. Aṭṭhakathāyam pana mahādhammarakkhitattheravāde yebhuyyaniyamasote patitattā akusalajavanānurūpaṃ ahetukaṃ upekkhā santīraṇa dvaya meva vuttam. Teneva hi parato theravādānaṃ vicāritatṭhāne akusalajavanānantaram ahetuka tadārammaṇa meva dīpentassa tassa theravādassa aparipuṇṇavādabhāvaṃ dassetvā yadā kusalajavanānaṃ antarantarā akusalam javati, tadā kusalāvasāne āciṇṇa sadisameva akusalāvasāne sahetukaṃ tadārammaṇam yuttanti aṭṭhakathāyam vuttam. Tadārammaṇecayutte etaṃpi yujjatiyeva. Tasmā chapi upekkhāsahagatavipākāni āgantukabhavaṅgam hontiyevāti daṭṭhabbam. Etthaca upekkhāpaṭisandhikassa tāva atimahantāti vibhūtesupi buddhavaṇṇādīsu abhiṭṭhārammaṇesu domanassam uppādentassa tadārammaṇasambhavo natthīti domanassa javanānantaram bhavaṅgapātova hoti. Somanassapaṭisandhikassa pana sabbesupi iṭṭhāniṭṭhabhūtesu mahantesu avibhūtesuca chaḷārammaṇesu domanassa uppādentassa neva tadārammaṇasambhavo atthi. Nacamūlabhavaṅga sambhavoti katvā domanassānantaram chasu upekkhāsahagatavipākesu yathāraham ekaṃ āgantuka bhavaṅgabhāvena pavattati. Tathā tasseva buddhavaṇṇādīsu atiiṭṭhabhūtesu atimahantesu ativibhūtesuca chaḷārammaṇesuvā mahagatapaññattīsu domanassam uppādentassāti. Ettha ca yasmā abhidhamme dhātuvibhaṅge sabbadhammesuvā pana pathama samannāhāroti vuttam. Mahāhatthipadopama sutteca ajjhatti kañceva āvuso cakkhu aparibhinnaṃ hoti. Bāhirāca rūpāpātaṃ āgacchanti. Noca tajjo samannāhāro hoti. Neva tāva tajjassa viññāṇabhāgassa pātubhāvo hoti. Yatoca kho āvuso ajjhattikañceva cakkhu aparibhinnaṃ hoti. Bāhirāca rūpāpāta māgacchanti. Tajjoca samannāhāro hoti. Evaṃ tajjassa viññāṇabhāgassa pātubhāvo hoti. Ajjhattikañceva āvuso sotaṃ.La. Ghānaṃ.La. Jivhā.La. Kāyo.La. Mano aparibhinno hoti. Bāhirāca dhammāpātaṃ āgacchanti. Noca tajjo samannāhāro hoti. Neva tāva tajjassa viññāṇabhāgassa pātubhāvo hoti. Yatoca kho āvuso ajjhattikoceva mano aparibhinno hoti. Bāhirāca dhammāpātaṃ āgacchanti. Tajjoca samannāhāro hoti. Evaṃ tajjassa viññāṇabhāgassa pātubhāvo hotīti vuttam. Tasmā vīthiccittānīnaṃ āvajjanenavinānauppajjanti. Sace āvajjanena dhammatovā kālabhovā yaṃyam niyametvā āvajjitaṃ hoti. Tam tadeva tānīpi gaṇhanti. Yadi aniyametvā yaṃkiñci āvajjitaṃ hoti. Tānīpi āvajji tappakārameva gaṇhanti. Na pana ekāvajjana vīthiyam sabbāni vīthiccittāni āvajjanenavā aññamaññamvā dhammatovā kālatovā bhinnā lambaṇāni hontīti veditabbanti.

Ettha siyā. Yadi ce tam āgantukabhavaṅgam ekavīthiyam ādimhi āvajjanena āvajjitaṃ ārammaṇam

agahetvā aññaṃ yaṃ kiñci paricitapubbaṃ parittārammaṇaṃ ārabha uppajjati. Evaṃ sati nirāvajjanaṃnāma etaṃ siyā. Āvajjanādīhica saddhiṃ dhammato kālato ca bhinnārammaṇaṃnāma siyāti. Saccam, yathā pana maggavīthiyaṃ gotrabhuvodānāni phalasamāpattivīthiyaṃ phalāni nirodhato vuṭṭhahantassaca phalacittaṃ nirāvajjanaṃeva honti bhinnārammaṇaṃnāca. Evametassapi natthi nirāvajjanatāya bhinnārammaṇatāyaca dosoti. Yañca ekasmimbhave bhavaṅgassa paṭisandhiyā saha dhammatoca ārammaṇa toca abhinnattaṃ tattha tattha vuttaṃ. Taṃpi mūlabhavaṅgaṃ sandhāya vuttaṃ. Idañca āgantukabhavaṅganti natthi dosoti. **Tamanantaritvā**ti taṃ āgantukabhavaṅgaṃ attano anantarapaccayaṃ katvā. Vadanti ācariyā. Pāliyaṃ pana mahāaṭṭhakathāyaṃca etaṃ vidhānaṃ natthīti adhippāyo. Kāmāvacarajavanāvasāneyeva tadārammaṇaṃ icchanti. Na mahaggaṭānuttarajavanāvasāne. Kasmā iti ce. Kāmāvacara javanānaṃ eva savipphandaṇatā. Itaresañca avipphandaṇatā.

[136] Vibhāvaniyaṃ pana

“Kāmatanḥā nidāna kammanibbattatā”ti kāraṇaṃ vuttaṃ. Taṃ akāraṇaṃ.

Apica abhiññāvajjitāni mahaggaṭānuttarajavanāni aparittārammaṇāni honti. Tadārammaṇāni pana parittārammaṇānevāti natesaṃ avasāne tadārammaṇuppatti pasaṅgo atthi. Abhiññājavānaṃnāca kānici parittārammaṇānipi santatarāni hontīti tesampi avasāne taduppatti natthiyevāti.

[137] Etena

Ajanakattā janaka samānattābhāvatotiādipi paṭikkhittaṃ hoti.

Kāmāvacarasattānaṃeva tadārammaṇaṃ icchanti. Na rūpārūpasattānaṃ. Na hi tesu uppannānaṃ parittārammaṇānaṃpi kāmāvacarajavanānaṃ avasāne tadārammaṇuppatti atthi. Tadārammaṇūpa nissayassa kāma bhavaṅgassa abhāvato mahaggaṭā bhavaṅgassa ca santa tarassa tadārammaṇa kiccā bhāvatoti. Cakkhuvīññāna sota viññānāni pana rūpasattānaṃ cakkhusotaindriya pavattīānubhāvato sampaṭicchanasantīraṇānaṃ dvāravīthibhede cittaniyamasiddhito rūpasattesu pavattanti yevāti. Kāmāvacaradhammesveva ārammaṇabhūtesu tadārammaṇaṃ icchanti, na mahaggaṭānuttarapaññattidhammesu. Ekantaparittārammaṇatā tadārammaṇānaṃ. Tesam pana ekantaparittā rammaṇabhāve kāraṇaṃ heṭṭhā vuttamevāti.

[138] Vibhāvaniyaṃ pana

“Aparicitatā”ti kāraṇaṃ vuttaṃ. Taṃ akāraṇaṃ.

Cittañhi nāma vikappabalevā appanāpattabhāvanākammavisesse vā sati nibbāne viya aparicitepi ārammaṇe pavattatiyevāti.

[139] Yañca vibhāvaniyaṃ

“Kāmatanḥāyattakammajanitattāpi”ti kāraṇaṃ vuttaṃ. Taṃpi heṭṭhā paṭikkhittameva. Teneva hi aṭṭhakathāyaṃ kiṃvā etāya yutticintāyāti vatvā sabbāni vibhāvaniyaṃ vutta kāraṇāni paṭikkhittāntīti.

Kāme javana sattālambaṇānaṃ niyamesatīti kāmabhūmipariyāpannānaṃ javanānaṃ sattānaṃ ārammaṇānaṃnāca vasena tividhe niyame sati. **Vibhūte timahanteca tadārammaṇamīritanti** etena tadārammaṇaṃnāma pavattamānaṃ vibhūtārammaṇevā atimahantārammaṇe vā pavattatīti ayameva niyamo dassito. Na pana yattha tadā rammaṇaṃ pavattati. Etadeva vibhūtañca atimahantañca nāmāti niyamo. Tasmā ulārakammanibbattānaṃ suvisadavatthukānaṃ rūpabrahmānaṃ uppanāvīthiyo yebhuyyena vibhūtārammaṇāeva atimahantā rammaṇāevaca hontīti veditabbā. Keci pana imamatthaṃ

asallakkhetvā rūpārūpabhūmīsu vibhūtārammaṇavīthiyo atimahantārammaṇavīthiyo nalabbhantīti vadanti. [Tadārammaṇaniyamo].

140. Javanesucāti casaddo pana saddattho. Chakkhattu mevavā javanti. Pakatikālepi ārammaṇassa dubbalabhāve satīti adhippāyo. Aṭṭhakathāyaṃpi hi pakatikāle ārammaṇadubba laṭṭhāneeva kāmāvacarajavanānaṃ chakkhattuṃ pavatti vuttāti. Keci pana chakkhattunti idaṃ mucchākālavasena vuttanti maññanti. **Mandavattiyanti** maraṇāsannakāle bahucittakkhaṇāṭītakassa vatthussa dubbalattā itarakālesuca mudutarabhāvena kenaci upadduta bhāvena ajjhotthaṭabhāvenaca vatthussa dubbalattā tannissitānaṃ javanānaṃ mandībhūtavegatā vasena pavattikāle. **Maraṇakālādīsūti** maraṇāsannakāle mucchākāle visaññibhūta kāle atitaruṇakāleca, tattha mucchākālonāma asayha rūpehi dukkhadhammehi atibhūtānaṃ adhimattato karajakāyassa vihaññappattikālo. Visaññi bhūtakālonāma pītivegenavā niddābhībhūtātāyavā yakkhagahaṇenavā surāmadādi vasenavā pakatisaññāya vigatakālo. Atitaruṇakālonāma gabbhagatassavā sampatijātassavā dārakassa ajjhata vatthūnaṃ atimudukālo. Tādisesu hi kālesu antarantarā chadvārikavīthiyo pavattamānāpi yebhuyyena paripuṇṇajavanavārā na pavattanti. Dvattivoṭṭhabbanikāvā catupañcajavanikāevavā pavattantīti. Etthaca dvattivoṭṭhabbanikavārā aṭṭhakathāyaṃ vuttā. Catupañca javanikavārā mūlaṭṭikāyaṃ vuttā. **Pañcavāramevāti** idaṃ pana maraṇā sannakālavasena vuttaṃ. Namucchākālādivasena. Tañca khopākatikasattānaṃ vaseneva. Ye pana jhānasamanantaraṃvā paccavekkhaṇa samanantaraṃvā abhiññāsamanantaraṃvā cavantivā parinibbāyantivā. Tesam jhānādīniyeva pañcavārato adhikānivā ūnānivā maraṇā sannajavanānināma hontīti daṭṭhabbaṃ. Ayañca attho upari maraṇuppattiyam āvibhavissatīti. **Bhagavato pana yamakapāṭihāriya kālādīsūti** ettha aññesaṃpi mahāmoggalānattherādīnaṃ evarūpo lahuppavattikālo ādisaddena saṅgahitoti daṭṭhabbo. Vuttañhi visuddhimagge ayaṃ pana matthakapattā vasī bhagavato yamakapāṭihāriye labbhati. Aññesaṃvā evarūpe kāleti. Sakalena pana vākyena thapetvā yamakapāṭihāriyasadisam lahuka pavattikālam aññasmim kāle bhagavatopi chavā sattavā paccavekkhaṇacittāni pavattanti. Aññesaṃ pana vattabbameva natthīti dasseti. **Cattāri pañcavā paccavekkhaṇacittāni bhavantīti** etthapi bhagavatopi lahukappavattiyam pañca paccavekkhaṇacittāni bhavanti. Lahukatarapavattiyam cattārīti atthopi yujjatiyeva.

Vibhāvanīyaṃ pana

Bhagavato cattāri aññesaṃ pañcapīti yuttaṃ viya dissatīti vuttaṃ.

Tattha yamakapāṭihāriyam karonto bhagavā aggikkhandhauka dhārādīnaṃ dvinnaṃ dvinnaṃ pāṭihāriyānaṃ pavattanattam pathamaṃ tejokasiṇe pādakajjhānaṃ samāpajji. Tato dve jhānaṅgāni paccavekkhi. Tato uparimakāyato aggikkhandho pavattatūti adhiṭṭhāsi. Tato tasmimyeva kasiṇe abhiññam samāpajji. Abhiññāvasena uparimakāyato aggikkhandho pavattati. Tato āpokasiṇe pādakajjhānaṃ samāpajji. Tato dve jhānaṅgāni paccavekkhi. Tato heṭṭhimakāyato udakadhārā pavattantūti adhiṭṭhāsi. Tato tasmimyeva kasiṇe abhiññam samāpajji. Abhiññāvasena heṭṭhima kāyato udakadhārā pavattanti. Sesayamakesupi eseva nayo. Etthaca lahukappavattiyā icchitattā dve dve paccavekkhaṇavārā catupañcajavanikāeva bhavanti. Dvinnañca javanavārānaṃ antarā dve eva bhavaṅgāni bhavanti. Tānica dve pāṭihāriyāni passantānaṃ ekappahāreneva pavattāni viya paññāyantīti. Etarahi pana keci ādikammikajjhānapaccavekkhaṇesupi cattāri pañcavājavanāni vadanti. **Ādikammikassāti** yogakammasiddhiyā ādimhi niyuttassa. Pathamaṃ uppannā appanā pathamakappanā. Tassam pathamakappanāyaṃ. Ādikammikaappanāvīthiyanti attho. Tadā hi sabbānipi mahaggatajavanāni puna āsevanābhāvato paridubbālāni hontīti ekavārameva javantīti. Abhiññājavanāni pana iddhivikubbanādi. Kiccāsiddhiyāeva payuttāntīti kiccāsiddhito paraṃ kattabbābhāvato ādikammikakālepi vasībhūtakālepi ekavārameva javantīti vuttaṃ **abhiññājavanānica sabbadāpīti**. Yathāca abhiññājavanādi evaṃ maggajavanānipi tam tam kilesappahānakiccāsiddhito paraṃ kattabbā bhāvato ekavārameva javantīti vuttaṃ cattāro pana.La. Eka cittakkaṇikāvāti. Athavā, maggacetanāya anantarikaphalattā sakim uppanneyeva magge phalassavāro āvatoti natthi maggacittassa punuppattiyā okāsoti vuttaṃ **cattāro pana.La. Ekacittakkaṇikāvāti**. Javanuppattiyā pakatiyā sattakkhuparamattā

mandassa pañcamam uppannamaggato param dve phalacittāni uppajjanti. Tikkhassa catuttham uppannamaggato param tīṇīti vuttam **tato param.La. Uppajjantīti**. Nirodhasamāpattikāle pana pubbhāgeyeva tādi sassa payogābhisankhārassa katattā dvinnam vārānam upari cittappavatti natthīti vuttam **nirodha.La. Javatīti**. Etthaca **dvikkhattunti** idam ukkaṭṭha niddesavasena vuttam. Ekaṃvā dnevā cittavāre atikkamitvā acittako hotīti hi vuttam. **Catutthāruppajavananti** anāgāmino kusalabhūtam arahato kriyabhūtam nevasaññānāsaññā yatana javanam. Vuṭṭhānakāleca nirodhassa nisandamattattā ekavārameva vajanam pavattatīti vuttam **vuṭṭhānakālecātīdi**. Tattha **anāgāmi phalamvā arahattaphalamvā**ti anāgāmi phalevā arahattaphalevā. Bhāvena bhāvalakkhaṇe hetam paccattavacanam. Tenāha niruddheti. **Sabbatthāpi samāpattivīthiyanti** jhānasamāpatti phalasangāhavasena sakalāyapi samāpattivīthiyam. **Bhavaṅgasotoviya vīthiniya mo natthīti** idam ciṇṇavasībhūtakālam sandhāya vuttam. Akatā dhikārassa pana jhānasamāpattiyam ādito paṭṭhāya dve tīni cattārītīādīnā jhānavanāni anukkamena vaddhamānāni pavattanti. Katā dhikārānam pana mahāpurisajātikānam paṭiladdhakālato paṭṭhāya ciṇṇavasībhāvāneva honti. Tathā phalajavanānica sabbesaṃpi phalaṭṭhānanti daṭṭhabbam. **Bahūnipīti** pisaddo sampiṇḍanatto. Tena ādikammikakālādīsu ekavārādivasena api avasesānam pavattim sampiṇḍetīti. [Jānaniyamo].

141. Evaṃ pubbāparaniyāmasena vīthicittānam pavattim dassetvā idāni puggalabhedavasena bhūmibhedavasena tesaṃ pavattim dassento **duhetukānanti**ādīmāha. Paṭisandhiviññānasahagatā dve hetuyo etesanti duhetukā. Catūhi ṇānavippa yuttamahāvīpākehi gahitapaṭisandhikā. Dvīhi pana ahetuka vipākehi gahita paṭisandhikā ahetukā natthi paṭisandhietu etesanti katvā. Tesaṃ dvinnampi vipākāvaraṇasabbhāvato mahagga tajjhānānīpi tāva nuppajjanti. Kuto lokuttarāni. Kriyajavanāni pana khīṇāsavānameva āvenika bhūtānīti vuttam **kriyajavanāni cevaappanājavānānica na labbhantīti**. Tattha vipākā varaṇam nāma ahetuka paṭisandhikatā dvihetuka paṭisandhikatāca. **Tathā ṇānasampayuttavīpākānica sugatiyanti** sugati bhava pariyāpannānam tesaṃ dvinnam tathā ṇānampayuttamahāvīpākānica na labbhantīti attho. Etthaca sugatiyanti etena duggatipariyāpanne ahetuka puggale nivatteti. Na hi tesaṃ imasmim vākye itaresam anuññātāni ṇānavippayuttavīpākānīpi labbhantīti. Tenāha **duggatiyam panā**tiādi. Tattha duggatiyam pariyāpannānam ahetukānam ṇānasampayuttavīpākānica ṇānavippayuttāni mahāvīpākānica na labbhantīti paripuṇṇa yojanā daṭṭhabbā. Ettha siyā. Kasmā panettha sugatipariyāpannānam ahetukānam cattāri ṇānasampayuttavīpākāni duggatipariyāpannānaṃca aṭṭhapi sahetuka mahāvīpākāni na labbhantīti vuttam. Nanu paṭṭhāne sahetukam bhavaṅgam ahetukassa bhavaṅgassa anantarapaccayena paccayoti vuttam. Ettha hi ekasmim bhava ekassa sattassa kadāci sahetukam bhavaṅgam kadāci ahetukam bhavaṅganti evaṃ mūlabhavaṅge pavattibhedo natthīti katvā sahetukam bhavaṅganti idam tadārammaṇasaṅkhātam āgantukabhavaṅgam sandhāya vuttanti viññāyati. Sahetukantica sāmāññavacanattā dvihetukam tihetukaṃca tadārammaṇam viññātabbam hoti. Ahetukassa bhavaṅgassāti idha pana tassa tadārammaṇassa anantaram uppannam mūlabhavaṅgameva adhippetam. Idhapi sāmāññavacanattā dvīsu a- ahetukabhavaṅgesu yaṃkiñci gahetabbamevāti. Tasmā dvinnam ahetukānampi aṭṭhasahetuka tadārammaṇānīpi labbhamānānieva siyūm. Duhetukānam pana vattabbameva natthīti. Vuccate, ahetu kesu tāva duggatipariyāpannānam sahetukatadārammaṇasambhavo sabbaaṭṭhakathāsu paṭikkhitto. Tasmā ahetukassa bhavaṅgassāti idam kusalavīpākabhūtam ahetukabhavaṅgam sandhāya vuttanti yuttam. Ayañhi paṭṭhāne dhammatā. Yadidaṃ yathālābhagahaṇanti. Itarathā sabbaaṭṭhakathāvirodho siyāti. Yathāca kusalānam yogasādhaniyattā pavattiyampi yogakammavasena ṇānayogo hoti. Na tathā vipākānam. Tesaṃ pana ayogasādhani yattā pavattiyam bhavaṅgaññāsaṅkhātena upanissayaññāneva vinā ṇānayogo na sambhavati. Tasmā sahetukam bhavaṅganti idhapi ṇānavippayuttabhūtam sahetukatadārammaṇameva gahetum yuttanti katvā dvihetukānam ahetukānaṃca ṇānasampayuttatadārammaṇa paṭikkhepo therena katoti. Ācariyabuddhadattatherena pana yena vipākacittena paṭisandhim gaṇhanti. Tena sadisaṃ vā tato hīnam vā tadārammaṇam tesaṃ sambhavati. Na pañīntanti katvā dvinnampi ahetukānam aṭṭhamahāvīpākāni paṭikkhipitvā sattatimsacittapaṭi lābho vutto. So pana yathā vuttapaṭṭhānapāliya virujjhati. Apare pana yathā ahetukānam sugatipariyāpannānam dvihetuka tadārammaṇam hoti. Evaṃ dvihetukānampi tihetukatadārammaṇam sambhavatīti vadanti. Tam yuttamviya dissati. Aṭṭhakathāyañhi katthaci tesaṃ dvinnampi avisesena aṭṭhamahāvīpākavattīti vuttatīti. Paṭisandhiviññāna sahatatā tayo

hetū etesanti tihetukā. Te pana kāmarūpārūpavasena tividhā honti. Puthujjano aṭṭhaariyācāti navavidhā. Tesu khīṇāsavaṇaṃ kusalākusala javanānica nalabbhanti. Sabbaso anusayapahānena sabbesaṃ kusalākusalaṇaṃ saha niruddhattā anusaya paṭibaddho hi tesam tabbhāvoti. Tathāsaddo pakkhantaratto. Apariniṭṭhitasikkhākiccatāya sikkhanasīlayuttā sattaariyā sekkhānāma. Idha pana tayo heṭṭhimaphalaṭṭhā adhippetā. Tesañhi ādito sotāpattimaggeneva diṭṭhivicikicchānaṃ pahīnattā taṃ sahaḡatāni pañcajavanāni nalabbhanti. Anāgāmiṃpuggalaṇaṃ pana paṭighajavanānica na labbhanti. Anāgāmiṃmaggena pahīnattā. Maggassa pana ekacittakkaṇikattā. Catunnaṃ maggaṭṭhānaṃ paccekaṃ yathāsakaṃ maggajavanānieva labbhanti. Uparimānañca phalaṇaṃ heṭṭhimehi puggalehi anamigatattā heṭṭhimānañca uparimesu puggalantaresu anuppajjanato catunnaṃ phalaṭṭhānaṃpi paccekaṃ yathāsakaṃ phalajavanānieva labbhanti vuttaṃ **lokuttara.La. Samuppajjanti**. Etthaca uparimagge āgate heṭṭhimamaggānubhāvassa sabbaso paṭipassaddhivasena uparimānaṃ puggalantaratāsiddhi veditabbāti. Idāni tesam tesam puggalaṇaṃ pārisesato labbhamānavīthiccittāni dassetuṃ gāthamāha. Pariniṭṭhi tasikkhākiccattā natthi sikkhitabbakiccaṃ etesanti asekkhā. Khīṇāsavā. Tesam tevīsaticāmaṃvipāka vīsaticriya arahattaphala vasena catucattālīsa vīthiccittāni sambhavā yathāsambhavaṃ uddise. Sattannaṃ sekkhānaṃ diṭṭhivicikicchājavanavajjitānaṃ sattannaṃ akusalānaṃ ekavīsatiyā kusalaṇaṃ tevīsatiyā kāmaṃvipākānaṃ tinnaṃ heṭṭhimaphalaṇaṃ āvajjanadvayassaca vasena chapaññāsa vīthiccittāni sambhavā uddise. Avasesānaṃ catunnaṃ puthujjanānaṃ kāmaṃvipāka lokiyakusalakulāvajjana dvayavasena catupaññāsa vīthiccittāni sambhavā uddiseti yojanā. Puggala bhedenā vīthiccittānaṃ bhedo puggalabhedo.

142. Sabbānīpi vīthiccittāni upalabbhanti puggalaṇaṃ dvārānañca etheva paripuññasambhavato. **Yathārahanti** taṃ taṃ bhūmiṃpuggalaṇaṃ uppattiarahānurūpaṃ. Rūpāvacaṃrabhūmiyaṃ vajjitabbesu soḡasavīthi cittesu channaṃ cittānaṃ uparivākye vuccamānattā paṭighajavana tadārammaṇa vajjitānīti vuttaṃ. Arūpāvacaṃrabhūmiyaṃ pathamamagga rūpāvacaṃrahasana heṭṭhimārūppavajjitāni paṭighajavana tadārammaṇavajjitānica vīthi cittāni labbhanti yojanā. Etthāpi vajjitabbesu aṭṭhatimsa vīthiccittesu soḡasannaṃ cittānaṃ uparivuccamānatā daṭṭhabbā. **Sabbatthāpīti** sabbāsūpi rūpārūpabhūmiṃsu. **Taṃtaṃ pasādarahitānaṃ taṃtaṃdvārika vīthiccittāni na labbhantevāti** rūpāvacaṃrabhūmiyaṃ tāva ghānādittayaṃ natthīti ghānājivhākāyapasāda rahitānaṃ rūpībrahmānaṃ ghāna jivhākāyadvārikāni cha vīthiccittāni nalabbhanteva. Yāni sandhāya channaṃ cittānaṃ uparivākye vuccamānattāti heṭṭhā vuttaṃ. Arūpabhūmiyaṃ pana pañcāpi pasādā natthīti pañcadvārikāni dvipañcaviññāṇa manodhā tuttika santīraṇattayavasena soḡasavīthiccittāni nalabbhanteva. Yāni sandhāya soḡasannaṃ cittānaṃ upari vuccamānatāti vuttaṃ. Kāmaṃbhūmiyaṃ pana taṃtaṃ pasādarahitāta jaccandhādīnaṃ vasena yo jetabbā. Kāme asīti vīthiccittāni yathārahaṃ labbhare labbhanti. Rūpe catusaṭṭhi tathā yathārahaṃ labbhare. Arūpe dve cattālīsa yathārahaṃ labbhareti yojanā. Etthaca brahmalokevā upari chakāmāvacara devalokesuvā anīṭṭhārammaṇāni nāma natthi. Tasmā rūpāvacaṃrabhūmiyaṃ catunnaṃ akusalavipākānaṃ labbhamānatāvacaṃnaṃ tattha ṭhatvāvā idha āgantvāvā idha anaṭṭhehi rūpasaddehi samāgacchantānaṃ vasena daṭṭhabbaṃ. Keci pana idha āgatānaṃyeva brahmānaṃ anīṭṭhārammaṇasamāyogo hotīti thāni cattāri rūpabhūmiyaṃ laddhānināma na honti. Tasmā tattha saṭṭhiyeva vīthiccittānīti vadanti. Taṃ na yujjati. Idha āgatānaṃyeva uppannānīpi brahmattabhāve uppannattā brahmaloke uppannāni icceva vattabbattā. Naca tattha ṭhitāpi idha anīṭṭhāni nagaṇhanti. Dūrepi ārammaṇaṃ gaḡetuṃ samatthattā brahmānanti.

[140] Yañca vibhāvanīyaṃ

Tassa vādassa paṭikkhipanattamaṃ vuttaṃ “idha pana tattha ṭhatvāpi imaṃ lokaṃ passantānaṃ anīṭṭhārammaṇassa asambhavo na sakkā vattu”nti. Tena tattha ṭhatvā imaṃ lokaṃ passantānaṃ uppannāni tāni cattāri cittāni tattha laddhānināma honti. Idha āgatānaṃ uppannāni idha laddhānināma hontīti anuññātaṃ hoti. Tañca na yuttaṃ.

Taṃ taṃ bhūmiṃpariyāpanne sattaṃsantāne uppannānieva taṃtaṃbhūmiyaṃ uppannānīti siddhattā. **Icevantiādi mahānigamaṃ. Yathāsambhavanti** taṃ taṃ bhūmiṃpuggaladvārārammaṇesu

sambhavānurūpaṃ. Bhavaṅgena antaritā bhavaṅgantaritā. **Yāvatāyukanti** tasmim tasmim bhave bhavanikanti vīthito paṭṭhāya yattakaṃ kālaṃ jīvitasantānaṃ pavattati. Tattakaṃ kālanti attho. Abbhocchinnā pavattati asati nirodha samāpattiyanti adhippāyo.

Iti paramatthadīpaniyānāma abhidhammatthasaṅgahassa

Catutthavaṇṇanāya vīthi saṅgahassa

Paramatthadīpanā niṭṭhitā.

Vīthimutta saṅgaha paramatthadīpanī

143. Evaṃ pavattikāle pavattisaṅgahaṃ dassetvā idāni paṭisandhiyaṃ pavattisaṅgahaṃ dassetuṃ ādigātha māha. Evaṃ vuttanayena pavattiyaṃ pavattisaṅgahonāma vīthicittavasena udīritokathito. Idāni sandhiyaṃ pavattisaṅgaho nāma vīthimutta cittānaṃ vasena vuccatīti yojanā. Etthaca paṭisandhiyaṃ cittacetāsikānaṃ pavattiyā kathitāya tato paraṃ bhavaṅgakāleca cutikāleca tesam pavatti kathitāyeva hotīti katvā sandhiyamicceva vuttaṃ.

[141] Vibhāvaniyaṃ pana

Parato maraṇupattiyaṃ pathamaṃ cutiṃ dassetvā pacchā anantare paṭisandhiyā vakkhamānattā idha sandhiggahaṇena atītā nantara cutipi gahetabbāti adhippāyena yaṃ vuttaṃ “tadāsannatāya taṃgahaṇeneva gahitacutikālecā”ti. Taṃ na yujjatiyeva.

Vīthimuttānañhi visayappavattināma atītānantarabhave maraṇupattiyameva siddhāti ekasmim bhave visayappattiyā saha tesam paṭisandhipamukhānaṃ vīthimuttacittānaṃ pavattidassanattameva tāya atītānantaracutiyaṃ saddhiṃ maraṇupattividhānaṃ therena dassitanti. Bhavanti sattā saṅkhārāca etāsūti **bhūmiyo**. Ayoti vaḍḍhi. Atthato pana sukhaṃca sukhaḥetu sukhapaccayāca veditabbā. Yebhuyyena tato ayato apagatā ettha nibbattā sattāti apāyo. Soeva bhūmīti apāyabhūmi. Oḷārikena kāmarāgena kāmiyatīti kāmo. Gantabbā upagantabbāti gati. Gacchanti sattā etthātivā gati. Anekavidhasampattīnaṃ adhiṭṭhānatāya sobhaṇāgati **sugati**. Kāmoca so sugaticāti samāso. Natthi yathāvutto ayo etthāti **nirayo**. Niccaṃ vā rayanti kampanti phandanti sattā dukkhappattā etthāti nirayo. Manussā viya uddhaṃ uccā ahutvā tiro añcitā āyatāti tīracchānā. Yuvanti nānā vaṇṇasaṅghānāpi sattā samānajātīya ekībhūtāviya honti etāyāti yoni. Jāti.

Vibhāvaniyaṃ pana

Khandhānaṃ pavattivisesoti vuttaṃ.

Tīracchānānaṃ yoni **tīracchānayoni**. Pecca itā gatāti petā. Ito apakkamma cavitvā bhavantare gatāti attho. Yekeci kālaṅkatā. Divaṅgatāpi hi loke kālaṅkatā petāti vuccanti. Idha pana sukhasamussayato pecca pakaṭṭhaṃ pavāsaṃ dūraṃ gatāti atthena yāva tato na muccanti. Tāva niccaṃ dukkhappattā lakkaṇasaṃyuttādīsu āgatā tatīya apāyikasattā adhippetā. Petānaṃ samūho petti. Pettiyā visayoti **petti visayo**. Visayotica pavattideso vuccati. **Asurakāyoti** ettha surā vuccanti upari devā suranti iddhivisesehi dibbanti, suṭṭhuvā ramanti kāmasukharatiṃ paccanubhavanti katvā. Na surāti asurā. Vepacitti pahārādādayo sandhāya surapaṭipakkhā sura sadisāvāti attho. Viyaṅkaramātā uttaramātādayo vini pātike sandhāya khuddakasurā cūlakasurāti attho. Yamarājā dayo vemānikapete sandhāya ekadesena surasadisāti attho. Vemānikapetāpi hi katthaci asurakāyāti āgatā. Lokantarika nerayike sandhāya sabbaso suraṅgaṇa rahitāti attho. Tepi hi buddhavaṃsanidānaṭṭhakathāyaṃ jātīdukkha niddesesuca asurakāyāti vuttā. Tathā kālakaṅkape sandhāya sabbaso surabhāvarahitāti attho. Iti

pañcannaṃ asurānaṃ vasena atthavibhāgo veditabbo. Dibbā vata bhokāyā parihāyissanti, paripūriṣṣanti asurakāyāti imasmiṃ suttapade cattāropi apāyā asurakāyāti aṭṭhakathāyaṃ vaṇṇitā.

Tattha vepacitti pahārādādayo asurā tāva tiṃsesu devesu saṅgahitā. Vinipātikāsura cātumahārājikadevesu. Tathā vemānikapētāsura. Tepi hi vinipātikāsura viya tihetukāpi duhetukāpi ahetukāpi hontīti aṭṭhakathāsu vuttā. Yamarājāno pana vessabhū nottica petti rājā somo yamo vessavaṇoca rājāti evaṃ kathā vatthupāliyaṃ āgatā vessabhūādayo sayama mahiddhikā mahānubhāvā vemānikapetarājāno hutvāpi nerayikesu sattesu kāruṇṇatama paṭicca heṭṭhā nirayalokesupi rajjama kārentiyeva. Teneva hi sabbe petalokāpi nirayalokāpi yamalo kātica yamavisayātica vuccantīti. Yeca cātumahārājikapari yāpannā pāpajjhāsaya kururakammakārino revativimāne yakkhāti āgatā samkiccajātake rakkhasāti āgatā yakkharakkhasānāma ito gantvā ussanirayesu nerayikānaṃ nānakamma kāraṇāyo karonto vicaranti. Tesampi kālo upakālōti evamādīhi nāmehi nāradajātake āgatānaṃ niraya pālānaṃ upariyamarājānaṃ āṇāpavattatiyevāti. Lokantarikā surā niraye saṅgahitā. Idha pana kālakaṇṭhikādayo petāsura va adhippetā. Tesama asurānaṃ kāyo samūhoti asurakāyo. Etthaca nirayabhūmināma paccekama soḷasussadapari vārānaṃ aṭṭhannaṃ mahānirayānaṃ vasena anto pathaviyaṃ ṭhitāti veditabbā. Arañña pabbata samudda dīpakādīsipi nānāniraya bhūmiyo hontiyeva. Tasmā tādisassa visuma vavattitassa okāsassa atthitāya nirayotveva vuttā. Sesānaṃ pana tissannaṃ apāyabhummīnaṃ tādisassa okāsassa natthitāya yoni visaya kāya saddehi yojetvā khandhāvā khandhappavattipadesāvā gahitāti. [Apāyabhūmi]

Ussito uggato ussannovā mano etesanti manussā. Tehi anantesu cakkavāḷesupi itarabhūmikānaṃ sattānaṃ tikkhatarasūra vicitracittā hontī. Paripuṇṇānaṃ kusalākusalakamma pathānaṃ ānantariyakammānaṃca ettheva sambhavatōti. Tesupi pana jambudīpavāsinoeva atisayena ussitamaṇā hontī. Itare pana tehi samānavāṇṇādītāya manussā icceva vuccantī. Imasmiṃ cakkavāḷe pana vattabbameva natthī, yathāha-tīhi bhikkhave ṭhāne hi jambudīpakā manussā uttarakuruke manusse adhiggaṇhanti. Deveca tāvatimse. Katamehi tīhi ṭhānehi. Sūrāca sati mantoca idha brahmacariyavāsocāti. Akkharacintakā pana vadanti manūti mahāsammatarājā vuccati. Imeca janā tena thapitesu mariyādadammesu ṭhitā tassa puttattāhāniyā hontī. Tasmā manuno apaccā puttāti manussāti. Idha pana bhūmipariyāyoti katvā manussāti itthilīṅgaṃ ekavacanaṃca katanti daṭṭhabbaṃ. Evaṃ sese supī. Yesu pana cattāro mahārājāno rajjama kārentī. Te devā cātumahārājikā. Tattha dhatarattho gandhappānaṃ rājā hotī. Virūhako kumbhaṇḍānaṃ. Virūpakkho nāgānaṃ. Kuvero yakkhānaṃ. Tattha paṭisandhivasena gandharukkhesu appenti upagacchantīti gandhappā. Gandharukkhaḍdivatthā devā. Te mūlagandhādivasena dasadhā pāliyaṃ āgatā. Kumbhaṇḍāti dānavarakkhasā. Nāgā yakkhāca pākāṭā. Sabbe te yebhuyyena pāpajjhāsaya kururakammakārino ca hontī. Tasmā cattāro mahārājāno aññamaññaṃvā manussānaṃ vā aviheṭṭhanatthāya tesu nānārājānaṃvā nānāsenāpatimvā thapesuma.

Āṭānāṭiyasuttaṃcettavattabbaṃ. Tattha hi yakkhoyakkhinīgandhappo gandhappī kumbhaṇḍo kumbhaṇḍī nāgo nāgīticatasso avaruddhakajātiyo āgatā. Tattha sarīrobhāsasirisampattiyutto amanusso yakkhōtica devōtica devatātica vuccati. Sarīro bhāsa sirisampattirahito vigaccharūpo amanusso yakkhōtveva vuccati. Rukkhatthakavimāne jāto rukkhadēvatānāma. Rukkhasa abbhantare jāto gandhapponāma. Yo loke kaṭṭhayakkhōti vuccati. Pubbe nihīnakammakatā kāci gandhappiyo manussitthīnaṃ sarīrabbhantaresupi jāyanti. Yā vedaganthesu yoginītica loke joginītica vuccanti. Abhilakkhitarattīsū gocarapasuta kāle jutiatthēna juṇhātica vuccanti, kumbhaṇḍānāma mahodarā visālakkhā rakkhasāeva. Ye loke dhana rakkhakāti vuccanti. Te hi vepullapabbate maṇirātanaṃ rakkhanti. Anto himavante abbhantara ambarukkhe rakkhanti. Evaṃ ratanaṭṭhānānīvā vanappati rukkhevā dibbosadharukkhevā dibbagandharukkhevā udakasarevā rakkhitvā asanti bhakkhanti. Tasmā rakkhasāti vuccanti. Nāgo nāgīti ettha anto pabbatevā anto pathaviyaṃvā nibbattā vasundharadevayakkhajātiyopi idha nāgātveva vuccanti. Yā mahāparinibbāna sutte bhūmicālasuttapade pathavī devatāti vuttā. Yāsaṃ kīlāpasuta vasena kadāci bhūmicālo hotī. Yāsaṃca mantapadāni vatthu vijjātica bhūmivijjātica brahmajālasutte vuttāni. Tesuca nānā iddhimantā avaruddhakā pāpātiratā kibbisakammakārino kīlā soṇḍavasēnavā ghāsasoṇḍavasēnavā petesucanirayesuca pakati vaṇṇēnavā

soṇagijjhakākādivaṇṇenavā satte viheṭṭhayantā vicaranti. Sabbañce taṃ suttantesuvā jātakesuvā vedaganthesuvā kusalehi veditabbanti.

Saha puññakārino tettiṃsa janā māghenanāma jeṭṭhapurisenā saha ettha nibbattāti tettiṃsā. Sāeva **tāvatiṃsā** nirutti nayena. Kāmañcettha sabbacakkavāḷesupi ayaṃ dutṭiyadeva loko janavasatasutte āgata nayena sakkaṭṭhāniyānaṃ pajāpati varuṇa īsānādīnaṃ tettiṃsa devarājūnaṃ nibandhano kāso hoti. Sahassaṃ cātumahārājikānaṃ. Sahassaṃ tāvatiṃsānanti hi aṅguttare vuttaṃ. Māghapurisā pana tesu samudāgatesu devarājāṭṭhānesu paccājātā honti. Etarahi dharamānāca tasmā tesāṃ vasena ayaṃ vacanatto katoti veditabbo. Apare pana yathā indagopakavaṇṇābhā. Tāva dissanti tiṃsatīti imasmiṃ vidhurajātake tāva saddo tiṃsasaddaparivāramatto hoti. Tathā idhāpīti katvā tiṃsamattānaṃ sakkaṭṭhāniyānaṃ devarājakulānaṃ nivāsaṭṭhā natta tāvatiṃsānāmāti yuttaṃ siyā. Aṭṭhakathāsu pana yathāvuttaṃ niruttinayaṃ kappetvā māghavatthūsuca tesu tesuca ṭhānesu sakkānaṃ tettiṃsa saṅkhāeva vuttātipi vadanti. Taṃ na yujjati. Pāḷiyameva brahmāsanaṅkumāro tettiṃse attabhāve abhinimminivā devānaṃ tāvatiṃsānaṃ pallaṅkesu nisīditvāti vuttattā. **Yāmoti** tasmīṃ devaloke issaradevakulassa nāmaṃ. Tathā suyāmotica. Taṃ saharitattā pana so deva lokopi tattha nibbattadevāpi yāmātveva vuccanti. Vipulāya sirisampattiyā samannāgatattā niccaṃ tusanti ativiya haṭṭhatuṭṭhamukhā honti etthāti **tusitā**. Yathārucite bhoge sayameva nimminivā nimminivā ramanti etthāti **nimmānaratī**. Attano ruciṃ ṇatvā parehi nimmitesu bhogesu vasaṃ vattenti etthāti **paranimmitavasavattī**. Brūhanti vaḍḍhanti atipaṇṭhehi jhānādi guṇehi vuddhiṃ viruḷhiṃ vepullaṃ āpajjantīti **brahmāno**. Mahantā brahmāno mahābrahmānoti vattabbe mahāsaddassa lopo.

Parisati bhavāti pārisajjā. Parisāsu jātativā pārisajjā. Paricārikāti attho. Mahābrahmānaṃ pārisajjāti **brahma pārisajjā**. Pure ucce ṭhāne odahanti tiṭṭhantīti purohitā. Mahābrahmānaṃ purohitāti **brahmapurohitā**. Mahantā brahmāno **mahābrahmāno**. Sahassobrahmā dvisahassobrahmā. Tisahassobrahmātiādīnā saṅkhārūpapattisutte āgatā adhipatibrahmānoti attho. Tattha sahasobrahmāti cakkavāḷasahasamhi issaro brahmā. Dvisahassoti dvīsu cakkavāḷa sahasesu issaroti attho. Tayopete ekatala vāsino honti. Tattha loka mahājanā visuṃ visuṃ kuladevatāyonāma upaṭṭhahanti. Keci mahādevaṃnāma upaṭṭhahanti. Keci vāsudevaṃnāma. Keci mahesaraṃnāma. Keci paramesvāraṃ nāmāti. Gharadevatā gāmadevatā rukkhadevatādayopi tesāṃ mahādevarājānaṃ upaṭṭhakāeva sampajjanti. Tattha mahādevarā jānoviya mahābrahmāno daṭṭhabbā. Gharadevatādayoviya brahma purohitādaṭṭhabbā, manussāviya brahmapārisajjādaṭṭhabbā. Tatthaca ghara devatādayo mahādevarā jāno adisvāva upaṭṭhahanti. Manussā ca teubhopi adisvāva upaṭṭhahanti. Evamevaṃ brahmapurohitā mahābrahmānopi napassanti. Mahābrahmānaṃ nivāsaṭṭhānaṃpi najānanti. Brahmapārisajjāubhopi napassanti. Ubhinnaṃnivāsaṭṭhānaṃpi najānanti. Yadā pana oḷārikaṃ rūpaṃ māpetvā attānaṃ dassenti. Tadā eva passanti. Esanayo uparibhūmīsūpi. Yaṃ pana brahmanimantana suttaṭṭhakathāyaṃ vuttaṃ brahmānaṃ pakatirūpaṃ kassaci āpātaṃ na gacchatīti. Taṃ brahmapuro hitā dīnaṃ uparimānaṃ brahmānaṃ pakatirūpaṃ kassaci brahmapārisajjādinovā devassavā manussassavāāpātaṃ nagacchatīti katvā vuttaṃ. Heṭṭhimānaṃ pana pakatirūpaṃ uparimassa āpātaṃ āgacchissatiyeva. Teneva hi janavasabhasuttaṭṭhakathāyaṃ heṭṭhimahēṭṭhimāhi devā uparimadevānaṃ oḷārikaṃ katvā māpitameva attabhāvaṃ passitūṃ sakkontīti vuttaṃ. Tatthadutṭiyatale **parittābhāti** brahmapārisajjāeva. **Appamāṇābhāti** brahmapurohitā eva. **Ābhassarāti** mahābrahmānoeva. Tasmīṃ tale adhipati brahmānoevāti attho. Heṭṭhimatalato pana vīsesa karaṇatthaṃ ābhāvasena nāmagahaṇaṃ hotīti daṭṭhabbaṃ.

Tattha parittā ābhā etesanti parittābhā. Appamāṇā ābhā etesanti appamāṇābhā. Ābhāsaranti niccharanti etesūti ābhassarāti. Tatṭiyatale **parittasubhāti** brahmapārisajjāeva. **Appamāṇasutāti** brahmapurohitāeva. **Sutakiṇṇāti** mahābrahmanoeva. Tasmīṃ tale adhipatibrahmāno evāti attho. Tattha subhāti ekagghanā acalasaṅṭhitā ābhāeva vuccanti. Parittā subhā etesanti parittasubhā. Appamāṇā subhā etesanti appamāṇasubhā. Sutehi ākiṇṇāti subhākiṇṇā. Subhākiṇṇāti paṭṭhanti. Tesāṃ ākārassa rasso antimaṇakārassa ca hakāro daṭṭhabbo. Imesu pana dvīsu talesu pakatikāyappabhā adhimattā honti. Tasmā tāsaṃ vasena parittābhātiādikaṃ nāmaṃ siddhaṃ. Na brahmapāri sajjātiādikaṃ. Evañca katvā

verañjasutte pathamatalavāsino brahmakāyikā devāti āgatā. Dutīyatalavāsino ābhādevāti. Tatīyatalavāsino subhādevāti catutthatale vipulaṃ phalaṃ etesanti **vehapphalā**. Athavā iñjanajātikehi somanassajjhānehi nibbattānaṃ tiṇṇaṃ heṭṭhimatalānaṃ tejoṣaṃ vaṭṭādikena antarāyena bhūmitalena saha āyukappanivattivasena iñjitaṃ puññaphalaṃ atthi. Tesu hi yaṃ subhākiñṇānaṃ devānaṃ catusaṭṭhikappānīti vuttaṃ. Taṃ tasmim tale ādikappikānaṃ vasena vuttaṃ. Pacchimikānaṃ pana tesatṭhikappa dvāsaṭṭhikappa ekasaṭṭhi kappādi vasena iñjitaṃ paṭilīnaṃ puññaphalaṃ hotīti. Āneñjajātikena upekkhājhānena nibbattānaṃ pana kenaci antarāyena tādisaṃ iñjitaṃ puññaphalaṃ nāma natthi. Tasmā jhāna sāmattiyanurūpaṃ visesena iṭhitaṃ abhivaḍḍhitaṃ puññaphalaṃ ettha atthīti vehapphalā.

Natthi saññāmukhena gahitā cattāro arūpakkhandhā etesanti asaññā. Asaññāca te sattācāti **asaññasattā**. Cittace tasikānaṃ pana natthitāya tesam asattapasāngatā sambhavatīti sattagahaṇaṃ katanti daṭṭhabbaṃ. Ete dvepi ekatalavāsino eva hontī. Etthapi nibbattakajjhānassa hīnamajjhimaṇītatā visesassa atthitāya tadanurūpaṃ brahmānaṃpi pārisajja purohita mahābrahmatta viseso sambhavatiyeva. Āyuvemattatāya pana aññamañña adassanādīnaṃ natthitāya pārisajjādivasena bhūmivibhāgo natthīti veditabbo. Evaṃ avihādīsupi. Oḷārikānaṃ kāmarāgapaṭighānusayānaṃ natthitāya suddhānaṃ anāgāmiarahantānameva āvāsāti **suddhāvāsā**. Tattha pathamabhūmivāsino appakena kālena attano ṭhānaṃ navijahantī avihā. Athavā, oḷārikānaṃ pañcannaṃ saṃyojanānaṃ pahīnattā natthi cittassa vihaññaṇaṃ samathavipassa nādhamesu avipphārikatāpatti etesanti **avihā**. Dutīyabhūmi vāsino na kenaci cittapariḷāhena tappantīti **atappā**. Tatīya talavāsino parisuddhehi pasādacakkhu dibbacakkhu dhammacakkhu paññā cakkhūhi sampannattā suṭṭhu passantīti **sudassā**. Catutthabhūmivāsino pana tato atisayena suṭṭhu dassanabhāvena samannāgatāti **sudassino**. Atisayatthe hi ayaṃ ikāroti. Pañcamabhūmi vāsino upari aññassa bhūmantaragatassa rūpibrahmuno natthitāya natthi rūpīnaṃ sattānaṃ majjhe kenaci guṇena kaniṭṭhabhāvo etesanti **akaniṭṭhā**.

Ākāsānañcāyatanabhūmīti ettha yattakaṃ ākāsapadesaṃ pharivā ākāsānañcāyatana saññitā catukkhandhā pavattanti. So khandhasahito ākāsapadeso ākāsānañcāyatanabhūmi. Evaṃ sesāsu. Puthujjanā sotāpannā sakadāgāminocāpi puggalā suddhāvāsesu sabbathā sabbapakārenapi nalabbhantīti yojanā. Etthaca sakadāgāmīnaṃ paṭikkhepena anāgāmi maggaṭṭhassapi tattha paṭikkhepo siddho hotīti uparimānaṃ tiṇṇaṃ ariyānameva tattha paṭilābho imāya gāthāya vuttoti veditabbo. **Sesaṭṭhānesūti** pañcasuddhāvāsato asaññāpāyatoca avasesesu ekavīsatiyā ṭhānesu, **anariyāti** puthujjanā. [Bhūmicatukkaṃ]

144. Okkantikkhaṇeti paṭisandhikkhaṇe. Paṭisandhihi bhavantare okkamaṇaṃ anupavisananthi atthena okkantīti vuccati. Tato paraṃ bhavaṅgaṃ hutvāti yojanā. Keci pana bhavaṅgapariyosāneti paṭhanti. Taṃ na yujjati. Jātiyā andho **jaccandho**. Ādisaddena jāti badhira jaccaghānaka jātimūga jacceḷa jaccummattaka paṇḍaka ubhato byañjanaka napuṃsaka mammādayo saṅgaṇhāti. Tattha yassa cakkhuṃ uppādetuṃ asamatthena kammaṇa paṭisandhi laddhā. So jaccandho nāma. Esanayo sesesupi. Tattha pasādasota rahito jātibadhiro nāma. Pasāda ghānarahito jacca ghānako nāma. Pasādajivhārahito nāma natthi. Vacanarahito jātimūgonāma. Disāvīdisāmattaṃpi saññāpetuṃ asakkuṇeyyo jātiḷo nāma. Sabbakālāṃpi vipallaṭṭhacitto jaccummattakonāma. Kāmahetu āsittakādibhāvena vippakārapatto paṇḍakonāma. Dvīhi byañjanehi samannāgato ubhato byañjanakonāma. Bhāvadvaya rahito napuṃsakonāma. Pakativacanepi ekamekaṃ akkharaṃ mahussāhena uppādetto vibacchavacano mammonāma. Etthaca cakkhuṃ uppādetuṃ samatthena kammaṇa laddhapaṭisandhikassa pavattikāle taṃvā aññaṃvā kammaṃ cakkhuṃ uppādeti. Asamatthenakammaṇa laddhapaṭisandhi kassa pana vatthuvipannassa pavattikāle aññaṃpi kammaṃ cakkhuṃ uppādetīti natthi. Tasmā gabbhaseyyakānaṃpi jaccandhabhāvo paṭisandhikkhaṇeyeva siddhoti veditabbo. Esanayo sesesu jāti badhirādīsū. Āyatanānaṃ paṭilābho jātīti vuttattā cakkhussa uppajjanārahakālo cakkhussa jātikālonāma. Tadā anuppanna cakkhuko jaccandhonāmāti evaṃ attano attano uppajjanāraha kālavasena tassa tassa āyatanassa jātikālo veditabbo. Evañhisati jātimūgādayopi upapanno hontītica vadanti. Vibhāvani yaṃpi ayamatto vibhāvīti.

[142] Yaṃ pana vibhāvaniyaṃ

“Apare pana jaccandhoti pasutiyāṃyeva andho. Mātu kucchiyaṃ andho hutvā nikkhantoti attho. Tena duhetukatihetukānaṃ mātukucchiyaṃ cakkhussa avipajjanaṃ siddhanti vadantīti” vuttaṃ. Taṃ na yuttaṃ.

Loke mātukucchiyaṃyeva andho hutvā nikkhantassapi ekaccassa taṃ taṃ sippavijjāṭhānesu paññāveyyattiyabhāvassa diṭṭhattā. Thapetvā hi mahābodhisatte aññeca pacchimabhavike satte avasesānaṃ dvihetuka tihetukānaṃpi mātukucchimhi parūpakkamenavā mātuyā visamapayogenavā nānābādhenavā uppannānaṃpi cakkhusotānaṃ vipattināma natthīti na sakkā niyametunti.

Bhummassitānaṃca vinipātikāsuraṇanti ettha bhūmiyaṃ jātāti bhumma. Bhūmisambandhesu rukkhāṭṭhaka pabbataṭṭhaka vimānesu nibbattā ālavaka sātāgira hemavatādayo mahiddhikā bhummaḍevā. Ye loke baliharaṇa vasena pūjaniyaṭṭhena yakkhātipi vuccanti. Ye pana bhummaḍevajātikāpi samānā attano puññanibbattassa kassaci bhogasukhassa abhāvā kicchajīvi kappattā vicaranti. Te tesāṃ mahiddhikānaṃ bhummaḍevānaṃ paraṃpara pārisajjesu pariyaṇannattā bhumme deve sitā nissitāti atthena bhummassitānaṃ honti. Bhummissitātipi pāṭho. Puññanibbattassa nivāsaṭṭhānassa abhāvā rukkhagumbaleṇaguhāsūsānā dīsu vivittesu bhūmipadesesu nissāya vasantīti attho. Teyeva virūpā hutvā bhavantare nipatantīti vinipātikā. Vinipātikāca te heṭṭhāvuttaṭṭhena asurācāti vinipātikā surā. Te pana gāmasamīpevā antogāmevā vivittaṭṭhānesu vasitvā gāmaḍāsīhi chaḍḍitāni bhattasitthapūvakhajjamacchamaṃsādīni pariyesitvāvā tāni alabhivā dārakevā gilānevā pīletvāvā sakkontā pana aññepi manusse tāsetvā pīletvāvā jīvitāṃ kappentīti. Tesāṃ vinipātikāsuraṇaṃ. Ekaccānanti adhippāyo. Na hi sabbe vinipātikā surānaṃ ahetu kāevāti sakkā vuttaṃ. Dvihetukatihetukānaṃpi sabbhāvato. Evaṃca katvā tesāṃ ekaccānaṃ piyaṅkaramātā uttaramātā dhammaguttā phussamittādīnaṃ dhammābhisamayopi aṭṭhakathāsu vuttoti. Ekacce yakkhajātikāpi rakkhasajātikāpi vemānikapetāpi paradattupajīvi petāpi ettha saṅgahitāti daṭṭhabbā.

Tesūti yathāvuttapaṭisaṇḍhi yuttasu puggalesu. Yasmā āyuparicchedonāma ekabhūmipariyaṇannānaṃ sabbasattānaṃ asesasā dhāraṇaniyamaparimāṇavasena pavatto. Apāyānaṃ manussānaṃ bhumma devānaṃca tādiso niyamaparimāṇonāma natthi. Na hi sakalacakka vālapariyaṇannā ekabhūmakā sabbanirayā ekaāyuparicchedā honti. Tiracchānādīsipi esevanayo. Tasmā vuttaṃ **catunnaṃ apāyānaṃ** anti. Catunnaṃ apāyānaṃ apāyikapuggalānaṃ āyuppamaṇa gaṇanāya niyamo natthi, tattha yebhuyyena kammaṇaṇattā. Tattha nirayesu abbudādīnaṃ dasannaṃ nirayānaṃ bhagavatā vutto āyuparicchedopi tattha tattha nibbattakena kammenevasiddhoti vedītabbo.

Manussānaṃ idaṃ jambudīpagāsīnaṃ vasena vuttanti vadanti. Te saññeva hi āyukappassa ārohaṇaṃ orohaṇaṃca atthi. Na itaradīpavāsīnaṃ. Tesu hi uttarakuruvāsīnaṃ niyamato vassa sahasaṃ hoti. Itaresāṃ dvinnaṃ pañcavassa satānītica vadanti. Evaṃ sante tesu dīpesu ādikappikānaṃpi soeva paricchedoti āpajjati. Jambudīpavāsīnaṃ pana samavisamācāranisaṇḍabhūtā candasūriyanakkhattādīnaṃ visamasamagatimūlikāutuāhārānaṃ sampattī vipattīyo tesāṃpi sādharāṇāeva honti. Tasmā tesupi āyuparicchedānaṃ ārohaṇaṃ orohaṇaṃca natthīti navattabbaṃ. Nisandaṃmattattā jambudīpagatīyā ekagatikā nahontīti pana vattabbaṃ. Tathā hi pāḷiyaṃ uttarakurukā manussā amamā apariggahā. Niyatāyukā avasesāyūnāti vuttaṃ. Tattha avasesāyūnāti asaṅkhyeyyato orohitvā niccalaṃ ṭhitena vassasahassenāti atthoti.

Vinipātikāsuraṇanti idaṃ nidassanamattaṃ daṭṭhabbaṃ. Sabbesaṃpi mahesakkhānaṃ appesakkhānaṃca bhummaḍevānaṃ vemānikapetādīnaṃca idha adhippetattā. Tesāṃhi sabbesaṃpi kammameva paṇāṇanti. **Cātumahārājikānaṃpanadevānaṃ** idaṃ uparime cātumahārājike sandhāya vuttaṃ. **Dibbānīti** tasmīṃ devaloke siddhāni. **Pañca vassasatānīti** idaṃca yebhuyyavasena vuttanti gahetabbaṃ. Yasmā pana kassapabuddhassa sāvakabhūtā sotāpannadeva puttā ākāsaṭṭhaka vimānesu nibbattā yāva nimirājakālāpi tiṭṭhantīti jātakatṭhakaṭṭhāyaṃ vuttā. Tasmā kesaṅci ākāsaṭṭhakaḍevānaṃpi kammaṇaṇattā siddhā hotīti vedītabbaṃ. Na cettha punappunaṃ nibbatti cintetabbā. Na hi sotā paṇānaṃ sattakkhattuto paraṃ kāmaḍbhava paṭisaṇḍhināma atthi. Na ca tasmīṃ devaloke

sahassakkhattuṃ nibbattamānāpi tattakaṃ kālaṃ sampāpuṇituṃ sakkontīti. **Manussagaṇanāyāti** manussānaṃ vassagaṇanāya. Manussaloke hi paññāsavassāni cātumahārājike eko dibbarattidivo hoti. Timsarattidivā eko dibbamāso. Dvādasamāsā ekaṃ dibbavassaṃ. Tena dibbavassena tesam pañcavassasatāni manussagaṇanāya navutivassasatasahassaṃ hotīti. **Tatoti** cātumahārājikānaṃ devānaṃ āyuppanāto. **Catugūṇanti** āyuppanāssa diguṇavuddhiyāceva dibbassa rattidivassa diguṇavuddhiyāca vasena catūhi bhāgehi guṇitaṃ vaḍḍhitanti attho. Esanayo sesesupi. Tattha āyuppanāssa diguṇavuddhināma heṭṭhimānaṃ devānaṃ āyuppanāto uparimānaṃ devānaṃ āyuppanāssa diguṇavuddhi. Etena tāvatimsānaṃ dibbaṃ ekaṃ vassasahassaṃ. Yāmaṇaṃ dvevassasahassāni. Tusitānaṃ cattāri, nimmānaratiṇaṃ aṭṭha. Vasavattiṇaṃ dibbāni soḷasavassa sahasāni āyuppanānaṃ hotīti siddhaṃ hoti.

Dibbassa rattidivassa diguṇavuddhināma heṭṭhimānaṃ devānaṃ rattidivato uparimānaṃ rattidivassa diguṇavuddhi. Etena manussaloke ekaṃ vassasataṃ tāvatimsa eko dibbarattidivo. Dvevassasatāni yāme. Cattāri tusite. Aṭṭha nimmānaratiyaṃ. Sahassaṃ cha cavassasatāni vasavattiyaṃ eko dibbarattidivoti siddhaṃ hoti. Rattidivānañca diguṇavuddhiyā siddhāya māsaṃvaccharānaṃpi diguṇavuddhi siddhāva hotīti. Evañcasati yathāvuttāni tāvatimsādīnaṃ dibbavassasahassādīnīpi attano attano rattidivamāsasaṃvaccharetieva vedītabbānīti siddhaṃ hoti. Tathāca sati uparimānaṃ āyuparimānāni heṭṭhimānaṃ āyuparimānato catugūṇanti siddhaṃ hoti. Tena vuttaṃ. **Tato catugūṇaṃ tāvatimsānaṃ. Tato catugūṇaṃ yāmaṇanti**ādi. Dibbagaṇanāya ca tathā siddhāya sati manussagaṇanāyapi catugūṇabhāvo siddhoyeva hoti. Tasmā manussagaṇanāyapi heṭṭhimānaṃ navutivassasatasahassādīni catūhi uparūpariguṇitāni uparimānaṃ tikoṭisaṭṭhivassasata sahasādīni bhavanti katvā tāni sabbānīpi ādiantadassana vasena niddisanto **navasatanti** gāthamāha. Vassānaṃ navasataṃ koṭiyo ca ekavīsa koṭiyo ca tathāsaṭṭhivassa satasahassāni ca vasavattisu devesu āyuppanānaṃ hotīti yojanā.

Yasmā avitakkavicāramattaṃ jhānaṃ oḷārikassa vitakkassa samatikkamā pathamajjhānato suṭṭhubalavaṃ hoti. Tatoyeva tatīyajjhānatopi nātidubbalañca hoti. Tasmā taṃ tatīyajjhānena ekato hutvā samatale bhūmantare vipākaṃ detīti vuttaṃ **duṭṭīyajjhānavipākaṃ tatiyajjhānavipākañca duṭṭīyajjhānabhūmiyanti**. Tenevaca bhūmīnaṃ ṭhitikkamopi catutthajjhāna vaseneva siddho. Therena pana heṭṭhā pañcakanayavaseneva jhānāni vuttāni. Tasmā idhapi teneva nayena vipākāni gahetvā **catutthajjhānavipākaṃ tatiyajjhānabhūmiyanti**ādi vuttaṃ. **Tesūti** tāhi chahi paṭisandhīti gahitapaṭisandhikesu. **Kappassāti** idaṃ asaṅkhyeyyakappaṃ sandhāya vuttaṃ. Catubbidhā hi kappāmahākappo asaṅkhyeyyakappo antarakappo āyukappoti, tattha āyukapponāma tesam tesam sattānaṃ taṃtaṃ āyuparicchedo vuccati. Antarakapponāma ekassavivaṭṭaṭṭhāyiasaṅkhyeyyassa abbhantare manussānaṃ āyukappassa hāyanaṃvaḍḍhanavasena dissamānantarā catusaṭṭhipabhedā cūlakappā vuccanti. Pīsatibhedāti keci. Asītibhedāti apare. Cuddasappa bhedāti vedavidu. Ye loke manvantarakappāti vuccanti. Ekamekena manunāmakena mahāsammatarājena upalakkhitā antarakappāti vuttaṃ hoti. Keci pana ekasmiṃ vivaṭṭaṭṭhāyimihi mahāsammatarā jānaṃ ekameva icchanti. Catusaṭṭhiantarakappā pana eko asaṅkhye kapponāma. So catubbidho saṃvaṭṭo saṃvaṭṭaṭṭhāyī vivaṭṭo vivaṭṭaṭṭhāyīti. Tattha vinassamāno kappo saṃvaṭṭo. Yathā vinaṭṭhaṃ tiṭṭhamāno kappo saṃvaṭṭaṭṭhāyī. Vaḍḍhamāno kappo vivaṭṭo. Yathā vivaṭṭhaṃ tiṭṭhamāno kappo vivaṭṭaṭṭhāyīti vedītabbo. Te pana cattāro asaṅkhyeyyakappā eko mahākapponāma. Etthaca yo janāyāmaṃvittāre setasāsaparāsīmihi vassasata vassasataccayena ekekabījahaṇaṇena parikkhīnepi eko mahākappo parikkhayaṃ nagacchati. Evaṃ digho mahākappoti vedītabbo.

Tattha yadā kappo tejena saṃvaṭṭati. Ābhassarato heṭṭhā agginā dayhati. Yadā āpena saṃvaṭṭati. Subhākiṇṇato heṭṭhā udakena vilīyati. Yadā vāyunā saṃvaṭṭati. Vehapphalato heṭṭhā vātena vidhamsatīti evaṃ aṭṭhakathāyaṃ vuttattā ayaṃ loko nirantaraṃ sattasu vāresu agginā vinassati. Aṭṭhame vāre udakena vinassati. Puna sattasu agginā. Aṭṭhame udakenāti evaṃ aṭṭhannaṃ aṭṭhakānaṃ vasena catusaṭṭhivāresu antime udakavāre udakaṃ pahāya vātavāro hotīti ayamatto siddho hoti. Kathaṃ. Yaṃ vuttaṃ **ābhassarānaṃ aṭṭhakappānīti**. Etena aṭṭhame vāre āposamvaṭṭo hoti. Antarā

sattasu sattasu vāresu tejosamvaṭṭā hontīti siddham. Yañca vuttam **subhākiṇṇanam** **catusaṭṭhikappānīti**. Etena catusaṭṭhime catusaṭṭhime vāre vātasamvaṭṭohoti. Antarā tesatṭhiyā vāresu tejosamvaṭṭā āposamvaṭṭāca hontīti siddham hotīti. Tenāhu porāṇā –

Agginā bhassarā heṭṭhā, āpena subhākiṇṇato;
Vehapphalato vātena, evaṃ loko vinassati.

Sattasattagginā vārā, aṭṭhame aṭṭhame dakā;
Catusaṭṭhi yadā puṇṇā, eko vāyuvāro siyāti.

Evañca vinaṭṭhe loka ekasmiṃ kappepi pathamajjhānabhūmi avinaṭṭhānāma natthi. Tasmā **brahmapārisajjānamdevānam kappassatatiyo bhāgo āyuppamānam,** **brahmapurohitānamupaḍḍhakappo, mahā brahmānamekokappoti** ettha asaṅkhyeyya kappova sambhavati. Namahākappo. Tena vuttam kappassāti idaṃ asaṅkhyeyyakappam sandhāya vuttanti. Āyukappam sandhāya vuttanti yujjatiyeva. Tejosamvaṭṭakappesu hi pathamajjhānataḷam vivaṭṭamānam sabbapathamam vivaṭṭati. Samvaṭṭamānam sabbapacchā samvaṭṭati. Tasmā vivaṭṭassa pacchimaḍḍhena samvaṭṭassaca pubbaḍḍhena saha ekaṃ vivaṭṭaṭṭhāyikappam gahetvā dve asaṅkhyeyyāni tasmīṃ tale eko āyukappoti sakkā vuttanti. Dutīya talato paṭṭhāya pana mahākappova gahetabbo. Appakam ūnakamvā adhikamvā gaṇanūpagam na hotīti katvā upaḍḍhehi saha sattakappāni sandhāya ābhassarānam aṭṭhakappānīti vuttam. Evaṃ catusaṭṭhikappānīti etthapīti. Ākāsānañcāyatanabhavaṃ upagacchantīti **ākāsānañcāyanupagā**, tesam. Ekova visayo ārammaṇam yassa taṃ ekavisayaṃ. **Ekajātiyanti** ekasmiṃ bhave. [Paṭisandhicatukkaṃ.]

145. Janetīti janakam upatthambhetīti upatthambhakaṃ. Upapīletīti upapīlakaṃ. Upaghātetīti upaghātakaṃ. Tattha **janakam nāma** paṭisandhipavattīsu vipākakkhandha kaṭattārūpanam nibbattikā kusalākusalacetanā. Tattha paṭisandhiniḥattikā kammaṭṭhāpattāva daṭṭhabbā. Pavattinibbattikā pana kammaṭṭhāpattāpi apattāpi antamaso pañcadvārikajavanacetanāpi supinante kusalākusalacetanāpīti. **Upatthambhakam nāma** vipaccitum aladdhokāsāvā vipakkavipākā vā sabbāpi kusalākusalacetanā. Sā hi janakabhūtāpi samānā attanovipākavārato purevā pacchāvā sabhāṅgam kammanta raṃvākammanibbattakkhandhasantānamvā upatthambhamānā pavattati. Yathā ganthārabbhe ratanattayapaṇāmacetanāti. Yaṃ pana visuddhimagge upatthambhakaṃ pana vipākam janetum nasakkotīti vuttam. Taṃ aladdhavipākavāram sandhāya vuttanti gahetabbaṃ. Na hi paccayasāmaggiyaṃ sati kiñcikammaṃ pavattivipākamattassapi ajanakam nāma atthīti. Tattha kammantarassa upatthambhanam nāma aladdhokāsassa aññassa janakakammaṃ okāsakaraṇam. Taṃ pana maraṇāsannakāle pakaṭam. Tadā hi kusale javite aññam paṭisandhijanakaṃ kusalakammaṃ okāsam labhati. Akusale javite aññam akusalakammanti. Vuttañhetam itī vuttake –

Imasmiṃ cāyaṃ samaye, kālaṅkariyātha puggalo;
Saggamhi upapajjeyya, cittañhissa pasāditaṃ.

Imasmiṃ cāyaṃ samaye, kālaṅkariyātha puggalo;
Niraye upapajjeyya, cittañhissa padūsitanti.

Pavattikālepi etaṃ bahulaṃ labbhatiyeva. Kammanibbattakkhandhasantānassa upatthambhanam nāma aññena laddhokāsena kusalakammenavā akusalakammenavā nibbattassa khandhasantānassa jīvitantarāye apanetvā jīvitaparikkhāre samudānetvā ciratara pavattikaraṇam. Yathāha –

Abhivādanasīlissa, niccaṃ vuddhāpacāyino;
Cattāro dhammā vaḍḍhanti, āyu vaṇṇo sukham balanti.

Ettha pana kusalaṃpi akusalakammanibbattassa khandhasantānassa akusalampi kusalakammanibbattassa upatthambhakaṃnāma natthīti navattabbaṃ. Akusala kamma nibbattassapi hi mahiddhikānaṃ nāgasupaṇṇādīnaṃ khandhasantānassa pavattikāle pubbakataṃ kusalaṃ vuttanayena upabrūhanaṃ karotiyeva. Tathākusalakammanibbattassapi kesañci vinipātikāsuraḍḍīnaṃ khandhasantānassa pavattikāle pubbakataṃ akusalaṃ ciratarappavattiṃ karotiyevāti.

Upapīlakaupaghātakānīpi vuttappakārā kusalākusala cetanāyoeva. Tāpi hi janakabhūtāpi samānā attano vipākavārato purevā pacchā vā vipākavāra gahaṇa kālepi vā kammantaraṃvā kammanibbatta khandhasantānaṃvā dubbalataraṃ katvāvā vibādhayamānā sabbasovā upacchindamānā pavattantīti. Tattha upapīlake tāva kammantarassa vibādhanamānā aññassa janakakammasa dubbalabhāvakaṇaṃ. Kammanīhi nāma āyūhanakāle balavantampi pacchā katena ujupaṭipakkhena kammantarena vibādhiyamānaṃ puna vihatasāmatthiyaṃ hoti. Uparibhūmi nibbattakaṃpi samānaṃ heṭṭhābhūmiyaṃ nibbatteti. Mahesakkesu mahiddhikesu nibbattakaṃpi samānaṃ appesakkesu nibbatteti. Tathā uccakulesu nibbattakaṃpi nīcakulesu. Dīghāyukesu nibbattakaṃpi appāyukesu. Mahābhogesu nibbattakaṃpi appabhogesu. Purisatta bhāvanibbattakaṃpi samānaṃ itthattabhāvaṃvā napuṃsakabhāvaṃ vā nibbatteti. Vaṇṇasampattinibbattakaṃpi dubbaṇṇabhāvaṃ. Indriyasampattinibbattakaṃpi andhaṃvā badhiraṃvā yaṃkiñci indriyavekallaṃ. Aṅgapaccaṅga sampattijanakaṃpi hatthapādādi aṅgavekallaṃ janeti. Tathā āyūhanakāle mahānirayesu nibbattakaṃpi akusalaṃ pacchākatena balavakusalena vibādhiyamānaṃ ussadesuvā petesuvā nibbatteti. Ajātasattu rājā cettha nidassanaṃ. Ussadesu nibbattakaṃpi petesuvā tīracchā nesuvāti ādisabbaṃ vattabbaṃ.

Upatthambhakaṃpi tabbipariyāyena vedītabbameva. Tathā hi kammaṃ nāma katakāledubbalaṃpisamānaṃ pacchāsabhāgenabalavatākusalena vā akusalena vā upatthambhīyamānaṃ suṭṭhu balavaṃ hotīti. Kammanibbatta khandhasantānassa vibādhanamānā aññena kammena nibbattassa sattassa gahitapaṭisandhito paṭṭhāya yadākadāci sarīre nānāantarāye uppādetvāvā ṭhānantarakhettavattu gomahīṃsa dhana dhaññabhoga sampattīnaṃ puttadārañāti mittānañca vipattiṃ katvāvā dukkhuppatti karaṇaṃ. Duvidhañhi kammaphalaṃnāma vipākaphalaṃ nisandaphalanti. Tattha vipākaphalaṃnāma kammakārasseva hoti. Na aññassa. Nisanda phalaṃ pana aññesampi sādharmaṇameva. Dhammapade ānandaseṭṭhivattu ettha vattabbaṃ. Cakkhādīsu pana kammajasantathīsīsesu yena kammena yaṃkiñci ekaṃvā dvevā tīṇivā sabbaso bhijjanti. Cakkhupālatthe rādīnaṃ viya. Taṃ kammaṃ upaghātake saṅgahitanti yuttaṃ. Upaghā takanti pana upacchedakantīca atthato ekaṃ. Tathā hi majjhimaṭṭha kathāyaṃ pathamaṃ upacchedakanāmena vatvā upaghātakantīpi etasseva nāmantī vuttaṃ. Aṅguttaraṭṭhakathāyaṃ pathamaṃ upaghātakanāmena vatvā upacchedakantīpi tassevetam nāmantī vuttaṃ. Visuddhi maggepi maraṇassatiniddese tadeva kammupacchedakakammantī vuttaṃ. Idhaca parato upacchedakakammunāti vakkhati.

Imassapi kammantarupacchedanaṃ maraṇāsanna kāle pākātaṃ. Tadāhi pathamaṃ pāpakammabalena duggatinimitte upaṭṭhahante puna kalyāṇa kammaṃ taṃ paṭibāhitvā sugatinimittaṃ dassetvā sagge nibbatteti. Kalyāṇakammabalena sugatinimitte upaṭṭhahante puna pāpakammaṃ taṃ paṭibāhitvā duggatinimittaṃ dassetvā apāye nibbatteti. Duṭṭha gāmaṇirañño soṇattherapitūca vatthūni kathetabbāni. Aṅguttaraṭṭhakathāyaṃ pana kusalākusalakammakkhaya karassa maggakammassapi kammantarupacchedakahā vuttā. Aṅgulimālattherādīnaṃ viyāti. Imasmiṃ bhava laddhāni mahaggatakammāni yena akusalena parihāyanti. Tassapi kammantarupacchedake saṅgaho yutto. Devadattassa viyāti. Kammanibbattakhandhasantānupacchedanaṃ pana tasmīṃ tasmīṃ bhava āyu kammesu vijjamaṇesu laddhokāsassa kassaci aparādhakammassa balena kalalakālato paṭṭhāya antarāva kenacirogenavā bhayenavā upakkamenavā marantānaṃ vasena vedītabbaṃ.

Etthaca kammantarassavā kammanibbattakhandhasantānassavā upatthambhanā dīni sandhāya imesaṃ catunnaṃpi kammānaṃ kusalākusalabhāvo visuddhimagge aṅguttaraṭṭhakathāyañca vutto. Majjhimaṭṭhakathāyaṃ pana saṃvaṇṇetabbasuttānurūpaṃ kammanibbattakhandhasantānasseva upatthambhanādīni sandhāya upatthambhakaṃ kusalabhāvo upapīlakaupaghātakānaṃ akusalabhāvo vutto. So pana majjhimaṭṭhikāyaṃ aṅguttaraṭṭhikāyañca aruccamāno viya vutto. Mahāṭṭhikāyaṃ pana so keci

vādopi kato. Tatthapana samvaṇṇetabbasuttānurūpaṃ vuttattā visuṃ pāḷinayoti daṭṭhabbo. Na ca kecivādo kattabbo. Suttasmiṃhi appāyukasamvattanikāesā māṇavapaṭipadā, yadidaṃ pāṇātipātī hotītiādinā upaghātakam pāṇātipātavaseneva vuttaṃ. Upapīḷakañca batvābādhasamvattanikā esā māṇava paṭipadā, yadidaṃ sattānaṃ viheṭṭhakajātiko hotītiādinā vihiṃsādīnaṃ vasena vuttaṃ. Upatthambhakañca dīghāyukasamvattanikā esā māṇava paṭipadā. Yadidaṃ pāṇātipātāṃ pahāya pāṇātipātā paṭivirato hotītiādinā pāṇātipātaviratiādināṃ vasena vuttaṃ. Sabbañcetam manussattam āgatasseva sattassa vasenāti evaṃ visuṃ pāḷinayo veditabboti. Mahāṭīkāyaṃ pana ānguttaraṭīkāyañca kammantarupatthambhanādīni anicchantehi janakādibhāvonaṃ vipākaṃ paṭīcchitabbo. Nakammanti vipākasseva upaghātakatā yuttā viya dissatīti vuttaṃ.

Kiccavasenāti jananam upatthambhanam upapīlanam upacchindananti catunnam kiccānam vasena. Tattha ekā pāṇātipātacetanā cattāri kiccāni sādheti. Sā hi yāva vipaccitum okāsam nalabhati. Tāva upatthambhanādīsu tīsu kicesu yaṃkiñci laddhapaccayaṃ kiccaṃ karoti. Yadā vipaccitum okāsam labhati. Tadā ekāya cetanāya ekāeva paṭisandhi hotīti evaṃ sāketapañhe vuttanayena ekaṃ apāyabhavaṃ janeti. Tato paraṃ pana paṭisandhijananakiccaṃ natthi. Pavatti vipākajananena saha itarāni tīni kiccāni bhavasatasahassepī kappasatasahassepī sādhetiyeva. Dhammadinnāyanāma uggasena rañño deviyā vatthu ettha vattabbaṃ. Sā pana yadā attano vipākavārato pure ariyabhūtasavā puthujjanabhūtasavāpi kalyāṇa cittasamaṅginovā upacchedanaṃ karoti. Tadā upacchinditvā kammanta rasseva okāsam karoti. Sayam vipākaṃ najaneti. Yadā pana pāpacittasamaṅgino khandhasantānaṃ upacchindati. Tadāeva upacchinditvā attano vipākaṃ janeti. Sakiṃ laddhapāṭisandhivārato pana paṭṭhāya anekesu attabhāva satasahassepī upacchedanādīniyeva karoti. Ettha mahāmoggalāna tthera vatthu sāmāvati vatthu vaggumudātīriyabhikkhu vatthu dussimāra kalāburājavatthūni kathetabbāni. Yasmā pana idaṃ upacchedakakammaṃ nāma tiracchānagatānaṃ bahulaṃ labbhati. Tasmā suṭṭhu balavaṃ akusalakammaṃ dubbalassa akusalakammassavā akusalakammanibbattakhandhasantānassavā upacchedakamṇāma na hotīti na vattabbaṃ. Teneva hi majjhimaṭṭhakathāyaṃ bahukasmiñhi akusalakamme āyūhite balavakammaṃ dubbala kammaṃ vipākaṃ paṭibāhitvā attano vipākassa okāsam karotīti vuttaṃ.

Apica pavattiyampi kammantarajanitaṃ bhavaṅgasantānaṃ anupacchinditvā pañcasu cakkhu sota ghāna jivhā bhāva dasaka saṅkhātesu santatī sīsesu aññatarassa santatisīsassa sabbaso upacchindanampi imasseva kiccanti vuttaṃ. Yaṃ pana mahāṭīkāyaṃ ānguttaraṭīkāyañca upapīlikaṃ aññassa vipākaṃ chindati. Na sayam attano vipākaṃ janetīti vuttaṃ. Taṃ aṭṭhakathāyaṃ sukhadukkhaṃ pīleti, addhānaṃ pavattitum na detīti idaṃ disvā vuttaṃ siyā. Addhānaṃ pavattitum nadetīti ettha pana sukhasantānaṃvā dukkhasantānaṃvā cirakālam pavattitum nadeti iccevattho. Na pana upaghātakam viya bhavaṅgasantānena saha aññassa kammaṃ vipākaṃ chindatīti.

[143] Yaṃpana vibhāvaniyam

“Janakaṃ kammantarassa vipākaṃ anupacchinditvāva vipākaṃ janeti. Upaghātakam upacchedanapubbakanti idaṃ tāva aṭṭhakathāsu sanniṭṭhānanti vuttaṃ”. Taṃ na sundaraṃ.

Idha pubbakatena upacchedanakakammena maritvā sagge nibbattānaṃ vatthūnaṃ aṭṭhakathāsuyeva āgatattāti.

[144] Yañca tattha

Apare pana ācariyā vadantītiādinā upaghātakassa sayam vipākanibbattakattā bhāvavacanaṃ vuttaṃ. Taṃpi na sundaraṃ.

Teneva kammaṃ apāye nibbattānaṃ dussimāra kalāburājā dīnaṃ tassa kammaṃ upacchedakakammabhāvena aṭṭhakathāsu āgatattāti. [Janakacattukkaṃ]

146. Garukanti aññena kammena paṭibāhituṃ asakkuṇeyyaṃ kusalapakkhe mahaggatakammaṃ akusalapakkhe niyatamicchādiṭṭhiyā saha pañcānantariyakammaṃ. Ettha siyā. Mahaggatakammanti kasmā vuttaṃ. Tañhi pamādavasena nīvaraṇadhammapavattiyāvā parihāyiyamānaṃ nikantibalenavā paṭibāhiyamānaṃ vipākaṃ na detīti. Tathā ekassa bahūsu ānantariyakammesu katesu ekasmiṃ vipaccante sesāni na vipaccantīti. Vuccate, mahaggatakammaṃ tāvathapetvā pamādadhammanīvaraṇadhammanikantidhamme attano balavataarañca mahaggatakammantaraṃ aññena puññakammena appaṭibāhaniyaṭṭhena garukaṃ nāma hoti. Ānantariyakammāni pana thapetvā attano balavataaraṃ ānantariyakammaṃ aññena kenaci dhammena appaṭibāhaniyaṭṭhenāti evaṃ yathārahaṃ tesam garukatā veditabbāti. **Āsannanti** maraṇakāle anussaritaṃ tadā katañca. Tattha tadākatanti antima javanavīthito pubbhāge āsanne kataṃ yaṃkiñci kusalākusalakammaṃ. Micchādiṭṭhikammaṃ pana vipassanādivasena pavattaṃ sammādiṭṭhikammañca antimajavanavīsiyaṃpi katanti gahetabbaṃ. Yathāha-maraṇakāle vāssa hoti micchādiṭṭhi sammādiṭṭhi samattā samādinnaṭi. Etena tato micchādiṭṭhikammato aññaṃ antimajavanavīthiyaṃ pavattaṃ kammaṃ paṭisandhiṃ janetuṃ na sakkotīti siddhaṃ hotīti. **Āciṇṇanti** dīgharattaṃ abhiñhaso kataṃ. Sakkiṃ karitvāpivā pacchā punappunaṃ somanassajanaṃ santāpajanakañca. **Kaṭattākammanti** kāriyitthāti kammanti evaṃ katakāraṇāeva kammanti vattabbaṃ kammaṃ. Garukādi bhāvena vattabbaṃ kammaṃ na hotīti attho. Tattha purimāni tīṇi imasmiṃ bhava katāni upapajjavedanīyakammānieva. Kaṭattākammaṃ pana atītabhavesu katehi aparapariyāyavedanīyehi saha imasmiṃ bhava kataṃ garukā sannāciṇṇabhāvarahitaṃ kamma pathapattaṃ yaṃkiñci upapajjavedanīyakammaṃ. Mahāṭīkāyaṃ pana kaṭattākammaṃ purima jāṭisu kataṃeva gahitaṃ. Taṃ aṭṭhakathāya na sameti. Etehi pana tīhi muttaṃ punappunaṃ laddhāsevanaṃ kaṭattāvā pana kammaṃnāma hotīti hi vuttaṃ. Na ca atītabhavesu katāni mātughātakādīnīpi aparapariyāya kammāni etehi tīhi muttānītivā amuttānītivā punappunaṃ laddhāsevanānītivā aladdhāsevanānītivā sakkā visesetuṃ. Tadā hi tāni garuka kamma santāne pavattānīpi honti. Āsannavaciṇṇakammasantāne pavattānīpi.

Āṅguttaraṭṭhakathāyañca etehi pana tīhi muttaṃ aññāṇavasena kataṃ kaṭattāvā pana kammaṃnāmāti vuttaṃ. Na tāni aññāṇavasena kabhānīti sakkā visesetuṃ. Tāni hi purimabhavesu aññāṇa vasena katānīpi honti. Ñāṇavasena katānīpi. Tāni pana visesanāni imasmiṃ bhava katānaṃ garukādīhi tīhi muttānaṃ sattamajavana kammānaṃ vasena vuttānīti tehi saha purimajāṭisu katāni aparapariyāya kammāni kaṭattā kammaṃnāmāti veditabbāni. Evañca katvā yatha taṃpubbakataṃ kammanti āgataṃ. Tatthapi imasmiṃ bhavēvā atītabhavesuvā pubbakāle katanti attho veditabboti. Imesu pana catūsu kammesu vijjamānesu garukameva anantare bhava paṭisandhiṃ deti. Garuke asati āsannaṃ. Āsanne asati āciṇṇaṃ. Āciṇṇe asati kaṭattākammaṃ. Tenāha **pākadānapariyāyenāti**. Pākadānavārenāti attho. Ettha siyā. Kasmā idha āsannaṃ āciṇṇato pathamaṃ vuttaṃ. Nanu pāliyaṃ āsannato āciṇṇameva pathamaṃ vuttaṃ. Yathāha-yaṃ garukaṃ yaṃ bahulaṃ. Yadāsannaṃ. Kaṭattāvā pana kammanti. Aṭṭhakathāsuca teneva kamena pākadānavāro vihīti. Vuccate, sabhāvato balavadubbalaṃ kamena pāliyaṃ āciṇṇaṃ pathamaṃ vuttaṃ. So pana kamo kadāci pākadānapariyāyopi sambhavatīti katvā aṭṭhakathāsu teneva kamena pākadānavāro vihīti. Āsannaṃpi hisamānaṃ cittaṃ tosetuṃvā santāpetuṃvā asakkontaṃ hutvā dubbalaṃ balavato āciṇṇassa nivattakaṃ na hotīti. Yasmā pana mahākammavibhaṅgasutte pubbevāssataṃ kataṃ hoti kalyāṇakammaṃ sukhavedanīyaṃ. Pacchāvāssataṃ kataṃ hoti kalyāṇakammaṃ sukhavedanīyaṃ. Maraṇakālevāssa hoti sammādiṭṭhi samattā samādinnaṭi evaṃ āciṇṇaduccaritassapi ekaccassa āsannaṃ kalyāṇa kammena saggagamaṃ vuttaṃ. Tathā pubbevāssataṃ kataṃ hoti pāpakammaṃ dukkhavedanīyaṃ. La. Micchādiṭṭhi samattā samādinnaṭi evaṃ āciṇṇa sucaritassapi ekaccassa āsannaṃ pāpakammaṃ apāyagamaṃ vuttaṃ. Yasmā ubhinnaṃpi balavabhāve sati āsannaṃ eva pariyaṭṭaṃ bhavituṃ arahati. Tasmā idha therena āsannaṃ eva pathamaṃ vuttanti daṭṭhabbaṃ. Etthaca pubbevāssakataṃ hotīti idaṃ āsannaṃ ussaritakammavasena vuttanti veditabbaṃ. Tambadāṭṭhikanāmassa coraghātakassa mahāvātakālanāmassa upāsakassa vatthu ettha kathetabbanti.

[145] Vibhāvanīyaṃ pana

Aṭṭhakathāyaṃ āgataṃ jaraggavopamaṃ dassetvā āsannaeva pathamaṃ vipākaṃ detīti ekamaṣena vuttaṃ. Taṃ na sundaraṃ.

Na hi aṭṭhakathāyaṃ evaṃ ekamaṣena vuttaṃ. Naca utṭhātumpi asakkonto so jaraggavo pajadvārassa āsanne ṭhitopi pathamataraṃ nikkhamissatīti. [Garukacatukkaṃ]

147. Diṭṭhadhammo vuccati paccakkhabhūto paccuppanno attabhāvo. Veditabbaṃ anu bhavitabbanti vedanīyaṃ. Phalaṃ. Diṭṭhadhamme vedanīyaṃ phalaṃ etassāti **diṭṭhadhammavedanīyaṃ.**

[146] **Vibhāvaniyaṃ** pana

“Diṭṭhadhamme veditabbaṃ vipākānubhavana vasenāti diṭṭhadhammavedanīya”nti vuttaṃ. Taṃ na sundaraṃ.

Diṭṭheva dhamme vipākaṃ paṭisaṃvedetīti hi pāliyaṃ vuttaṃ. Ettha hi vipākaṃ paṭisaṃvedetīti etena idha vedanīyasaddo kammaśādhano vipākātidheyyoca hotīti dasseti. Evañca sati idha aññapadatthasamāso eva labbhati. Na uttarapadatthasamāso. Diṭṭhadhammaṃ upecca tassa anantare pajjivā pāpūnitvā veditabbaṃ phalaṃ etassāti **upapajjavedanīyaṃ.** Teneva hi aṭṭhakathāyaṃ upapajja saddassa atthaṃ vadantena upapajjivāti vuttaṃ. Suttapadesu pana upapajjevāti pāṭho diṭṭho. Tasmā diṭṭhadhammassa samīpe anantare pajjitabbo gantabboti upapajjo. Dutīyo attabhāvo upapajjeveditabbaṃ phalaṃ etassāti upapajjavedanīyanti evamattho pāṭhassa vasena veditabbo. Upapajjātivā anantare bhava pavatto eko nipāto. Yathā paccāti.

[147] **Vibhāvaniyaṃ** pana

“Diṭṭhadhammato anantaraṃ upapajjivā veditabbanti upapajjavedanīya”nti vuttaṃ. Taṃ na sundaraṃ.

Upapajjavā vipākaṃ paṭisaṃvedetīti hi pāliyaṃ vuttaṃ. Pariyāyati punappunaṃ āgacchatīti pariyāyo. Aparoca so pariyā yocāti **aparapariyāyo.** Diṭṭhadhammā nāgatā nantara bhavehi añño atta bhāva parivatto. Te neva hi mahāṭīkāyaṃ āngutta raṭīkāyañca aparapariyāyeti diṭṭhadhammānantarānāgatato aññasmīṃ attabhāvapariyāye attabhāvaparivatteti vuttaṃ. Suttapadesu pana aparevā pariyāyeticā aparāparevā pariyāyeticā dvidhā pāṭho diṭṭho. Tattha pacchimasmiṃ pāṭhesati idha majjhe ekassa aparasaddassa lopo daṭṭhabbo. Saṅgahapoṭṭhakesu pana majjhe dīgho yākāranatṭhoca aparāpariyasaddo dissati. So bahūsu aṭṭhakathāsu natthi. Pāliyāca na sameti.

[148] Yañca **vibhāvaniyaṃ**

“Apare apare diṭṭhadhammato aññasmīṃ yatthakatthaci attabhāve veditabbaṃ kammaṃ aparāpariya vedanīya”nti vuttaṃ. Tattha diṭṭhadhammatoti idaṃ tāva nayujjati.

Na hi majjhe upapajjabhavaṃ vajjetvā pathamo diṭṭhadhammova idha tatīye pade adhikatoti yutto.

[149] Atthato pana byañjanatoca sabbāṃ pāliyā na sameti.

Aparevā pariyāye vipākaṃ paṭisaṃvedetīti hi pāliyaṃ vuttaṃ. Aparāparevā pariyāyativā. Ahośināmakāṃ kammaṃ **ahosikammaṃ.** Ahośikammaṃ. Bhavissatikammaṃ. Atthikammaṃ. Natassa vipākoti evaṃ vuttapāṭhavasena ācariyehi tathāgahitanāma dheyyaṃ sabbaso aladdhavipākavāraṃ kammanti vuttaṃ hoti. Tattha sattasu kusalākusalajavanesu pathamajavanacetanā diṭṭhadhammave

danīyaṃnāma. Sā hi aladdhāsevanatāya sabbadubbalattā aciraṭṭhi tikāca hoti appataravipākācāti. Paccayaṃ laddhā diṭṭhadhammeva ahelukamattaṃ phalaṃ datvā vigacchati. Na ekampi maraṇakālaṃ atikkamma santānaṃ anubandhituṃ sakkoti. Paccayaṃ pana alabhamānā ahosikaṃnāma hoti. Paccayotica attano phaluppattiyā okāsadāyako nānā iriyāpathesu iṭṭhāniṭṭhārammaṇasamā gamādiko yokoci paccayopi yujjatiyeva. Tikāsu pana paṭipakkhehi anabhibhūtātāyātiadinā mahantaṃ katvā paccayo vutto. So kākavaliyādīnaṃ viya pākaṭataraphaladānaṃ sandhāya vuttoti veditabbo. Na hi kamma pathajavanasantāne pavattamānā itarāpivā pathamajavanacetanā iṭṭhāniṭṭhasamāyogavasenapi laddha paccayā kāci attano balānurūpaṃ phalaṃ na detīti atthi. Nacatāya diyyamānaṃ sabbampi phalaṃ mahājanassavā kammakārasseva vāpākaṭameva siyāti sakkā vattunti. Yaṃ pana nāṇavibhaṅgaṭṭha kathāyaṃ ekaṃ diṭṭhadhammavedanīyaṃ vipākaṃ deti. Sesāni avipākānīti vuttaṃ. Taṃ aladdhapaccayāni sesāni sandhāya vuttanti gahetabbaṃ. Na hi eko diṭṭhadhammo ekasseva diṭṭhadhammavedanī yassa okāsoti sakkā viññātunti. Atthasādhikā pana sannīṭṭhāpakabhūtā satthamajavanacetanā upapajja vedanīyaṃnāma. Sā hi laddhāsevanatāya thokaṃ sārabhūtā hotīti pathamacetanā viya sīghataraṃ vipaccituṃ nasakkoti. Balavatīca hotīti ekaṃ bhavaṃ janetuṃ sakkoti. Patita java nesu pana antimajavanatāya majjhimacetanāyo viya ciraṭṭhitikā na hotīti paccayaṃ laddhā anantare eva bhava paṭisandhiṃvā pavatti phalamevavā datvā vigacchati. Aladdhā pana ahosikammameva hoti. Na dutīyaṃ maraṇakālaṃ atikkamituṃ sakkoti. Yaṃpana nāṇavibhaṅgaṭṭhakathāyaṃ ekaṃ upapajjavedanīyaṃ paṭisandhiṃ ākaḍḍhati. Sesāni avipākānīti vuttaṃ. Taṃpi paṭisandhivipākaṃ sandhāya vuttanti gahetabbaṃ. Sesānipi hi yāva dutīyacuti nāgacchati. Tāva laddhapaccayāni pavatti vipākaṃ dentiyeva. Idha missaka kammāni katvā anantarabhava missakakammaphalaṃ anubhontāni vemānika petavatthūni aññānika taṃtaṃkammaṃ katvā anantarabhava eva sugati yaṃ kabbipākabhūtaṃ vipattim anubhavantāni duggatiyaṃvā tabbipākabhūtaṃ sampattim anubhavantāni anekāni vatthusatāni ettha kathe tabbānīti.

[150] Yaṃ pana **vibhāvaniyaṃ**

“Sāca paṭisandhiṃ datvāva pavattivipākaṃ deti. Paṭisandhiyā pana adinnāya pavattivipākaṃ detīti natthī”ti vuttaṃ. Taṃ na yujjati.

Yathāvuttavattūhi saddhiṃ virujjhanato.

[151] Yañca **tattha**

“Cuti anantarañhi upapajjavedanīyassa okāso”ti kāraṇaṃ vuttaṃ. Taṃpi akāraṇaṃ.

Putianantarato paṭṭhāya yāvajīvaṃpi okāsasambhavato.

[152] Yañca **tattha**

“Paṭisandhiyā pana dinnāya jātisatepi pavattivipākaṃ detīti vuttaṃ”. Taṃpi na gahetabbaṃ.

Kammasaṅkarāpattito. Aṅguttaraṭṭhakathāyañca diṭṭhadhammavedanīyaṃ upapajjavedanīyaṃ aparapariyāya vedanīyanti tesam saṅkamaṃ natthi. Yathāṭṭhāneyeva paṭiṭṭhantīti vuttaṃ. Na cettha paṭisandhivasena evaṃ vuttanti sakkā vuttuṃ. Tadatthasādhakassa aṭṭhakathāpadesassavā vatthussavā yuttiyāvā abhāvototi. Majjhe pana pañcajavana cetanā aparapariyāya vedanīyaṃnāma. Etā hi suṭṭhu balavanti sārabhūtāca hontīti na sīghaṃ vipaccituṃ sakkonti. Ciraṭṭhitikā pana honti. Tasmā tatīyabhavato paṭṭhāya yadā okāsaṃ labhanti. Tadā pañcavāre paṭisandhiṃ datvā saṃsārapavattiyā sati kappasatasahassepī pavattivipākaṃ detīti. Imānīyeva pana tīṇi kammāni attano attano khetto sabbaso vipākavāraṃ alabhamānāni ahosikammaṃnāma. Khettañca nesam pathamassa diṭṭha dhammacutiyā paricchinnaṃ. Dutīyassa anāgatānantarabhavacutiyā. Tatīyassa parinibbānacutiyāti daṭṭhabbaṃ.

[Diṭṭhadhammacatukkaṃ]

148. Pākaṭṭhānavasenaṭi apāyādikassa vipaccanaṭṭhānassa vasena tathā cattāri kammānīnāma hontīti yojanā. **Tatthāti** tesu akusalādīsū catūsū kammesu. **Kammadvāravasenāti** kammāsiddhiyā aṅgabhūtānaṃ kāyādi kammadvārānaṃ vasena. Pāṇaṃ atipāṭenti etenāti **pāṇātipāto**. Atipātanañcetta sarasato patitūṃ adatvā antarāeva payogabalena pāṭanaṃ daṭṭhabbaṃ. Adinnaṃ ādiyanti etenāti **adinnādānaṃ**. Agamanī yavattusāṅkhātesu vatthukāmesu micchā caranti etenāti **kāmesumicchācāro**. Tattha parapāṇe pāṇasaññino tassa jīvitindriyasantānupacchedakassa kāyavacīpayogassa samuṭṭhāpikā vadhakacetanā pāṇātipātonāma. Sayameva attano jīvitindriyaṃ pāṭentassa pāṇātipātonāma natthi. Parapariggahite parapariggahitasaññino tato viyogakāraṇassa kāya vacīpayogassa samuṭṭhāpikā acchindakacetanā adinnādānaṃnāma. Agamanīyavattūsu maggenamaggapaṭipādakassa kāyapayogassa samuṭṭhāpikā assādacetanā kāmesumicchācāronāma. Keci panaetthapi agamanīya vatthusaññinoti padaṃ icchanti. Taṃ aṭṭhakathāya na sameti. Agamayānīvatthu tasmīṃ sevanacittanti hi tattha vuttaṃ. Etena agamanīyavattumhi sati gamanīya saññāyavā agamanīya saññāyavā sevantassa kammaṭṭho hoti yevāti siddhaṃ hoti. Itarathā agamanīyavattū tathā saññitā tasmīṃ sevanacittanti vuttaṃ siyāti.

Apare pana sayāṃ payogaṃ katvā attani parena karīyamānaṃ maggena maggapaṭipādanaṃ assādentassa sevanacitte satipi natthi kammappathabhedo. Payogassa abhāvāti vadanti. Sevanacitte pana sati payogo appamaṇanti eke. Evañca sati tiyaṅgikova micchācāro, na caturaṅgikoti āpajjati. Aṭṭhakathāyaṃ pana sevana payogena saha caturaṅgikova vuttoti aññe. Sevanapayogo pana yebhuyyena labbhamaṇattāyeva vutto. Na pana ekantaṅgabhāvato. Itarathā itthīnaṃ yebhuyyena payogakiccaṃ natthīti tesaṃ micchācāro dullabho siyāti ca vadanti. Bhikkhunīdūsanāṃpi ettheva saṅgayhati. Sā hi rakkhītāsu saṅgahītāti. Ṭīkāsu pana sā dhammarakkhītāpi na hoti. Kuto mātādirakkhitā. Dhammoti hi idha pāsāṇḍiyadhammova aṭṭhakathāyaṃ vuttoti vadanti. Sāsanadhammopi nana yutto. Sabrahmacāri niyopi upajjhāyīnī ādikā tassā mātādiṭṭhāniyāeva honti. Tathā hi sikkhāpadavibhaṅgaṭṭhakathāyaṃ micchācāropi dussīlāya. La. Sāmaṇeriyā, puthujjanabhikkhuniyā, sotāpannāya, sakadāgāminiyā, tato anāgāminiyā vīṭikkamo mahāsāvajjo. Khīṇāsāvāya pana ekantamahāsāvajjovāti vuttaṃ.

Kasmāpanettha surāpānaṃ nagahi taṃ. Taṃpihi apāyasaṃvattani kabhāvena vuttaṃ. Yathāha-surāmerayaṃpānaṃ bhikkhave āsevitāṃ bhāvitaṃ bahulīkataṃ nirayaṃvattanikaṃ tiracchānayanisaṃvattanikaṃ pettivisaṃvattanikaṃ. Yoca sabbalahuko surāmeraya pānassa vipāko. So manussabhūtassa ummattakasaṃvattaniko hotīti. Aṭṭhakathāsupi koṭṭhāsato pañcapi pāṇātipāṭā dayo kammaṭṭhāevāti vuttanti. Vuccate, mūlaṭṭikāyaṃ tāva tassa sabhāgattena micchācāre upakārakattena dasasupi kammaṭṭhesu anupavesoti vuttaṃ. Tattha sabhāgattaṃ gahetvā vibhāvanīyaṃ surāpānaṃpi ettheva saṅgayhatīti vadanti rasasaṅkhātesu kāmesu micchācārabhāvatoṭi vuttaṃ. Upakārakattaṃ gahetvā paṭisambhidāmaggaṭṭikāyaṃ kusalākusalāpica paṭisandhijanakāyeva kammaṭṭhāti vuttā. Vuttāvasesā paṭisandhijanane anekanti kattā kamma ṭṭhāti na vuttāti imassa vākyassa saṃvaṇṇanāyaṃ vuttāvase sātī surāpānādayo tabbiraṃāṇādayoca. Surāpānañhi madassa paccayo. Mado apuññāpathassa. Tabbiratipi nimmadatāya. Sāca puññāpathassātī kammaṭṭhūpanissayāni tāni tadāsannakammavasena sandhijanakānīpi hontīti vuttaṃ. Tattha tadāsannakammavasenaṭi tassa surāpānassavā surāpānaviratīyavā āsanne pavattānaṃ tammūlakānaṃ apuññakammānaṃvā puññakammānaṃvā vasenaṭi attho. Idaṃ vuttaṃ hoti-yo suraṃ pivitvā surāmadahetu pāṇā pātādīsū yaṃkiñci kammaṃ karoti, tassa surāpānaṃ tassati kammaṃ balavūpanissayo hoti pubbacetanāṭhāniyañca. Tadeva viṣuṃ paṭisandhiṃ janeti, na itaranti. Yathā hi pubbāparacetanā yopi kammaṭṭhāpattassa kammaṃ parivārabhūtāeva paṭisandhiṃ janenti, na itarā. Evamidampīti. Na hi kammaṭṭhasuttetu sarūpato āgatānieva paṭisandhiṃ janenti. Na itarānīti sakkā niyametūṃ. Yāni pana ekantena paṭisandhijananasāmatthīya yuttāni, tāneva tattha sarūpato vuttāni. Yānīpana paṭisandhijanane anekantikāni honti. Tāni tatthasarūpato na vuttānīti sakkā viññātūṃ. Tathā hi paṭisambhidā maggaṭṭhakathāyaṃ kusalākusalāpica paṭisandhijanakāyeva kammaṭṭhāti vuttā. Vuttāvasesā paṭisandhijanane anekanti kattā kammaṭṭhāti na vuttāti vuttaṃ. Tasmā idaṃpi paṭisandhijanane anekantikattā tattha sarūpato na vuttantīca. Yaṃ tadā sannakammavasena paṭisandhijanakanti pubbe

vuttaṃ. Taṃ tattha sarūpato vuttesu tadā sannakammesu anupaviṭṭhantica sakkā vattunti. Tassa pana duvidhaṃ kiccaṃ paṭisandhijananam kammajananañcāti. Tattha paṭijananato kammajananamevassa mahantaṃ mahāvippahārañca hotīti katvā sakkena devānamindena kumbhajātake

Yaṃ ve vivitvā duccharitaṃ caranti,
Kāyena vācāya cetasāca;
Nirayaṃ vajanti duccharitaṃ caritvā,
Tassā puññaṃ kumbhamimaṃ kiñāthāti.

Evam tadāsannakammavaseneva tassa apāyagāmitā vuttā. Tadubhayaṃ panassa kiccaṃ gahetvā surāmerayapānaṃ bhikkhave āsevitam.La. Saṃvattanikanti ānguttare vuttanti vedītabbaṃ. Ayañhisuttapadesu dhammatā. Yadiḍaṃ saṃvattanikanti vuttaṭṭhāne yathālābhayojanāti. Tathāhi mūlaṭṭikāyaṃpunabbhavaṃdetipunabbhavāya saṃvattetīti pāṭhe kammasaḥajātā punabbhavaṃdeti. Kammasaḥāyabhūtā akammasaḥajā tāpunabbhavaṃ saṃvattetīti vuttaṃ. Keci pana imamatthaṃ anupadhāretvā imāya pāḷiyā tassa visuṃ ekantakammaphathabhāvaṃ maññanti. Yaṃ pana koṭṭhāsato pañcapi kammaphathāevāti aṭṭhakathāvākyam. Tattha evasaddena tesam cetanādhammatā jhānādikoṭṭhāsikattaṃ nivatteti. Cetanā hi kammaphatham pattāpi apattāpi koṭṭhāsato kamma pathakoṭṭhāsikāeva hotīti. Teneva mūlaṭṭikāyaṃ kammaphathā evāti kammaphathakoṭṭhāsikāevāti vuttaṃ. Anuṭṭikāyañca kamma pathakoṭṭhāsikāeva. Na jhānādikoṭṭhāsikāti vuttaṃ. Keci pana imamatthaṃ asallakkhetvā iminā vākyena tassa visuṃ kammaphathabhāvaṃ vadanti.

Khuddakapāṭhaṭṭhakathāyaṃ pana sabbenasabbaṃ tassa kammaphathabhāvo paṭikkhittoyeva, tattha hi purimānaṃ catunnaṃ kāyakammādhībhāvañca kammaphathabhāvañca visuṃ vatvā surāpānaṃpatvā kāyakammamevāti vuttaṃ. Etena vacīkammabhāvañca kammaphathabhāvañca paṭikkhipatīti. Dhātusamyuttaṭṭhakathā yañca paṭikkhitto. Yathāha-tatīyaṃpañcakammavasena bujjhanakānaṃ ajjhāsaya vasena vuttaṃ. Catutthaṃ satta kammaphathavasena pañcamaṃ dasa kammaphathavasena. Tattha hi tatīye surāpānamissakattā pañcakammavasena icceva vuttaṃ. Na pañcakammaphathavasena. Etāsupica paṭisandhijanane anekanti kattāeva paṭikkhittoti na nasakkā vattuṃ evañhi sati sabbā pālīṭṭhakathāṭṭikāyo saṃsanditā hotīti. **Kāyakammanti** ettha kāyo tividho sasambhārakāyo pasādakāyo copanakāyoti. Idha kāyaviññattisañkhāto copanakāyo adhippetoti vuttaṃ **kāyaviññattisañkhātetī**. Copanakāyo hi kadāci kāyaṅgena attano adhippāyaṃ parassa viññā panatthāyapi karīyatīti kāyaviññattīti vuccatīti. So yevaca kammānaṃ pavattimukhattā dvāranti kāyadvāraṃ. Tasmīñhi tena tena upakkama kiccena pavattamāneeva jīvitindriyupacchedādīkiccāsiddhito taṃjana kassa cetanādhammassa āyūhana kiccānibbattica kāyakammaṇāma lābhoca hotīti. Tasmīñ kāyadvāre. Etthaca yasmāsabbānīpi kammāni pubbaṅgamabhūtena sampayuttamanena vinā nasijjhanti. Manopubbaṅgamā dhammā. Manosetthā manomayāti hi vuttaṃ. Dhammāti cettha sucaritaduccharitadhammā vuccanti. Tasmā manodvāraṃ sabbakammāsādhāraṇattā kammāni visesetuṃ nasakkoti. Asādhāraṇabhūtā pana kāyavacīyo eva sakonti. Yasmāca purimāni sattavidhāni kammāni kevalaṃ manomattena nasijjhanti. Taṃsamutṭhitehi pana kāya vacīpayogehi eva sijjhanti. Tasmā teeva tesam kammānaṃ pavattimukhasaṅkhyam gacchantīti vuttaṃ **kāyadvāreti**. Parato **vacīdvāreti** ca.

Yasmā pana kāyadvāre vuttito kāyakammaṇāma. Vacīdvāre vuttito vacīkammaṇānāmāti ettakamatte vutte pāṇātipātādīni tīṇi kāyakammaṇāma. Musāvādādīni cattāri vacīkammaṇānāmāti evaṃ dvārena kammānaṃ nāma vavattānaṃ asiddhaṃ siyā. Kathaṃ. Yādā hi purimāni dve āṇattivasena appakena vacīdvāre bhijjhanti. Tadā tāni kāyakammanti nāmaṃ jaheyyuṃ. Vacīkammanti saṅkhyam gaccheyyuṃ kasmā vacīdvāre vuttito vacīkammaṇānāmāti vuttattā. Dvēvā nesaṃ nāmāni bhaveyyuṃ. Ubhayadvāresupi sandissanato. Yādāpana majjhimāni cattāri hatthamutṭhādivasena appakena kāyadvāre sijjhanti. Tadā tānīpi vacīkammanti nāmaṃ jaheyyuṃ. Kāyakammanti saṅkhyam gaccheyyuṃ. Kasmā kāyadvāre vuttito kāyakammaṇānāmāti vuttattā. Dvēvā nesaṃ nāmāni bhaveyyuṃ. Ubhayadvāresupi sandissanato. Evañcasati pāṇātipāto.La. Micchācāroceti kāyakammaṇānāmāti idaṃ

vavatthānameva niratthakaṃ siyā. Tathā parato musāvādo. La. Ppalāpoceti vacīkammaṃ nāmāti. **Bāhullavuttitoti** vuttepana ekamekena bāhullasaddena chabbidhāni tāni vajjāni vajjetvā vuttappakāraṃ dvārena kammavavatthānaṃ siddhaṃ bhavati. Yathā vanacarako saṅgāmāvacaroti.

Manokammāni pana dvārantaresu carantānipi caraṇamattāni eva honti. Na dvārantarāni tesam kammāsiddhiyā aṅgaṃ honti. Tasmā tāni visuṃ katānīti veditabbaṃ. Yasmā pana kāyadvārassa kāyoti nāmaṃ anekesu suttasahasseeva sayameva siddhaṃ pākāṇa. Tathā vacīdvārassa vācāti nāmaṃ. Kusalākusala javanacittasaṅkhākaṃ manodvārassaca manoti nāmaṃ. Tasmā sabbattha kāyadvāraṃ vacīdvāraṃ manodvāranti vutte kamma dvārassa vavatthāna kiccaṃ nāma natthi. Yattha pana kāyakammadvāraṃ vacīkammadvāraṃ manokammadvāranti āgataṃ. Tattheva dvārakathādīsū kamma dvāravavatthānaṃpi visuṃ vattabbaṃ hotīti daṭṭhabbaṃ.

[153] Etena yaṃ vuttaṃ **vibhāvaniyaṃ**

“Kāyakammassa pavattimukhabhūtaṃ kāyadvāranti vuccatīti”. Taṃ paṭikkhittaṃ hoti.

[154] Yañca **tattha**

“Tathā musāvādādiṃ kāyavikārena karontassa vacīkammaṃ kāyadvārepi pavattatīti kamma dvāravavatthānaṃpi nasiyātīti” vuttaṃ. Taṃpi na yujjati.

Na hi kāyavikārena karīyamānaṃ vacīkammaṃ kāyadvāre pavattamānaṃpi tassa dvārassa nāmaṃ bhindituṃvā attano nāmaṃ dātuṃvā sakkoti. Sabhāva siddhattā tassa nāmassāti.

[155] Eteneva yañca **tattha**

Vuttaṃ “tathā kāyakammameva yebhuyena kāyadvāre pavattati. Na itarāni. Tasmā kāyakamma yebhuyena ettheva pavattanato kāyakammadvārabhāvo siddho. Brāhmaṇagāmādīnaṃ brāhmaṇagāmādi bhāvoviyātīti”. Taṃpi paṭikkhittaṃ hoti.

Na hi kāyakammadvāranti nāmaṃ idha vuttaṃ atthīti. [Kāyakammaṃ]

149. Musāti abhūtatte nipāto. Musā vadanti etenāti **musāvādo**. Visati paresaṃ aññaṃaññasammodabhāvasaṅkhātaṃ sāmaggiraṃ saṃcuṇṇeti paribhīdati mithu bhedaṃ karoti etāyātī piṣuṇā. Attano piyabhāvaṃ paresaṃca mittasuññaṃ karoti etāyātīvā piṣuṇā. Niruttinayena. Vadanti etāyātī vācā. Piṣuṇāca sā vācācāti **piṣuṇavācā**. Yena suyyati, tassa hadayaṃ pharamānā usati dahatīti pharusā. Pharusāca sā vācācāti **pharusavācā**. Sādhujanehi adhigantabbaṃ saṃsukhaṃ hitaṃ phalati visarati vināseti hitasukhamaggaṃ bhīdatīti samphaṃ. Taṃvā phalati bhijjati etenāti samphaṃ. Atthadhammāpagatassa paṭibhāṇacittassa bhāratayuddhasītāharaṇā dikassa vācā vatthumattassetam nāmaṃ. Yattha diṭṭhadhammahitabuddhiyāvā samparāyika hitabuddhiyāvā upāyadīpaṃ kiñci atthadhammavinayapadaṃ natthi. Samphaṃ palapantipakārena kathayanti etenāti **sapphappalāpo**. Tattha parassaviṣaṃ vādanapurekkhārena viṣaṃ vādaka kāyavacīpayogasamuṭṭhāpikā akusalacetanā musāvādo. So parassa atthabhaṇṇanakova kammāpathabhedo. Itaro kammameva. Ettha ca kamma pathoti paṭisandhijanākānaṃ kammānaṃ uṭṭhānamukhamaggaṃ vuccati. Yathā hi rajānaṃ uṭṭhānapadeso rajapathoti vuccati. Tathā loke sandissamānesu sattānaṃ kāyavacīcittābhisaṅkharaṇakiccesuyehi kiccehi paṭisandhijanākāni kammāni uṭṭhahanti. Yesuvā kiccesu tāni uṭṭhahanti pavattanti. Tāni kāyavacīcittā bhisaṅkharaṇakiccehi paṭisandhijanākānaṃ kammānaṃ uṭṭhānamukhamaggaṃ kammāpathoti vuccanti. Katamāni pana tānīti. Aṅgasampannāni akusalesu paṇaghāta kiccādīni kusalesu tabbiramaṇakiccādīni dasavidhāni kiccānīti. Kammāniyeva sugatiduggatīnaṃ taduppajjanakasukhadukkhānaṃca pathabhūtattā kammāpathonāmātipi vadanti.

Parassa bhedapurekkhārena bhedakakāyagacīpayogasamuṭṭhā pikā saṃkiliṭṭhacetanā piṣuṇāvācā. Sāpi pare bhinneyeva kammaṭṭhabhedo. Abhinne kammameva. Parassa mammacchedakakāya vacīpayogasamuṭṭhāpikā duṭṭhacetanā pharusavācā. Etthaca maranti sattā, maraṇamattaṃvā dukkhaṃ nigacchanti etasmim̐ ghaṭṭiyamāneti mammaṃ. Duṭṭhavaṇo. Mammaṃ chindati bhindati ghaṭṭetīti mammacchedako. Vaṇaghaṭṭanapayogo. Idha pana mammaṃviyāti mammaṃ. Jātiādīsu dasasu akkosavatthūsu yaṃkiñci. Mammacchedakoti jātiādīsu ghaṭṭana vasena pavatto pharusa kāyavacī payogo. Aya mattho sīlakkhandha ṭikā vasena veditabbo. Athavā. Mamāyatīti mamo. Mitto. Mamassa bhāvo mammaṃ. Mettācittaṃ. Mammaṃ chindatīti mammacchedako. Ayampi akkositabbassa sammukhāeva kammaṭṭhabhedoti keci. Parammukhāpīti apare. Yathā pana paraṃ akkositvā khamāpentassa khamāpanakammaṃ parassa dūre ṭhitassapī matassapī sampajjati. Evaṃ akkosanakammaṃpīti dīghamajjhimaṭṭikākārā icchanti. Akkosādhippāyena caṇḍā mahimsī taṃ anubandhatūtivā corā taṃ khaṇḍā khaṇḍikaṃ karontūtivā muddhā te phalatu sattadhātivā evamādinā nayena paraṃ abhisapantassapī kammaṭṭhabhedo hotiyevātica vadanti.

Anatthaviññāpana kāyavacīpayoga samuṭṭhāpikā pāpacetanā samphappalāpo. Sopi bhāratayuddha sītāharaṇādikesu paṭibhāṇacittesu vācāvattumattesueva kammaṭṭhabhedo. Socakho pare taṃ anatthaṃ saccato gaṇhanteyeva. Agaṇhante pana kammameva. Tathā rājakathādīsu dvattiṃsa tiracchāna kathāpabhedesupi kammameva. Tañca kho tadassādasena kathentasseva. Atthadhammavinayanissitaṃ katvā kathentassa pana sabbampi satthakameva hotīti veditabbaṃ. **Vacīkammanti** ettha vacīti vācāyeva. Sā catubbidhā saddavācā virativācā cetanāvācā copanavācāti. Idha pana saddasahitā vacīviññattisaṅkhātā copana vācā adhippetāti vuttaṃ **vacīviññattisaṅkhātetī**. Copanavācā hi kadāci vācaṅgena attano adhippāyaṃ parassa viññāpanatthāyapī karīyatīti vacīviññattīti vuccatīti. Sāyevaca kammānaṃ pavatti mukhattā dvāranti vacīdvāraṃ. Tāya hi taṃtaṃvacīpayogakiccena pavattamānāya eva viṣaṃvādanādikkasiddhito taṃsamuṭṭhāpakassa cetanādhammassa āyūhanakriyānibbattica vacīkammanāmalābhoca hotīti. Tasmim̐ vacīdvāre. Yamettha vattabbaṃ, taṃ kāyakamme vuttamevāti. [Vacīkammaṃ]

150. Abhijjhāyanti assādamatte aṭṭhatvā parabhaṇḍassa attano pariṇāmanavasena atirekataraṃ jhāyanti nijjhāyanti etāyāti **abhijjhā**. Byāpādentī parasatte vināsaṃ āpanne katvā cintenti etenāti **byāpādo**. **Micchādīṭṭhīti** ettha micchāti viparītatthe nipāto. Atthidinnantiādinayapavattaṃ sabbam̐ sappurisa maggaṃ sappurisapaññattaṃ bhinditvā natthi dinnantiādinayena tabbiparī tato passanti etāyāti micchādīṭṭhi. Tattha parasantakaṃ disvā kevalaṃ assādanābhinandanarajjanamattesu aṭṭhatvā ahovata idaṃ mamassāti evaṃ attano katvā cittena pariṇāmentasseva abhijjhākammaṭṭhabhedo hoti. Parasantakabhāveyyeva thapetvā lābhāvatime. Ye īdisaṃ paribhuñjanti. Ahovatāhampi tāvakālikam̐ paribhuñjeyyaṃ. Yācitvāvā kiṇitvāvā attano kareyyaṃ. Aññaṃvā īdisaṃ labheyyanti evaṃ assādentassa kammameva. Vuttañhetam̐ aṭṭhakathāsu parabhaṇḍavatthuke hi lobhe uppannepi na tāva kammaṭṭhabhedo hoti. Yāva na ahovata idaṃ mamassāti attano pariṇāmetīti. Antamaso ḍaṃsamakasādikepi ārabba ime nassantu vinassantu. Ahovatime nasseyyumaṃ vinasseyyumaṃ. Avaḍḍhitāvā bhaveyyumaṃ ciraṃvā natīṭṭheyumaṃ. Kadāvā nassanti vinassantīti evaṃ para sattassa khandhajīvavināsaṃ cintentasseva byāpādo. Itaro kammameva. Vuttañhetam̐ parasattavatthuke hi kodhe uppannepi na tāva kammaṭṭhabhedo hoti. Yāva na ahovatāyaṃ ucchijjeyya vināseyyāti tassa vināsaṃ cintetīti. Kammassavā kammavipākassavā sabbaso paṭibāhikā natthikāhe tukākriyavasena tividhā niyata micchādīṭṭhīeva kammaṭṭhabhedo. Dasavatthukamicchādīṭṭhi pana natthikādīṭṭhipabhedāeva. Sabbaññudesanaṃ paṭibāhitvā pavattā ariṭṭhakaṇṭakādīnaṃ dīṭṭhiyopi kammaṭṭhabhedāeva vadanti. Vīsativatthukā sakkāyadīṭṭhivā dvāsaṭṭhidīṭṭhigatānivākammamevāti.

Niyatāti cettha yathā tīṇi lakkhaṇāni yattakaṃ passitvā saddhādhimokkkena sannīṭṭhānaṃ gacchantassa cittuppādo attano anantaraṃ phaladānaniyamena niyato hoti. Tattakaṃ passanto kusalesu dhammesu niyāmaṃ okkamati vutto. Tathādīṭṭhiṭṭhā nāni kāraṇa paṭirūpakāni yattakaṃ passitvā micchādhimokkkena sannīṭṭhānaṃ gacchantassa cittuppādocutianantarephaladānaniyamena niyato hoti. Tattakaṃ passitvā sannīṭṭhānaṃ gacchanto akusalesu dhammesu niyāmaṃ okkamati, atekicchonāma

hoti. Tathā pana apassitvā kevalaṃ micchādhimokkhamattena evameva bhavissatīti sannitṭhānaṃ gantvā sakaṃ ācariyakaṃ samayaṃ paggaṇhitvā tṭhito atekicchonāma nahoti. Kasmā, phaladāna niyamābhāvāti. Ayañca attho micchattattikena dīpetabbo. Tattha hi phaladāna niyamavaseneva ubhinnaṃpi sammattamicchattadhammaṃ niyatasaññāpaṭilābho aṭṭhakathāyaṃ vuttoti. Suttantaṃvaṇṇaṇāsu pana gahaṇaniyamavasenaṃpi tassā niyatabhāvo vuttoti.

Aññatrāpiviññattiyāti viññattidvayaena vināpi. Viññattidvayaṃ asamuṭṭhāpetvāpīti attho. Apisaddena pana viññattidvayaena sahāpīti dasseti. Imāni hi tīṇi kammāni yadā kāyaṅgavā caṅgāni acopetvā manasmīveva sījjhanti. Tadāviññattiyā vināva pavattanti. Yadā pana tāni copetvā kāyavacīdvāresu sījjhanti, tadā viññattiyā saheva pavattantīti. Etena imesaṃ tīsūpi dvāresu pavattim dīpeti. Evaṃsantepi imāni manodvāreeva bahulaṃ pavattanti. Kāyavacīdvāresu pana appakameva pavattantīti vuttaṃ **manasmīyevabāhullavuttoti**. Tattha manasmīy yevāti kusalā kusalajavanacittasaṅkhāte manodvāreeva. Etena purimesūpi kāyadvāre vacīdvāreti padesu evasaddasambhavo dīpito hoti. Evañhi satī tatthapī dvārena kammavavattānaṃ suṭṭhutaṃ upapannaṃ hotīti. Itarathā upalakkhaṇādivasena atthantarapasaṅgopi siyāti. Apica, idha evasaddena ayaṃpi visesattho dīpito hoti. Pāṇavadhādīsu hi vadhāmi naṃ avaharāmi na ntiādīnā saṃvidhānākāreṇa pavattā cetayitakriyāeva padhānaṃ hoti. Sāca kāyavacīpayogehi vinā nasījjhati. Tasmā tesu kāya vacī payogā kammaśiddhiyā ekaṃ aṅgaṃ honti. Taṃ sahaṃjātāca abhījjhādayo cetanāpakkhikāeva hutvā abbohārikattaṃ gacchanti. Parabhaṇḍā bhījjhāyanādīsu pana abhījjhādīnaṃ attapadhānaṃ kāyavacīdvāresu pavattānaṃpi kāya vacīpayogākammaśiddhiyā aṅgameva nahonti. Tathā cintāpavattī matteneva tattha kammaśiddhito. Iti imesu kammesu kāya vacīdvārānaṃ sabbenasabbaṃ aṅgabhāvapaṭikkhipanattaṃ manasmīy yevāti eva gahaṇaṃ idheva katanti daṭṭhabbaṃ. Tesu pana dvāresu pavattimatta sabbhāvaṃ sandhāya bāhullasaddopi idha gahitoti.

[156] Yaṃ pana vibhāvaniyaṃ

“Viññattisamuṭṭhāpaka cittaśampayuttācetta abhījjhādayo cetanāpakkhikāva hontīti” vuttaṃ. Taṃ idha na yujjati.

Na hi viññattisamuṭṭhāpakacittaśampayuttāpi kevalaṃ manokamma kiccavisesena pavattamānā abhījjhādayo cetanāpakkhikā honti. Cetanāeva pana abhījjhādīpakkhikā hotīti. [Manokammaṃ]

151. Ettha ca dasannaṃpi imesaṃ kammaṃpathānaṃ pubbāparacetanāyo paṭisaṇḍhiākaḍḍhane anekantikapakkaṃ gatāti paṭisaṇḍhidā maggaṭīkāyaṃ vuttā. Tasmā tāpi imaṃ sattaṃ māressāmi imaṃ bhaṇḍaṃ adinnaṃ ādiyissāmītiādīnā nayena ādīto paṭṭhāya pavattā balavapaccaye laddhā paṭisaṇḍhiṃ ākaḍḍhanti. Aladdhā nākaḍḍhantīti yuttā. Yāni pana kusalākusalāni kammaṃpathabhedāṃ appattāni honti. Tāni kāyadvāre dissamānāni kāyakammānīnāma honti. Vacīdvāre dissamānāni vacīkammānīnāma. Suddhe manodvāre dissamānāni manokammānīnāmāti veditabbānīti. **Dosamūlenāti** dosasaṅkhātāmūlena dosamūlakacittenāti dvidhā attho. Tattha purimo byāpādavajjehi dvīhi yujjati, pacchimo tīhi. **Lobhamūlenāti** ettha esanayo. Tatthāpīti purimo abhījjhāvajjehi dvīhi yujjati. Pacchimo tīhīti. **Dvīhi mūlehīti** kadāci dosamūlena kadāci lobhamūlenāti evaṃ dvīhi mūlehi sambhavanti. Moho pana sabbasādhāraṇattā visesakaro na hotīti idha na gahito.

[157] Yaṃ pana vibhāvaniyaṃ

“Nidhipāṭhakaṃpamāṇato duṭṭhaniggahattaṃ parasantakaṃ harantānaṃ rājūnaṃ brāhmaṇānañca sabbamidaṃ brāhmaṇānaṃ rājūhi dīnaṃ. Tesāṃ pana sabbadubbalaḥbhāvena aññe bhūñjanti. Attasantakameva brāhmaṇā paribhūñjantīti evamādīni vatvā sakasaññāya eva yaṃkiñci harantānaṃ kammaṃphalasambandhāpavādīnañca mohamūlenā”ti vuttaṃ. Taṃ idha na yujjati.

Sahajātamūlañhi idha adhippetam asādhāraṇabhūtañca. Tesañca tathāharantānam haraṇam haraṇakāle kadācidosamūlena kadāci lobhamūlenāti evaṃ dvīhi mūlehi eva sambhavatīti. Yo pana moho mahāsammataḍḍināmdhammikarājūnaṃ kāle pavattam porāṇaka nidhisattham thapetvā pacchā adhammikānaṃrājūnaṃ kāle pavattesu yebhuyyena adhammikesu dhammasattha rājasattha saṅkhātesu nidhipāthesu dhammikasaññīnaṃ rājūnaṃ uppanno. Yoca rājūnaṃ abhisekakāle dinnaññevasamaṇabrāhmaṇānaṃtiṇakatthodakanti vacanaṃ upādāya sabbamidaṃ brāhmaṇānaṃ rājūhi dinnanti evaṃ saññīnaṃ brāhmaṇānaṃ uppanno. Yoca natthi sukata dukkaṭānaṃ kammānaṃ phalaṃ vipākoti evaṃ diṭṭhikānaṃ kammaphalasambandhā pavādīnaṃ uppanno. Sosabbopi upanissayamoho nāma hoti. So idha nādhippeto. Itarathā lobho nidānaṃ kammānaṃ samudayāya. Doso nidānaṃ kammānaṃ samudayāya. Moho nidānaṃ kammānaṃ samudayāyāti vacanato sabbepi akusalakamma pathāti mūlakāeva idha vattabbā siyunti. Evaṃpanettha vattabbaṃ siyā, kammesuca kammaphalesuca sañjātakāṅkhānaṃ janānaṃ kaṅkhā pariyuṭṭhāna cittenasavevatadanurūpāniadinādānādīni cattārikammāni karontānaṃ tāni kammāni suddhena mohamūlena jāyantīti. Evañhi sati parato vicikicchā cetanāya paṭisandhijanakesu gahaṇaṃpi upapannaṃ hotīti. [Akusalakammaṃ].

152. Kāmāvacarakusalampi kāyadvāre pavattam kāya kammanti ettha dve pariyāyā veditabbā. Kathaṃ, vakkhamānesu hi puññakriyavatthūsu yaṃkiñci puññakriyavatthum kāyaṅgaṃ copetvā pavattitaṃ kāyakammaṃ nāma. Vācaṅgaṃ copetvā pavattitaṃ vacīkammaṃ nāma. Kāyaṅga vācaṅgāni acopetvā manodvāreeva pavattitaṃ manokammaṃ nāmāti ayameko pariyāyo. Ayaṃ pana mettaṃ kāyakammaṃ paccupaṭṭhitaṃ hoti sabrahmacārīsu āviceva raho ca. Mettaṃ vacīkammaṃ paccupaṭṭhitaṃ hoti sabrahmacārīsu āviceva rahoca. Mettaṃ manokammaṃ paccupaṭṭhitaṃ hoti sabrahmacārīsu āviceva rahocātica. Sabbaṃ kāyakammaṃ ñāṇapubbaṅgamaṃ ñāṇānuparivattam. Sabbaṃ vacīkammaṃ ñāṇapubbaṅgamaṃ ñāṇānuparivattam. Sabbaṃ manokammaṃ ñāṇapubbaṅgamaṃ ñāṇānuparivattanti ca.

Padakkhiṇaṃ kāyakammaṃ, vācākammaṃ padakkhiṇaṃ;
Padakkhiṇaṃ manokammaṃ, paṇīhite padakkhiṇe tica.

Evamādīsu suttapadesu āgato. Apica, aṭṭhasāliniyaṃ sakalāya navakammadvārakathāya ayamatto dīpetabbo. Tattha hi dānamayaṃpi kāyavacī manokammavasena tidhā vibhattaṃ. Tathā sīlamayaṃ bhāvanāmayañcāti. Yasmiṃ pana dussilye pavattamāne kāyo aparisuddho hoti. Kāyasaṃvaro bhijjati. Yaṃ pana kusalaṃ pavattamānaṃ tadaṅgapahānādivasena taṃ dussilyaṃ pajahitvā kāyadvāraṃ sodhayamānaṃ kāyasaṃvaraṃ pūrayamānaṃ pavattati. Taṃ kāyacopana rahitaṃpi kāyaṅga saṃvaraṇa kiccattā kiccāsīsenā kāyadvāre pavattam kāyakammaṃnāma. Kāyasucaritanti vuccati. Etthaca taṃ dussilyaṃ pajahitvāti yasmiṃ citte uppajjamāne pāṇaghātādikam kāyadussilyaṃ uppajjeyya. Tassa cittassa uppajjituṃ appadānavasena taṃ kāyadussilyaṃ pajahitvā. Kāyadvāraṃ sodha yamānanti yasmiṃ dussilye uppajjamāne kāyaṅgaṃ asuddhaṃ hoti. Tassa uppajjituṃ appadānavasena kāyadvāraṃ sodhayamānaṃ. Kāyasaṃvaraṃ pūrayamānanti sayam kāyaṅgasamvaraṇakiccāsampādanena kāyasaṃvaraṃ pūrentanti attho. Vacīkammepi eseva nayo. Avayesaṃ pana sabbampi kalyāṇakammaṃ tīsu dvāresu pavattaṃpi manodvāraṃeva sodhayamānaṃ manosamvaraṃeva pūrayamānaṃ pavattatīti manodvāre pavattam manokammaṃnāma. Manosucaritanti vuccati. Ayameko pariyāyo. Ayaṃ pana anekasatesu kammaphasuttesu āgato. Apica, aṭṭhasāliniyaṃ sakalāya dvārakathāka ayamatto dīpetabboti. Imesu pana dvīsu pariyāyesu sattusāsane kalyāṇadhammapūraṇaṃnāma yāvadeva pāpadhammapahānathāya eva hotīti pacchimoyeva padhānanti veditabboti. Diyyati etenāti **dānaṃ**. Vatthupariccāgacetanā. Sīlayatīti **sīlaṃ**. Kāya vacīkammāni sāvajjāni nīvāretvā anavajjāni susamāhitāni katvā sammādahati thapeti, uparime kusaladhamme upadhāreti. Tesam patiṭṭhā hutvā dhāretīti attho. Bhāventi etāyāti **bhāvanā**. Adhikusaladhamme anuppannevā uppādentī uppannevā vaḍḍhentīti attho. Apacāyanti etenāti **apacāyanaṃ**. Pūjenti kāyavācāhi attānaṃ nīcavuttiṃ dassentīti attho.

Visesena āvaranti ussukkaṃ āpajjantīti byāvaṭānaṃ bhāvo kammaṃvā **veyyāvaccam**. Pajjitthāti patti. Attani laddhapuññakoṭṭhāsassa nāmaṃ. Pāpīyatītivā patti. Parehi anumodantehi laddhabbassa

puññānisandassetam nāmaṃ. Pattiṃ dadanti etenāti **pattidānaṃ**. Tadeva parehi dinnam anumodanti. Sādhukāraṃ dadanti etenāti **pattānumodanaṃ**. Dhammaṃ suṇanti etenāti **dhammasavanaṃ**. Dhammaṃ desenti etāyāti **dhammadesanā**. Atthi dinnam, atthi yiṭṭham, atthi hutam, atthi sukata dukkaṭānaṃ kammānaṃ phalaṃ vipākotiādinaṃ dasavatthukam sammādiṭṭhiṃ ujum karonti etenāti **diṭṭhijukammaṃ**. Sabbāni pana tāni punenti cittasantānaṃ sodhenti etehi puññāni. Pūjanīyabhāvaṃ nibbattenti puññānītipi vadanti. Tānieva avassaṃ kattabbaṭṭhena kriyānicāti puññakriyāni. Tānieva sukhavisesānaṃ adhiṭṭhānaṭṭhena vatthūnicāti **puññakriyavatthūnīti**. Ettha ekamekaṃ tividham hoti purimaṃ majjhimaṃ pacchimanti. Tattha dāne tāva paṭiggāhakassa pariccāgakaṇaṃ majjhimaṃnāma. Tato pubbe iminā paccayena dānamayaṃ puññaṃ pavattayissāmīti evaṃ paccayuppādanato paṭṭhāya dānaṃ ārabba dānaṃ uddissa tīsu dvāresu pavattā kusalacetanā purimaṃnāma. Pacchā bhāge pana attanā dinnadānaṃ ārabba punappunaṃ attamanacittaṃ uppādentassa pavattā kusalacetanā pacchimaṃnāmaṃ. Sabbampi cetam akusale vuttanayena balavapaccaye laddhā paṭisandhiṃ deti. Aladdhā na detīti veditabbaṃ.

Puna hīna majjhimaṃpaṇītasena tividham hoti. Tattha hīnena chandena cittena vīriyena vīmaṃsāyavā pavattitaṃ hīnaṃ, majjhimena chandādinā pavattitaṃ majjhimaṃ, paṇītena paṇītam. Yasakāmatāyavā pavattitaṃ hīnaṃ. Puññaphalakāmatāyavā pavattitaṃ majjhimaṃ. Kattabbame vidanti ariyabhāvaṃ nissāya pavattitaṃ paṇītam. Attukkaṃsana paravambhanādīhi upakkiliṭṭhamvā hīnaṃ. Anupakkiliṭṭham lokiyasukhabhāgitāya pavattitaṃ majjhimaṃ. Maggaphalasukhabhāgitāya pavattitaṃ paṇītam. Taṇhāvasenavā bhavabhogattāya pavattitaṃ hīnaṃ. Attano vimokkhattāya pavattitaṃ majjhimaṃ. Sabbasattavimokkhattāya pavattitaṃ pāramitādānaṃ paṇītanti ayamatto visuddhimagge sīlaniddesaṃ nissāya veditabboti. Yathā cettha, evaṃ sesesupiyathā sambhavaṃ tikadvayaṃ vibhajivā vattabbanti. Tattha sīlam nāma bhikkhusīlam, bhikkhunisīlam, sāmaṇerasīlam, gahaṭṭhasīlanti catubbidham hoti. Tattha purimānaṃ dvinnaṃ samādānakkiccaṃ kammavācāya siddhamhoti. Antimavatthuaññāpannenavā sikkhāpaccakkhānenavā kammavācāya bhinnāya sabbam samādānaṃ bhinnam hoti. Sabbāni upasampanna sīlāni bhinnāni honti. Tadā bhikkhupaṭiññaṃ avijahitvā ṭhito dussīlonāma hoti. Thapetvāpana antimavatthum aññāsikkhā padāni vītikkamantassa yaṃ vītikkamati. Tasmīyeva saṃvarabhedo hoti. Na samādāna bhedo. Na hi tam puna kammavācāya samādātābbanti atthīti. Paṭikkammaṃ karontassa pana saṃvaro pākātika hoti. Sañcicca vītikkamantovā paṭikkammaṃ akarontovā alajjīnāma hoti. Na dussīloti. Esanayo sāmaṇerasīlepi. Tattha pana saraṇagamaneneva samādānaṃsiddham hoti. Liṅganāsanaṅgaṃ katvā saraṇagamane bhinne sabbam samādānaṃ bhijjati. Itaresu pana yaṃ vītikkamati, tasmīyeva saṃvarabhedo hotīti veditabbaṃ.

Gahaṭṭhasīle pana pakati gahaṭṭhānaṃ gahaṇavaseneva samādānaṃ siddham hoti. Tasmā ekatogaṇhante sabbāni samādināni honti. Ekasmimca bhinne sabbāni bhinnāni honti. Sabbāni puna samādātābbāni. Visuṃ visuṃ gaṇhante pana yaṃ vītikkamati, etadevabhijjati. Tadeva puna samādātābbam hotīti. Paricchinnakālā tikkamane pana sabbam samādānaṃ vūpasammatiyeva. Dussīlabhāvo panettha pañcannaṃ nikkasīlānaṃ bhedenā veditabbo. Niccāniccesu pana yaṃ niccameva vaṭṭati. Aniccaṃ navatṭati sāvajjam hoti. Tam nikkasīlam nāma. Yaṃ pana niccaṃpi vaṭṭati. Mahantaṃ puññābhisaṇḍam hoti. Aniccaṃpi vaṭṭati sāvajjam na hoti. Tam anikkasīlamnāma. Tattha bhikkhu bhāve ṭhitassa bhikkhusīlam sāmaṇerabhāve ṭhitassa sāmaṇerasīlam pakatigahaṭṭhānaṃpañcasīlam pabbajitasāṅkhepagatānaṃ upāsakānaṃ tāpasaparibbājakānañca dasasīlam nikkasīlamnāma. Tesāhi tam tam yathāsakaṃ sīlam niccaṃ suddham katvā rakkhitumeva vaṭṭati. Arakkhantānaṃ bhikkhubhāvādiko sāvajjo hoti asuddho. Kasmā, attano anurūpassa ācārassa vipattito. Pakatigahaṭṭhānaṃ pana aṭṭhaṅguposathasīlam nikkasīlamnāma. Tañhi tesam vuttanayena niccaṃpi vaṭṭati. Aniccaṃpi vaṭṭati. Tathā dasasīlañca. Tañhi pakati gahaṭṭhānaṃ anikkasīlameva hoti. Gihinivattham pahāya kāsāyavatthadhāraṇena pabbajitasāṅkhepagatānaṃ eva nikkasīlam. Yathā hi pakatimanussānaṃ pañcasīlam samādinnaṃpi asamādinnaṃpi niccaṃ rakkhitumeva vaṭṭati. Vītikkamituṃ navatṭati. Tathā pabbajitavesadhāraṇaṃ dasasīlam samādinnaṃpi asamādinnaṃpi niccaṃ rakkhitumeva vaṭṭati. Vītikkamituṃ navatṭati. Vesadhāraṇena saha siddhattāti.

Upari vuccamānā samathavipassanāvasena duvidhā bhāvanā bhāvanānāma. Sā idha appanaṃ apattāva adhippetā. Dhammavinayapari yattiyā saha anavajjakammasippavijjāthānesu paricayakaraṇa cetanāpi ettheva saṅgayhati. Ratanattaye pana mātāpitūsu kulejēṭṭhesu ācariyesu dhammikasamaṇabrāhmaṇesu aññesuca guṇavayavuddhesu yathārahaṃ paccuṭṭhānaṃ vandanaṃ añjalikaraṇaṃ sāmīcīkaraṇaṃ vattaṭṭhānaṃ evamādisabbaṃ apacāyanaṃnāma. Tesaññeva aññesañca āgantukagamikaaddhikānaṃ gilānānaṃ jīṇānaṃ kicca karaṇīyesu sabrahmacārīnaṃ cīvarakammādīsu paresaṃ taṃtaṃpuñña kammesuca parisuddhena hitapharaṇacittena attanokiccesu viya kāyavācāhi vāyāmakaraṇaṃ veyyāvaccamaṃnāma. Attanā katassa yassakassaci puññassa parehi sādharmaṇakaraṇaṃ pattidānaṃnāma. Parehi dinnāya pattiyā anumodanaṃ attamanatāpavedanaṃ pattā numodanaṃnāma. Adinnassa puññassa anumodanaṃ pana anumodanameva hoti. Na pattānumodanaṃ. Pattiyāeva abhāvato. Pattica duvidhā uddisikā anuddisikāti. Tattha attānaṃ uddisikaṃ anumodantasseva diṭṭhadhammavedanīyaṃ jātanti veditabbaṃ. Idaṃ pana dvayaṃ dānapuññesueva visesato pākaṭaṃ. Tañhi uddisikaṃ katvā devatānaṃvā paradattupajīvipetānaṃvā vemānikapetānaṃvā vinipātikāsuraṇaṃvā dinnāṃ anumoditañca tesāṃ taṅkhaṇeeva diṭṭhadhamma vedanīyaṃ jātanti. Atthahita paṭisaṃyuttāya dhammakathāya yoniso manasikāre ṭhatvā savanañca kathanañca dhammasavanaṃ dhamma desanācānāma. Niravajjakammasippavijjāthānānaṃ savanakathanacetanāca etthevasaṅgayhanti.

Natthi dinnāṃ natthiyiṭṭhantiādinayapavattāya dasavattukāya micchā diṭṭhiyāvā issaranimmānādidiṭṭhiyāvā diṭṭhamaṅgalādidiṭṭhiyāvā visuddhaṃ katvā tehi tehi vatthūhivā yuttīhivā kāraṇehivā kammasakatā ñāṇasaṅkhātāya sammādiṭṭhiyā vodānakaraṇaṃ diṭṭhujukammaṃnāmāti. Yattha pana tividhameva puññakriyavatthu āgataṃ. Tattha pattidānānumodanāni dāne saṅgayhanti. Issāmaccherānaṃ paṭipakkhabhāvena taṃ sabhāvattā. Apacāyanaveyyāvaccāni sīle saṅgayhanti. Tesāṃ cārīta sīlattā. Sesāni tīṇi bhāvanāmaye saṅgayhanti. Taṃ sabhāvattā. Kammatṭhānavinimutto dhammonāma natthīti hi vuttaṃ. Diṭṭhujukammañca ñāṇa vaḍḍhanaṃevāti. Tisvevavā etaṃ saṅgayhati. Diṭṭhujukammaṃ sabbesaṃ niyama lakkhaṇantīti aṭṭhakathāyaṃ vuttaṃ. Satiyeva hi kammasakatāññe dānādīni tīṇi sampajjantīti. **Manokammamevāti** manasmīmeva kammapatha kiccasiddhito manokammaṃeva.

[158] Vibhāvanīyaṃ pana

“Viññattisamuṭṭhāpakattā bhāvena kāya dvārādīsu appavattanatoti” vuttaṃ. Taṃ na sundaraṃ.

Na hi viññattisamuṭṭhāpakāṃ abhiññākusalaṃ kāyadvārādīsu pavattamānaṃpi kāyavacīkamasāṅkhaṃ gacchati, kāyavācānaṃ kammapatha āṅgabhāvāsambhavatoti. Tañca **bhāvanāmayanti** dānasīlavasena appavattanato. Kevalaṃ bhāvanākammavisesattā tañca mahaggata kusalaṃ bhāvanākamma meva hoti. Yaṃ pana paṭisambhidā magge pathamajjhānena nīvaraṇānaṃ. Dutīyena vitakkavicārānaṃ. Tatīyena pītiyā. Catutthena sukhadukkhānaṃ pahānaṃ sīlaṃ. Veramaṇi sīlaṃ. Cetanā sīlaṃ. Saṃvaro sīlaṃ. Avītikamo sīlanti vuttaṃ. Taṃ pariyāyena vuttanti veditabbaṃ. **Appanāpattanti** bhāvanā balena ārammaṇe anupavisitvā acalaṭṭhitibhāvena pavattanato appanāpattaṃ kammaṃ hoti.

[159] Vibhāvanīyaṃ pana

“Pubbabhāgapavattānaṃ kāmāvacarabhāvatoti” kāraṇaṃ vuttaṃ. Taṃ na sundaraṃ.

Na hi tesāṃ kāmāvacaratāmattaṃ appanāpattiyā kāraṇaṃ hotīti. **Jhānaṅgabhedenāti** vuttaṃ. Jhānabhedenāti pana vattabbaṃ. Jhānaṅgabhedenātivā jhānaṅgasamudāyabhedenāti attho, jhānabhedenā icceva vuttaṃ hoti. Kusalakammaṃ

153. Etthāti etasmim pākattānacatukke. **Uddhaccarahitanti** uddhaccasahagatacetanāvajjitam. Kasmā pana uddhaccacetanā idha pajjitāti. Paṭisandhianākaḍḍhanato. Kathaṃ viññāyatīti ce. Dhammasaṅgahe dassanena pahātabbesu taṃ avatvā bhāvanāya pahātabbesu eva vuttattā. Yathāha-cattāro diṭṭhigatasampayuttacittuppādā vicikicchāsahagato cittuppādo, ime dhammā dassanena pahātabbātica, uddhaccasahagato cittuppādo, imedhammā bhāvanāyapahā tabbātica, sesā pana cattāro diṭṭhigatavippayuttacittuppādā dve paṭighasampayuttacittuppādāca siyā dassanenapahātabbā siyā bhāvanāya pahātabbāti tattha vuttā. Kathaṃca viññāyati. Yo dassanenapahātabbesu na vutto, so akusaladhammo paṭisandhim nākaḍḍhatīti. Paṭṭhāne dassanenapahātabbadhammesueva nānākkhaṇika kammaṃpaccayassa uddhaṭattā itaratta tassa anuddhaṭattāti. Yathāha-sahajātā dassanenapahātabbā cetanā sampayuttakānaṃ dhammānaṃ cittasamuṭṭhānānaṃ rūpānaṃ kammaṃpaccayenapaccayo. Nānākkhaṇikā dassanena pahātabbā cetanā vipākānaṃ khandhānaṃ kaṭattāca rūpānaṃ kammaṃpaccayena paccayotica sahaṭātā bhāvanāya pahātabbā cetanāsampayuttakānaṃdhammānaṃ cittāsamuṭṭhānānaṃcarūpānaṃ kammaṃpaccayena paccayotica. Naca nānākkhaṇika kammaṃpaccayasattiyā vinā vipākuppādanānaṃ atthīti. Yadi evaṃ sā pavattivipākampi najanetīti sakkā vattuntice. Na. Paṭisambhidāvibhaṅge tassā vipākassa uddhaṭattā. Yathāha-katame dhammā akusalā. Yasmiṃ samaye akusalaṃ cittaṃ uppannaṃ hoti upekkhāsahagataṃ uddhaccasampayuttaṃ rūpārammaṇaṃvā. La. Ime dhammā akusalā. Imesu dhammesu ñāṇaṃ dhammapaṭisambhidā. Tesam vipāke ñāṇaṃ atthapaṭisambhidāti. Tenāha **pavattiyam pana sabbampi dvādasavidhanti**ādi.

[160] Yaṃ pana vibhāvaniyam

“Adhimokkavirahena sabbadubbalaṃpi vicikicchāsahagataṃ paṭisandhim ākaḍḍhati. Adhimokkhasampayogena tato balavantampi uddhaccasahagataṃ nākaḍḍhatīti” vuttaṃ. Taṃ na sundaraṃ.

Na hi adhimokkavirahamattena vicikicchāsahagataṃ sabbadubbalantica adhimokkhasampayogamattena uddhaccasahagataṃ tato balavantantica sakkā vuttam. Satthari kaṅkhati dhamme kaṅkhatīti evamādinā nayena vuttāya vicikicchāya attano visaye mahāhatthināgassa viya balavatarattā ativiya kālakadhammattācāti. Tathā hisā ekantena dassanenapahātabbesu padhānabhāvena vuttā. Tatoyevaca paṭisandhiākaḍḍhanampi tassā viññātabbaṃ hotīti. Sabhāvaviruddhattāyeva pana vicikicchāsahagataṃ adhimokkharahitaṃ hotīti yuttaṃ. Tasmā uddhaccasahagatameva sabbadubbalanti veditabbaṃ. **Sabbatthāpīti** sugatiduggativasena sabbasmimpi. **Yathārahanti** tesu lokesu laddhavatthudvārānurūpaṃ. **Vipaccatīti** vipāceti vipakkabhāvaṃ āpādeti. Sabbampivādvādasavidhaṃ akusalakammaṃ sattā kusalapākāni hutvā vipaccati, vipakkabhāvaṃ gacchatīti attho.

Yasmā kusalakammāni apāyabhūmiyampi pavattiyam mahāsampattiyo samuṭṭhāpetvā mahiddhikānaṃ nāgasupaṇḍānaṃ santāne sayameva attanovipākassa okāsaṃ katvā sukhavipākaṃ janayanti. Aññesampi apāyikānaṃ tena tena kāraṇena iṭṭhārammaṇa samāyoge sati attano vipākassa okāsaṃ labhitvā sukhavipākaṃ janayanti. Tasmā tathāpavattiyāñcātiādi māha. Na hi tāni sukhavipākāni akusakammaṃ vipākāni bhavitum arahanti. Vutteñhetam vibhaṅge aṭṭhānametaṃ anavakāso, yaṃ kāyaduccaritassa iṭṭho kanto manāpo vipāko nibbatteyyātiādi. Tattha mahāvipākāni sugati kāmaloke ahētukāni aṭṭhapi sabbasmim kāmaloke tesuca pañcacakkhuvīññāṇa sotaviññāṇa sampatiṭṭhāna santīraṇa yugaḷāni rūpaloke vipaccatīti vuttaṃ yathārahaṃ vipaccatīti. Rūpāvacara kusalañhi kammasamuṭṭhānarūpāni janayantampi sayam vipaccamānaṃ ārammaṇantare aññabhūmika vipākabhāvena navipaccati. Kāmavirāgabhāvanābhāvena pana appanāpatta kamma visesattā kāmataṇhāya avisayabhūte nimittā rammaṇe attanā sabbaso sadisena mahaggatabhāvapattena rūpa vipākabhāveneva vipaccati. Tasmā rūpalokepi tāni pañcavipākāni kāmāvacarakusalassevāti veditabbāntīti. Dvīsu kammaṃ vipaccanāṭṭhānesu paṭisandhināma mahantaṃṭhānaṃ hoti. Tasmā tadā vipaccantaṃ kammaṃ attano sāmattiyaṇurūpaṃ nātiṭhānaṃ vipākam janetum sakkoti. Pavattiyam pana nānāṭhānesu nānākiṭṭhehi vipaccati. Tasmā tadā vipaccantaṃ kammaṃ attano sāmattiyaṇurūpaṃ vipaccetum nasakkoti. Pañcaviññāṇaṭṭhānādisu parittakesu vipaccamānaṃ ṭhānā nurūpaṃ vipaccati.

Tadārammaṇaṭṭhāne vipaccamānaṃ yebhuyyena javanā nurūpaṃ vipaccati. Tasmā soḷasakamaggo dvādasakamaggo ahētu kaṭṭhakanti evamekekassa kammassa vipākappabhedo pavattotitaṃ pabhedamḍassetuṃ tatthāpītiādīmāha.

Kusalam duvidham sampajānakataṃ asampajānakatanti. Tattha kammā yūhanakāle antamaso heṭṭhā vuttaṃ diṭṭhujukammañāṇampi suṭṭhu yojetvā kataṃ sampajānakataṃnāma. Yathāha-kammañca kammaphalañca saddahitvā kataṃ sampajānakataṃ nāmāti. Diṭṭhujukammañāṇa mattampi ayojetvā taṃ asampajānakataṃ nāma. Yathāha-kammaṃpi kammaphalampi ajānitvā kataṃ asampajānakataṃ nāmāti. Tattha sampajānakataṃ tihetukaṃ hoti. Asampajānakataṃ duhetukaṃ. Yathāha-sampajānakaraṇaṃ pana catuññasampayuttehi hoti. Asampajāna karaṇaṃ catūhi ñāṇavippayuttehīti. Tattha ekamekaṃ ukkaṭṭhaṃ omakanti duvidham hoti. Tattha kusalasamaye pariyaṭṭhite nīvaraṇadhammevā attukkamsana paravambhanādi ke pāpadhammevā suṭṭhu sodhetvā kataṃ ukkaṭṭhaṃ nāma. Asodhetvā kataṃ tehivokiṇṇaṃ omakaṃnāma. Apica, yaṃ katvā pacchā lābhā vata me. Naca vata me alābhā. Suladdham vata me. Naca vata me dulladdham. Yassa me īdisaṃ puññaṃ pasutanti evaṃ punappaṇaṃ anumoditaṃ. Taṃ ukkaṭṭhaṃ. Yaṃ katvā pacchā yenakenaci kāraṇena duṭṭhukataṃ mayāti vippaṭisāro uppajjati. Taṃomakaṃ. Evaṃ catubbidhassa kammassa vasena catubbidham vipāka koṭṭhāsaṃ vibhajitvā dassetuṃ tathāpītiādi māha. **Tatthāpīti** tasmim kāmāvacarakusalepi. **Tihetukamukkaṭṭhanti** ukkaṭṭhabhūtaṃ paṇītabhūtaṃ catubbidham tihetukaṃ. **Tihetukapaṭisandhinti** catubbidham tihetuka paṭisandhivipākaṃ. Etthaca ekacetanā ekameva paṭisandhim deti. Pavattivipākaṃ pana asaṅkhyeyyesupi bhavesu detiyeva. Ettha siyā –

Ekapupphaṃ yajitvāna, sahasakappakoṭiyo;
Devesuca manussesu, sesena parinibbutoti hi vuttaṃ.

Tasmā ekā cetanā ekameva paṭisandhim detīti idaṃ na yujjati. Na na yujjati. Pubbāparacetanāhi saddhim sahasakappa koṭi parimāṇassa vattabbattā. Cittañhināma ekaccharakkhaṇepi anekasata sahasa koṭisaṅkhaṃ uppajjati. Tatociratarekālevattabbameva natthīti. Sahassa kappakoṭiyoti ca sahasaāyukappakoṭiyo sahasa atabhāvakoṭiyoti nettiaṭṭhakathāyaṃ vuttaṃ. Pubbāparacetanānañca paṭisandhidānabhāvo kosalaṃyuttakena dīpetabbo. Ekapiṇḍapātadānasmimhi ekācetanādve paṭisandhiyo na deti. Pubbapacchimacetanāvasena sattakkhattuṃ sagge sattakkhattuṃ seṭṭhikule nibbattoti hi saṃyuttaṭṭhakathāyaṃ vuttaṃ. Tihetu kaṃpi kammaṃ paṭipakkhehi abhibhuyyamaṇaṃ vihatasāmatthiyaṃ hutvā tihetukavipākaṃ janetuṃ na sakkoti. Naca taṃ atidubbalampi samānaṃ kosallaṃsaṅkhātena ñāṇena yuttattā atibyāmuḷhapaccaya bhūhaṃ jaccandhādivipattisahitaṃ ahetukavipākaṃ janetīti vuttaṃ tihetukamomakantiādi. **Dvādasavipākānivipaccati**. Ayaṃ dvāda sakamaggonāma **ahetukavipākāneva vipaccati**. Idaṃ ahētu kaṭṭhakaṃnāma. Evaṃ tipītakacūḷanāgattheravādasena vipākappavattiṃ dassetvā idāni moravāpivāsi mahādattattheravādaṃ dassetuṃ gāthamāha. So hi therovipākānaṃ asaṅkhārikatā sasaṅkhārikatāca kammavaseneva siddhāpi katvā asaṅkhāraṃ kammaṃ sasaṅkhāravipākāni na paccati. Sasaṅkhāraṃkammaṃ asaṅkhāravipākāni navaccatīti vadati.

Yathā mukhanimittaṃ nāma mukhe sannisinne sannisīdati. Calante calati. Evaṃ payogena asādhaniyānaṃ vipākānaṃ tikkhamandatā visesabhūto saṅkhārabhedo kammavaseneva vattabbo. Na payogavasena. Itarathā kammavisesena tikkhamandajātānaṃ tesam sannihitapaccayamattena mandatikkhatāpattināma siyāti. Ahētu kavipākānaṃ pana paridubbalattā aparibyattova tikkhamandatā visesoti ubhayakammanibbattanti adhippāyo. Yasmā pana tesam sasaṅkhārāsasaṅkhārabhāvo paṭisandhivasenavā tadārammaṇavasenavā uppattikāle pubbapayogasaṅkhātassa paccayavisesassa bhāvābhāvena vattuṃ yutto. Na kammāgamanavasena, na hi kammabhāve saṅkhāro bhavantare vipākāni visesetuṃ yutto. Tasmā imaṃ vādaṃ kecivādaṃnāma karonto **kecanāti** āha.

Imasmim kecivāde asaṅkhārikakamme sasaṅkhārika vipākāni sasaṅkhārikakammeca asaṅkhārikavipākāni vajjetvā catūsu tihe tukukkaṭṭhesu kammesu asaṅkhārikadvaye vipākāni

paṭisandhiyaṃ dve, pavattiyaṃ dvādasa. Sasaṅkhārikadvaye paṭisandhiyaṃ dve, pavattiyaṃ dvādasa. Catūsu dvihetukomakakammesu asaṅkhārikadvaye paṭisandhiyaṃ dve, pavattiyaṃ dasa. Sasaṅkhārikadvaye paṭisandhiyaṃ dve, pavattiyaṃ dasa. Tathā catūsu dvihetukukkaṭṭhesu. Catūsu dvihetukomakesu pana paṭisandhiyaṃ ekaṃ ahetukaṃ pavattiyaṃ aṭṭhaahetukānīti evaṃ vipākānaṃ dve dvādasakamaggā cattāro dasakamaggā ekaṃ ahetukaṭṭhakañca hontī, taṃsabbhaṃ saṅgahetvā dassetuṃ tesanti gāthamāha.

Tesanti tesam kesañci therānaṃ vāde. Aṭṭhasālīniyaṃ pana tihetukena kammaena paṭisandhitihetukāva hoti. Na duhetukā nacaahetukā. Duhetukena kammaena paṭisandhi duhetukāpi hoti ahetukāpi. Tihetukā pana nahotīti evaṃ pavatto mahādhammarakkhitattheravādopi āgato. Tattha yathā duhetukena hīnena kammaena ahetukā paṭisandhi avassaṃ icchitabbā hoti. Tathā tihetukenapi hīnena kammaena duhetukāpi paṭisandhi avassaṃ icchitabbāyevāti katvā idha ayaṃvādo therena na gahitoti veditabbo. Paṭisambhidāmagge pana-gatisampattiyā ñāṇasampayutte aṭṭhannaṃ hetūnaṃ paccayā upapatti hoti. Kusalassa kammaassa javanakkhaṇe tayo hetū kusalā. Nikantikkhaṇe dve hetū kusalā. Paṭisandhikkhaṇe tayo hetū abyākatātica gati sampattiyā ñāṇa vippayutte channaṃ hetūnaṃ paccayā upapatti hohi. Kusalassa kammaassa javanakkhaṇe dve hetū kusalā. Nikantikkhaṇe dve hetū akusalā. Paṭisandhikkhaṇe dve hetū abyākatātica evaṃ tihetukena kammaena paṭisandhi tihetukāva vuttā. Dvihetukena kammaena dvihetukāva. Na pana gatisampattiyā ñāṇavippayutte sattannaṃ hetūnaṃ paccayātiadinā tihetukena kammaena dvihetukā paṭisandhi vuttā. Naca catunnaṃ hetūnaṃ paccayātiadinā dvihetukena kammaena ahetukā paṭisandhīti.

Tattha pana tīsu khaṇesu sahaajāta hetūnaṃ vasena hetu mūlakova ayaṃ desanāvāroti katvā anokāsātāya ahetukapaṭisandhi tattha navuttā. Na pana alabbhamānatāya. Dvihetuka paṭisandhi pana anokāsāyeva nahotī. Alabbha mānattāyeva sā navuttāti sakkā viññātuṃ. Tasmā yuttito pāḷiyeva balavatarāti katvā mahādhammarakkhitattheravādova pāḷiyā sametūti paṭisambhidāmaggaṭṭhakathāyaṃ vutto. Tīkākārā pana kamma sarikkhaka vipākadassanattamaṃ sāvasesa pāṭhova mahātherena vuttoti icchanti. Evañca katvā aṭṭhasālīniyaṃpi tipītakacūlanāgattheravādova pamāṇaṃ katvā vuttoti.

Vibhāvaniyaṃ idāni ekāya cetanāya dvādasavipākāni ettheva dasakamaggopi ahetukaṭṭhakampiti āgatassa moravāpivāsī mahādhammarakkhitattherassāti pāṭho.

Moravāpivāsīmahādattattherassāti pana vattabbo. Mahādhamma rakkhitattheravādopi pana ettha ekadesena saṅgahitoyeva. Tasmimpi hi asaṅkhārikaṃ kammaṃ asaṅkhārikavipākameva deti. No sasaṅkhārikaṃ. Sasaṅkhārikaṃ kammaṃ sasaṅkhārikavipākameva deti. No asaṅkhārikanti āgatamevāti. [Kāmāvacarakammaṃ]

154. Rūpāvacarakamme **parittanti** duvidhaṃ parittaṃ apaguṇatā yavā hīnatāyavā. Tattha yaṃ paṇītehi chandādīhi yuttaṃpi abhāvitaṃ hoti paṭiladdhamattaṃ, taṃ apaguṇatāya parittaṃnāma. Yaṃ sandhāya yaṃ apaguṇaṃ hoti, upari jhānassa paccayo bhavituṃ na sakkoti, idaṃ parittaṃnāmāti aṭṭhasālīniyaṃ vuttaṃ. Yaṃ pana subhāvitaṃpi samānaṃ hīnehi chandādīhi yuttaṃ hoti. Taṃ hīnatāya parittaṃnāma. Yaṃ sandhāya yassa āyūhanakkhaṇe chandovā hīno hoti. Vīriyaṃvā, cittaṃvā, vīmaṃsāvā, taṃ hīnaṃnāmāti tattheva vuttaṃ. **Majjhimaṃpi** duvidhaṃ. Tattha nātipaguṇa tāya majjhimaṃ sandhāya nāti subhāvito majjhimoti visuddhimagge vuttaṃ. Majjhimehi chandādīhi yuttatāya majjhimaṃ sandhāya yassa āyūhanakkhaṇe te dhammā majjhimā honti. Taṃ majjhimanti aṭṭha sālīniyaṃ vuttaṃ. **Paṇītaṃpi** duvidhaṃ. Tattha atipaguṇatāya paṇītaṃ sandhāya subhāvito vasippatto paṇītoti visuddhimagge vuttaṃ. Paṇītehi pana chandādīhi yuttatāya paṇītaṃ sandhāya yassa āyūhanakkhaṇe te dhammā paṇītā honti. Taṃ paṇītanti aṭṭhasālīniyaṃ vuttaṃ. Tattha yāni apaguṇatādi vasena parittādīni vuttāni, tāni idha nādhippetāni. Yāni pana hīnādīhi chandādīhi yuttatāya parittādīni vuttāni, tāneva idhādhippetāni. Imāneva hi tividhāsu bhūmīsu tividhaṃ brahmupapattibhedam sādhentīti. Itthīnaṃ jhānesu vasīpattānaṃpi chandādīnaṃ apaṇītatāya mahābrahmesu anuppajjanañcetta sādhaṃ. Tenevaca aṭṭhakathāyaṃ chandādivasena siddhāni hīna majjhima

pañītāni aṭṭhārasapabhedena vibhajitvā imāni aṭṭhārasa kammadvārāni nāma imehi pabhāvitattā imesaṃ vasena aṭṭhārasakhattiyā aṭṭhārasa brāhmaṇā aṭṭhārasa vessā aṭṭhārasa suddā aṭṭhacattā līsa gotta caraṇāni veditabbānīti vuttaṃ. Etena hi devānaṃpi brahmūnaṃpi labbhamānaṃ upapattibhedam upalakkhetīti.

[161] Vibhāvaniyaṃ pana

“Paṭiladdhamattaṃ anāseviṭaṃ parittanti avisesatova aṭṭhakathāyaṃ vuttaṃ. Tathā nāti subhāviṭaṃ amaripuṇṇavasībhāvaṃ majjhimam. Ativiyasubhāviṭaṃ pana sabbaso paripuṇṇa vasībhāvaṃ pañīta’nti vuttaṃ. Taṃ sabbaṃ idha nayujjatiyeva.

Tañhi upari jhānassa paccayo bhaviṭuṃ samatthāsamatthaṃvā hāna bhāgiyatādi visesaṃ vā sandhāya vuttaṃ. Na pana upapatti bhedajanaka visesanti.

[162] Yañca tattha

“Ācariyena panettha parittaṃpi īsakaṃ laddhāsevanameva adhippetanti dissati. Tathā hānena nāmarūpaparicchede-

Samānāsevane laddhe, vijjamāne mahabbale;
Aladdhā tādisaṃ hetu, mabhiññā na vipaccatīti.

Samānabhūmikato va āsevana lābhena balava bhāvato mahaggatadhammānaṃ vipākādānaṃ vatvā tadabhāvato abhiññāya avipaccanaṃ vutta’nti vuttaṃ. Taṃpi vicāretabbameva.

Yathā hi ariyamaggacetaṇā attanā samānabhūmakajavanato aladdhāsevanāpi samānā vipākaṃ na detīti natthi. Tathā ādi kammikavīthiyaṃ ekavāramattabhūtā sabbasamāpatti vīthīsuca sabbapatha mabhūtā mahaggatācetaṇāpi samānabhūmakadhammato aladdhāsevana tāya dubbalattā vipākaṃ nadetīti natthīti na na sakkā viññātuntī. Ettha siyā- tasseva rūpāvacaṇassa kusalassa kammassa katattā upacitattā vipākaṃ.La. Pathamaṃ jhānaṃ upasampajja viharatīti vuttaṃ. Na ca sā cetanā upacitānāma hoti. Samānabhūmaka dhammato aladdhāsevanattāti.Na. Maggacetaṇāyapi avipākatāpattito. Sāpihi tasseva lokuttarassa kusalassa jhānassa katattā bhāvitattā vipākaṃ. La. Pathamaṃ jhānaṃ upasampajja viharatīti vuttā. Naca sāpi samānabhūmakadhammato laddhāsevanā hotīti. Ubhayattha pana pathamasamannāhāro paṭṭhāya upacinitvā bhāvetvā āgatattā asamānabhūmika javanehipi laddhāsevana bhāvaṃ paṭicca upacitattā bhāvitattāca vuttāti sakkā vattuntī. Tasmā ādi kammikabhūtāpi mahaggatācetaṇā maraṇā sanne laddhā abbhūṇhā āsanna kammabhūtā vipākaṃ nadetīti na vattabbā. Abhiññācetaṇā ca samānabhūmakehipi nānāvajjanavīthijavanehi suṭṭhutarāṃ laddhāsevanattā tikkhatarabhūtā kathaṃ dubbalānāma siyā. Teneva ayaṃ vādo anuṭṭikāyaṃ paṭikkhitto. Vuttañhi tattha keci pana samāna bhūmakato āsevanalābhena balavantāni jhānānīti tāni vipākaṃ denti. Abhiññā pana satipi jhānabhāve tadabhāvato tasmim tasmim ārammaṇe āgantukattāvā dubbalā. Tasmā vipākaṃ na dentīti vadanti. Taṃ akāraṇaṃ. Punappunaṃ parikkamma vasena abhiññā yapi vasībhāvasambhavatoti. Catutthajjhānasamādhissa pana ānisaṃsabhūtā abhiññācetaṇā tassa phalāsadisā phalaṭṭhāne ṭhitā, tasmā sā vipākaṃ nadetīti icchanti ṭikākārā. Tassa pana iddhi vikubbanādikiccaṃ vipaccanakiccatopi mahantataraṃ hoti. Sabbathā menaca vikubbanādikiccaṃ sādhentiyā vipaccanathāmepe tena thāmena saha parikkhayaṃ gacchati. Tasmā sā puna vipākaṃ nadetīti yujjatiyeva. **Pañcamajjhānanti** abhiññābhāvaṃ apattaṃ parittātibhedena tividhaṃ pañcamajjhānaṃ. **Tadevāti** pañcamajjhānameva. **Saññāvirāgaṃ bhāvetvāti** citte sati rajjana dussana muyhanāni honti. Tasmim asati diṭṭhadhammanibbānappattonāma hotīti evaṃ citte eva ādīnavaṃ disvā acittakabhavapatthanā sahitaṃ vāyokasiṇevā kesaṇī matena paricchinnākāsa kasiṇevā saññāvirāgaṃ bhāvetvā. **Asaññasattesu uppajjantīti** yena yena iriyāpathena idha maranti, teneva tattha uppajjanti. Kammakiriyavādītīthiyā evāti adhippāyo. Na hi akammakiriyavādīnaṃ jhānabhāvanā nāma atthīti. **Anāgāmino pana**

suddhāvāsesu uppajjantīti suddhāvāsesu pana anāgāmino eva uppajjanti. Na aññe sakadāgāmiādayoti attho. Etena anāgāmīnaṃ aññasmimpi brahmaloke uppatti appaṭisiddhā hoti. Anāgāmīsuca saddhādhiko avihesu uppajjati, vīriyādhiko atappesu. Satādhiko sudassesu. Samādhādhiko sudassīsu. Paññādhiko akaniṭṭhesūti. Yathākkamaṃ bhāvetvā yathākkamaṃ arūpesu uppajjantīti yojanā. Etthaca **pathamajjhānaṃ parittaṃ bhāvetvā**tiādi sabbamaṃ pathamajjhānādīnaṃ yathā sakaṃ vipaccanabhūmi vavatthānavasena vuttaṃ. Samāpattilābhino pana puthujjana sotāpanna sakadāgāmino attanā laddhasamāpattīnaṃ vipaccanabhūmīsu icchitabhūmiyaṃ nibbattanti. Tesu puthujjano nikantiyā sati kāmalokepi nibbattatiyeva. Itare pana jhāne apari hīne sati kāmalokepi nibbattatiyeva. Itare pana jhāne aparihīne sati kāmabhāve nikantiṇāma tesam na sambhavatīti pariḥīnājjhānāeva tattha nibbattanti.

[163] Vibhāvanīyaṃ pana

Tesampi sotāpannasakadāgāmīnaṃ nikantivasena kāmabhāvenibbattiṃ icchantena ‘‘tathā kāmabhāvepi kāmāvacara kammabalena. Ijjhati bhikkhave sīlavato cetopaṇidhi visuddhattāti hi vutta’’nti vuttaṃ. Taṃ na yujjati.

Tehi jhāne aparihīne ekantena brahmalokagāminoeva honti. Yato te jhānaanāgāminonāmāti vuccanti. Jhānapari hānica tesam taṃtaṃ palibodha vaseneva hoti. Na pana kāma rāgādivasena. Kasmā, maggasahāyena jhānena suṭṭhu vikkhambhitattā. Vuttañhetam ānguttare-sahadassanuppādā bhikkhave ariyasāvakaṃ tīṇi saṃyojanāni mahīyanti. La. So vivicceva. La. Pathamaṃ jhānaṃ upasampajja viharati. Tasmim ce samaye bhikkhave ariyasāvako kālaṅkareyya. Natthi tassa saṃyojanaṃ. Yena saṃyojanena saṃyutto ariyasāvako puna yīmaṃ lokaṃ āgaccheyyāti. Etthaca tasmim ce samayetiādīna so laddhajjhānaṃ aparihāpetvā ce kālaṅkaroti. Ekantena brahmalokameva gamissati. Parihāpentassa pana taṃ saṃyojanaṃ pākātimevāti dasseti. Paṭisambhidāmaggaṭṭhakathāyaṅca jhānalābhīnaṃ pana anāgāmissaca brahmalokeyeva paṭisandhidānato paccayo nahotīti vuttaṃ. Tattha jhānalābhīnanti mahāgatajjhānalābhīnaṃ sotāpanna sakadāgāmīnaṃ. Paccayo nahotīti tesam vipassanānikanti taṃhā kāmasugatipaṭisandhiyā na hotīti attho.

Tasmā tesam dvinnam sekhānaṃ kuppadhammānaṃpi satam jhāne vijjamāne kāmabhāve nikanti nāma natthīti veditabbaṃ. Anāgāmissa pana niddāyantasseva satthena gīvaṃ chinditvā māriyamānassapi jhānaṃ alabhitvā cavanaṃnāma natthi. So hi samādhismim paripūrakārīti vutto. Itthiyo pana aṭṭhasamāpattīyo labhitvā anantare bhāve akaniṭṭhe nibbattamānāpi adhipatibhūtesu mahābrahmesu na nibbattanti. Hīnājjhāsāyattā purohita pārisajjesueva nibbattanti. Tathāhi aṭṭhakathāsu yaṃ itthī brahmattaṃ kareyya, netam ṭhānaṃ vijjātīti suttapadassa atthavacane brahmattanti mahābrahmattaṃ adhippetam. Itthī ca idha jhānaṃ bhāvetvā kālam katvā brahmapārisajjānaṃ saḥabyataṃ upapajjati, na mahābrahmānanti vuttaṃ. Brahmapārisajjānanti cettha brahmapurohitānaṃpi saṅghaṇaṃ veditabbaṃ. Te hi brahmānaṃ parisabhūtā hontīti. Vuttañhetam saṃyuttake –

Athakho bhikkhave sikhībhagavā abhituṃ bhikkhuṃ āmantesi. Paṭibhātu taṃ brāhmaṇa brahmunoca brahmapārisāyaca brahmapārisajjānaṅca dhammikathāti.

Parisabhāveca sati parisāsu jātāpināma hontīti. Tattha brahmunoti mahābrahmuno. Brahmapārisāyāti brahmapurohita gaṇassāti attho. Nanu brahmapārisajjānanti vuttattā na mahābrahmānanti ettheva tesam saṅghaṇaṃ yuttanti ce. Na. Yaṃ itthī sakkattaṃ kareyya, mārattaṃ kareyya, brahmattaṃ kareyya, netam ṭhānaṃ vijjātīti evaṃ adhipati bhūtehi sakkādīhi saha vuttattā idha adhipatipaṭikkhipanasseva sambhavato. Teneva hi nettiyaṃ-itthī mahābrahmā siyāti, netam ṭhānaṃ vijjātīti vuttaṃ. Ettāvata vephalādīsu uparibrahmalokesupī purohitapārisajjabrahmānaṃ atthitā siddhā hoti. Teneva saṃyuttaṭṭhakathāyaṃ therānaṃhi bhaṇḍagāhakaḍaḥarā viya brahmānaṃpi pārisajjabrahmāno nāma hontīti vuttaṃ.

Vibhāvanīyaṃ pana

“Itthiyopi pana ariyāvā anariyāvā aṭṭhasamāpattilā bhiniyo brahmapārisajjesuyeva nibbattantīti aṭṭhakathāyaṃ vutta’nti vuttaṃ.

Tattha brahmapārisajjesuyevāti akaniṭṭhe nibbattamānāpi brahmānaṃ paricārika brahmesueva nibbattanti. Na mahābrahmesūti attho daṭṭhabbo.

Mañimañjūsāyaṃ pana

Brahmapārisajjesuyeva nibbattanti, na brahmapurohitādīsūti vuttaṃ. Taṃ na gahetabbaṃ.

Yañca **tattha**

Sāmāvatiyādīnaṃ pathamaṃ brahmapārisajjesu nibbattanaṃ vuttaṃ. Taṃpi aṭṭhakathāya na sameti.

Yasmā pana tā imasmiṃ attabhāve ariyaphalāni sacchākaṃsu. Tasmā tattha anāgāminiyo suddhāvāsesu uppannā. Itarā kāci tāvatimśesu kāci paranimmitavasavattīsu uppannā icceva udānaṭṭhakathāyaṃ vuttanti. Apicettha vehapphale akaniṭṭhe catutthāruppeti tīsu bhavaggesu nibbattā ariyā aññattha nuppajjanti. Sesabrahmalokesu nibbattā heṭṭhābhūmīsu nuppajjantīti. [Kammacatukkaṃ].

155. Āyukkhayena maraṇaṃ kammakkhayena maraṇantiādīnā yojetabbaṃ. Tattha aparikkhīṇeyeva kammānubhāve tasmiṃ tasmiṃ sattanikāye yathāniyamitassa āyuparimāṇassa parikkhayena pariṇaṇṇena maraṇaṃ **āyukkhaya maraṇaṃnāma**. Tasmiṃ tasmiṃ bhava dubbalena kammena nibbattassa sattassa aparikkhīṇeyeva āyuparimāṇe kevalaṃ kammassattiparikkhayena antarāva maraṇaṃ **kammakkhaya maraṇaṃnāma**. Tadubhayassa samaṃ parikkhayena maraṇaṃ **ubhayakkhaya maraṇaṃnāma**. Dharamānēpi tadubhaye purimabhavesuvā imasmiṃvābhava katena upaghātakakammena ajjhatabhahiddhābhūte nānārogābādha pathavīpavesa asanipātādike jīvitantarāye samuṭṭhāpetvā dussimārakalāburājādīnaṃviya antarāva uparodhita khandhasantānassa sattassa maraṇaṃ **upacchedaka maraṇaṃnāma**. Nanu cettha marantānaṃ nāma sabbesaṃpi taṃtaṃbhavaṃ janentaṃ kammaṃ khiyyatiyeva. Athakasmā itarepi vuttāti. Vuccate, sarasavaseneva hi kammassāmatthiyassa khayō idha kammakkhayoti adhippeto. Ye pana dasavassa vīsativassa yāva asaṅkhyeyya vassādi vasena nānāyukappavidhāyakā tasmiṃ tasmiṃ sattanikāye sabbajana sādharmaṇā sattānaṃ ajjhatabhahiddhasambhūtā utuāhārānāma hontī. Te tassa tassa āyukappassa ṭhitikarā vuddhikarā hānikarācāti tividhā hontī. Tattha akusalamūlesu vaḍḍhamānesu hānikarā vaḍḍhanti. Kusalamūlesu vaḍḍhamānesu buddhikarā vaḍḍhanti. Ubhayamūlesu samaṃ ṭhitesu ṭhitikarā samaṃ pavattanti. Tesā vasena sattānaṃ āyukappo katthaci sadā ṭhitibhāgo hoti. Katthaci kadāci hānibhāgo kadāci vuddhibhāgo hoti. Tayopi cete ṭhitikarādayo taṃtaṃsattanikāyaṃ ajjhottharamānā āyuṃ paricchindantā pavattantīti asaṅkhyeyyāyuka saṃvattanikaṃ cakkavattisampatti saṃvattanikañca kammaṃ dasavassike kāle vipaccamānaṃ tadanurūpaṃeva bhogañca issariyañca datvā dasavasena khiyyati. Taṃ taṃ sattanikāya pariyaṇṇā satta santānabhūtā rūpadhammā sabbaññu buddhānaṃ khandhasantāna bhūtāpi taggatikā tadanūvattikā eva hutvā pariṇamanti aññatra iddhimaya vijjāmayā rasāyanavidhi jīvita saṅkhāra vidūhīti. Vuttañhettaṃ mahāpadānasuttaṭṭhakathāyaṃ –

Sabbepi sabbaññubuddhā asaṅkhyeyyāyukā. Kasmā te asaṅkhyeyyaṃ na aṭṭhaṃsūti. Utubhojanavipattiyā. Utubhojanavasena hi āyu hāyatipi vaḍḍhatipīti.

Tasmā padhānanissayabhūtesu dvisamuṭṭhānika rūpadhammesu taṃ taṃ āyukappavasena pariṇamantesu jīyamānesu yāvamahantaṃpi kammaṃ attano vipākādhiṭṭhānassa abhāvā khiyyatiyeva. Socassa khayō na sarasena hoti. Athakho āyusaṅkhāravipattiyā eva hotīti idha āyukkhayo visuṃ gahitoti. Esanayo upacchedakamaraṇepi netabbo. Tattha upacchedakamaraṇanti akālamaraṇaṃ vuccati. Tañhipavattamānaṃ upacchedakakammunāvā pavattati. Aññehivā aneka sahassehi kāraṇehi. Tāni pana

pāliyaṃ mūlabhedato saṃkhipitvā aṭṭhadhā vuttāni. Katamāni pana tānīti. Atthi vātasamuṭṭhānā ābādhā. Atthi vittasamuṭṭhānā. Atthi semha samuṭṭhānā. Atthi sannipātikā. Atthi utusamuṭṭhānā. Atthi visamaparihārajā. Atthi opakkamikā. Atthi kammavipākajā ābādhāti. Tattha kammavipākajā keci upapīlakakammajākeci upacchedakakammajā. Yasmā pana vāto kuppamāno sītuṇhādīhi dasahi kāraṇehi kuppanti. Tesuca ekameva kamma vipākajaṃ hoti. Sesāni pana akammavipākajānīti milinda pañhe vuttaṃ. Yasmāca kammavipākajāpi ābādhā uppajjamānā vāta kuppanādīhi vinā na uppajjanti. Tasmā keci vātasamuṭṭhānādayopi kammavipākajā hontiyevāti daṭṭhabbā.

Tattha sannipātikāti vātādīnaṃ dvinnaṃ tiṇṇaṃvā sannipatitānaṃ vasena pavattā. Ye pana loke sattānaṃ payogamuttā sayamaṃ jātā nānābhayupaddavā. Te utusamuṭṭhānesu saṅgahitāti daṭṭhabbā. Visamaparihārajāti anisammakārīnaṃ anekavidhe visame vipattimukhe attānaṃ payojantānaṃ tato tatovā tattha tattha vā patana pakkhalaṇādivasena pavattā. Opakkamikāti attanāvā parehi rājacoraverīhivā amanussavālayakkhadevatāhivā vālamigādīhivā katānaṃ payogānaṃ vasena pavattā. Kuppitā hi devatā sakalaṃ rajjaṃvā raṭṭhaṃvā dīpakaṃvā ekappahārena asesamaṃ katvā vināsenti daṇḍakarattaṃ majjharattaṃ kaliṅgarattaṃ mātaṅgarattaṃ viya. Anekaśahassevā vālayakkhe vissajjanti vesāliyaṃ viya. Rakkhasevā vissajjanti suvaṇṇabhūmiyaṃviya. Vuttañhetamaṃ aṅguttare yakkhā vāle amanusse ossajjanti. Tena bahumanussā kālaṃ karontīti. Aṭṭhakathāyaṃpi yakkhāti yakkhādhipatino. Vāle amanusse ossajjantīti caṇḍe yakkhe manussapathe vissajjanti. Te laddhokāsā mahājanaṃ jīvitakkhayaṃ pāpentīti vuttaṃ. Tattha vissajjantīti visamācāra bahule manusse disvā bhinnasaddhā yakkhasenāpatino manussānaṃ atthāya pubbeviya ārakkhamaṃ gaṇhantīti attho. Janapadanaganigamaḡamesuceva tasmaṃ tasmaṃ puggaleca vattabbameva natthi. Aṅguttare vuttā satthadubbhikkharoga kappāpi idha vattabbāti. Kammavipākajāti upapīlakopaghātakānaṃ kammānaṃ vipaccanavasena pavattā ābādhāti attho. Evaṃ akālamaraṇaṃ upacchedakammunāvā aññehivā anekasahashehi kāraṇehi hotīti. Yehi keci loke dissanti. Paṇaharā jīvitavināsakā nānārogāvā nānābādhāvā nānābhayā nivā nānā daṇḍāvā nānā upaddavu pasaggāvā. Sabbe te sakakamma samuṭṭhitāeva attano sādharmaṇāti natthi. Parakammasamuṭṭhitāpi attano sādharmaṇāeva. Sakakammasamuṭṭhitāpi paresamaṃ sādharmaṇāeva. Kammena vinā yato kutoci samuṭṭhitāpi attano vā paresamaṃvā sādharmaṇāeva. Sabbasādharmaṇakammasamuṭṭhitesu vattabbameva natthi. Yathāha-visuddhimagge.

Yathā catumahāpathe thapite lakkhamhi sabbadisāhi āgatā sarasattitomarapāsānādayo nipatanti. Evaṃ kāyepi sabbupaddavā nipatantīti.

Yesuca rajjaraṭṭhādīsū te uppajjanti. Tattha yejanā upāya kusalāvā na honti. Naca paṭikārakusalā. Nāpi parihāra kusalā. Kammañca yesamaṃ dubbalaṃ hoti. Uppanna anatto bala vā. Tejanaṃ vināpi upacchedakammunā tato na muccanti. Maraṇaṃ vā maraṇamattaṃvā dukkhaṃ pāpuṇantiyeva. Kalyāṇabhūtaṃpi hi kammaṃ attano balavataraṃ yatokutoci samuṭṭhitamaṃ rogaṃvā ābādhaṃ vā bhayaṃvā daṇḍaṃvā upaddavupasaggaṃvā paṭibāhituṃ nasakkoti. Rogādayoeva taṃkhepenti pavattanti. Yathā hi udakaṃ attano balavataraṃ aggaṃ paṭibāhituṃ na sakkoti. Aggieva taṃ khepento pavattatīti evamaṃ sampadamidaṃ daṭṭhabbamaṃ. Imesañca sattānaṃ pakatiyāpi kammaṃ dubbalabhāvo mahāniddeṣe jarā suttaniddeṣena visuddhi maggeca maraṇassati niddeṣe āyu dubbalatoti padassa niddeṣe na dīpetabbo. Yathāha –

Āyunāmetaṃ abalaṃ dubbalaṃ. Tathā hi sattānaṃ jīvitaṃ assāsapassāsupanibandhañceva iriyāpathupanibandhañca sītuṇhu panibandhañca mahābhūtupanibandhañca āhārupanibandhañcātīdi.

Tathā kāyabahusādharmaṇato animittatoti imesamaṃ padānaṃ niddesenapi pākātoyeva. Kammanibbattassa hi āyuno tiṇṇagge ussāvabindusseva paridubbalabhāve pāliyaṃ aṭṭhakathā yañca vutte kammasāpi tatheva paridubbalatā siddhā hotīti. Evañcetaṃ sampaṭicchitabbaṃ. Itarathā sabbamaṃ pubbekatahetudiṭṭhināma siyā. Yathāha –

Idhekacco samaṇovā brāhmaṇovā evaṃvādī hoti evaṃ diṭṭhī. Yaṃ kiñcāyaṃpurisapuggalo paṭisaṃvedeti sukhaṃvā dukkhaṃvā adukkhamasukhaṃvā. Sabbhaṃ taṃ pubbekatahetūti.

Ayañca attho milindapañhe tīsu thānesu vitthārato āgato. Yathāvuttehi pana anekasahashehi kāraṇehi pavattamaraṇaṃpi akālamaraṇatāsāmaññaena idha upacchedakamaraṇe saṅgahitanti daṭṭhabbaṃ.

Vibhāvaniyaṃ

“Idaṃ pana nerayikānaṃ uttarakuruvāsinaṃ kesañci devānañca nahotīti” vuttaṃ.

Yathā pana mahāṭīkāyaṃ kesañci petānaṃ ito ñātake hi dinnāṃ puññapatti anumoditvā tañkhaṇeyeva cavitvā sugatiyaṃ nibbattānaṃ kusalabhūtaṃ upacchedakaṃ vuttaṃ. Tathā kesañci nerayi kānaṃpi yamarañño samanuyuñjanakālādīsu attanā katapuññaṃ anussarivā tañkhaṇeyeva cavitvā sugatiyaṃ nibbattānaṃ upacche dakamaraṇaṃnāma na na sakkā vattaṃ. Kesañci tāvatiṃsādīnaṃ devānañca taṃ upacchedakamaraṇaṃ hotiyeva. Tathā hi subrahmadeva putta saṃyuttaṭṭhakathāyaṃ atha rukkhaṃ abhiruḷhā upacchedakakammādi vasenaekappahārenea kālañkatvā avīcimhi nibbattāti vuttaṃ. Tattha rukkhaṃ tāvatiṃse pāricchattakarukkhaṃ. Abhiruḷhāti āruḷhā pañca satadevaccharāyo. Manopadosika khiṭṭāpadosika devānaṃ maraṇaṃ mahābodhisattānaṃ dighāyuke devalokevā brahmalokevā nibbattānaṃ adhimutti kālañkiriyaṃ channattheragodhikattherādīnaṃviya sayameva satthaṃ āharitvā parinibbāyantānaṃ maraṇaṃ ettheva saṅgayhatīti daṭṭhabbaṃ. **Tathācāti** tehi pakārehica. Marantānaṃ channaṃ dvārānaṃ aññatarasmim paccupaṭṭhātīti sambandho. **Maraṇakāleti** maraṇāsannakāle. **Yathārahanti** sugatiduggatigāmīnaṃ arahānurūpaṃ. Yepana khīṇāsavā katthaci nuppajjanti. Tesu sukkhavipassakānaṃ pakatiyā yatho paṭṭhitaṃ nāmarūpa meva antima javanānaṃ ārammaṇaṃhoti. Samāpattilābhīnaṃ pana jhānasamanantare parinibbāyantānaṃ kasiṇanimittādikaṃ. Paccavekkhanasamanantare parinibbāyantānaṃ jhānaṅgāni abhiññāsamanantare parinibbāyantānaṃ attano karajarūpaṃ. Jīvita samasīnaṃ pana aggamaggassa paccavekkhanasamanantare parinibbāyantānaṃ maggaṅgādini antimajavanānaṃ ārammaṇaṃ hotīti. Parinibbānacuticittassa pana sabbesaṃpi ādito attano attano paṭisaṃdhiyāyathāgahitaṃ kammādīsu aññatarameva ārammaṇaṃ hotīti daṭṭhabbaṃ. Yepana anejosanti mārabbhayaṃ kālamakarīmūnīti imaṃ suttapadaṃ disvā nibbānameva bhagavato parinibbānacutiyaṃ ārammaṇanti vadanti. Te tena sayameva abhidhamme ārammaṇattikesu attano akovidataṃ dassenti. Yathāha –

Katame dhammā parittārammaṇā, sabbo kāmāvacaravipāko kriyamanodhātu kriyāhetuka manoviññāna dhātu somanassasahagatā. Ime dhammā parittārammaṇāti.

Yasmā pana parinibbānaṃnāma santi atthāyeva hoti. Ajjhāsāyo cassa ekantena santininnoyeva hoti. Tasmā anejosanti mārabbhāti suttapadaṃ vuttaṃ. Tathā hi aṭṭhakathāyaṃ santimārabbhāti anupādisesaṃ nibbānaṃ ārabha paṭicca sandhāyāti vuttaṃ. Na pana vuttaṃ ārabha ālambitvā ārammaṇaṃ katvāti. Theragāthaṭṭhakathāyaṃ pana santimārabbhāti santimā anupādisesaṃ nibbānaṃ ārammaṇaṃ katvāti vuttaṃ. Taṃ mahāparinibbānapāliyaṃ tadaṭṭhakathāyaca nasameti. Tāsu hi bhagavato parinibbānaṃ jhānaṅga paccavekkhanasamanantaranti vuttaṃ. Etthaca purimāni dve samanantarāni parinibbānasuttaṭṭhakathāsu vuttāni. Abhiññāsamanantaraṃ udānaṭṭhakathādīsu āgataṃ. Yathāha-vuṭṭhahitvā parinibbāyīti iddhicittato vuṭṭhahitvā bhavaṅgacittena parinibbāyīti. Aggamaggassa paccavekkhanasamanantaraṃ puggalapaññattiṭṭhakathādīsu āgataṃ. Yathāha-ekūnavīsati me paccavekkhanaññaṇe paṭiṭṭhāya bhavaṅgaṃ otarivā parinibbāyātīti. Saṃyuttaṭṭhakathāyaṃ pana arahattamaggānantaraṃ phalaṃ. Phalānantaraṃ bhavaṅgato vuṭṭhāya paccavekkhanaṃ. Taṃ pana paripuññaṃvā hoti aparipuññaṃvā. Tikhiṇena asinā sīse chijjamānepi ekaṃvā dvevā paccavekkhanāni uppajjantiyevāti vuttaṃ.

[164] Vibhāvaniyaṃ pana

Evam vavatthānaṃ akatvā yaṃ vuttaṃ. “Katthaci pana anuppajjamānassa khīṇāsavassa yathopaṭṭhitāṃ nāmarūpadhammādikameva cutipariyosānānaṃ gocarabhāvaṃ gacchati. Na kamma kammani mittādayoti.” Taṃ na sundaraṃ.

Na hi tassa cuticittaṃ kammakammanimittādayo ārammaṇaṃ nakaroti. Naca cutiyā gahitāni kammādīnīnaṃ sabbasattānaṃpi bhavantarassa atthāya bhavanti. **Abhimukhībhūtaṃ** kammantarassa okāsaṃ adatvā attano okāsaṃ katvā paccupaṭṭhitāṃ. Kammaṃvā paccupaṭṭhātīti sambandho. **Upaladdhapubbanti** tassa kamma ārammaṇa bhūtaṃ deyyadhamma vatthādīni parapāṇādīnica sandhāya vuttaṃ. **Upakaraṇabhūtaṃ** kammasiddhiyā upakaraṇabhūtaṃ parivārabhūtaṃ paṭiggāhakādīni āvudhabhaṇḍādīnica sandhāya vuttaṃ. Yasmāca lakkhaṇa saṃyutte gavādīni vadhitvā rāsikatāni aṭṭhipuñjādīni kammanimittāni hutvā upaṭṭhahanti aṭṭhakathāyaṃ vuttaṃ. Tasmā kammāsambandhāni yaṃ kānīci vatthūni vā ārammaṇānīva idha upakaraṇe saṅgahi tānīti daṭṭhabbāni. **Upalabhitabbanti** duggatinimittaṃ sandhāya vuttaṃ. **Upabhogabhūtaṃ** sugatinimittaṃ. Ubhayaṃpi vā yaṃ kāyapaṭibaddhaṃ hutvā labhitabbaṃ hoti. Taṃ upalabhitabbaṃnāma. Apaṭibaddhaṃ hutvā kevalaṃ sukhadukkānubhavanatthāya labhitabbaṃ upabhoga bhūtaṃnāma. Etthaca aggijāla lohakumbhi nirayapāla nirayasunakhādīni nirayanimittaṃ. Taṃ pana kesañci janānaṃ attano vasaṇatthāneviya upaṭṭhāti. Kesañci tato tato āgantvā attānaṃ saṃparivārentaṃ viya upaṭṭhāti. Yathāha-tassa gilānaseyyāya nippanassa nirayo upaṭṭhāti. Soṇagiri-pādato mahantā mahantā sunakhā āgantvā khādītukāmāviya saṃparivāresunti. Tathā deva nimittepi. Yathāha-nandavana cittalatāvana missakavana phārusakavana vimānāniceva devanātakānica parivāretvā ṭhitānīviya ahesunti. Kesañci pana sayāṃ tattha tattha patvā diṭṭhaṃviya upaṭṭhāti. Kambalayānasadiso mātukucchivaṇṇo manussanimittaṃ. Pabbatapāda vanasaṇḍa narakapapātādīni tiracchānagatānaṃ nimittānīti. **Kammabalenāti** idāni paṭisandhiṃ janetuṃ paccupaṭṭhitassa kamma ānubhāvena. Idañca yebhuyyavasena vuttaṃ. Pakatiyā pana āciṇṇa bhūtaṃvā taṅkhaṇakatāṃvā parena sarāpitaṃvā sayameva anussaritaṃvā pakatiyāva kukkucchaṃvā somanassaṃvā janetvā ṭhitaṃvā kammaṃvā tassanimittaṃvā aññenapi kāraṇabalena paccupaṭṭhātiye vāti daṭṭhabbaṃ. **Tameva tatopaṭṭhitāṃ ārammaṇaṃ ārabhāti** idāñca yebhuyyavasena vuttaṃ. Tato hi kesañci pathamaṃ kammabalenavā kāraṇantarenavā pāpapakkhiyesu upaṭṭhahantesu puna duṭṭha gāmaṇi rañño viya pubbakatāṃ balavantaṃ puññaṃ anussarantānaṃvā soṇatthera vitu viya taṅkhaṇeyeva pasādanakāṃ puññaṃ karontānaṃvā pacchā kalyāṇapakkhiyāni upaṭṭhahanti. Tathā kesañci pathamaṃ kalyāṇa pakkhiyesu upaṭṭhahantesu dhammāsokarañño viya pacchā kenaci kāraṇena domanassaṃ uppādetvā pāpakamma ārammaṇa okāsaṃ karontānaṃ pāpapakkhiyāni upaṭṭhahanti. **Vipaccamānaka kammānurūpanti** yassa vipaccamānakaṃ kammaṃ kusalaṃ hoti. Tassa parisuddhaṃ kusalacittasantaṃ abhiṇṇaṃ pavattati. Yassa taṃ akusalaṃ hoti. Tassa upakiliṭṭhaṃ akusala cittasantaṃ abhiṇṇaṃ pavattatīti attho. Tathā hi aṭṭhakathāyaṃpi sugatigāmīnaṃ kusaluppatti hetubhūtaṃ paṇītaṃ ārammaṇaṃ āpātamāgacchatītica duggatigāmīnaṃ akusaluppatti hetubhūtaṃ hīnārammaṇaṃ āpāta māgacchatī tica vuttaṃ. Mūlaṭṭikāyaṃ mahāṭṭikāyañca āsanne akusalaṃ duggatīyaṃ kusalañca sugatīyaṃ paṭisandhiyā upanissayo hotīti vuttaṃ. Ettha siyā, yadā devaccharādīni sagganimittāni upaṭṭhahanti. Tadā tāni taṅhāya assādentasseva sato cavantassa kathanti. Vuccate. Upakiliṭṭhaṃyeva tassa cittaṃ. Tasmā duggatīeva tassa pāṭikaṅkhitabbāti vadanti. Yasmā pana paṭisambhidā magge tādisiyā taṅhāya kusalakamma sahakāri kāraṇa bhāvo vutto. Yathāha-nikantikkhaṇe dve hetū akusalāti. Tasmā sugatibhavanibbattanepi ayaṃ taṅhā ekantena kusala kamma niyāmakasahakāripaccayabhūtaṃ katvā tassa tānivā devaccharādīni kusalakamma kammanimittānīva assādentasseva sato cavantassa sātaṅhā tadupatthambhikāeva bhavituṃ arahati. Na taṃ paṭibāhikāti sakkā viññātuṃ. Yañca nimittasādagadhitaṃvā bhikkhave viññānaṃ tiṭṭhamānaṃ tiṭṭhati, anubyañjanassādagadhitaṃ vā. Tasmīṃ ce bhikkhave samaye kālaṅkareyya, ṭhānametaṃ vijjati. Yaṃ dvinnāṃgatīnaṃ aññataragatiṃ gaccheyya, nirayaṃvā tiracchāna yonimvātiādittapariyāye vuttaṃ. Taṃpi attano paresaṃ vā hatthapādādisu gadhitaṃ taṅhaṃ sandhāya vuttaṃ. Nakammādisūti sakkā vattuntī. **Upalabhitabba bhavānurūpanti** upalabhitabbo bhavo yadi sugatibhavo hoti, taṃ assādanākārena. Yadi duggatibhavo hoti, taṃ anassādanākārenāti evaṃ upalabhi tabbassa bhavassa anurūpaṃ. **Tatthoṇatāṃvāti** tasmīṃ yatho paṭṭhite ārammaṇe oṇamantaṃeva. Tathā hi bālaṇḍitasutte tānissa tasmīṃ samaye olambanti ajjholambanti abhippalambanti vuttaṃ. Tattha

tānissāti assa puggalassa tāni puññāpuñña kammāni. Kammāsīsenā vuttāni kammanimitta gatinimittānīca. Olambantīti tassa cittasantānaṃ attanīeva oṇamantaṃ ajjhoṇamantaṃ abhimukhībhūtaṃ katvā lambanti palambanti. Bandhitvā ākaḍḍhantāni viya upaṭṭhahantīti attho. Evaṃ pana tesu tathā olambantesu taṃcittasantānaṃ tesu ninnapoṇapabbhārameva hotīti vuttaṃ tatthoṇataṃvāti. Tathā hi aṭṭhakathāyaṃ kilesabalavināmitaṃ sutvā tadevaṃ pavattamānaṃ taṇhāavijjānaṃ appahīnattā avijjāya paṭicchā ditādīnave tasmim visaye taṇhā nāmeti sahaḷāta saṅkhārā khipantīti vuttaṃ. Tattha tanti viññānaṃ. Cittasantānaṃ icceva attho. Tasmimvisayeti kammādiārammaṇe. Taṇhānāmetīti vaṭṭamūlaka taṇhā taṃ tasmim oṇamantaṃ katvā niyojetīti attho.

[165] Vibhāvaniyaṃ pana

“Tatthoṇataṃvāti tasmim upapajjitabbabhāve oṇataṃ viya oṇataṃeva vā”ti vuttaṃ. Taṃ aṭṭhakathāya na sameti.

Abhiñhanti nirantaraṃ. Tathāpavatti pana saṅikaṃ marantānaṃ eva labbhati. Lahuka maraṇena marantānaṃ pana na labbhatīti vuttaṃ. **Bāhullenāti**

[166] Yaṃ pana vibhāvaniyaṃ

“Bāhullenātietha adhippāyo yebhuyyena bhavantareti etha vuttanayena daṭṭhabbo”ti vuttaṃ. Taṃ na yujjati.

Na hi tasmim vuttānaṃ asaṅghasattānaṃ cittasantānassa abhiñhappagattipasaṅgonāma atthi. Cittasantānasseva tesam abhāvatoṭi. Idāni aparena pakārena kammu paṭṭhānaṃ dassetuṃ **tamevavā pana.La. Dvārapattaṃ hotīti** vuttaṃ. Tattha **abhinavakaraṇavasena dvārappattaṃ hotīti** pubbe katasaññaṃ ajanetvā taṅkhaṇe eva karaṇākāraṃ janetvā attānaṃ abhinavaṃ viya katvā manodvāre taṃsadisajavanappavattivasena pattaṃ pātubhūtaṃ hotīti attho. Yathā hi imasmim bhāvepavattaṃ kiñci pākaṭaṃ kammaṃ asukasmim kāle idaṃnāmayākatanti evaṃ pubbekatasaññaṃ janetvāpi upaṭṭhāti. Na tathā bhavantare pavattaṃ bhavapaṭicchannaṃ imasmim bhāve pavattaṃ apākaṭaṅcāti. Apica, idhekacce buddhādīsu tīsu vatthusu dānapūjādīvasena āciṅṅabahulā honti. Te maraṇanti kābādhābalena visīdappattā kiñci dukkhaṃajānitvā visīdantare pubbe viya bhikkhusaṅghassa dānaṃ dentācetiyaṃ vandantā pūjaṃ karontā vipasannacittā pamodacittā eva honti. Tabbiparītena pāpakammabahulāpi vattabbāti. Idampi dvārappattamevāti. Sabbañcetaṃ lakkhaṇa saṃyuttaṭṭhakathāya dīpetabbaṃ. Tattha asilomapeṭādī paṭṭhūsu tassa ukkhittāsikabhāvova nimittaṃ ahoṣīti ca. Tassa sattiyā vijjhanaka bhāvova nimittaṃ ahoṣītica. Tassa usunā vijjhanakabhāvova nimittaṃ ahoṣītica. Tassa patodasūciyā vijjhanakabhāvova nimittaṃ ahoṣītica. Tassa sūcīhi patodanadukkhaṃ paccanubhavitum kammameva nimittaṃ katvā sūcilomapeṭo jātotica evaṃ bahuṃdvāra pattavasena kammupaṭṭhānaṃ vuttanti. Tattha hi tassa ukkhittāsika bhāvova nimittaṃ ahoṣīti tassa niraye pacitvā puna āsanna maraṇassa taṃkammaṃ tadā tassa ukkhittāsikasaññaṃ janetvā dvāra pattavasena nimittaṃ ahoṣīti attho. Esanayo sesesupīti. Soca dvārappattākāro kammakoṭṭhāsiko eva hoti. Tassa sattassaca apākaṭonāma natthīti tassa paṭisandhiyā gahaṇayogyatā jātāti. **Paccāsanna maraṇassāti** antima javanapavattivasena puna āsannamaraṇassa. **Vīthicittā vasānevāti** kāmabhavato cavitvā kāmabhāveyeva uppajjamānānaṃ javana pariyoṣānānaṃvā tadārammaṇa pariyoṣānānaṃvā vīthicittānaṃ avasāne. Itaresaṃ pana javanapariyoṣānānaṃvā vīthicittānaṃ avasāneti attho. Ayamatto aṭṭhakathāyaṃpi vuttoyeva. Yathāhaṭaṃ ārabha uppanāya tadārammaṇapariyoṣānāya suddhāyavā javanavīthiyā anantaraṃ cuticittaṃ uppajjati.

[167] Vibhāvaniyaṃ pana

“Tattha kāmabhavato cavitvā tattheva uppajjamānānaṃ tadārammaṇapariyoṣānāni sesānaṃ javanapariyoṣānānīti dhammānusāraṇiyaṃ vutta”nti vuttaṃ. Taṃ na sundaraṃ.

Aṭṭhakathāyañhi paripuṇṇaṃ katvā vutte kiṃparipuṇṇāya dhammā nusāraṇiyāti.

Bhavaṅgakkhayevāti bhavaṅgāvasānevā iccevattho. Yadi duvidhapīthiccittato paraṃ pañcavokāre vatthurūpaṃ catuvokāre cittasantānaṃ dviccittakkhaṇāyusesaṃ hoti. Tadā ekassa bhavaṅgassa avasāneti vuttaṃ hoti. Etthaca somanassa paṭisandhikassa domanassacittena cavantassa āgantukabhavaṅga sambhavo. Taṃ sambhaveca satī aññabhavaṅgasambhavopi avāri totī suvuttametaṃ bhavaṅgakkhayevāti. **Tasmimniruddhāvasāneti** tasmimniruddhe tassa niruddhassa avasāne. Ye pana loke cuti paṭisandhīnaṃ antare eko antarābhavonāma atthi. Yattha uppanno satto dibbacakkhuko viya iddhimā viya ca khaṇena icchitaṃ ṭhānaṃ gantuṃ samattho. Ito cutā keci tattha uppajjitvā mātāpitu samāgamādīni āgamentaṃ sattāhaṃvā atirekaṃ sattāhaṃvā tiṭṭhantīti laddhiṃ gaṇhanti. Tesam taṃnisedhetuṃ **tassānantarame**vāti vuttaṃ. Savatthukaṃ pañcavokāre avatthukamevavā catuvokāre. **Yathārahanti** kusalahūtassavā akusalabhūtassa vā saṅkhārassa arahānurūpaṃ. Avijjātaṇhānusayā kusalahūtassa appahīnaṭṭhena akusalabhūtassa pana sahaajātabhāvenāpi parivārabhūtā mūlahūtāca hontīti attho. Pariyutṭhānāvattaṃ apatvā kusalābyākatacittasantānenāpi aviruddhabhāvena anurūpaṃ. Anubandhamānovā seti, anuanuvānirantaraṃ setīti anusayo. Anusayabhūtāya avijjāya parikkhittoti **avijjānusayaparikkhitto**. Taṇhānusayo mūlaṃ etassāti **taṇhānusaya mūlako**. Avijjānusaya mūlakena taṇhānusaya parikkhittenāti pana vutte suṭṭhutaṃ yujjati. Avijjā hi taṇhāyapi mūlahūtā hoti. Tāya paṭicchādītādīnave eva ārammaṇe taṇhāpavattisambhavato. Taṇhā ca pana sahakāri kāraṇa bhāvena taṃ taṃ saṅkhāraṃ niyojenti pavattatīti saṅkhārassa parivārabhūtā balavaāsanna sahaāyabhūtā hotīti.

Etthaca akusalakamma sahaajātānaṃvā kammanikanti nimittanikanti sahaajātānaṃvā vipaṭisāra saha jātānaṃvā maraṇāsanna javana sahaajātānaṃvā avijjātaṇhānaṃpi dhammato anusayasadisatāya anusaya vohārasambhavo veditabbo. Apica, anusayānāma paṭisandhijanane kusalasaṅkhārassapi balavasahaāyabhūtā hontī. Tasmā idha ekantānusayabhūtāeva pariyattāti kiṃsahaajātānaṃ gahaṇenāti. Teneva aṭṭhakathāyampi taṇhā avijjānaṃ appahīnattāti evaṃ appahīnasaddena ekantānusayāeva gahitāti. **Saṅkhārenāti** paṭisandhijanakammasaṅkhātena cetanāsaṅkhārena. Taṃ sahaajātaphassādīdhammasamūhenapivā. Sopi hi upanissayabhāve na paṭisandhiṃ janetiyevāti. Athavā, saṅkhārenāti maraṇāsanna javanaviññāṇa sahaajātena cetanāsaṅkhārena. Taṃ sahaajāta phassādīdhammasamūhenapivā. Tadubhayaṃpi hi kammādivisaye khipanaka saṅkhārabhāvena paṭisandhiṃ janeti. Tathā hi aṭṭhakathāyaṃ taṇhā avijjānaṃ appahīnattā avijjāya paṭicchādītādīnave tasmimn visaye taṇhā nāmeti. Sahaajātasaṅkhārā khipantīti vuttaṃ. Mūlaṭīkāyañca sahaajātasaṅkhārāti cutiāsannajavanaviññāṇasahaajātā cetanā. Sabbepivā phassādayoti vuttaṃ. Sakalena pana vacanena aggamaggena appahīnā avijjākammādivisayevā bhavantarevā ādīnavaṃ paṭicchādeti, tathā rūpāyeva taṇhā tadubhayaṃpi cittaasantānaṃ nāmeti. Yathāvuttasaṅkhārā taṃ tattha khipanti. Tasmimn abhinava viññāṇapātubhāvaṃ sādhetīti dasseti.

Sampayuttehi pariggayhamānanti phassādīhi sampayuttadhammehi parivāretvā gayhamānaṃ. **Sahaajātānanti** nāmarūpadhammānaṃ. **Adhiṭṭhāna bhāvenāti** nissayabhāvena. **Pubbaṅgamabhūtanti** padhānabhūtaṃ. Pada dvayena vijjānanadhātuyā ativiya mahānubhāvabhāvaṃ dasseti. Yathā hi loke ekasmiṃ mahānubhāve purisavisesse jāyamāne parivārabhūtā sahaajātajanāca tassa upabhoga paribhogabhūtā pāsādakapparukkādayova tena saha jāyanti. Evaṃ sampadamidaṃ daṭṭhabbaṃ. **Bhavantarapaṭisandhānavasenāti** ekasmiṃbhāve niruddhe tena saha nirantaraṃ katvā bhavantarassa paṭisandhana vasena. **Uppajjamānameva patiṭṭhāti** na purimabhāve uppajjitvā anirujjhivā ṭhītibhāvena gantvā bhavantare patiṭṭhātīti adhippāyo. Na hi uppannuppannā dhammā pakatikālepi desantaraṃvā khaṇantaraṃvāsaṅkantā nāma atthi. Kuto maraṇakāle bhavantaraṃ. Yañca anamataggo yaṃ bhikkhave saṃsāro. Pubbakoṭi napaññāyati avijjānīvaraṇānaṃ sattānaṃ taṇhāsamaṃyojanānaṃ sandhāvataṃ saṃsaratanti vuttaṃ, taṃpi pariyāyena vuttaṃ. Yesañhi avijjā taṇhāsaṅkhārānaṃ vasena bhavantare paṭisandhi pātubhavati. Teca pubbe yassa santāne pavattanti, so tesam hetuphalasambandhena bhavantaraṃ sandhāvati saṃsaratīti vuccatīti. Tatoyevaca tassā paṭisandhiyā purimabhāvaṃpari yāpannehi hetūhi vinā anuppajjanaṃpi siddhaṃ hotīti. Paṭighosa padīpamuddhādīni cettha nidassanānīti.

Etthāti maraṇuppatitthāne. **Mandappavattānīti** kammadubbalaḥāvena vatthudubbalaḥāvenaca mandam hutvā pavattāni. Tasmā paccuppannā lambaṇakā labbhatīti sambandho. **Dharantesvevāti** tiṭṭhantesu eva. **Paṭisandhi bhavaṅgānaṃpīti** paṭisandhiyāpi katipayabhavaṅgānaṃpī. **Iti katvāti** iminā kāraṇena. Kāmañcettha aṭṭhakathāyaṃ gatinimittamaṇā nibbattanakaokāse eko vaṇṇo upaṭṭhātīti vatvā sabbesu gatinimittavāresu gabhinimittam vaṇṇāyatanaṃeva manodvāra gahitameva paccuppannamevaca dassitam. Tathāpi chadevalokato attano santikaṃ āgate dibbaratheyeva gatinimittam katvā cavantānaṃ dhammikaupāsaka duṭṭhagāmaṇi abhayarājādīnaṃ vasena taṃpi kammanimittamviya chabbidhampi chadvāragahitaṃpī paccuppannamatītaṃpī sambhavatīti adhippāyena taṃkammanimittena nibbisesam katvā **kāmāvacarapaṭisandhiyā.La. Upalabbhatīti** vuttam. Tathā cavantā hi dibbavaṇṇopi devatānaṃ ānubhāvena cakkhunā diṭṭhoyeva hoti. Dibbo rathasaddovā tūriyasaddovā vacanasaddovā sotena sutoyeva. Dibbagandhopi ghānena ghāyitoyeva. Nirayato uggatena aggijālena dayhamānakāyena cavantānaṃ devadatta nandayakkha nandamaṇa vakādīnaṃ khuracakke āsajjamānaṃ mittavindakādīnaṃ vasena phoṭṭhabbaṃpī sambhavatiyeva. Rasadhammāpi yathā sambhavaṃ yojetabbāti. Vuttaṅga saccasaṅkhepe –

Pañcadvāre siyā sandhi, vinā kammaṃ dvigocareti.

Mahāṭīkāyaṃpi ayamatto vuttoyeva. Yadā pana antima javanavīthito pubbabhāge yathopaṭṭhitaṃ gatinimittam antimajavanassa ārammaṇam hoti. Tadā taṃ atītaṃpī hotiyevāti. Aṭṭhakathāyaṃ pana santativasena tassa paccuppannatāva vuttā. Tathā vaṇṇārammaṇabhāvo manodvārena gahitabhāvoca yebhuyyena vuttoti veditabbo. Itarathā kammanimittampi paccuppannabhūtam pañcadvāreeva aṭṭhakathāyaṃ dassitanti taṃpī manodvāragahitaṃ paccuppannabhūtam pañcārammaṇamvā dhammārammaṇamvā nasambhavatīti vattabbaṃ siyā. Naca sakkā tathā vuttam. Kasmā, cakkhum aniccato dukkhato anattato vipassantītiādīnā paṭṭhāne vuttassa chaḷārammaṇa bhūtassa purejātapaccayassa manodvārika maraṇāsanna javanānaṃpī icchitabbattā. Tatoyevaca tadanubandhāya paṭisandhiyāpi sambhava totī.

[168] Vibhāvanīyaṃ pana

Tathā avicāretvā yaṃvuttam “paccuppannārammaṇesu āpātamāgatesu manodvāre gatinimittavasena pañcadvāre kammanimittavasena”ti. Taṃ na sundaram.

[169] Yaṅga tattha

“Chadvāragahitanti kammanimittam chadvāragahitaṃ gatinimittam chaṭṭhadvāragahitanti yathāsambhavaṃ yojetabba”nti vuttam. Taṃpi na yujjati.

Evañhi sati kammaṃ viya gatinimittampi therena bhinditvā vuttam siyā. Naca taṃ vuttanayena pañcadvāragahitaṃ na sambhavatīti.

[170] Yaṅga tattha

Aṭṭhakathāyaṃ mūla ṭīkādisuca yebhuyyavasena vuttam sāvasesapāṭham avicāretvā “aṭṭhakathāyaṃ pana gatinimittam manodvāre āpātamāgacchatīti vuttattā tadārammaṇāyaca pañcadvārikapaṭisandhiyā adassitattā mūlaṭīkādisuca kamma balena upaṭṭhāpitaṃ vaṇṇāyatanaṃ supinaṃ passantassaviya dibba cakkhussa viyaca manodvāreyeva gocarabhāvaṃ gacchatīti niyamevā vuttattā tesam vacanaṃ nasampaṭicchanti ācariyā”ti vuttam. Tatthapi asampaṭicchantaṃ aññaṃ kāraṇam natthi aññaṭra avicāraṇāyāti.

Paccuppannamatītanti ettha yassa javanāvasānāya pañcadvārikavīthiyā cavanaṃ hoti. Tassa paṭisandhiyā dvinnāṅga bhavaṅgānaṃ paccuppannā rammaṇatā upalabbhati. Yassa

tadārammaṇāvasānāya, tassa paṭisandhiyā eva. Yassa pana javanāvasānāya paccuppannārammaṇāya manodvārikavīthiyā cavanam hoti, tassa paṭisandhiyā channañca bhavaṅgānaṃ. Yassa pana tadāraṇāvasānāya, tassa paṭisandhiyā catunnañca bhavaṅgānanti. Etthaca ārammaṇe bahutarāyuke balavantepi vatthudubbalabhāve sati kāmasattānampi javanāvasānā vīthi hotiyevāti daṭṭhabbam. Aṭṭhakathāyaṃ pana tadārammaṇāvasānāya eva yojitattā manodvāre paṭisandhito param catunnaṃ bhavaṅgānaṃ pañcadvāre paṭisandhiyāeva paccuppannārammaṇatā vuttā. Tadārammaṇa pariyoṣānāyavā suddhāyavā javanavīthiyāti vuttattā pana idha javanāvasānāpi yojitāti veditabbā.

[171] Vibhāvaniyaṃ pana

Evam avicāretvā yaṃ vuttaṃ “manodvāre tāva paṭisandhiyā catunnaṃ bhavaṅgānañca pañcadvāre paṭisandhiyāeva paccuppannārammaṇatā labbhatī”tiādi. Taṃ anupapannaṃ.

Etthaca yasmā paṭisandhijanakasēva kammaṣa ārammaṇaṃvā upakaraṇaṃvā kammanimittanti adhippetam. Pañcadvārikakammañca paṭisandhijanakameva na hoti. Tasmā tadā paṭisandhijanakaṃ kammaṃ purimabhāgeeva manodvāravasena siddham hoti. Tassaca ārammaṇabhūtaeva upakaraṇabhūtaevavā ekantena kammanimittamāna hoti. Yaṃ pana pañcadvārikassa antimajavanassa ārammaṇam hoti. Taṃ purimena niruddhena ārammaṇena vatthuto abhinnattāvā tassadisattāvā kammanimittanteva vuccatīti. Tathā hi vuttaṃ mūlaṭṭikāyaṃ pañcadvāre āpātaṃ āgacchantam paccuppannam kammanimittam āsannakatakammārammaṇa santatiyaṃ uppannam taṃsadisañca daṭṭhabbanti. Tattha yesu deyyadhammavattḥsu cetiyādīsuvā yehi sathādīhivā pubbe kammaṃ siddham. Tesam paccakkhe dharamānataṃ sandhāya santatiyaṃ uppannanti vuttaṃ. Tehi sadi savatthūnaṃ dharamānataṃ sandhāya taṃsadisañcāti vuttaṃ. Sadisavatthūnīpi hi kammaṣa laddhokāsakāraṇāni hontiyeva. Yathā taṃ ito parittakena pāpakammaṇa niraye ussadasāmate nibbattānaṃ pubbe puññakaraṇakāle laddhanimittasadiṣam nirayaggijālānaṃ saddam sutvāvā vaṇṇam disvāvā puññam saritvā cavitvā sagge nibbattānaṃ aggijālāni viyāti.

[172] Vibhāvaniyaṃ pana

Mūlaṭṭikāpāṭham avicāretvā taṃsadisañcātiēttā naṭṭhacakāraṃ pāṭham disvā “manodvārika javanānaṃ ārammaṇabhūtena saha samānattā tadekasantatipatitam cutiāsannajavanagahi taṃpi paccuppannam vaṇṇādikaṃ kammanimitta bhāvena vutta”nti vuttaṃ. Taṃ anupapannameva.

Apica, aṭṭhakathāyaṃ aparassa maraṇasamaye ñātakā ayaṃ tāta tavatthāya buddhapūjā karīyati. Cittam pasādehīti vatvā pupphadāmadhajapaṭākādivasena rūpārammaṇaṃvā dhammasavanatūriyapūjādi vasena saddārammaṇaṃvā dhūmavāsagandhādivasena gandhārammaṇaṃvā idaṃ tāva sāyassu, tavatthāya dātabbam deyyadhammanti vatvā madhuphāni tādivasena rasārammaṇaṃvā idaṃ tāva phusassu, tavatthāya dātabbam deyyadhammanti vatvā cīnapāta somārapaṭādivasena phoṭṭhabbā rammaṇaṃvā pañcadvāre upasaṃharantīti vuttaṃ. Tattha rūpasaddagandhārammaṇāni sandhāya ṭṭikāyaṃ santatiyaṃ uppannanti vuttaṃ. Rasaphoṭṭhabbā rammaṇāni sandhāya taṃsadisañcāti vuttaṃ. Tāni hi pathamaṃ sāyita phusitāni aññāni honti. Pacchā dinnāni aññānīti etthaca evam upasaṃhaṭāni rūpārammaṇādīni pathamaṃ pañcadvārena gahetvā acavitvā pacchā puna atthi dāni evarūpānīti suddhena manodvārena gahetvā cavantānaṃ tāni manodvāragahitāni paccuppannabhūtanī kammanimittāni hontīti veditabbānīti. Pathamatatīyārūpa paṭisandhīnaṃ paññatti bhūtam dutīyacatutthārūpapaṭisandhīnaṃ mahaggatabhūtantī vuttaṃ **yathārahanti**. Āruppesu uparibhūminibbattānaṃ arūpīnaṃ heṭṭhimajjhānāni paṭipassambhanti. Na ca te tāni puna āyūhantīti vuttaṃ **heṭṭhimārūpa vajjitāti**. Pamādapakkhe patitvā vissatṭhājjhānānaṃ tatoyevaca appahīnehi orambhāviya saṃyojanehi heṭṭhabhāgaṃ ākaḍḍhita mānasānaṃ kāmabhāve uppajjamānānaṃ tesam thapetvā tihetu kukkaṭṭhabhūtam upacārajjhānacetanaṃ aññaṃ dubbalakammaṃ okāsam nalabhatīti vuttaṃ **tathā kāmātihetukāti**. Tathā hi ānguttaraṭṭha kathāyaṃ-na hi tassa upacārajjhānato

balavataramñāma kammaṃ atthīti vuttaṃ. Tīkāyañca na hi tassa.La. Atthīti iminā tato cavantānaṃ upacārajjhānameva paṭisandhijanakaṃ kammanti dīpetīti vuttanti. Rūpāvacarapaṭisandhi pana tesam natthiyeva. Evañca katvā yamakearūpadhātuyā cutassa arūpadhātuṃ upapajjantassātivā arūpa dhātuyā cutassa kāmādhātuṃ upapajjantassātivā vuttaṃ. Na pana vuttaṃ arūpadhātuyā cutassa rūpadhātuṃ upapajjantassāti. Rūpa lokato cavantānaṃ pana aññaṃ dubbalakammaṃ okāsaṃ nalabhatīti navattabbaṃ. Evamsantepi suṭṭhu vikkhambhitanīvaraṇānaṃ tesam appanā pattajjhānavisesena suparibhāvitacittasantānattā jaccandhādivipatti janakaṃ dvihetukomakakammaṃpi okāsaṃ na labhati. Kuto apāyagāmikammanti vuttaṃ **ahetuka rahiṭā siyunti**.

[173] Vibhāvanīyaṃ pana

“Upacārajjhānā nubhāvene va duhetuka tihetuka paṭisandhiyo siyu”nti vuttaṃ. Taṃ vicāretabbaṃ.

Yadi hi taṃ paṭisandhidānaṃ sandhāya vuttaṃ siyā. Duhetukapaṭi sandhi na yujjati. Na hi suṭṭhu vikkhambhitanīvaraṇānaṃ appanāvīthiyaṃ pavattaṃ upacārajjhānaṃ tihetukomakamñāma sambhavatīti. Atha kammantarassa upatthambhanaṃ sandhāya vuttaṃ siyā. Sayam balavatarassapi sato paṭisandhiṃ adatvā dubbalassa kammantarassa upatthambhane kāraṇaṃ natthīti. Yasmā pana rūpabrahmānaṃ upacārajjhānato aññānīpi kāyavacīmanokammakusalāni uppajjantiyeva tāniye vaca kānīci tihetukomakānīpi kānīci dvihetukukatthānīpi bhavanti. Oḷārikānaṃ pana nīvaraṇānaṃ suṭṭhu vikkhambhitattā savipattikapaṭi sandhijanakāni dvihetukomakāni tesam nuppajjanti. Aparapariyāya bhūtānīca tādisāni tesam okāsaṃ nalabbhanti. Nānārammaṇesuca nesam chandovā nikantivā pavattatiyeva. Yena nānākammānīpi vipaccitūṃ okāsaṃ labhanti. Yenaca te cakkhu sotadvārehipi tato cavanti. Tasmā ettha upacārajjhānena kāraṇaṃ avatvā vuttanayeneva taṃkāraṇaṃ vattaṃ yuttanti daṭṭhabbaṃ. Kāmatihetumhā cutiyā paraṃ sabbā vīsati paṭisandhiyo siyūṃ. Itarā duhetukāhetukacutito paraṃ kāmesveva bhavesu dasapaṭisandhiyo siyunti yojanā. Evaṃ paṭisandhikkhaṇe visayappavattiyā saha vīthimuttacittānaṃ pavattākāraṃ dassetvā idāni pavattikāle paraṃparabhavesuca dassetūṃ **iccevantī**ādīmāha. **Paṭisandhinirodhānantaratoti** paṭisandhiyā nirodhassa bhaṅgassa anantarakālato. **Tamevacittanti** tassadise tabbohāro daṭṭhabbo. Yathā tāniye va osadhānīti. **Yāva cuticittuppādāti** ettha cutiggahaṇena tadāsanna vīthicittānampi gahaṇaṃ daṭṭhabbaṃ. **Asati vīthicittuppādeti** antarantārā vīthicittānaṃ uppattiyā asati. **Bhavassaṅgabhāvenāti** upapattibhavassa aviccheda kāraṇabhāvena. Tasmimīti avattamāne pacchājātapaccayarahitānaṃ rūpadhammānaṃ vassodaka rahiṭānaṃ taruṇasassānaṃ viya milāta bhāvapattiyā upapattibhavo occhijjati. Cuticittaṃ hutvā nirujjhati tameva cittanti sambandho. **Yathākkamaṃ eva parivattantā pavattantīti** yāva parinibbānacutiyā yathākkamaṃ parivattantā pavattantīeva. Na pana parasamaye viya kadāci katthaci nivattiṃ pāpuṇantīti attho.

[174] Vibhāvanīyaṃ pana

“Yāva vaṭṭa mūla samuccheda”ti vuttaṃ, vaṭṭamūlasamucchedo vuccati arahattamaggo. Tato paraṃpi yāvakhandhapariniḥānā pavattantiyeva.

Ihāti imasmim bhava. **Iccayanti** iti ayaṃ. Itisaddo ādiattho. Yathā iha paṭisandhica bhavaṅgañca āvajjanādi vīthiyoca cuticāti ayaṃ cittasantati pavattati. Tathā puna bhavantarepi sandhibhavaṅgādikā ayaṃcittasantati parivattati parivattamānā pavattatīti attho. Idāni yassa vipassanā maggaphalanibbānassa atthāya cittacetāsikānaṃ pabhedapavattisaṅgahā paṭṭhapiyanti. Tadatthaṃ dassento gāthamāha. Tattha **paṭisaṅkhāyāti** paṭisaṅkhāna saṅkhātena vipassanā ñāṇena punappunaṃ ñatvā. **Etanti** yathāvuttaṃ cittacetāsikānaṃ pabhedapavattividhānaṃ. **Adhuvanti** aniccaṃ. **Adhigantvāti** adhigamasāṅkhātena catumaggaññāṇena patilabhitvā sacchikatvā. **Padanti** saupādisesaṃ nibbānaṃ. **Budhāti** paṇḍitā. Suṭṭhu anusaya mattampi asetvā sesakilesehi saddhiṃ ucchinnaṃ yathā vuttasu cittacetāsikesu adhisayitaṃ taṅhāsineha saṅkhātaṃ bandhanaṃ etehīti **susamucchinna sineha bandhanā**. Samanti vūpasamanti

vaṭṭadukkhasantāpā etasminti **samo**. Anupādisesanibbānaṃ. **Essantīti** gamissanti. **Cirāyāti** cirakālaṃ. Sundaraṃ adhigamāvahaṃ sīla dhutaṅgasāṅkhātaṃ vataṃ etesanti **subbatā**. Suparisuddhasīlasallekha vuttinoti attho. Cirāya subbatā budhā etaṃ adhuvaṃ paṭisaṅkhāya accutaṃ padaṃ adhigantvā susamucchinnaśinehabandhanā samaṃ essantīti yojanā.

Iti paramatthadīpaniyānāma abhidhammatthasaṅgahassa

Catutthavaṇṇanāya vīthimutta saṅgahassa

Paramatthadīpanā niṭṭhitā.

Rūpa saṅgaha paramatthadīpanī

156. Evaṃ cittacetāsike dvīhi pabhedappavattīhi dassetvā idāni yathānuppattaṃ rūpaṃ dassento ādigātha māha. Tattha etaṃ parimāṇaṃ assāti **ettāvaṃ**. Tena ettavatā. Nipātapadaṃvā etaṃ. **Hi** saddo padapūraṇe. Pabhedoca pavattica pabhedappavattiyō. Tāhi saha ye vattanti te **sappabhedappavattikā**. Ettāvatā sappabhedappavattikā cittacetāsikā dhammā mayā vibhattā. Idāni rūpaṃ pavuccatīti yojanā. Saṅkhepato uddisanaṃ kathaṃ **samuddeso**. Samuddiṭṭhassa rūpassa puna vibhajanaṃ **vibhāgo**. Samuṭṭhāti rūpaṃ etenāti **samuṭṭhānaṃ**. Kammādi. Kalā vuccanti avayavā. Tā appenti pavisanti etthāti **kalāpo**. Piṇḍīti attho. **Pavattikkamatoti** uppattikkamato. Salakkhaṇato sasambhāratoca mahantāni hutvā bhavanti pātubhavantīti **mahābhūtāni**. Tāni hi attano sabhāvatopi mahantānieva hutvā pātubhavanti upādārūpāni upādāyāti.

[175] Vibhāvaniyaṃ pana mahāṭīkāyañca

“Sasambhāradhātuvasenāti” vuttaṃ. Taṃ anupapannaṃ.

Na hi sasambhāravatthuvaseva tesam ayaṃ vohāro pavattoti sakkā vattuṃ. Naca salakkhaṇato mahattena vinā tesam sasambhāratō mahattaṃnāma sambhavatīti. Tasmā yaṃ tesam indriyānindriyabaddhasantānesu pathavipabbatādivasena samudde macchakacchapādivasena sasambhāratō mahattaṃ. Taṃpi salakkhaṇamahattamūlakamevāti daṭṭhabbaṃ. Mahābhūtātivā loke viśaṃvāda kaṭṭhena māyākārāvā āvisanagahaṇesu acinteyyaṭṭhānaṭṭhena yakkhādayovā vañcakatṭhena yakkhiniyovā vuccanti. Tenevaṭṭhena tehi sadisattā imānīpi mahābhūtāviyāti mahābhūtāni. Ubhayatthapica mahantāni abhūtāni abbhūtānivā etesūti nibbacanaṃ yujjatiyeva.

[176] Vibhāvaniyaṃ pana

Yakkhiniṃ visuṃ upamāmatṭaṃ katvā “manāpavaṇṇasaṅṭhānā dīhivā sattānaṃ vañcīkā yakkhinīdayo viya manāpa itthipurisarūpadassanādinā sattānaṃ vañcakattā mahantāni abhūtāni etesūti mahābhūtāti” vuttaṃ. Taṃ aṭṭhakathā ya na sameti.

Aṭṭhakathāyañhi mahābhūtasāmaññatoti padassa vitthāre eva māyākāro yakkho yakkhinīti tayo mahābhūtā vuttāti. **Catunnañcamahābhūtānanti** upayogatthe sāmivacanaṃ. **Upādāyāti** daḷhaṃ nissāya. Pavattanti pāṭhaseso. Upādāya rūpantivā samāsapadaṃ daṭṭhabbaṃ.

[177] Vibhāvaniyaṃ pana

“Upādāya pavattaṃ rūpaṃ upādārūpanti” vuttaṃ. Taṃ idha na yujjati.

Na hi imasmim pāṭhe katthaci yakāraviraho diṭṭho. Tathā hi mūlaṭīkāyaṃ upādāyati nissayatīti

upādāyaṃ. Tameva rūpantipi vuttaṃ. Pathayatīti pathavī. Sahajātarūpānaṃ patitṭhāna bhāvena pakkhāyati upatṭhātīti attho. Puthu mahantī hutvā jāyatītipi pathavī. Pakārena thavīyati sabbesaṃ rūpasambhāraṇaṃ adhiṭṭhānattā. Ayaṃ tesāṃ adhiṭṭhānā patitṭhānā vatthubhūtā bhūmi bhūtātiadinā nānāppakārena guṇapadena abhitthavīyatīti pathavī. Sāeva nisattanijvatṭhena dhātūti **pathavīdhātu**. Āpeti sahajātarūpāni byāpetvā tiṭṭhati, appāyati vā tāni suṭṭhu brūheti vaḍḍhetīti āpo. Tānivā avippakiṇṇāni katvā bhūso pāti rakkhati, pivativā vivanto viya tāni saṅgaṇhati sampiṇḍetīti āpo. Soyeva dhātūti **āpodhātu**. Te jati tikkhabhāvena samujjalanto viya sahajātadhammānaṃ majjhe pakāsati, tejetivā niseti sahajātadhamme tikkhathāma bale karoti, paripācetivā usmāpetīti tejo, so eva dhātūti **tejodhātu**. Vāyati samīreti desantaruppatti hetubhāvena bhūtasāṅghāṭaṃ desantaraṃ gametīti vāyo. Vāyati vā sahajātadhamme apatamāne katvā vahatīti vāyo. Soeva dhātūti **vāyodhātu**. Tattha kakkhaḷalakkhaṇā pathavī. Ābandhanalakkhaṇo āpo. Uṇhattalakkhaṇo tejo. Vitthambhanalakkhaṇo vāyo. Ettha siyā, kasmā pathavī kakkhaḷalakkhaṇāti vuttā. Nanu sā mudubhūtāpi hotīti. Saccāṃ, mudubhūtāpi pana sā sesabhūtattayaṃ upādāya kakkhaḷā tveva saṅkhyāṃ gacchati. Aññamaññaṃ upādāyeva pana ayaṃ mudu ayaṃ kakkhaḷāti bhavati. Teneva mudukakkhaḷānaṃ dīgharassānaṃ viya anavaṭṭhānatā hoti. Mudubhūtāpi hi tato mudutaraṃ patvā kakkhaḷānāma jātā. Kakkhaḷāpi kakkhaḷataraṃ patvā mudubhūtānāma jātāti. Ābandhanalakkhaṇo āpoti vutto. Soca pakatiudake adhimattoti pakatiudakaṃ baddhaṃ ghanībhūtameva siyāti ce. Na. Ābandhitabbāya pathaviyā tattha paridubbalattāti, yattha pana pathavī balavatī hoti tattheva so baddhataṃ ābandhatīti. Uṇhatta lakkhaṇo tejoti vutto. Evañcasati sītabhāvo tejoyeva na siyāti ce. Na. Usati dahati paripāceti pariṇa tabhāvaṃ gametīti uṇhonāma. Sītabhāvoca dahati paripāceti tabbhāvaṃ gametiyevatī. Vuttañca mūlaṭṭikāyaṃ tejoyeva hi sītaṃ. Himapātasamayādīsu sītassa paripācakatādassana totī. Vitthambhana lakkhaṇo vāyoti vutto. So pana ghana thaddhesu silāthambhādīsu nalabbhatīti ce. Na. Tattha hi pathavī attanā sahajātavāyuvitthambhanaṃ labhitvā thāmapattā thiratarappattāca hutvā vahatīti. Cakkhatīti **cakkhu**. Samavisamaṃ ācikkhati samavisamajānanassa tammūlakattā. Rūpaṃvā assādeti āpātaṃ āgatāgatassa rūpassa anirākaraṇato. Taṃvā vibhāvetīti attho. Suṇātīti **sotaṃ**. Suṇanti suyyantivā ete nāti sotaṃ. Ghāyatīti **ghānaṃ**. Ghāyanti ghāyiyantivā etenāti ghānaṃ. Jīvitanimittaṃ raso jīvitanti vuccati. Tasmim ninnatāya taṃ avhāyatīti **jivhā**. Athavā. Jīvitaṃ vahati etāyavā taṃ vahanti pavattenti jīvitavuttisampādanattāti jivhā. Jītivā jayo parājayovā vuccati. Tadubhayaṃ vahati vahantivā etāyāti jivhā. Sasambhārajivhā. Yathāha –

Purisassa hi jātassa, kudārī jāyate mukhe;
Yāya chindati attānaṃ, naro dubbhāsitaṃ bhaṇanti.

Idha pana taṃ saharitattā jivhāti pasādarūpamo vuccati. Kucchitānaṃ kesādīnaṃ pāpadhammānañca āyo uppattiṭṭhānanti **kāyo**. Sasambhārakāyo. Idha pana taṃ saharito pasāda kāyoeva adhippeto. Pasādantīti **pasādā**. Pasādanti vā ettha candamaṇḍalādīni ārammaṇanimittāni tattha saṃsīdamānāni viya sarūpato sandissantīti pasādā, suparisuddhaādāsamaṇḍasadisā kammajamaṇḍā. Ime pana pañca daṭṭhukāmatādi nidāna kammamuṭṭhāna bhūtapasāda lakkhaṇā rūpādi abhighātāraha bhūtapasādalakkaṇā vā cakkhupasādādayo daṭṭhabbā. Tattha cakkhu tāva setamaṇḍala parikkhittassa kaṇhamaṇḍalassa majjhe ūkāsirapamāne atimukhe thitānaṃ sarīrasaṅṭhānuppatti padesa bhūte diṭṭhamaṇḍale telamiva sattapicupaṭalāni sattaakkhipaṭalāni byāpetvā tiṭṭhati. Sotaṃ sotabilabbhantare aṅguliveṭhanākāraṃ upacitatanutambalomaṃ padesaṃ byāpetvā tiṭṭhati. Ghānaṃ nāsikabbhantare ajapadasaṅṭhānaṃ padesaṃ byāpetvā tiṭṭhati. Jivhā sasambhāra jivhāmajjhe uppala dalagga saṅṭhānaṃ padesaṃ byāpetvā tiṭṭhati. Kāyo pana mahanti yā kappāsa paṭalavaṭṭiyaṃ āsittatelaṃviya thapetvā pācaka tejjassa patitṭhānaṭṭhānaṃ kesagga lomagga nakhagga sukkhacammānīca avasesaṃ sakalasarīraṃ byāpetvā tiṭṭhatīti. Te pana pañca yathārahaṃ pañcadvārikacittānaṃ vatthudvārabhāvaṃ sādheti. Tesuca ekekassa catasso catasso dhātuyo sandhāraṇābandhana paripācana samudīraṇa kiccehi upakāraṃ karonti. Yathākhatti yakumārassa catasso dhātīyo dhāraṇa nahāpana maṇḍana bījāna kiccehīti. Utucittāhārāca naṃ upatthambhenti. Yathā taṃ khattiyakumāraṃ pitu jeṭṭhabhātu jeṭṭhabhaginiovīya. Āyuca naṃ suṭṭhu anupāleti. Yathā taṃ khattiyakumāraṃ disāpāmokkho rājasammato mahābhisakkovīya. Vaṇṇādayoca naṃ parivārenti. Yathā taṃ khattiyakumāraṃ sahajātā amaccaputtā

viyāti. Yasmā pana sattānaṃ cittaṃ nāma vicittaṃ hoti. Cittavicittatāya saññāvicittā. Saññāvicittatāya taṇhāvicittā. Taṇhāvicitta tāya kammāni vicittāni. Kammavicittatāya kammamasuṭṭhānāni bhūtāni vicittāni. Bhūtavicittatāya ime pasādā vicittā. Aññamaññaṃ asadisā honti. Tehi pasādamaṇḍabhūtāpi samānā keci rūpassēva abhighātārahā honti, na saddādīnaṃ. Keci saddādīnaṃ eva, na rūpassāti. Tasmā tesam aññamaññaṃ aññarūpehica lakkhaṇato asaṃmissatā veditabbāti.

Rūpayatīti **rūpaṃ**. Vaṇṇavisesaṃ āpajjitvā hadayaṅgatabhāvaṃ pakāseti. Pakatīyāpi vā yaṃkiñcidabbaṃ samavisamaṃvā pakāse tīti attho. Sappati sotaviññeyyabhāvaṃ gacchatīti **saddo**. Saddayatīti saddo. Taṃ taṃ atthaṃvā attano vatthumvā ācikkhatīti attho. Sadativā taṃ taṃ disaṃvā desaṃvā khaṇena vissarati vippharatīti saddo. Gandhayatīti **gandho**. Attano vatthumsūcētīti attho. Gacchatīti go. Vāto. Tena dhāriyatīti gandho. Rasīyati assādīyatīti **raso**. Rasantivā taṃ assādētīti raso. Phusīyatīti **phoṭṭhabbaṃ**. Phusanañcetha pasādēna saha ghaṭṭanaṃ kalāpantarabhūtehi saddhiṃ paṭihananañca veditabbaṃ. Tadubhayampi āpo dhātuyā natthīti vuttaṃ **āpodhātuvivajjitanti**. Kasmā pana taṃ tassā natthi. Nanu sītātāvā dravatāvā phusitvā gayhatīti. Vuccate, sītātā hi tejoyeva, na āpo. Yadi hi sā āpoyeva siyā. Pakkumite santatte loharasepissa sītātā labbhamānā siyā. So hi raso āpādhiko hotīti. Evaṃ pana nalabbhati. Tasmā sā tejoyeva, na āpoti. Apica, sītuṇhānaṃ ekasmiṃ kalāpe saha appavattanato orapārānaṃ viya tesam anavaṭṭhānatoca viññāyati. Na hi sītakalāpe uṇhaṃ, uṇhakalāpevā sītaṃ saha pavattati. Yasmimca vatthumhi pubbe sītasaññā saṅghāti. Pacchā tato sītatare āgate tasmimyeva puna uṇhasaññā saṅghāti. Pubbe uṇhasaññāyampi eseva nayo. Tathā uṇhe mande sītasaññā saṅghāti. Sīte mande uṇhasaññāti.

Atha pana dravabhāvabhūto āpo phusitvā gayhati. Ayo piṇḍādīsu ābandhanabhūtopi phusitvāva gayheyya. Evañca sati yathā tesu itarāni tīṇi bhūtāni vinā itarītarena visuṃ visuṃ kāyika sukhadukkhānaṃ ārammaṇabhūtāni honti. Tathā sopi vinā itarehi visuṃ kāyikasukhadukkhānaṃ ārammaṇabhūtoeva siyā. Na pana hoti. Yañhi tāni ayopiṇḍādīni phusantānaṃ kāyikaṃ sukhaṃvā dukkhaṃvā uppajjati, taṃ saṅghathaddhatā vasenavā uppajjati. Sītuṇhatāvasenavā abbhantarathambhanassa mandagāḷhatāvasenavā. No aññathāti. Tasmā purimabhāge tīṇi bhūtāni phusitvāva vaṇṇaṃ disvāvā pacchā bhāge suddhena mano viññāṇasantānena dīgharassādīsaṅghānaṃvā rattiyaṃ alātacakkaṃ vā taṃtaṃchiddavivaraṃvā jānantā viya pathamaṃ dravatāsahitāni vilīnāni mudūni tīṇi bhūtāni pathaviṃ eva vā phusitvā pacchā suddhena mano viññāṇasantānena visuṃ dravabhāvaṃ addatintabhāvaṃ jānanti. Evaṃ santēpi taṃ phusitvā jānantā icceva maññanti avisesavidunoti. Gunnaṃ abhiṇhaṃ caraṇaṭṭhānaṃ gocaro. Gocarasadisattā idha gocaro. Gotivā idha cakkhādīni indriyāni vuccanti. Tāni viññāṇadhīṭṭhitāni hutvā etesu caranti. Etānivātesu caranti pavattanti ghaṭṭētīti gocarā. Teyeva idha ekattaṃ upanetvā **gocararūpanti** vuttaṃ. Imānipana pañca yathākkamaṃ cakkhādīsu paṭihanana lakkhaṇāni rūpādīnīti veditabbāni.

Itthi vuccati avisadākārasaṅghitaṃ khandhapañcakaṃ. Yassa pana dhammassa ānubhāvena taṃ tathā saṅghāti pavattati. So itthi yā bhāvoti itthattaṃ. Puriso vuccati visadākārasaṅghitaṃ khandhapañcakaṃ. Sesam vuttanayameva. Tattha itthiliṅga itthinimitta itthi kutta itthākappānaṃ hetubhāva lakkhaṇaṃ **itthattaṃ**. Purisaliṅga purisanimitta purisakutta purisākappānaṃ hetubhāva lakkhaṇaṃ **purisattaṃ**. Tattha liṅganti padhānaṅgabhūtaṃ mahāsaṅghānaṃ. Nimittanti paccaṅgabhūtaṃ khuddakasaṅghānaṃ. Kuttanti kīḷālilādi kriyāviseso. Ākappoti gamanādiko ākāravikāro. Sabbepete khandhapañcakassa pavattivisesāeva. Ye saddasatthesu liṅganti vuccanti. Yesañca vasena ayaṃ itthīeva, na puriso. Ayaṃ purisoeva, na itthīti sañjānanti. Yasmā panettha saṅghānādīnaṃ avisadādibhāvoeva atthato itthipurisatā hoti. Tadubhayamuttabhāvoca napuṃsakatā. Soca akkharapada saṅkhātesu vacanesu ca vacanatthesuca yathārahaṃ sandissatiyeva. Tasmā indriyarahitesupi padesuca rukkhādīsu padatthesuca pariyāyena itthipumanapuṃsakatāsiddhi veditabbāti.

[178] Yaṃ pana **vibhāvaniyaṃ**

“Itthīnaṃ aṅgajātaṃ itthiliṅga”’nti vuttaṃ. Taṃ na sundaraṃ.

Na hi katthaci pāliyaṃ aṭṭhakathāsuca nimittasaddoviya liṅgasaddo aṅgajāte pākaṭo diṭṭhoti.

[179] Yañca tattha

“Itthisaṅṭhānaṃ itthākappo”’ti vuttaṃ. Taṃpi na sundaraṃ.

Na hi liṅgasaddo viya ākappasaddo saṅṭhāne pākaṭo diṭṭhoti. Sesampana tattha vuttaṃ yaṃkiñci aṭṭhakathāya asamentampi tena pariyāyena yujjatiyeva. Bhavanti pavattanti taṃsahite khandhasantāne esā itthī, eso purisoti evaṃ pavattā sadda buddhiyo etenāti bhāvo bhavativā pātubhavanti taṃsahite khandhasantāne liṅgādīni etasmiṃ satīti bhāvo. So eva rūpanti **bhāvarūpaṃ**. Hadanti sattā taṃtaṃmatthaṃvā anattaṃvā pūrenti etenāti hadayaṃ. Hadativā sattā ito nānāvikkakke osajanti muñcantīti hadayaṃ. Harativā pariharanti taṃ sattā jīvitamviya dayanti rakkhanticāti hadayaṃ. Vasanti nivasanti cittaceta sikādhama etthāti vatthu. Hadayañca taṃ vatthucāti **hadayavatthu**. Dhātudvayanissayalakkhaṇaṃ **vatthurūpaṃ**. Taṃ pana hadayakosabbhantare aḍḍhapasatamattaṃ lohitaṃ byāpetvā tiṭṭhatīti vedītabbaṃ. Dhammasaṅgaṇiyaṃ pana desanābhedarakkhanattaṃ avatvā paṭṭhāneeva taṃ vuttaṃ. Yathāha-vatthu kusalānaṃ khandhānaṃ nissayapaccayena paccayo. Vatthu akusalānaṃ khandhānaṃ nissayapaccayena paccayotiādi. Etthaca chahi vatthūhi aññaṃ vatthunāma natthi. Tesuca purimāni pañca kusalādīnaṃ nissayāeva na honti. Tasmā tesam nissayabhāvena tattha vuttaṃ vatthunāma visum ekaṃ vatthurūpamevāti siddhanti.

[180] Vibhāvaniyaṃ pana

Yaṃ rūpaṃ nissāyāti pāṭhassa uddhaṭṭā rūpasāmaññapasaṅgo hotīti taṃ visodhetum yuttināma vuttā. Paṭṭhāne pana bahūsu anaññasādhāraṇesu ṭhānesu vatthunāmena visesetvā vuttattā sopasaṅgo natthiyevāti daṭṭhabbaṃ.

Jīvanti sahaṅgādhama yenāti jīvitaṃ. Tesam jīvane ādhipaccayogena tesu indaṃ issaraṃ attānaṃ karotīti indriyaṃ. Jīvitañca taṃ indriyañcāti jīvitindriyaṃ. Sahaṅgā nupālana lakkhaṇaṃ jīvitindriyaṃ. Yathā hi bījanibbattāni uppalādīni bījevinaṭṭhepi udakānupālītāni cirampi kālaṃ jīvanti. Evamevaṃ niruddha kammanibbattāni kammajārūpāni kamme asantepe jīvitānupālītāni santativasena vassasatampi vassasahassaṃpi kappampi soḷasakappasahassānīpi jīvantiyeva, tathā hi jīvitarahitāni itararūpāni jīvantānīnaṃ nahontī. Tāni hi yena ekena cittenavā utunāvā āhārenavā jāyanti. Tasmīṃ niruddhe nirujjhanti, paraṃ muhuttamattaṃpi santānaṃ ghaṭetum nasakkonti. Tesu hi cittajarūpānaṃ santatipaccuppannaṃ ekavīthi ekajavanavāra ekasamāpattivārena paricchinnaṃ hoti. Utujāhārajānañca sabhāgeka utuāhāra vasena paricchinnaṃ hoti. Kammajārūpānaṃ pana visum santatipaccuppannaṃnāma natthi. Tesam ekabhavaparicchinnaṃ addhāpaccuppannameva hotīti. Yadi evaṃ arūpadhammaṃ kathanti. Tehi jīvitayogena jīvantāeva hontī. Evaṃsantepe tesam santatipaccuppannaṃ dissatīti. Vuccate, arūpadhammesu vipākāni tāva kammajārūpasadisāni. Tānīpi hi asatī vīthiccittuppāde yāvajīvaṃpi ekasantativasena pavattissantiyeva. Itarāni pana yassa ārammaṇassa āpātāgatattā uppajjanti. Tasmīṃ niruddhe tadabhāvepi tadārammaṇā bahū cittasantatiyo jīvitassaaddhānapharaṇānubhāvena pavattantiyeva. Apica, yāvakhandhāparinibbānā anantarapaccayupanibandhena abbotchinnaṃ pavattamānāya cittasantatiyāvasenapi ayamatto vattabbo. Teneva hi kilesasīsaṃ avijjā. Pavattasīsaṃ jīvitindriyanti vuttaṃ.

[181] Vibhāvaniyaṃ pana

Āhārajādīnaṃ āhārādiyeva uppattiyāpi ṭhitiyāpi kāraṇaṃ hoti. Kasmā, tañkhaṇe dharamānattā. Kamma jānaṃ pana kammaṃ uppattiyāeva kāraṇaṃ, na ṭhitiyā. Kasmā, tañkhaṇābhāvato. Jīvitena pana anupālittā eva tesam khaṇaṭṭhiti siddhāti iminā dhippāyena yaṃ

vuttam “yathāsakaṃ khaṇamattaṭṭhāyīnaṃpi hi sahaajātānaṃ pavattihetubhāvena anupālakaṃ. Na hi tesam kammaṃyeva ṭhitikāraṇaṃ hoti. Āhārajādīnaṃ āhāraḍi viya kammaṃsa taṅkhaṇābhāva totī”. Tam na vuttam.

Dhammānaṃhi khaṇaṭṭhitināma ekakalāpagatasahaajātapaccayā yattāeva hoti. Na nānakalāpagatajanakapaccayāyattā. Itarathā uppādakkhaṇe labbhamānānaṃ upacayasantatīnaṃ viya ṭhitikkhaṇe labbhamānāya jaratāyapi kutocisamuṭṭhānatā pāliyaṃ vuttā siyāti. Apica, khaṇaṭṭhitināma sabhāvasiddhāeva. Na hi uppannā dhammā paccayavekallena attano khaṇesu paripuṇṇaṃ aṭṭhatvā antarāva bhijjantīti atthi. Naca paccayādhimattena atire kataraṃ tiṭṭhantīti atthi. Tasmā khaṇaṭṭhitiyaṃ upatthambhayamānāpi āhāradayo anupālayamānaṃca jīvitam pacchā balavarūpasantati pavattiatthāyaeva upatthambhenti pāletica. Na khaṇaṭṭhitipavattiyāti. Ettāvataṃ sabbesaṃpi khaṇaṭṭhitināma dharamānanakāyattā vā jīvitāyattāvā nahotīti siddham hoti. Yadi pana tam santatipavattimeva sandhāya vuttam siyā, evaṃsati yujjeyyāti. Aṭṭha kathāyaṃpi santepica anupālana lakkhaṇādīmhi vidhāne atthikkhaṇeyeva tam tedhamme pāletītiādivacane yathāsantatiṭṭhiti labbhati. Tathā vicāretvā gahetabbāti. Iduṃ pana pācakagginā saha sakalaṃ upādinnakasarīraṃ byāpetvā tiṭṭhatīti. Kabaḷaṃ karīyatīti kabaḷikāro. Āharīyati ajjhoharīyatīti āhāro. Kabaḷikāroca so āhārocāti **kabaḷikārāhāro**. Kabaḷikāro āhārotipi pāṭho. Iduṃca savatthuka vacanaṃ daṭṭhabbam. Athavā, kabaḷikārāhārabhakkhānaṃ sattānaṃ attabhāvaṃ bhūso harati addhānaṃ pavattetīti āhāro. Khajja bhojjādike kabaḷikāre āhāro tannissitattā tappariyā pannattācāti kabaḷikārāhāro. Imasmiṃmatthe sati nibbattita oḷā eva labbhati. Atthato pana āngamaṅgānusārino rasassa sārabhūto upatthambhabalakāro bhūtanissito paramasiniddhasi neho idha **āhārarūpaṃnāma**. Tattha āngamaṅgānusārino rasassāti ajjhoharivā āmāsaye patiṭṭhitāni āhāravatthūni pācakatejena vivecitāni rasādibhāvena pañcadhā vibhāgaṃ gacchanti. Tattha paṇīta siniddha lahuka sineha koṭṭhāso rasonāma. Ye loke rasadhātūti vuccati. So pācaka tejabalena tato uttarivā rasaharaṇidhamanijālānusārena heṭṭhāca uddhaṃca sakalasarīre āngamaṅgāni anusaranto anupharanto āngamaṅgānusārīti vuccati. Tassa sārabhūto upatthambham balaṃ karotīti upatthambhabalakāro. So hi āmāsaye patiṭṭhita mattova sakalasarīre bhūtesu upatthambhakabalaṃ janetīti.

[182] Vibhāvaniyaṃ pana

“Āngamaṅgā nasāri rasahara saṅkhātāti” pāṭho. So duppāṭho.

Tam pana sendriyakāyopatthambhanalakkaṇaṃ āhārarūpaṃ. Oḷalakkhaṇaṃ vā. Tattha udayati pasavatīti **oḷā**. Avasaddovā rakkhaṇe. Rakkhaṇaṃcetha upatthambhanaṃeva. Avati janeticāti oḷā. Kim avati. Attano nissayavatthum. Kimca janeti. Āhārasamuṭṭhānarūpaṃ. Udayānantaraṃ rūpaṃ janetīti oḷātipi vadanti. Aññāpadesarahitena kakkhaḷattādīnā attano bhāvena siddham rūpaṃ **sabhāvarūpaṃ**. Uppādādīnā aniccatādīnāca saṅkhalakkaṇaṃ sahitaṃ rūpaṃ **salakkhaṇarūpaṃ**. Ujukatova kammādīhi paccayehi nipphāditaṃ rūpaṃ **nippannarūpaṃ**. Ruppenalakkaṇasampannaṃ nippariyāyarūpaṃ **rūparūpaṃ**. Yathā dukkhadukkham ajjhattaajjhantanti. Saṅkhalalakkaṇayutta tāya aniccatādikaṃ lakkhaṇattayaṃ āropetvā sammasanārahaṃ rūpaṃ **sammasanarūpaṃ**. Te te dabbasambhārāvā rūpakalāpāvā visuṃvisuṃ bhūso kāsanti pakāsanti etenāti ākāso. Nisatta nijīvatṭhena dhātu. Ākāsaṅkhātā dhātūti **ākāsadhātu**. Parito samantato chindati kalāpantarabhūtāni kalāpantara bhūtehi saddhiṃ asaṃmissaṃ ekattaṃ anupagamaṃ karotīti paricchedo. Tehivā paricchindīyati attanovā paresaṃvā akatvāmajjhe visuṃ thapīyati. Tesamvā chiddavivaramattabhūto. Na visuṃ eko uppādasahito sabhāvadharmo. Nāpi kassaci rūpakalāpassa pakkhabhūtoti paricchedo. Vikāralakkhaṇarūpāni hi asabhāvadharmabhūtānīpi taṃtaṃ rūpakalāpesu sandissamānatā taṃtaṃrūpakalāpapakkhikānieva hontī. Ayaṃ pana tehi rūpa kalāpehi sabbaso vimuttabhāvena bahibhūtattā kassaci rūpa kalāpassa pakkhabhūto na hotīti. Asabhāvadharmattāca pana kenaci rūpena phusana pariyaṃyopi tassa sabbaso natthīti katvā so asaṃphuṭṭham catūhi mahābhūtehīti pāliyaṃ vutto. Aṭṭhakathāyaṃ pana ghanapiṇḍavatthūsu paṭighaphoṭṭhabbasabhāvānaṃ nānā kalāpagatabhūtānaṃ aññamaññasaṃphuṭṭhatā atthīti katvā asaṃphuṭṭham catūhi mahābhūtehīti etehi asaṃphuṭṭham

ajaṭākāsaṃ kaṃthitanti vuttaṃ. Tīkāyaṃ pana ayaṃ niddeso ajaṭākāsaniddeso nahoti, paricchedarūpaniddeso yeva. Soca ghanapiṇḍa vatthūsueva veditabbo. Tesuca bhūtānaṃ asaṃphuṭṭhatānāma natthi. Tasmā bhūtānaṃ aññamaññaabyāpitā ekattaṃ anupagatatāeva. Tattha asaṃphuṭṭhatānāma yuttā siyāti adhippāyena abyāpikatā hi asaṃphuṭṭhatāti vuttaṃ. Atthato pana nānākālāpagatānaṃ bhūtānaṃ pariyantatā saṅkhāto antarāladhammo. Rūpaparicchedalakkhaṇaṃ **paricchedarūpaṃ**. Yā pana calamānena kāyaṅgena attānañca attasamaṅgino puggalassa adhippāyañca paccakkhe ṭhite jane viññāpeti pākaṭaṃ katvā dasseti. Sayañca tena kāyaṅgena tehi janehi viññāyati. Sā **kāyaviññattināma**. Yā uccāriyamānena vācaṅgena saddena attānañca attasamaṅgino puggalassa adhippāyañca sotapathe ṭhite jane viññāpeti. Sayañca tenavācaṅgena tehi janehi viññāyati. Sā **vacīviññattināma**. Athavā, viññāpeti janā viññāyantivā janehi aññamaññaassa cittāni etāyāti viññatti. Sasambhāre aṅgapaccaṅgabhūte kāye pavattā viññatti kāyaviññatti. Copana kāyasaṅkhāto kāyo evavā viññatti kāyaviññatti. Cittajasaddasaṅkhātāya vācāya pavattā viññatti vacīviññatti. Copanavācā saṅkhātā vācā evavā viññatti vacīviññatti. Tattha cittavasena yaṃkiñci kāyaṅgavikāraṃ karontassa taṃtaṃgaṃ saṃtambhantā sandhārentā cālentā aṅgamaṅgānusārisaṅkhātā cittajavātakalāpā taṃtaṃgaṃ pūretvā uppajjanti. Uppajjantāca yathāvā tathāvā anuppajjitvā yassa tehi cittajavātakalāpeti saṃhāntassa copanakāyassa ānubhāvena sabbe te kalāpā yathādhippetadisābhimukhāeva uppajjanti. Ayaṃ copanakāyasaṅkhāto ākāravikāro kāyaviññatti nāma. Niyāmakasadisī hi ayaṃ kāyaviññatti. Teca nāvāsadi sāti. Yathā hi niyāmakā nāvāya mūlabhāge ṭhatvā ekaṃ mahāphiyaṃ daḷhaṃ gahetvā nadisote cāretvā sakalaṃ mahānāvaṃ icchitadisābhimukhaṃ niyojetī. Na yaṃvā taṃvā disaṃ gantaṃ detī. Evaṃ sampadamidaṃ daṭṭhabbaṃ. Ekacittakkhaṇikā hi viññatti tesāṃ mūlabhāgeeva labbhamānā te yathādhippetadisābhimukhe evaṃ katvā niyojetī sā niyāmakasadisī hotīti. Etthaca yadetāṃ aṭṭhakathāyaṃ. Ekajavanavīthiyaṃ sattuṃ javanesu pathama javanasamuṭṭhitā vāyodhātu attanā saṃhāntarūpakāyaṃ saṃthambhetuṃ sandhāretuṃ sakkoti. Aparāparaṃ pana cāletuṃ nasakkoti. Dutīyādīsipi eseva nayo. Sattamacittena pana samuṭṭhitā vāyodhātu heṭṭhā chahicittehi samuṭṭhitaṃ vāyodhātuṃ upatthambhanapaccayaṃ labhitvāattanāsahajātaṃ rūpakāyaṃ saṃthambhetuṃ sandhāretuṃ cāletuṃ abhikkamāpetuṃ sakkotīti vuttaṃ. Taṃ abhikkamāmitī kāyaṃ paggaṇhantānaṃ anekasahasu javana vāresu pavattamānesu yasmimvāre calanasāṅkhātāṃ desantarapāpanaṃ jāyati, taṃ sandhāya vuttaṃ. Na hi katipayajavanavārehi calanaṃ jāyati. Yadi jāyeyya, iddhiṃantānaṃ iddhiyāgamaṇaṃ viya sabbesaṃpi sīghataraṃ gamaṇaṃ paññāyeyya. Kasmā, ekaccharakkhaṇepi anekakoṭṭisatasahasacikkapavattiyā sambhavato. Ayañca attho upari akkharuppattivācāraṇāyaṃ pākaṭo bhavissatīti. Tasmā tato purimavāresu saṃthambhanasandhāraṇānieva sampajjantīti veditabbaṃ. Yā cettha sattayugasakaṭopamā vuttā, sāpi nānājanavīthīsu samuṭṭhitānaṃ vāyodhātūnaṃ aparāparaṃ upatthambhaneca yujjatiyeva. Tathā hi calanacittajarūpasantatiyaṃ pavattāni utujarūpasāṅghātānīpi viññattisahitāni viya tadākāravantāni savegāni savipphāraṇānieva pavattanti. Tasmā pubbāparapavattānaṃ nānā javanavīthīnaṃ antarantārā bhavaṅgasamāyepi abhikkamanādikaṃ calanaṃ sampajjatiyeva. Ekābaddhapavattānīca catusamuṭṭhānikarūpānīnaṃ ekassa visāye itarāni ekasamuṭṭhānāni viya sabbaso tadanu parivattīni hotīti cittaṃ calante itarānīpi calanti yevāti daṭṭhabbaṃ. Calanañcettha pacchimacchimānaṃ rūpakalāpasāṅghātānaṃ purima purimānaṃ uppannadesato desantare yathāpavattasannivesākārena aparāparaṃ uppajjamaṇaṃ veditabbaṃ. Na hi rūpārūpadhamānaṃ uppanna dese anirujjhitvā kesaggamattaṃpi desantara saṅkamaṇānāma atthi. Itarathā khaṇīkadhammatā abyāpārādhamaṃ avasavattitāca tesāṃ nasiyāti. Yaṃkiñci vacībhedaṃ karontassa kaṇṭhaṭṭhānādi gataupādinnaka pathavīdhātūsu calamānakaṇṭhapadesādigatacittaja pathavīdhātūnaṃ saṅghaṭṭanasāṅkhātēna ṭhānakaraṇasannipātena sahevāyo vacīghosasaṅkhāto cittajasaddo jāyati. So yena attanā saha jātena ākāravikārena yathādhippāyaṃ taṃtaṃ vaṇṇavisesattaṃ upagacchati. Yenāca suṇantānaṃ taṃtaṃatthajotako akkharasannipātābhūto padabyañjanaviseso upalabbhati. So copanavācāsaṅkhāto ākāravikāro vacīviññattināma. Aṭṭhakathāyaṃ pana tassā pana cittasamuṭṭhānāya pathavīdhātuyā upādinnaghaṭṭanassa paccayabhūto eko ākāravikāro vacī viññattināmāti vuttaṃ. Tattha upādinnaghaṭṭanassa paccayabhūtoti kammajabhūtāya catujabhūtāyaevavā upādinnapathavīdhātuyā saṃghaṭṭanaṃ paṭicca saddavisesapavattiyā paccayabhūtoti attho. Ghaṭṭanassa paccayo pana calamānakaṇṭhapadesādivikārabhūto kāyaṅgavisesoeva siyā. Vikāradvayañca asaṃmissaṃ katvā veditabbanti. Etthaca upādinnakapathavīhi saha ghaṭṭanaṃ cittajapathavīnaṃ kiccaṃ. Yaṃ pana tāsaṃ yathāvā tathāvā aghaṭṭetvā yathā icchitakkharaṃ sampajjati. Tathā ghaṭṭanapakāravīdhānaṃ. Idaṃ

kāyaviññattiyā kiccaṃ. Ghaṭṭanena saheva uppannasaddānaṃ taṃtaṃvaṇṇatta pattiyā vidahanameva vacīviññattiyā kiccaṃ. Kumbhathunatalaṃ viyaca upādinnakapathavī. Paharaṇahattho viya cittajapathavī. Hatthapari vattana vikāro viya kāyaviññatti. Saddavikāro viya vacīviññatti. Kumbhathunassa nānāsaddapabhedoviya nānāvaṇṇabhedoti. Etthaca yadetam aṭṭhakathāyaṃ idam vakkhāmi etaṃ vakkhāmīti uppajjamānaṃ cittaṃ aṭṭharūpāni samuṭṭhāpeti. Tesam abbhantare citta samuṭṭhānā pathavīdhātu upādinnakaṃ ghaṭṭayamānāva uppajjati. Tena dhātughaṭṭanena saheva saddo uppajjattīca purimacittasamuṭṭhā nāya upatthambhanakiccaṃpi natthītica vuttaṃ. Taṃpi anekasatesu javanavāresu pavattamānesu yasmimvāre paribyattaṃ akkharāṃ pavattati, taṃ sandhāya vuttanti gahetabbam. Teneva hi mūla ṭīkāyaṃ upatthambhanakiccaṃ natthi laddhāsevanena citteneva ghaṭṭanassa balavabhāvatoṭi vuttaṃ. Etthaca laddhāsevanenāti etena pubbabhāge nānājavanavīthīhi laddhāsevanabhāvaṃ dasseti. Pathama javanacittassapi laddhāsevanatāya adhippetattā. Naca ekajavana vāramattena paribyattaṃ ekakkharāṃ sampajjattīti sakkā viññātuṃ. Kasmā, tassa ekadvīaccharakkhaṇamattena kālena vattabbattā ekaccharakkhaṇeca anekasatasahassānaṃ javanavīthīnaṃ pavattisambhavato. Vuttañca –

Ekamattā tayo rassā, dvimattā dīghamuccare;
Timatto tu gīto ñeyyo, byañjanā aḍḍhamattikāti.

Milindapañheca sādhike vīhivāhasate vīhibijāni ekaccharakkhaṇe uppannassa cittassa kalampi naupenti. Kalabhāgaṃpi naupentīti dīpitaṃ. Ekakkharāṃ uccārentassaca tattakaṃpi kālaṃ uccāraṇacittabyāpāro sandissatiyeva. Naca paramatthato ekameva saddaṃ uccāremītivā suṇomītivā sakkā niyametvā uccāretuṃ sotuñca. Tathā niyamentassapi saddānaṃ pubbāparato anekasatasahassasseva uccāraṇa savana sambhavato. Ekamevāti abhimāno pana samūhaghana santatighanehi paṭicchannattāeva hotīti daṭṭhabbam. Sesamettha kāyaviññattiyāṃ vuttana yena yathāsambhavaṃ veditabbanti. Etthaca viññattisaddo kāyena viññāpeti vācāya viññāpetītiadisū bodhanattho. Sudinna kaṇḍe tikkhattuṃ viññāpetītiadisū pavattanattho. Idha pana duvidhopi yujjati. Evañhi sati paraṃ bodhetukāmatārahi tesu sabbesu kāyaṅgavācāṅgacopanēsupi pavattakaviññattiyā labbhamānatā veditabbā hotīti. Mūlaṭīkāyaṃ pana paraṃ bodhetukāmatāya vināpi abhikkamanādīpavattanena so citta sahabhūvikāro adhippāyaṃ viññāpeti. Sayañca viññāyatīti dvidhāpi viññattiyevāti vuttaṃ, tattha dvīsū bodhanaviññattīsū purimā kāyaviññatti aṅgapaccaṅgassa calamānavāṇṇaṃ cakkhuvīññānavīthiyā calamānaṅgapaccaṅgaṃ kāyaviññānavīthiyā gahetvā pacchā suddhena manodvārikajavanenaeva viññāyati pacchimāca vacīviññatti uccāriyamānaṃ saddaṃ sotaviññānavīthiyā gahetvā pacchā suddhena manodvārikajavanenaeva viññāyati, na pañcadvārikajavanena. Sā hi attānaṃ jānanteeva parasatte attanā samaṅgino puggalassa cittaṃ viññāpeti, na ajānante. Nāpaka hetu hi nāma attānaṃ jānanteeva nāpetabbam nāpeti, no ajānante. Evañca katvā kāyaṅga copanaṃ disvā parāmasitvāvā saddaṃ sutvāvā parassa taṃtaṃadhippāyaṃ jānantānaṃ tiracchāna gatānaṃpi pathadhaṃ viññattijānanāṃ siddhaṃ bhavati. Taṃjānanena vinā adhippāyajānanassa asambhavato. Viññattim jānantānaṃca purimasiddhasāṅketa sambandha jānanena vinā adhippāyajānanāṃ na sambhavatīti majjhe viṣuṃ pubbasāṅketa sambandhagahanaṃpi icchanti, dvīsū pana pavattakaviññattīsū paraṃ abhikkamantaṃ cakkhuvīññānavīthiyā disvā abhikkamanaviññattiñca abhikkamanacittañca manoviññānavīthiyā jānanti. Esanayo paṭikkamanādīsū. Tathā parassa kathaṃ sotaviññānavīthiyā sutvā kathanaviññattiñca kathanacittañca manoviññānavīthiyā jānanti. Paraṃ rattacittena kāyaṅgaṃ cālentāṃ disvā calanaviññattiñca rāgacittañca jānanti. Rattassa kathaṃ sutvā kathaṃ viññattiñca rāgacittañca jānanti. Esanayo sabbāsū kāyikavācasikakriyāsūti. Lahuno bhāvo **lahutā**. Muduno bhāvo **mudutā**. Kammani sādhu kammaññaṃ. Kammayogyanti attho. Kammaññaṃ bhāvo **kammaññatā**.

Adandhatālakkaṇā rūpassa lahutā. Athaddhatā lakkaṇā rūpassa mudutā. Sarīrakriyānukūlakammaññabhāvalakkaṇā rūpassa kammaññatā. Aññaṃaṇñaṃ avijahantiyopi etā viruddhapaccayasappāya paccayānaṃ vasena asaṃmissato veditabbā. Tathā hi attano kāyaviruddhaṃ utuṃvā āhāraṃvā cittakriyaṃvā sevantānaṃ sarīragatā dhātuyo kadāci sakalasarīraṃvā sarīrekadesaṃvā

khobhetvā visesato pūtimukha sappasaṅkhātaāpo pariyuṭṭhānaṃ katvā kāyaṃ asayhabhāraṃ viya garuṃ bhāriyaṃ karonti. Iriyā pathaparivattane kāyabhāriyanimittaṃ dukkhaṃ uppādentī. Tadārūpassa lahutā napavattati. Puna attano sarīrasappāyaṃ utumvā āhāraṃvā cittakiriyaṃvā sevantānaṃ so dhātukkabhō vūpasammati. Kāyo sallahuko hoti. Iriyāpathaparivattane kāya bhāriyanimittaṃ dukkhaṃnāma natthi. Tadā sā pavattati. Esanayo sesāsupi. Visesanato panettha mudubhāyaṃ kaṭṭhamukhasappasaṅkhāta pathavīpariyuṭṭhānaṃ katvā sukkhakaṭṭhaṃviya kāyaṃ thaddhaṃ kakkhaḷaṃkaronti. Iriyāpathaparivattane aṅgamaṅgānaṃchijjanabhijjanākārapattaṃ thaddhaṃ kakkhaḷanimittaṃ dukkhaṃ uppādentīti vattabbaṃ. Kammaññatāyaṃ satthamukhasappasaṅkhāta vāyo pariyuṭṭhānaṃ vāyovisamaṃ katvā dāmarikacorapariyuṭṭhitaṃ paccantaraṭṭhaṃ viya kāyaṃ vivaṭṭamaṃ karonti, sabbairiyāpathesu sukhaṃnāma natthīti vattabbaṃ. Tejodhātu pana tāsamaṃ sabbāsamaṃ mūlabhūtā hotīti veditabbā.

Imā pana arogino kallabhāvoviya suparimadditacammaṃ mudubhāvoviya sudandhasuvaṇṇassa kammakkhamabhāvoviya rūpakāyassa iriyāpathaparivattane sallahukatādivasena sandissamānā visesākārā hotīti katvā **vikārarūpaṃ nāma**. Cayaṃ cayo. Piṇḍavasena abhinibbattīti attho. Ādito uparitoca cayo **upacayo**. Pathamābhinibbatti uparuparivaḍḍhicāti attho. Ayañhi upasaddo upaññattantiādīsu viya pathamattho upasittantiādīsu viyaca upari atthoti. Vuttaṅca mūlaṭṭikāyaṃ upasaddo pathamattho upariatthoca hotīti. Tenevahi paḷiyaṃ yo āyatanānaṃ ācayo, so rūpassa upacayo. Yorūpassa upacayo, sā rūpassa santatīti vuttaṃ. Tananaṃ vitthāraṃ tati. Sambandhā tati punappunaṃvā tati **santati**. Yathā pavattānaṃ āyatanānaṃ addhānapūraṇavasena pavattīti attho. Tattha gabbhaseyyakānaṃ sattānaṃ paṭisandhikkhaṇe rūpānaṃ uppādo pathamānibbattiatthena upacayonāma. Tato paraṃ yāva sabbapathamaṃ uppannānaṃ cakkhu sota ghāṇajivhānaṃ uppādo, etthantare rūpānaṃ uppādo upari vaḍḍhiatthena upacayonāma. Tato paraṃ yāvajīvaṃ catusantatirūpānaṃ uppādo santatināma. Vuttañhetamaṃ aṭṭhakathāyaṃ nadīre nikhātakūpasmiṃ udakuggamanakāloviya ācayo nibbatti. Paripuṇṇakāloviya upacayo vaḍḍhi. Ajjhottharivā gamanakālo viya santati pavattīti.

Vibhāvaniyaṃ pana

Paṭisandhito paṭṭhāya yāvacakkhādi dasakānaṃ uppattī. Etthantare rūpuppādo upacayonāma. Tato paraṃ santati nāmāti vuttaṃ. Taṃpi tena pariyāyena yujjatiyeva.

Samsedajopavātikānaṃ pana paṭisandhikkhaṇe rūpānaṃ uppādo pathamā bhinibbatti atthena paripuṇṇa vaḍḍhi atthenaca upacayo nāma, tato paraṃ rūpānaṃ uppādo santatināma. Apica, tisamuṭṭhānika rūpānaṃpi visuma visuma santatipaccuppannaṃnāma atthi. Tassaca ekekassa nibbatti vaḍḍhi pavatti vasena tisso tissoavatthā honti. Tattha ekekasantatiyaṃ ādimhi santatisīsarūpānaṃ sabbapathamaṃ uppādo nibbattināma. Tato vaḍḍhanarūpānaṃ uppādo vaḍḍhīnāma. Vaḍḍhane samatte avaḍḍhitvā pabandhaṭṭhitivasena vattanavasenauppādo pavattināma. Tattha ca nibbattivaḍḍhiyo upacayonāma. Pavattisantati nāma. Saṅkhepato pana loke sabbāsu indriyānindriyabaddharūpapavattīsu sandissamāne jāyana vaḍḍhana pavattanasāṅkhāte avatthābhede disvā upacayasanta tiyo veditabbā. Tatrāyaṃ nayo-rukhatinādīnīvā sākāhā pattapupphaphalādīnīvā ādimhi jāyanti. Jāyitvā vaḍḍhanti. Vaḍḍhane samatte avaḍḍhitvā pabandhavasena pavattitvā bhijjantīti. Jīraṇaṃ jarā, jīranti jīṇabhāvaṃ gacchanti etāyāti jarā. Sāyeva **jaratā**. Uppādajarābhaṅgehi niccalati nakampatīti nicco asaṅkhata dhammo. Na nicco anicco, saṅkhatadhammo. Aniccassa bhāvo **aniccatā**, bhaṅgo.

[183] Vibhāvaniyaṃ pana

“Niccadhuvabhāvena na iccaṃ anugantabbanti anicca”nti vuttaṃ. Taṃ na sundaraṃ.

Niccassaddo hi sāsane lokeca pākāto. So eva idha nakārayutto aniccoti vuttoti. Lakkhīyanti sallakkhīyanti vinicchīyanti dhammā ime saṅkhatāti etenāti lakkhaṇaṃ. Saṅkhata bhāvajānananimitanti attho. Yathāha- aṅguttare tīṇi māni bhikkhave saṅkhatassa saṅkhatalakkhaṇāni. Katamāni tīṇi, uppādo

paññāyati, vayo paññāyati, tñitassa aññathattam paññāyatīti. Nanu pāḷiyam jātināma āgatā. Tasmā sāpi idha vattabbāti vuttam **jātirūpamevātiādi**. **Etthāti** rūpasamuddese. Jananam pātubhavanam jāti. Jāyantivā etāyāti jāti, **upacaya santati nāmenapavuccati** tassajātiyātathā avatthābhedayogototi adhippāyo. Sā hi ādito paṭisandhirūpāni pātubhavantāni karoti. Puna aparipuṇṇānica āyatanāni pūreti. Pūritāni ca dīghampi addhānam abhocchinnaṃ katvā pavatteti pabandhayatīti. **Ekā dasavidhampīti** mahābhūtādibhāvena ekattam upanayanavasena ekā dasapabhedampi. Katham sarūpavasena aṭṭhavīsatividham hotīti pucchitvā **bhūtappasāda visayātiādinā** ekādasavidhasseva sarūpato dassanam antogadhabhedānam pubbe vuttabhāvena supākaṭṭatīti daṭṭhabbam. Tenāha-**aṭṭhārasavidhanti**.

Cattāri bhūtāni pañcapasādā agahitagahaṇena cattāro visayā gocarā. Duvidho bhāvo. Ekam hadayam. Iti idam soḷasavidham rūpam jīvitāhārārūpehi saha aṭṭhārasavidham hoti tathā eko paricchedo. Duvidhā viññanti. Agahitagahaṇena tividho vikāro. Catubbidham lakkhaṇanti dasa anipphannācāti rūpam sarūpato aṭṭhavīsatividham bhaveti yojanā. Etthaca pacchimāni dasarūpāni sabhāvato anupalabbhamānattā paccayehi nipphādītāni rūpāni na hontīti **anipphannāni nāma**. Api cettha abhidhamme visum uddiṭṭhāni niddiṭṭhānica etāni sabhāvato anupalabbhamānānīti vā paramatthato avijjamānānītivā nasakkā vuttum. Vohārasiddha mattabhāvam atikkamma tādisena suddhadhammagatiyā siddhena paramattha lakkhaṇena upaladdhattā. Itarathā nibbattilakkhaṇarahitam asaṅkhata nibbānampi sabhāvato anupalabbhamānam paramatthato avijjamānañca nāma siyāti. Tasmā nibbatti lakkhaṇarahitattāeva etāni anipphannānīna. Na sabhāvato anupalabbhamānattāti yuttam siyāti. [Rūpasamuddeso]

157. Rūpavibhāgesabbañca pana etam yathāsamuddiṭṭham aṭṭhavīsati vidham rūpam ahetukaṭṭhena ekavidhameva. Na sahetukā hetuka vasena duvidham. Tathāsappaccayaṭṭhena ekavidhameva. Na sappaccayāpaccaya vasena duvidhanti evam pavattam ekavidhanayam tāva dassetum **sabbañcātiādimāraddham**.

[184] Vibhāvaniyam pana

Ekavidhanayopi rūpavibhāgoevāti katvā “yathā uddiṭṭha rūpānam ekavidhādinayam dassanattam sabbañca panetantiādi vutta”nti vuttam. Tam na sameti.

Vakkhati hi –

Ajjhattikādibhedena, vibhajanti yathārahanti.

Etena ajjhattikādibhedo eva rūpavibhāgonāmāti viññāyati.

Tattha sabbampi rūpam hetusampayogā bhāvato ahetuka meva, na kiñci sahetukam. Kiñci ahetukanti evam vibhāgo atthīti adhippāyo. Sappaccayam sāsavam saṅkhatam lokiyanti pāṭho. Sappaccayam saṅkhatam lokiyam sāsavanti pana yutto. Pāḷiyampi tathā diṭṭhattā sabhāgayugaḷasambhavatocāti. Itarāni pana pāḷikamena asamentānīpi sabhāga yugaḷattā bhāgato yuttānieva. Tattha attano janakena paccayena saheva vattatīti **sapaccayam**. Paccayehi saṅgama karīyatīti **saṅkhatam**. Pañcupādā nakkhandhasaṅkhāte lokeva pariyāpananti **lokiyam**. Attānam ārabha pavattehi āsavehi saheva vattatīti **sāsavam**. Akaniṭṭha brahmasantāna bhūtampi rūpam kāmataṇhā visayabhāvena kāmeeva pariyāpanattā **kāmāvacaram**. Natthi attanā gahitam kiñci ārammaṇamāna assāti **anārammaṇam**. Yo dhammo aññena payogena pahīnopi samudayapahāne asati apahīnova hoti. Puna avassam uppajjamānattā. Appahīnopi tasmim sati pahīnova hoti. Puna anuppajjamānattā. Tādiso dhammo pahānavāyāmassa aṭṭhānattā appahātabbonāma. Rūpampi edisameva hotīti vuttam **appahātabba mevāti**. Aṭṭhānattā pahāna vāyāmam na arahatīti attho. Athavā, vinā samudayapahānena pahātum asakkuṇeyyoti attho. Yadi evam rūpam bhikkhave na tumhākam. Tam pajahatha. Tam vo pahīnam dīgharattam atthāya hitāya sukhāya bhavissatīti idam kathanti. Tampi

tabbisayassa rāgassa pahānaṃ sandhāya vuttanti daṭṭhabbaṃ. Yathāha –

Rūpe kho rādha yo chando, yo rāgo, yānandī, yā taṇhā, taṃ pajahatha. Evaṃ taṃrūpaṃ pahīnaṃ bhavissati ucchinnamūlaṃ tālavatthukataṃ anabhāvaṃkataṃ āyatīṃ anuppādadhammanti.

Ayaṃ nayo aññesupi kusalādīsu appahātabbesu veditabboti. Evasaddo cettha purimapadesupi yojetabbo. Itisaddo ādiattho, pakāratthovā. Tena pāliyaṃ āgataṃ na hetu hetuvippayuttantiādiṃ saṅgaṇhāti. Tassa tassa puggalassa atabhāvapariyāpanno dhammasamūho ajjhataṃnāma. Tasmim̐ppica yattha taṇhāya atirekataraṃ daḷhapariggaho hoti. So cakkhādiko cittena saha chabbidho dhammo **ajjhattiko nāma**. Ajjhatte vidito pākaṭoti katvā. Tathā hi so ajjhatajjhattantipi vutto. Itarāni pana rūpādini phassādīnica tadupādāya taṇhāpariggahassa mandattā bāhirāni nāma. Yathā hi loke maṇivā suvaṇṇaṃvā rajataṃvā bahigehe nidahitvā thapitaṃ hoti. Pacchivā suppaṃvā ghaṭovā sarāvovā anto gehe thapito. Tattha pacchimāni chaḍḍetvāpi purimāni rakkhanti. Tasmā tāneva taṇhāpariggahadaḷhatāya antoparibhogātveva vuccanti. Pacchimāni pana bāhira paribhogātveva. Evaṃ sampadamidaṃ daṭṭhabbaṃ. Idhapi hi yadi sakkuṇeyya. Rūpādīni phassādīnica sabbāni chaḍḍetvāpi cakkhādikaṃ chabbidhameva avassaṃ rakkhissanti. Iti taṇhā pariggahassa daḷhamandatā vaseneva tesam̐ dvinnaṃ ajjhattika bāhiraṭā vuttā. Na pavattidesavasenāti niṭṭhamettha gantabbam̐.

[185] Yaṃ pana **vibhāvaniyaṃ**

“Ajjhattikarūpaṃ atthabhāvasaṅkhātāṃ attānaṃ adhikicca uddissa pavattattā. Kāmaṃ aññepi ajjhattasambhūtā atthi. Rulhīvasena pana cakkhādikameva ajjhattikanti” vuttaṃ. Taṃ na sundaraṃ.

[186] Yañca **tattha**

“Attasaṅkhātāṃpā cittaṃ adhikicca tassa dvārabhāvena pavattatīthi ajjhattaṃ. Tadeva ajjhattikanti” vuttaṃ. Taṃpi na sundaraṃ.

Tasmim̐ atthe hi sati cittassa ajjhattatā na sampajjati. Ajjhattadhamma ajjhattikammonañca aviseso āpajjati.

Yaṃ pana **tattha**

Athavā yadi mayaṃ na homa, tvaṃ kaṭṭhakalingarūpamo bhavissatīti vadantā viya atabhāvassa sātisayaṃ upakārakattā cakkhādīneva visesato ajjhattikānti vuttaṃ. Taṃ yuttataraṃ.

Tathā upakārātisayattāeva hi tesu sattānaṃ pariggaha daḷhatā hotīti. Sattavidham̐pi **dvārarūpaṃnāma**. Yathākkamaṃ vīthi cittānaṃ paṇātipātādīkammānañca pavattimukhattā. Tattha pana pañca vidhaṃ pasādarūpaṃ upapattidvāraṃnāma. Viññattidvayaṃ kammadvāraṃnāmāti **oḷārikarūpaṃ** pakatiyā thūlasabhāvattā ghaṭṭanasāṅkhātassaca attano kiccassa oḷārikattā. **Santikerūpaṃ** dūre pavattassapi sīghataraṃ ñāṇena gahaṇayogyattā. **Sappaṭigharūpañcāti** ettha paṭihananaṃ paṭigho. So duvidho visayavisayīnaṃ paṭighaṭṭanaṃ mahā bhūtānaṃ aññamaññapaṭighaṭṭananti. Tattha yena paṭighaṭṭanena pasāda dvāraṇaṃ bhavaṅgassaca vikārapatti hoti. Idaṃ visayavisayīnaṃ paṭighaṭṭanaṃnāma. Yena ruppānalakkhaṇānaṃ rūpadhammānaṃ ruppāna kuppāna ghaṭṭana pīḷana bhijjanādayo pavattanti. Idaṃ mahābhūtānaṃ aññamaññapaṭighaṭṭanaṃ nāma. Paṭighena saha vattatīti sappaṭighaṃ.

[187] **Vibhāvaniyaṃ** pana

“Yo sayaṃ nissayavasena sampattānaṃ asampattānañca paṭimukhabhāvo aññamaññapataṇaṃ. So paṭigho viyāti paṭigho. Yathāhi paṭighāte sati dubbalassa calanaṃ hoti. Evaṃ aññamaññapaṭimukhabhāve sati arūpasabhāvattā dubbalassa bhavaṅgassa calanaṃ hotīti” evaṃ mahābhūtaghaṭṭanaṃ upamāmatṭaṃ katvā visayavisayighaṭṭanameva gahitaṃ. Taṃ anupapannaṃ.

Evañhi sati yāni loke ajjhatabhahiddhāsantānesu ghaṭṭanāni dissanti. Yesaṃ vasena rūpadhammesu aññamaññānaṃ laggana bandhana thambhana dhāraṇa calanādānīvā vaḍḍhana hāyana chedana bhedana vilīna vikiraṇādānīvā pavattanti. Tāni idha asaṅgahitāni siyuṃ. Naca tāni anuggaha upaghāta vasena pavattibhūta sannipāta saṅkhātaṃ ghaṭṭanaṃvinā aññapakārānieva sakkā bhavitunti. Itaraṃ soḷasavidhaṃ vuttapaṭipakkhavasena **sukhumarūpaṃ dūrerūpaṃ apaṭigharūpañca**. Upādinnarūpaṃ nāma katthaci yaṃkiñci sarīraṭṭhakarūpaṃ vuccati. Katthaci kammaṣamuṭṭhāna meva tadubhayaṃpi taṇhādīṭṭhīhi tusaṃ ādinnaparāmaṭṭhattā upādinnaṃ nāma nippariyāyato pana kammaṣamuṭṭhānameva upādinnaṃnāma. Kasmā tasseva sattasantāne niccakālaṃ pavattivasena sātisayaṃ bhusaṃ ādinnagahitaparāmaṭṭhatāsambhavatoti vuttaṃ **kammajaṃupādinnarūpanti**. Etaṃ mamātiādīnā taṇhādīṭṭhīhi bhusaṃ ādiyātīti upādinnaṃ. Aṭṭhakathāyaṃ pana taṇhādīṭṭhīhi upetena kammaṇā attano phalabhāvena ādinnāṃ gahitanti imamatthaṃ dasseti. Saha nidassanena **sanidassanaṃ**. Nidassananti cakkhuvīññāṇena daṭṭhabbābhāvo vuccati. So pana dhammato anaññattepi aññe viya katvā upacariyati. Evañhi sati atthavisesabodho hotīti. Nidassanantivā cakkhuvīññāṇakiccaṃ vuccati. Tena saha vattatīti sanidassanantipi yujjatiyeva. Cakkhādīdvaṃ asampattavasena gocaraggāhikaṃ. Ghānādittayaṃ sampattavasena gocaraggāhikanti pañcavidhampi gocaraggāhikarūpanti yojanā. Tattha pasāde allīyitvā laggitvā uppannaṃ ārammaṇaṃ sampattamāna. Kesaggamattampi muñcivā uppannaṃ asampattamāna. Kasmā panettha cakkhādīdvaṃ asampattameva gaṇhāti. Ghānādittayaṃ sampattamevāti, paccayavisesato. Āloko hi rūpagahaṇe cakkhussa paccayo. Ākāsoca saddagahaṇe sotassāti cakkhurūpesuca aññamaññānaṃ laggitvā uppajjamānesu ālokaparivārassa okāso natthi. Tathā sotassadesuca ākāsaparivārassāti. Vāyupapathaviyo pana ghānādittayassa gandhādīgahaṇe paccayā honti. Tattha vāyunāma gandhākaḍḍhanako nāsavātoyeva, soca sampattasseva paccayo. Āponāma jivhātemanako āpo, sopi sampattasseva paccayo. Na hi raso sukkhājivhāya pharatīti. Pathavīca ghaṭṭanatthāya paccayo. Na hi dubbalapathavīsannissayo ālokovā rajovākāye patamānopi pasāde ghaṭṭetīti. Iti paccayavisesato tesāṃ sampattāsampattavasena gahaṇa viseso hotīti. Tattha cakkhussa tāva asampattagahaṇaṃ pākaṭaṃ. Tañhi samīpe akkhivaṇṇaṃvā bhamukamūlaṃvā napassati. Dūre pana mahantaṃ candamaṇḍalādikaṃvā phalikādītirohitamvā vaṇṇaṃ passati. Disādesavavattānañcassa paññāyatīti. Sotassa pana kathanti, tattha hi dūre saddo cirena suyyamāno dissati pacchimadisābhāge uppannopi saddo antarā mahante cetiyādīke antarite sati dakkhiṇapassatovā suyyati. Uttarapassatovā. Asuyyamānovā hotīti. Vuccate, uppanno saddasaṅghāto āsanne ṭhitānaṃ ādīto paṭṭhāya yāva avasānā kamena pākaṭībhūto hoti. Paṭighaṭṭanānighaṃsoca balavā hoti. Ahaṃ suṇomīti pavattā sallakkhaṇavīthīyo sīghataraṃ nirantaraṃ viya pavattanti. Dūre ṭhitānaṃ pana paṭighaṭṭanānighaṃso mandataro hoti. Ādīto apākaṭo. Majjhevā avasānevā piṇḍavasena pākaṭībhūto. Sallakkhaṇavīthīyo cirena parena pavattanti. Tasmā tesāṃ lahuṃ suto. Cirena sutoti atimāno hotīti. Apica, saddonāma nissayadhātuparaṃparāya pavattitvā dūraṃpi desaṃ gacchatiyeva. Evaṃ gacchantoca gatagataṭṭhāneeva ṭhatvā savanūpacāre ṭhitānaṃ sotasaḥsaṃpi ghaṭṭeti. Mahante pana cetiyādīke antarite sati yato ākāso ujjuṃ vivaṭo hoti. Tato dakkhiṇapassatovā uttarapassatovā gatagataṭṭhānatovasotaṃ ghaṭṭeti. Mandataro pana saddoasuyya mānopi hoti. Evaṃ gacchantoca yāva sotapasāde allīyitvā nuppajjati. Tāva asampattoyeva hoti. Yo pana allī yitvā uppajjati. So sampattonāma hoti. Na so suyyatīti. Yadi pana sotaṃ sampattavisayaṃ siyā. Yathā anto kucchigato gandho bahi naghāyiyati. Tathā anto kucchigato saddopi bahi nasuyeyya. Gandhassa viya disādesavavattānaṃ vissana siyāti.

[188] Vibhāvaniyaṃ pana

“Gantvā visayadesaṃ taṃ, pharitvā gaṇhatīti ce. Adhiṭṭhāna vidhā nepi, tassa so gocaro siyā.” Tipi vicāritaṃ. Taṃ na sundaraṃ.

Na hi cakkhādidvayassa bahiddhā visayadesagamanasaṅgo atthīti. Gocaraṃ gaṇhātīti **gocaraggāhikaṃ**. Pasāda maṇḍabhūtattā āpātamaḡataṃ ārammaṇanimittam sampajicchatīti attho.

Vibhāvaniyaṃ pana

Viññāṇādhiṭṭhitam hutvā taṃtam gocaragahaṇa sabhāvattāti vuttam.

Vaṇṇoti rūpārammaṇassetam nāmaṃ. **Ojāti** āhāra rūpa māha. Vinibhujjātīti vinibbhogo. Tḥānato desato uppattikāraṇato visuṃvisuṃ vavattapīyatīti attho. Navinibbho goti avinibbhogo. So eva rūpanti **avinibbhogarūpaṃ**. Ācariyānandattherenapanettha gandharasaojā katthaci vinībhattā dissantīti pañcavidhameva avinibbhogarūpaṃ icchitam. Tam parato āgamissatīti. [Rūpavibhāgo].

158. Kammanti ekā cetanāeva. Sāyeva hi paṭṭhāne nānākkhaṇika kammaṃpaccayabhāvena vuttā. Yathāha-nānākkhaṇikā kusalākusalā cetanā vipākānaṃ khandhānaṃ kaṭattāca rūpānaṃ kammaṃpaccayena paccayoti. **Cittanti** pana sasampayuttadhammaṃ adhippetam. Paṭṭhāne cetasikadhammānaṃpi rūpasamuṭṭhāpanabhāvena vuttattā. Yathāha-hetū hetusampayuttakānaṃ dhammānaṃ tam samuṭṭhānānaṃca rūpānaṃ hetu paccayena paccayotiādī. **Utūti** tejoyeva. So hi kappasaṇṭhāpanavasena sakalam okāsa lokampi nānāsarīrasaṇṭhāpanavasena saka lam rūpamayam kāyam sattalokampi nānārukkhatinādīnaṃ abbhapaṭalameghavuṭṭhijalaaggi vātādīnaṃca saṇṭhāpanavasena sakalam saṅkhāralokampi udayati pasavati janeti vaḍḍheti. Tasmā utūti vuccatīti. Arati gacchati pavattatīti utūtipi vadanti. **Āhāroti** ojāeva. Rūpavirāgabhāvanābhūtam arūpakusalam kammajarūpaṃ najanetīti vuttam **pañcavīsatividhampīti**. **Atisaṅkhatanti** atītakāle yathākā lantare rūpaṃ janeti, tathā visesetvā suṭṭhukatam. **Ajjhatti kasantāneti** vuttam, ajjhattasantāneti pana vattabbaṃ. Ajjhatta meva ajjhattikantivā ikasaddassa attho daṭṭhabbo. **Paṭisandhimupādāyāti** paṭisandhicittassa uppādakkhaṇam upādāya. **Khaṇekhaṇeti** ekekassa cittassa tīsu tīsu khaṇesu. Ācariyānandatthero pana sabbesampi catusamuṭṭhānikarūpānaṃ ekekassa cittassa uppādakkhaṇeeva uppādam bhaṅgakkhaṇeeva nirodhaṇca āha. Aham panassā dhippāyo-sabbānīpi catusamuṭṭhānikarūpāni cittassa uppādakkhaṇeeva uppajjanti, na bhaṅgakkhaṇe. Yathāha –

Yassavā pana samudayasaccaṃ nirujjhati, tassa dukkhasaccaṃ uppajjatīti. Noti.

Tathā tāni cittassa bhaṅgakkhaṇeeva nirujjanti. Na uppādakkhaṇe. Yathāha –

Yassa kusalā dhammā akusalā dhammā uppajjanti, tassa abyākatā dhammā nirujjantīti. Noti.

Arūpabhavaṃ sandhāya etaṃ yamakadvayaṃ vuttam. Rūpāni pana cittassa bhaṅgakkhaṇepi uppajjanti. Uppādakkhaṇepi nirujjantīti ce. Na. Evañhi sati –

Yassavā pana samudayasaccaṃ nirujjhati, tassa dukkhasaccaṃ uppajjatīti. Arūpe taṇhāya bhaṅgakkhaṇe tesam samudayasaccaṃ nirujjhati. Noca tesam dukkhasaccaṃ uppajjati. Pañcavokāre taṇhāya bhaṅgakkhaṇe tesam samudayasaccaṃca nirujjhati, dukkhasaccaṃca uppajjatītica.

Itaratthaca

Arūpe kusalānaṃ uppādakkhaṇe tesam kusalā dhammā uppajjanti. Noca tesam abyākatā dhammā nirujjanti. Pañcavokāre kusalānaṃ uppādakkhaṇe tesam kusalā dhammāca uppajjanti. Abyākatā dhammāca nirujjantītica.

Evam paripuṇṇapañhāeva uddhaṭā siyuṃ. Noti pana paṭisedhova uddhaṭo. Tasmā nayidaṃ

arūpabhavaṃ sandhāya vuttanti sakkā vattunti. Cittajarūpaṃ sandhāya vuttanti ce. Tampi na. Kammajarūpassa vigahaṇe virodhassa yamakapāṭhantarassa abhāvato. Anulomassevaca bhāvato. Yathāha –

Yassavāpana yattha manindriyaṃ na uppajjati. Tassa tattha jīvitindriyaṃ nauppajjati. Asaññasattānaṃ tesam tattha manindriyaṃ na uppajjati. Noca tesam tattha jīvitindriyaṃ na uppajjati.

Sabbesaṃ cavantānaṃ pavatte cittassa bhaṅgakkhaṇe tesam tattha manindriyaṃ nauppajjati. Jīvitindriyaṃ nauppajjati.

Ettha hi asaññasattānanti etena rūpajīvitindriya meva vuttaṃ. Yadica taṃ cittassa bhaṅgakkhaṇepi uppajjeyya, purimakoṭṭhāse pavatte cittassa bhaṅgakkhaṇe asaññasattānaṃ tesam. La. Jīvitindriyaṃ nauppajjati vuttaṃ siyā, pacchimakoṭṭhāseca sabbesaṃ cavantānaṃ icceva vuttaṃ siyāti. Pacchimakoṭṭhāse pana arūpa jīvitindriyaṃ sandhāya vuttanti ce. Na. Tathā gahaṇatthaṃ yamaka pāṭhantarābhāvato sabbaññuvisayeca ṭhāne pāliyo saṃsanditvā balavatiyā pāliyuttiyāeva ṭhātabbatoti. Yasmāca rūpadhammā nāma dandhapavattino honti. Arūpadhammā lahapavattino ṭhitikkhaṇoca tesam visuṃ gaṇanūpago natthi. Tasmā aññoyeva rūpa dhammānaṃ khaṇapabandho. Añño arūpadhammānaṃ. Tattha sabbepi rūpadhammā ekacittakkhaṇaparimāṇena attano uppādakkhaṇena yuttā khaṇe khaṇe nirantameva uppajjanti. Paṭisandhito paṭṭhāya sahuppannattāca pana dvinnam tesam uppādādivā nirodhantovā yāvajīvaṃpisaheva hotītipi tassa adhippāyoti. Yamaka pāliyo pana nānāṭṭhā, nānāyañjanā, gambhīroca satthu adhippāyo. Tasmā suṭṭhu vicāretvā sallakkhetabbo. Na pana dhammatā esā yamakassa. Yadiḍaṃ yathālābhayojanāti katvā attano adhippāye ṭhatvā diṭṭhaṃ diṭṭhaṃ yamakapāṭhaṃ yathālābhayo janāyaeva sakkā yojetunti. Rūpavirāgabhaṇāvanāvisesabhūtaṃ arūpakusalaṃ tasmim loke rūpasahitaṃ paṭisandhim najaneti. Suddhaarūpameva janeti. Tasmā rūpasantatisīssa sabbaso abhāvā tatrūpannāni sabbāni chacattālīsacittāni rūpaṃ janetuṃ na na sakkonti. Arūpavipākā pana tattheva niyamuppannāni arūpapākasseva gahaṇaṃ kataṃ, teneva aṭṭhakathāyaṃ, aññānīpi bahūni āruppe uppannāni anokāsathā rūpaṃ nasamuṭṭhāpentīti vuttaṃ tattha anokāsātānāma ādito paṭṭhāya uppannassa rūpasantatisīssa abhāvo eva daṭṭhabboti.

[189] Vibhāvaniyaṃ pana

“Rūpavirāgabhaṇāvanānibbattattā hetuno tabbidhuratāyā” tipī kāraṇaṃ vuttaṃ. Taṃ akāraṇaṃ.

Rūpārūpavirāgabhaṇāvanābhūtamagganibbattassa lokuttaravipākassa rūpokāse sati rūpajanakatādassanatoti. Jhānaṅgavirahena āṅgadubbālānīpi rūpaṃ na janentīti dvipañcaviññāgahaṇaṃ kataṃ. Itarā nīpi pana pannarasakāmarūpa paṭisandhicittāni khīṇāsavānaṃ parinibbānacuti cittanti imāni cittāni rūpaṃ na samuṭṭhāpentiyeva. Evaṃsantepi tāni sabbānīpi bhavaṅgakāle akhīṇāsavānaṃ cutikāle samuṭṭhāpentīti tesam idha agahaṇaṃ daṭṭhabbaṃ.

[190] Vibhāvaniyaṃ pana

Paṭisandhicittaṃ pana cuticittaṃ ekūnavīsati bhavaṅgasseva antogadhattā cittantaraṃ na hotīti na tassa vajjanaṃ kata’nti vuttaṃ. Tattha ekūnavīsati bhavaṅgassevāti na vattabbaṃ.

Arūpavipākassa sarūpato vajjitattāti. Kasmā pana yathā vuttāni pannarasa paṭisandhicittāni paṭisandhikkhaṇe rūpaṃ na samuṭṭhāpentīti, paridubbalattā. Cittañhināma uppādakkhaṇeeva paripuṇṇaṃ paccayaṃ labhitvā balavaṃ hoti. Rūpaṃ ṭhitikkhaṇeva.

Tasmā attano balavantakkhaṇe uppajjamānabhāvena dubbalaṃ vatthuṃ nissāya uppannattā

sayampi paridubbalaṃ hotīti sabbānipi tāni tadā rūpaṃ nasamuṭṭhā pentīti. Etthaca keci anantarāsevanādipaccayā cittaṃ uppādakkhaṇeṃ pharanti. Rūpassa pana upatthambhakabhūtā utuāhārā pacchājātapaccayadhammāca ṭhitikkhaṇeṃ vapharanti tesam yathākkamaṃ uppādakkhaṇe ṭhitikkhaṇe ca pariṇāpaccayalābho veditabbo.

[191] Vibhāvaniyaṃ pana

“Pacchājāta paccayarahitaṃ pana āhārādīhica anupatthaddhaṃ dubbalavatthum nissāya pavattatā attanoca āgantukatāya kammajarūpehica cittaṃ samuṭṭhānarūpanaṃ ṭhānaṃ gahetvā ṭhitatā”ti kāraṇaṃ vuttaṃ. Tattha pacchājāta paccaya rahitanti idaṃ vicāretabbaṃ.

Paṭisandhicittaṃ ṭhitikkhaṇe pacchājāta paccaya rahitassa piutussa rūpajanakabhāvassa vakkhamānattā. Na hi attanā avijjamānaṃ pacchimacittaṃ purimacittakkhaṇe ṭhitassa kassaci rūpassa pacchājāta paccayo hoti. Atthi paccayekadesattā tassa paccayassāti. Khīṇāsavānaṃ cuticittaṃ pana pakatiyāva vūpasantavattamūle santāne pavattatā santataraṃ hoti. Puna āyusaṅkhārānaṃ parikkhayena dubbalatare pariyaṅgate ca vatthumhi nissitattā dubbalataraṇa hotīti taṃ rūpaṃ nasamuṭṭhāpetīti, ācariyānandatthero pana sabbasattānaṃ pi cuticittaṃ rūpaṃ nasamuṭṭhāpetīti icchati. Yathāha-khīṇāsavānaṃ cuticittanti visesetvā vuttaṃ.

Kāmāvacarānaṃ pacchimacittaṃ uppādakkhaṇe yassa cittaṃ anantarā kāmāvacarānaṃ pacchimacittaṃ uppajjissati. Rūpāvacare arūpāvacare pacchimabhavikānaṃ yeca rūpāvacaraṃ arūpāvacaraṃ upapajjitvā parinibbāyissanti, tesam, cavantānaṃ tesam vacī saṅkhāro nirujjhissati, noca tesam kāyasaṅkhāro nirujjhatīti –

Pana vacanato aññesampi cuticittaṃ rūpaṃ nasamuṭṭhāpetīti viññāyati. Na hi rūpasamuṭṭhāpaka cittaṃ gabbhagamanādi vinibaddhābhāve kāyasaṅkhārāsamuṭṭhāpanaṃ atthi, na ca yuttaṃ cutoca cittaṃ samuṭṭhānañcassa pavattatīti. Nāpi cuticittaṃ rūpaṃ samuṭṭhāpetīti pāli atthīti.

Anuṭṭikāyaṃ pana

Tasmim pāṭhe tesam cavantānaṃ noca kāyasaṅkhāro nirujjhatīti vacanaṃ na kevalaṃ cuticittasseva rūpasamuṭṭhāpanābhāvaṃ sādheti, athakho tato purimānaṃ sabbesaṃ maraṇāsanna cittaṃ rūpasamuṭṭhāpanābhāvampi sādhetiyevāti dīpeti. Cuti cittaṃ mimihi kāyasaṅkhārassa nirodhe paṭisiddhe tato pubbe yāva sattarasamacittā etthantare tassa uppādopi paṭisiddhoeva hotīti. Sabbañcetaṃ vicāretabbaṃ.

Kāyasaṅkhāroti hi assāsapassāso vuccati. Soca suṭṭhu oḷāriko rūpadhammoti nacuticitte tannirodhābhāva vacanena itarāni sukhumānipi rūpāni cuticittaṃ najanetīti sakkā vuttaṃ.

[192] Yañca tattha

Na hi rūpasamuṭṭhāpakacittaṃ gabbhagamanādi vinibaddhābhāve kāyasaṅkhārāsamuṭṭhāpanaṃ atthīti vuttaṃ. Taṃ pi na yujjati.

Tānieva hi gabbhagamanādīni imassatthassa sādhakāni bhavituṃ arahanti oḷārikassa kāyasaṅkhārassa asamuṭṭhāpakampi cittaṃ itaraṃ sukhumarūpaṃ pana samuṭṭhāpetiyevāti.

[193] Yaṃ pi tattha

Na ca yuttaṃ cutoca cittaṃ samuṭṭhānañcassa pavattatīti vuttaṃ. Taṃ pi akāraṇaṃ.

Na hi cutito param katipayakhaṇamattaṃ cittajarūpapavattiyā koci virodho atthīti.

Yañca **tattha**

Nāpi cuticittaṃ rūpaṃ samuṭṭhāpetīti pāli atthīti vuttaṃ. Tatthapi cuticittaṃ rūpaṃ nasamuṭṭhāpetītipi natthi, aññatra kāyasankhārāti na na sakkā vattuntī.

Evam pana yuttaṃ siyā, yathā rūpadhammā ādito paṭisandhikāle ekacittakkhaṇamate paccayaparittatāyavā attano dandhavutti tāyavā dubbalā honti, tathā pariyoṣānepi maraṇakāle parikkhīyamānapaccayatāyavā nirodhāsannatāyavā paridubbalāeva hontīti sakkā vuttaṃ. Tasmā vatthussa ādiantanissitāni paṭisandhicutticittāni samadubbalānieva hontīti sakkā viññātuntī.

Vibhāvanīyaṃ pana

Abhidhammatthavikāsanīyañca pāli virodhaṃ maññamāno kiñcimattampi avicāretvā ṭikāsu vuttanayameva suṭṭhu vikāsayitvā gatoti.

Pathamabhavaṅgamupādāyāti pathama bhavaṅgacittassa uppādakkhaṇato paṭṭhāya. **Jāyantamevāti** uppādakkhaṇe uppādakkhaṇe uppajja mānameva, na tiṭṭhantaṃ. Naca bhijjamānanti attho. Kāraṇaṃ vuttameva. **Tatthāti** tasmim pañcasattatīvidhe citte. **Appanājavananti** abhiññādvayavajjitaṃ chabbīsatividhaṃ appanājavanacittaṃ. **Iriyāpathanti** gamanavajjitaṃ tividhampi iriyāpathaṃ.

[194] **Vibhāvanīyaṃ** pana

“Gamanādi”ti vuttaṃ. Taṃ na yujjati.

Na hi aṅgapaccaṅgānaṃ calanaphandanamattampi viññattiyā vinā sījhati. Kuto gamanaṃ. Naca yathāvuttaṃ appanājavanaṃ viññattim samuṭṭhāpetuṃ sakkotīti. **Pi** saddena taṃ nakevalaṃ rūpasamuṭṭhāpakamattaṃti dasseti. **Sannāmetīti** sandhāreti ayamevavā pāṭho siyā, vakkhamānehi cittehi abhisankhataṃ yathāpavattaṃ iriyāpathaṃ apatamānaṃ acalamānaṃ dhāreti upatthambhetīti attho. Upatthambhanañcetta yathāpavattassa iriyāpathassa rakkhanamattaṃ daṭṭhabbaṃ. Naukkipitvā viya abhinīharaṇaṃ. Itarathā thambhanaviññattiyā pasaṅgo siyāti. Etthaca yathānisinnassavā ṭhitassavā bhavaṅga citte abbokīṇṇe pavattamāne aṅgāni osīdanti patanti. Na tathā imasmim chabbīsatividhe jāgaraṇacitte vakkhamānesucadvattiṃsa vidhesu jāgaraṇacittesupavattamānesu. Tesu pana pavattamānesu aṅgāni upatthaddhāni honti. Na osīdanti na patanti. Pubbe yathā thapitāneva pavattantīti veditabbaṃ.

[195] **Vibhāvanīyaṃ** pana

“Na eva metesu dvattiṃsavidhesu vakkhamānesu ca chabbīsati yā jāgaraṇacittesu pavattamānesū”ti pāṭho.

Na evametesu chabbīsatiyā jāgaraṇacittesu vakkhamāne suca dvattiṃsa vidhesu pavattamānesūti pana pāṭho yutto. **Voṭṭhabbananti** manodvāre āvajjanamāha. Na hi pañcadvārikāni javana cittānīpi viññattim samuṭṭhāpentī. Iriyāpathupatthambhana mattaṃ vā pisaddena gahithaṃ sandhāya voṭṭhabbanādīni pañcadvārikānīpi gahitānīti daṭṭhabbaṃ. Etthaca iriyāpathonāma gamanādīnā tena tena avatthāvisesena pavattā rūpadhammāeva. Evam santepi kiñcicittaṃ rūpa sāmāññameva janeti na tatoparaṃ. Kiñci aññacittassa vasena yathāpavattaṃ iriyāpathaṃ rakkhituṃeva sakkoti, na appavattaṃ iriyāpathaṃ pavattetuṃ. Kiñci viññattim samuṭṭhāpetvā appavattañca iriyāpathaṃ pavattetuṃ sakkoti. Aññānīca kāyika vācasika vikārāni janetuṃ sakkoti. Yānīca cittāni uttarakiccaṃ janetuṃ sakkonti. Tāni

heṭṭhimahetṭhimam kiccam janetuṃ sakkontiyevāti dassanattam ayaṃ vibhāgo katoti veditabbo.

[196] Yaṃ pana vibhāvanīyaṃ

“Yaṃpana cittaṃ viññattijanakaṃ, taṃ ekamsato iriyāpathu patthambhakaṃ. Iriyā pathassa viññattiyā saha avinābhāvato”ti vuttam. Taṃ na yujjati.

Idha hi iriyāpathupatthambhanamṇāma viññattirahitamevā dhippetam, na viññattisahitam. Itarathā appanājavanānaṃpi viññattijanakatā āpajjeyyāti. **Somanassajavanāni terasāti** hasituppādena saddhiṃ lobhamūlato mahā kusalato mahā kriyato ca cattāricattārīti terasa somanassajavanāni. Tesupana kusalā kusalato aṭṭhaputhujanānaṃ. Diṭṭhivippayuttā kusalakusalato chasekkhānaṃ. Kriyato pañcakhīṇāsavānanti daṭṭhabbam. Sabbam kāyavacīmanokammaṃ ṇāṇapubbaṅgamaṃ ṇāṇānuparivattanti vacanato vicāraṇakiccarahito hasituppādo sabbaññubuddhānaṃ nasambhavatīti evaṃ pavatto vādo aṭṭhakathāyaṃ paṭikkhittoyeva. Tasmimvāde hi sati itaresaṃpi ahētukacittānaṃ ṇāṇavippayuttamahā kriyajavanānaṃca buddhānaṃ asambhavo āpajjati. Tasmā tesam hasituppādacittena pavattassa sitakammassa pubbāparapavattānaṃ ṇāṇānaṃ vasena ṇāṇapubbaṅgamatā ṇāṇānuparivattatā ca veditabbāti. **Sītuṇhotu samaññātāti** idaṃ sītam idaṃ uṇhanti evaṃ sabba lokiyamahājanehi suṭṭhu paricchinditvā ṇātā. **Ṭhitippattāvāti** attano ṭhitibhāvaṃ ṭhitikkhaṇaṃvā pattāeva. Na pana cittamiva jāyanta mattāti attho. Kāraṇaṃ vuttameva.

[197] Yaṃ pana vibhāvanīyaṃ

“Pacchājātādipaccayupatthambhalābhena ṭhitikkhaṇeva utuojānaṃ balavabhāvoti vuttam tejodhātu ṭhitippattātiadi”. Tatha pacchājātāpaccayavacanam heṭṭhā vicāritameva.

Apica, yadi utuno balavabhāvo rūpuppādanaṃca pacchājātāpaccayāyattam siyā. Evaṃ sati so paṭisandhicittassa ṭhitikkhaṇe rūpaṃ na samuṭṭhāpeyya, tadā pacchājātāpaccayasseva abhāvato. Vakkhatica **ṭhitikālamupādāya utusamuṭṭhānāti**. Etthaca **ṭhitikālanti** paṭisandhicittassa ṭhitikālo vuttoti. Tasmā pacchājātāpaccayavacanam vicāretvā sampaṭicchitabbanti. **Ojāsaṅkhāto āhāroti** kammamuṭṭhānādivasena catubbidho ajjhataṃsantāna gatoasitapītakhāyitasāyitavasena catubbidho, bahiddhasantā nagatoca ojāsaṅkhāto duvidhāhāro. Tadubhayāpica saṃsagga vasena laddhupatthambhā evarūpaṃ samuṭṭhāpentīti vuttam **ajjhoharaṇa kāleti**. Etthaca bahiddhāsambhūtena utunā saha ajjhata sambhūtānaṃ catusamuṭṭhānānaṃ utuojānaṃ viya bahiddhāsambhūtāya ojāyapi ajjhattam rūpasamuṭṭhānaṃ sabbaaṭṭhakathāsu vuttam.

Yathāha-majjhimaṭṭhakathāyaṃ

Kabalīkārāhāro tāva mukhe thapitamatto eva aṭṭharūpāni samuṭṭhāpeti. Dantavicuṇṇitam pana ajjhoharīyamānaṃ ekekaṃ sittham aṭṭha aṭṭha rūpāni samuṭṭhāpeti.

Ācariyadhammapālattherena pana yadi bahiddhasambhūtā oja rūpaṃ samuṭṭhāpeyya, evaṃ sati yathā bahiddhasambhūto utu ajjhataṃca bahiddhāca rūpaṃ samuṭṭhāpeti. Tathā sā bahiddhāpi rūpaṃ samuṭṭhāpeyya. Na pana samuṭṭhāpeti. Tasmā sā ajjhattam patvāpi rūpaṃ na samuṭṭhā petiyeva. Ekantena pana ajjhatao jāeva samuṭṭhāpeti. Sā pana tassā upatthambhanapaccayoeva hotīti adhippāyena mukhe thapitamattoeva. Na saṅkhādito. Tattakenapi abbhantarassa paccayo hotiyeva, kenāha aṭṭha aṭṭha rūpāni samuṭṭhāpetīti majjhimaṭṭkāyaṃ vuttam. Yasmā pana upādinnakā utu ojanāma suṭṭhu paṇītarūpā hontī, tasmā bahiddhā ojaṃpi ajjhattam patvā tena utunā suṭṭhu sediyamānā tāyaca ojaṃ suṭṭhu upatthambhīya mānā sarīre medasinehupacayavasena rūpaṃ samuṭṭhāpetiyevāti yuttam. Ajjhoharaṇakāleti idaṃca suṭṭhu balavabhāvappatta kālam sandhāya vuttam. Visuddhimagge pana mātarā paribhuttāhāropi dārakassa sararam pharivā rūpaṃ samuṭṭhāpeti. Sarīre makkhitāhā ropi rūpaṃ samuṭṭhāpetīti vuttam. Mukhe thapitamattoeva aṭṭharūpāni samuṭṭhāpetītica pubbe vuttanti. **Ṭhāna**

pattovāti attano **ṭhitikkhaṇaṃ** pattoeva. Etthaca catūsu samuṭṭhānesu utueva mahanto mahāthāmo mahāvippahāroca hoti. So hi sakalassapi okāsalokassa bahiddhā saṅkhāralokassaca samuṭṭhā pako vināsako ca hoti. Sattalokassaca soeva mahanto ajjhattasambhārahūto hoti. Itarāni pana tīṇi tassa parivāramattānieva sampajjantīti.

Hadaya indriya rūpāni kammajāneva, na cittajādini. Yadi evaṃ vippasannāni kho te āvuso sārīputta indriyāni. Katarena tvaṃ etarahi vihārena viharasīti kasmā vuttanti. Indriyasambhāraṇaṃ vaṇṇānaṃ samāpatti cittasamuṭṭhitānaṃ visadvippasannatāvasena upacari tattāti. Tathā hi ekābaddhapavattāni catujarūpāni ekasmiṃ vippasanne sabbāni vippasannāneva honti. Milāteca milātānevāti. Utucittāhārā pana tesam navannaṃ upatthambhanapaccayā hontīti veditabbaṃ. Ettha ca uppalapadumāni viya kammajarūpāni daṭṭhabbāni. Tesam bijaṃ viya kammaṃ. Kaddamodakāni viya utuāhārādīni. **Viññatti dvayaṃ cittajameva**. Tathā hi taṃ cittaṣaḥbhū cittaṇuparivattidhammesu bhagavatā niddiṭṭhanti. **Saddocittotujoti** kasmā vuttaṃ. Nanunidhikaṇḍasutte suvaṇṇatā susaratā susaṅghānaṃ surūpatātiādīnā tādisena kammavisesena saddasampattināma vuttāti. Saccaṃ, kammavisesena pana yathā suvisado sumadhuro saddo pavattati, tathā ṭhānakaraṇagatānaṃ upādinnakasarīraṇaṃ susaṅghitātā vāta semhādīhi apalibuddhatāca hoti. Tasmā tammūlikāsaddasampatti kammaphalesu pakkipitvā susaratāti vuttā. Na ekantena saddassa kammajanitattāti veditabbā.

Lahutādittayaṃ utucittāhārehi sambhotīti kasmā vuttaṃ. Nanu appābādhasaṃvattanikā esā māṇava paṭipadā, yadidaṃ avihiṃsāti vuttaṃ. Appābādha paccayasamuṭṭhitaṅca etaṃ rūpattayaṃ. Tathā hi dandhattādi kara dhātukkhotā paṭipakkhapaccaya samuṭṭhānatā etassa vuttāti. Vuccate, kammajarūpānīnaṃ uduke pakkhittāni satapākatelāni viya pakatiyāva kammānurūpaṃ lahu mudu kammañña bhūtāni honti. Tasmā tesam viṣuṃ lahutādi vikāronāma natthi. Yato tesam ekasmiṃbhava ekāaddhā paccuppannatāva labbhatīti. Evaṅca katvā yamakesupi tesam kālabhedo paṭisandhivuttiparicchinnena addhā paccuppanneva gahitoti. Yasmā pana cittaṃnāma nānānīvaraṇabheda vasenavā sukha dukkha pīti passaddhi saddhā paññādi vasenavā nānā khaṇesu nānā avatthā yuttaṃ hoti. Tathā utuāhārāca sappāyā sappāyabheda vasena. Tasmā tehi tīhi samuṭṭhita rūpānieva nānākhaṇesu garukalahukādi vasena nānāvīkārāyuttāni honti. Yato tesam santati samaya vasena kālabhedo labbhati. Evaṅca katvā yamakesupi akammajānaṃ pavattikāle khaṇasantativasenapi kālabhedo gahitoti. Nanu kammavipākajā ābādhatīti vuttaṃ. Satīca kamma samuṭṭhāne ābādharūpe tatovuṭṭhānabhūto kammajo lahutādi guṇopi viṣuṃ labbhamāno siyāti. Na. Yesañhi vasena imasmiṃ sarīre kammavipākajānāma ābādha uppajjanti. Tāni upapīlakupa ghātakakammānīpi gatikālapayoga vipattiyo labhamānāni eva sarīraṭṭhakā pathavādayo vātipittādayoca utusamuṭṭhānā dhātuyo khobhetvā nānābādhe uppādentī. Utusamuṭṭhānāsu pana khubbhitāsu itarāni tadanugatīkāni eva honti. Teneva hi sītenapi ruppanti, uṇhenapi ruppanti, jigacchāyapi ruppanti, vipāsāyapi ruppantītiādīnā utupadhānova rūpadhammānaṃ ruppanapaccayo vuttoti. Tasmā kevalaṃ kammāsamuṭṭhāno ābādhanāma natthi. Yato yathāvutto kammajo lahutādiguṇonāma viṣuṃ labbhamāno siyāti.

Yasmā pana avihiṃsā kammanibbattā sattā tesam upapīlakādīnaṃ kammānaṃ suvidūratāyaceva sarīrakoṭṭhāsānaṃ ghanasīniddhasaṅghitīyā dukkhobhaniyatāyaca nibbattabhava nīrābādha honti. Tasmā tadatthaṃ sandhāya appābādhasaṃvattanikā esā māṇavapaṭipadā. Yadidaṃ avihiṃsāti vuttaṃ, na pana appābādhanimittassa lahutādittayassa kammāsamuṭṭhānatāya. Evaṅca katvā rūpakaṇḍena kammāsakaṭattārūpesu eva etaṃ rūpattayaṃ niddiṭṭhanti daṭṭhabbaṃ. Rūpakalāpānāma ekasmiṃ paramāṇusmiṃpi bahuvīdhā hutvā pavattanti. Tasmā catujarūpa kalāpesu ghanabhāvena pavattamānesu kalāpantarabhūtā ākāsadhātupi dissamānāneva hotīti katvā catujesu tassā gahaṇaṃ kataṃ. Kāmaṃ sabbānīpi anipphannarūpāni kenaci paccayena anipphādītāni honti. Tesu pana na tathā lakkhaṇarūpāni. Yathā itarāni cittādi paccaya visesena dissamāna visesāni hontīti vuttaṃ **lakkhaṇarūpāni na kutoci jāyantīti. Jāyamānādi rūpānanti** jāyamāna jīyamāna miyyamānānaṃ rūpakalāpānaṃ. **Sabhāvattāti** jātijarāmarāṇasaṅkhātalakkhaṇasabhāvamattattā. Etthaca rūpakaṇḍe utusamuṭṭhānanti ca āhārasamuṭṭhānanti ca vuttaṃ natthi. Paṭṭhāne eva vuttaṃ.

Ettha siyā, jaratā aniccatā pāḷiyameva na kutoci samuṭṭhānāti vuttā. Tasmā idhapi tāsam nakutoci samuṭṭhānesu gahaṇam yuttam. Upacayasantatiyo pana pāḷiyampi kutoci samuṭṭhānesu vuttā. Aṭṭhakathāyampi tāhi saddhim visati kammajarūpāni sattarasa cittajarūpāni cuddasa utujarūpāni terasa āhāraja rūpāni vuttāni. Tasmā idha tāsam nakutocisamuṭṭhānatā navattabbāti. Vuccate, rūpajanakānaṃ janānabyāpāronāma attanā janitarūpānaṃ uppādakkhaṇe eva pharati. Na-tato param, tasmā tasmim khāṇe labbhamānā upacayasantatiyoyeva kutoci jātapariyāyaṃ arahanti, na jaratā aniccatāyoti katvā pāḷiyam aṭṭhakathā yaṃca tāsameva kutoci samuṭṭhānesu gahaṇam katam. Apica, pubbe ajātā dhammā paccaye sati jāyanti. Asati na jāyantīti atthi. Jātā pana dhammā paccaye sati jiyanti, miyyanti. Asati najiyanti namiyyantīti natthi, tasmā purimānaṃ dvinnaṃ pavatti ekantena paccayāyattā hoti. Pacchimānaṃ dvinnaṃ pavatti pana ekantena paccaya nirapekkhā hotīti iminā pariyāyena tāsam tesu gahaṇam agahaṇaṇca vedītabbam. Yaṃ pana suttapadesu jarāmarāṇam bhikkhave saṅkhatam paṭicca samuppannanti vuttam. Tam jātiyā satieva tadubhayaṃ paññāyati. Asati na paññāyatīti iminā pariyāyena vuttanti vedītabbam. Idha pana pubbe vuttanayena itara anipphanarūpāni viya cattāripi eṭāni cittāḍipaccayavisesena dissamānavisesāni na hontīti catunnaṃpi na kutoci jātātā vuttā. Evaṃsantepi sāratarāṃ pāḷinayam atidhāvanto viya hotīti upacayasanta tīnaṃ kutoci samuṭṭhānesu saṅgahoeva seyyoti. [Rūpasamuṭṭhānanayo]

159. Eko eva jāti saṅkhāto uppādo etesanti **ekuppādā**. Ekoeva aniccatāsāṅkhāto nirodho etesanti **ekanirodhā**. Ekasaddo cettha saṅkhāne pavatto. Tasmā tena yāni rūpāni ekāyaeva jātiyā jāyanti. Ekāya eva aniccatāya nirujjhanti. Tesam piṇḍi idha rūpakalāponāmāti dasseti. Ye pana kalāpagata rūpagaṇānāya ekasmim kalāpepi anekāni jātiādīni kappenti, tesam mūlaṭṭikāya nasameti. Yuttica natthi. Vuttañhi tattha ekekakalāpa pariyāpannānaṃ rūpānaṃ saheva uppādāḍipavattito ekekakalāpassa uppādādayo ekekāva hontīti yathā ekekassa kalāpassa jīvitindriyaṃ kalāpā nupālakaṃ upādāya rūpanti vuccati. Evaṃ kalāpuppādādi sabhāvā jātiādāyo upādāyarūpānicceva vuccanti. Evaṃ vikārapariccheda rūpānica yojetabbānīti. Yadica yo āyatanānaṃ ācayo. So rūpassa upacayotica yo rūpassa upacayo. Sārūpassa santatītica vuttattā tāni jātiādīni lakkhaṇarūpāni visumvisum rūpānaṃeva, nakalāpassāti vucceyyum. Catunnaṃ mahābhūtānaṃ upādāya pasādo rūpīnaṃ dhammānaṃ āyūtiādīnā vuttattā cakkhādi jīvitādīnīpi ekasmim kalāpe anekānieva āpajjeyyum. Tasmā tathā kappanaṃ akatvā ekasmim kalāpe aññāni upādārūpāni viya lakkhaṇarūpānīpi ekekānievāti niṭṭham gantabbanti.

Eko samāno mahābhūtasāṅkhāto nissayo etesanti **ekanissayā**. Ettha pana samānatthe ekasaddo yutto. Catunnaṃ bhūtānaṃ nissayatāsambhavato. Yānicaekuppādātādīhītilakkhaṇehi yuttāni. Tāni ekantena sahavuttīni nāma hontīti vuttam **sahavuttinoti**. Dasaparimāṇāniassātidasakam. Dasannaṃ samūho vā dasakam. Cakkhunā upalakkhitam dasakanti **cakkhudasakam**. Cakkhupadhānaṃvā dasakam cakkhudasakam. Esanayo sesesupi. Yasmā pana cittajo saddo viññattivikārena vinā napavattati. Viññattivikāroca tena saddena vinā napavattati. Tasmā cittajam saddanavakamvā vacīviññattinavakamvā nasambhavatīti adhippāyena **vacīviññatti sadde hi ca sahavacīviññatti dasakanti** vuttam. Ettha pana viññatti vikāro saddena vinā napavattatīti idam tāva yujjati. Yā tāya vācāya viññatti viññāpanā viññāpitattam. Idam tamrūpaṃ vacīviññattīti hi vuttam. Viññattivikārarahitam pana cittajam saddanavakam. Aṭṭhakathāsu āgatameva. Yathāha-paṭiccasamuppāda niddesesu paṭisandhikkhaṇato uddham pavattautotoceva cittatoca saddanavakanti.

Mahāaṭṭhakathā nayena viññatti rahito vitakka vipphāra saddonāma asota viññeyyo cittajo saddo labbhati. So pana saṅgahakārena paṭisiddho. Yathāha-paṭṭhānepi cittasamuṭṭhānaṃ saddāyatanam sotaviññāṇassa ārammaṇapaccayena paccayoti āvataṃ. Tasmā vinā viññattighaṭṭānāya uppajjamāno asota viññeyyo vitakkavipphārasaddonāma natthīti. Visuddhimagge assāsa passāse cittajam saddanavakam vuttam. Yathāha-cittaje assāsa passāsa koṭṭhāsepi ojaṭṭhamakañceva saddocāti navāti, saddanavakeca āgate saddalahutādi dvādasakampi āgatameva hoti. Tasmā suddhaṭṭhakam, saddanavakam, kāyaviññatti nākam, vacīviññatti dasakam, lahutādekā dasakam, saddalahutādidvādasakam, kāyaviññatti lahutādi dvādasakam, vacīviññattisaddalahutādi te rasakanti aṭṭhacittajakalāpā paccetabbāti. Saccasāṅkhepe pana sadda lahutādi dvādasakam visum agahetvā cittaja

kalāpā satteva vuttā.

Ṭīkāsu panassa **porāṇaṭṭikāyaṃ**

Mahāṭṭhakathāyena viññattirahite asota viññeyye vitakka vipphārasadde saddanavakaṃ dassetvā puna vādantaraṃ dassentena. Apica, mahājanasannipātassa dūrato apaññāyamānakkharapadabyañjanattho cittasamuṭṭhānanighosāsaddo aviññattiko evāti vadanti. Tathā migapakkhīnaṃca aññamaññaṃ bhāsaṃ ajānantānaṃ andhadamiḷādīnaṃ aviññattiko cittasamuṭṭhānasaddo atthīti vuttaṃ.

Tattha viññattirahito asotaviññeyyo vitakkavipphāra saddo aṭṭhasālīniyaṃ paṭikkhitto. Mahājanasannipātassa citta samuṭṭhāna nighosāsaddopi āsanne ṭhitānaṃ paññāyamānakkharapada byañjanattho saviññattikoeva hoti. Itarathā sabbeṃ citta jasaddā dūratare ṭhitānaṃ apaññāyamāna padabyañjanāeva hontīti sabbeṃ viññattirahitā siyunti. Naca migapakkhīdīnaṃ cittaṃ saddo viññattirahito hoti. Samānāṭṭiyānaṃ paresaṃ adhippāyattha viññāpanatoti.

Pacchima ṭīkāyaṃ panassa

Saddanavakaṃ panettha accharā saṅghāta pañippahārādi sadda sahitaṃ aṭṭhakamevāti vuttaṃ. Taṃpi na yuttaṃ.

Tādiso hi saddo cittaṃ paccayo utusamuṭṭhānoeva. Tasmā visuddhimagge vuttanāyena assāsapassāsevā avacīghosesu kadāci cittasahitesu ukkāsa khapita vāmita chaḍḍitasaddādīsū pivā etaṃ saddanavakaṃ veditaṃ banti. Utujakalāpesu pacchimā dveṃpi kasmā bahiddhā nalabbhanti. Nanu bahiddhāpi rūpānaṃ lahu garu mudu thaddha kammaññatā dissantīti. Saccā, tā pana bhūtānaṃ omattādhimatta vasena hontī, na pana lahutādittayavasenāti daṭṭhabbaṃ. Kasmā pana ākāsadhātuca lakkhaṇarūpānica rūpakalāpesu nagahitānīti vuttaṃ **kalāpānanti**ādi. Ākāsadhātukalāpānaṃ pariccheda mattattā kassaci rūpakalāpassa aṅgabhūtā avayavabhūtā na hoti, lakkhaṇarūpānica sabbesampi kalāpānaṃ uppādādi lakkhaṇa mattattā vikārarūpāni viya kalāpānaṃ bhedakarāni aṅgabhūtāni kalāpavisesapaññāpanassa kāraṇabhūtāni na hontī. Tasmā tāni tesu nagahitānīti dasseti. Etena ekuppādātiādīnaṃ pubbe vuttaniyamo nipphannarūpānaññeva, na anipphannarūpānaṃ. Tesāṃ pana kalāpa bheda kāraṇa meva kalāpaṅganti ca dīpeti. Evañca katvā ekanirodhaṅgarahitassapi viññattidvayassa kalāpabheda karattāeva tesu gahaṇaṃ suṭṭhu upapannaṃ hotīti veditaṃ banti. [Kalāpayojanā]

160. Yathārahanti sabhāvakā bhāvakānaṃ paripuṇṇāpari puṇṇindriyānañca arahānurūpato. **Anūnānīti** paripuṇṇāni. Nañhi idaṃ nāmarūpaṃ kāmaloke pavattiyāṃ na labbhatīti atthīti.

[198] **Vibhāvaniyaṃ** pana

“Yathārahanti sabhāvakapariṇāyatanānaṃ anurūpato”ti vuttaṃ, taṃ na sundaraṃ.

Na hi anūnānīti idaṃ puggalavasena visesaṃ hotīti. **Samśedajānañcevaopapātikānañcāti** ettha mahāsīhanādasutte-

Catasso kho imā sārīputta yoniyo. Katamā catasso, aṇḍajā yoni jalābujā yoni samśedajāyoni opapātikā yonīti. Ye kho te sārīputta sattā aṇḍakosaṃ abhinibbhijja abhinibbhijja jāyanti, ayaṃ vuccati sārīputta aṇḍajā yoni. Ye kho te sārīputta sattā vatthikosāṃ abhinibbhijja abhinibbhijja jāyanti. Ayaṃ vuccati sārīputta jalābujā yoni. Ye kho tesāri puttassattāpūtimacchevā jāyanti. Pūtikūṇapevā pūtikummāsevā candanikāyavā oḷigallevā jāyanti, ayaṃ vuccati sārīputta samśedajā yoni. Devā nerakā ekacce ca manussā ekacce vinipātikā ayaṃ vuccati sārīputta opapātikā yonīti vuttaṃ.

Aṭṭhakathāyañca aṇḍe jātā aṇḍajā. Jalābumhi jātā jalābujā. Saṃsede jātā saṃsedajā. Vinā etehi kāraṇehi uppattitvā viya nibbattā abhinibbattāti opapātikā. Abhinibbhijja jāyantīti bhinditvā nikkhamanavasena jāyanti. Pūti kuṇapetiādīhi aniṭṭhaṭṭhānāneva dassitāni. Iṭṭhesu sappi telamadhuphāṇitādīsu sattā jāyantievāti vuttaṃ. Etthaca purimesu dvīsu pālīnayaena aṇḍaṃ vuccati aṇḍakoso. Jalābuvuccati vatthikoso, tato jātā vijātā nikkhantāti aṇḍajā jalābujātica vuccantīti veditabbā. Tattha jaraṃ jīraṇaṃ bhedaṃ yāti upetīti jalābūti saddanītiyaṃ vuttaṃ. Jalaṃ vuccati kalalaṃ. Taṃ āvunāti paṭicchādeti avativā rakkhatīti jalābu, gabbhapalivethanāsayo. Saṃsīdanti etthāti saṃsedo. Pūtimacchā diko sappitelādiko padumagabbhaveḷugabbharukkhasusirapuppaphalādi koca allakilinnapadeso. Upapattikkhaṇeeva paripuṇṇaṅgappaṅgattā tato tato uppattitvā viya jāyantīti opapātikā.

Vibhāvaniyaṃ pana

Aṇḍajādayopi aṇḍakosādīmhi okkamantā uppatantā eva nāma hontīti tesampi opapātikattapasaṅgaṃ maññaṃāno upapāto nesam atthīti opapātikāti vatvā ukkaṃsagati paricchēdavasena cettha visiṭṭhaopapāto gahito. Yathā abhirūpassa kañña dātābbāti vadati.

Ukkaṭṭhavasēnāti paripuṇṇāyatanabhāvasaṅkhātena ukkaṃsatāvena, tattha opapātikā aṅgapaccāṅgehi saha sabbaso paripuṇṇena attabhāvena jāyanti. Puna tesam vaḍḍhanakiccaṃ natthi. Saṃsedajānaṃ pana āyatanāni eva paripuṇṇāni honti. Aṅgapaccāṅgāni pana puna vaḍḍhitvāeva paripuṇṇāni jātānīti veditabbaṃ. **Omakavasēnāti** avakaṃsavasena.

Cakkhusotaghānabhāvasekānikadācīpi na labbhanti jātibadhira jaccaghānakānaṃ abhāvakānañca sambhavatoti appoyo. Tattha tāni sabbānīpi sugati duggati jātiyānaṃ ahetukasāṃsedajānaṃ kadāci nalabbhanti. Sugatiyaṃ pana opapātikabhāvonāma seṭṭho attabhāva paṭilābhoti nayena kenaci omakena kammena labbhati. Tasmā sugatijāti yānaṃ opapātikānaṃ aparipuṇṇindriyatānāma natthi aññatra abhāvakehi ādikappikehiti. Duggatijātiyānaṃpi pana tesam kadāci cakkhu sota bhāva vekallatāeva vattabbā. Na ghānavekallatā. Kāmadhātuyaṃ pana aghānako opapātikō natthīti hi aṭṭha kathāyaṃ vuttaṃ. Jivhāvekallatānāma sabbesaṃpi natthi yevāti veditabbaṃ. Tathā hi dhammahadayavibhaṅge –

Kāmadhātuyā upapattikkhaṇe kassaci ekādasā yatanāni pātubhavanti. Kassaci dasa. Kassaci aparāni dasa. Kassaci nava. Kassaci sattāyatanāni pātubhavanti vuttaṃ.

Tattha kāmadhātuyanti kāmaloke. Upapattikkhaṇeti paṭisandhicittassa uppādakkhaṇe. Kassaci ekādasā yatanānītiadisū catūsū vākyesu saṃsedajopapātikā vuttā. Kassaci sattāyatanānīti ettha pana gabbhaseyyakova vutto. Tattha yasmā sattāyatanānaṃ nāma paṭisandhikkhaṇe na labbhati. Pavatti kāleyeva labbhati. Tasmā ekādasayatanānīti vuttaṃ. Kassaci dasāti cakkhūvekallavasena. Kassaci aparāni dasāti sota vekallavasena. Kassaci navāti cakkhusota dvaya vekalla vasena vuttaṃ. Yadica aghānako opapātikonāma siyā. Tadā suddhajaccaghānakena saddhiṃ tayo dasakavārā vuttā siyūṃ. Tathā jaccandhaghānaka jaccabadhiraghānakehi saddhiṃ tayo navakavārā ekoca aṭṭhakavāro vutto siyā tiṇṇaṃ vipannānaṃ vasena. Tathā avuttattā pana natthi aghānako opapāti koti viññāyatīti. Tasmīṃ pana vibhaṅge indriyavāre napuṃsakānaṃ opapātikānanti avuttattā thapetvā ādikappike abhāvakopi opapātikō natthiyevāti. Pālīyaṃ avuttampi pana saṃsedajānaṃ vuttapakāraṃ cakkhādivekallaṃ aṭṭhakathāvasena veditabbaṃ. Yathāha-sattati ukkaṃsatova rūpāni saṃsedajopapāta yonīsū. Athavā, avakaṃsato tiṃsāti. Tattha tiṃsāti jivhākāya vatthu dasakānaṃ vasena tiṃsarūpānīti ca vuttaṃ. Idañhi vacanaṃ saṃsedajānaṃ vasena vuttanti mahāṭīkāyaṃ vuttaṃ. Ācariyā nandattherena pana yamake ghānajivhānaṃ aññaṃānaṃ avinābhāva vuttitā vuttāti jivhā vekallatā viya ghānavekallatāpi natthīti icchitaṃ. Indriya yamake pana –

Yassavā pana itthindriyaṃ uppajjati, tassa ghānindriyaṃ uppajjati. Aghānakānaṃ itthīnaṃ upapajantīnaṃ tāsāṃ itthindriyaṃ uppajjati, noca tāsāṅghānindriyaṃ uppajjati. Yassavā pana purisindriyaṃ uppajjati, tassa ghānindriyaṃ uppajjati. Aghānakānaṃ purisānaṃ

upapajjantānaṃ tesam purisindriyaṃ uppajjati, noca tesam ghānindriyaṃ uppajjatītica vuttaṃ.

Tasmā aṭṭhakathāyaṃ vuttanayena ghānavekallatāpi atthīti vuttaṃ.

Vibhāvaniyaṃ pana

Apare pana yamake ghānajivhānaṃ sahaacāritā vuttāti ajivhassa asambhavato aghānakassapi abhāvameva vaṇṇenti. Tatthāpi yathā cakkhusotāni rūpabhava ghāna jivhāhi vinā pavattanti. Na evaṃ ghānajivhā aññamaññaṃ vinā pavattanti. Dvinnaṃpi rūpabhava anuppajjanatoti evaṃ visuṃ visuṃ kāmabhava apavatti vasena tesam sahaacāritā vuttāti na na sakkā vattunti vuttaṃ. Taṃ vuttaṃ.

Okāsavāre hi ekantasahaacāritā vuttamattena puggalesu ekantasahaacāritā na sakkā vattunti. Gabbhe mātukucchimhi sentīti gabbhaseyyakā. Rūpādīsu khandhesu sañjanti laggantīti sattā. Yathāha-rūpe kho rādha yo chando, yo rāgo, yā nandī, yā taṇhā, tatra satto, tatra visatto, tena sattoti vuccatītiādi. Gabbhaseyyāca te sattācāti samāso. Aṇḍajāceva jalābujāca. **Tīṇidasakāni pātu bhavanti.** Yāni kalalanti vuccanti. **Bhāvadasakam kadāci nalabbhati** napuṃsakassāti adhippāyo. Evañcakatvā dhammahadayavibhaṅge gabbhaseyyakānaṃ sattānaṃ ahētukānaṃ napuṃsakānaṃ upapattikkhaṇe cattāriṇḍriyāni pātubhavanti kāyindriyaṃ manindriyaṃ jīvitindriyaṃ upekkhindriyanti vuttaṃ. **Tatoparanti** gabbhaseyyakānaṃ paṭisandhikkhaṇato paraṃ. **Pavattikāleti** ekadasame sattāhe. Tathā hi kathāvattuṭṭhakathāyaṃ sesāni cattāri sattasattati rattimhi jāyantīti vuttaṃ. Tattha sesānīti kāyāyatana manāyatana avasesāni cattāri cakkhusotaghānajivhā yatanāni. Sattasattatirattimhīti ekādasamasattāhassa pariyoṣānarattimhi. Ayañca attho yamakaṭṭikāya dīpetabbo. Vuttañhi tattha –

Gabbhaseyyakassa pacchimabhavikassa upapajjantassa ekadasa masattāhā orato ṭhitassa rūpāyatanaṃ nuppajjissati, noca cakkhāyatanaṃ nuppajjissatīti.

Yaṃ pana yassavā pana yattha rūpāyatanaṃ uppajjittha, tassa tattha ghānāyatanaṃ uppajjatīti. Kāmāvacarā cavantānaṃ aghānakānaṃ kāmāvacaraṃ upapajjantānaṃ rūpāvacarānaṃ tesam tattha rūpāyatanaṃ uppajjittha. Noca tesam tattha ghānāyatanaṃ uppajjatīti ettha aghānakānaṃ kāmāvacaraṃ upapajjantānanti vuttaṃ.

Taṃ ye ekādasamasattāhā orato kālaṅkarissanti. Tesam ghānāyatanaṃ nibbattakakammena gahitapaṭisandhikānaṃ vasena vuttantīca vuttaṃ. Etthaca cakkhughānesu vuttesu sotajivhā avuttāpi atthato siddhāeva hontīti.

[199] Yaṃ pana vibhāvaniyaṃ

“Pavattikāleti sattame sattāheti” vuttaṃ. Taṃ na gahetabbam.

Aṭṭhakathā virodhato idisesu ca ṭhānesu aṭṭhakathā pamāṇatoti.

[200] Yañca tattha

“Ṭīkākāramatena ekādasame sattāhe vāti” vuttaṃ. Tampi na sundaraṃ.

Nahi aṭṭhakathāyaṃ niddiṭṭhato vutto vinicchayo ṭīkākāra matonāma sakkā vattunti.

[201] Yañca tattha

“Kamenāti cakkhudasakapātubhāvato sattāhātikkamena sotadasakaṃ. Tato sattāhātikkamena ghāna dasakaṃ. Tato sattāhā tikkamena jivhādasakanti evaṃ anukkamenāti vuttaṃ”. Taṃpi na daṭṭhabba.

Yathāvutta aṭṭhakathāvirodhattā eva.

[202] Yaṃpi tattha

“Aṭṭhakathāyaṃpi hi ayamatto dassito vā”ti vuttaṃ. Taṃpi na yuttaṃ.

Na hi sānāma aṭṭhakathā atthi. Yattha īdiso uppattikkamo dassito siyā. Nanu paṭiccasamuppādaṭṭhakathāsu gabbhaleyyakavasena vā purimaṃbhavacakkaṃ vuttaṃ. Anupubbapavattidīpanatoti vuttanti ce.Na. Tañhi viññāṇādīnaṃ pañcannaṃ aṅgānaṃ paccayapaccayuppannabhāvavattikkamena pāḷiyaṃ āgataṃ pañcapadaṃ sandhāya vuttanti. Āyatananiddesaṭṭhakathāsu pana so paṭikkhittoyeva. Naca aṭṭhakathāsu paṭikkhitto uppattikkamo therena idha kamenāti iminā pāḥena dassitoti sakkā vuttanti. Tasmā **kamenāti** idhapi desanakkamenāti attho. Desitānīti sambandhoca vedītabbo.

Saccasaṅkhepa ṭīkāyaṃ pana

Sākhāvattaṃ atikkamma pacchā sattame sattāhe cakkhu sotaghānajivhādasakāca uppajjanti. Ṭīkākāropana ekādasame sattāheti āhāti vuttaṃ. Taṃpi nayujjati yevāti.

Ettha ca kalalādīnaṃ uppattikkamo saṃyuttake vutto. Yathāha –

Pathamaṃ kalalaṃ hoti, kalalā hoti abbudaṃ;
Abbudā jāyate pesi, pesiyā nibbattate ghano;
Ghanā pasākhā jāyanti, kesā lomā nakhāpicāti.

Aṭṭhakathāyaṃca vuttaṃ. Tattha pathamanti pathamena paṭisandhiviññāṇena tissoti vā phussotivā nāmaṃ natthi. Athakho tīhi jātiunṇaṃsūhi katasuttage saṅghitatelabindupamaṇaṃ kalalaṃ hoti. Yaṃ sandhāya vuttaṃ –

Tilatelassa yathā bindu, sappimaṇḍo anāvilo;
Evaṃ vaṇṇapaṭibhāgaṃ, kalalaṃ saṃpavuccatīti.

Kalalā hoti abbudanti tasmā kalalā sattāhaccayena maṃsadhovanaudakavaṇṇaṃ abbudaṃnāma hoti, kalalanti nāmaṃ anta radhāyati. Vuttaṃpi cetam –

Sattāhaṃ kalalaṃ hoti, paripakkasamūhakaṃ;
Vivattamānaṃ tabbhāvaṃ, abbudaṃnāma jāyatīti.

Abbudā jāyate pesīti tasmāpi abbudā sattāhaccayena vilīna tipusadisā pesināma sañjāyati. Sā maricaphāṇitena dīpetabbā. Gāmadāraḥ hi supakkāni maricāni gahetvā sāṭakantare bhaṇḍikaṃ katvā pīletvā maṇḍaṃ ādāya kapāle pakkhipitvā ātape thapenti. Taṃ sukkhamānaṃ sukkhamānaṃ sabbabhāgehi muccati. Evarūpā pesi hoti. Abbudanti nāmaṃ antaradhāyati. Vuttaṃpi cetam –

Sattāhaṃ abbudaṃ hoti, paripakkasamūhakaṃ;
Vivattamānaṃ tabbhāvaṃ, pesināma pajāyatīti.

Pesiyā nibbattate ghanoti tato pesito sattāhacca yena kukkuṭaṇḍasaṅṭhāno ghanonāma maṃsapesi piṇḍo nibbattati. Pesītināmaṃ antaradhāyati. Vuttampi cetam –

Sattāhaṃ pesi bhavati, paripakkaṃ samūhakaṃ;
Vivattamānaṃ tabbhāvaṃ, ghanotināma jāyatīti;
Yathā kukkuṭiyā aṇḍaṃ, samantaṃ parimaṇḍalaṃ;
Evaṃ ghanassa saṅṭhānaṃ, nibbattaṃ kammaṃpaccayātica.

Ghanā pasākhā jāyantīti pañcame sattāhe dvinnaṃ hatthapādānaṃ sīsassaca atthāya pañcapīlakā jāyanti. Yaṃ sandhāyetaṃ vuttaṃpañcame kho bhikkhave sattāhe pañcapīlakā jāyanti. Saṅṭhanti kamma totī. Kesā lomā nakhāpicāti dvācattālīsame sattāhe etāni jāyantīti. Ettha ca chaṭṭhasattāhādayo chasattāhā pasādanissayānaṃ aṅgapaccaṅgānaṃ anukkamena vaḍḍhitvā pariṇatakālā honti. Cakkhādīni pana ekādasama sattāhassa pariyo sānadivase ekato jāyantīti niṭṭhamettha gantabbaṃ. Yaṃ panettha tilatelassa yathābindūtīādinā kalalassa vaṇṇasaṅṭhānaṃ vuttaṃ. Taṃ thokaṃ vaḍḍhitvaṃ sandhāya vuttaṃ. Na paṭisandhikkhaṇe pavattamānaṃ. Na hi tadā tādisaṃ pakaticakkhunā diṭṭhaṃ vaṇṇajātaṃvā saṅṭhānaṃvā tassa paññāyeyyāti. Anumānato pana evaṃ vedittabbaṃ. Ekāya ukāya sattamo bhāgo likkhānāma. Likkhāya chattimsatimo bhāgo rathareṇunāma. Rathareṇussa chattimsatimo. Tajjārī nāma. Tajjārīya chattimsatimo aṇunāma. Aṇussa chattimsatimo bhāgo paramāṇunāma. So pana ākāsakoṭṭhāsiko maṃsacakkhussa āpātaṃ nāgacchati. Dibbacakkhusseva āgacchatīti atṭhakathāyaṃ vuttaṃ. Tesam chattimsa parimāno aṇu pana titticchidda tālacchiddehi pavittasūriyasmīsu vaṭṭivaṭṭi hutvā paribbhamanto paññāyatīti vuttaṃ. Sakalaṃ pana kalāpattayaparimānamattabhūtaṃ paṭisandhikkhaṇe paramāṇutopi parittakameva siyā. So hi santānānubandhavasena pavattattā khaṇe khaṇe upacitarūpakalāpasamūhoeva hotīti heṭṭhima koṭiyā ekūnapaññāsakalāpaparimāṇoeva siyā. Tato parittake sati santāna ghaṭanasseva asambhavatoti. Yaṃ pana mahāṭīkāyaṃ te pana kalāpā paramāṇuparimāṇā hontīti vuttaṃ. Taṃ dhātūnaṃ cuṇṇamanasikārānurūpamattavasena vuttanti gahetabbaṃ. **Dutīyacittanti** pathama bhavaṅgacittaṃ. **Ṭhitikālanti** paṭisandhi cittaṃ **ṭhitikālaṃ**. **Ojāpharaṇamupādāyāti** gabbhaseyyakānaṃ tāva abbudabhāva pesibhāva ghanabhāvādi pattakāle mātuyā āmasayagatāya ajjhohaṭāhāra sinehabhūtāya ojāya jalābumulā nusārena vatthusmiṃ pharaṇakālaṃ upādāya, yathāha –

Yañcassa bhuñjati mātā, annaṃ pānañca bhojanaṃ;
Tena so tattha yāpeti, mātukucchigato tiroti.

Atṭhakathāyañca tena so tattha yāpetīti tassa hi nātito utṭhito nālo mātuudara paṭalena ekābaddho hoti. So uppaladaṇḍako viya chiddo. Tena āhāraso saṃsaritvā āhārasamuṭṭhānarūpaṃ samuṭṭhāpeti. Evaṃ so dasamāse yāpeti. Mātukucchigato tiroti mātuyā tiro kucchigato. Mātukucchiyā abbhantaragatoti atthoti vuttaṃ. Tattha pana nābhinaḷassa utṭhitakālaṃ sandhāya nātito utṭhito nāloti vuttanti gahetabbaṃ. Na hi abbudādīkāle tassa nātinālonāma utṭhito siyāti. Saṃsedajopapātikānaṃ pana yaṃkiñci laddhaṃvā attano kheḷaṃvā ajjhoharaṇakāle ojāpharaṇaṃ upādāya. Tena vuttaṃ **ojāpharaṇamupādāyaāhārasamuṭṭhānāti**. **Cuticittopari sattarasamacittassāti** cuticittato upari pubbakāle sattarasamassa bhavaṅgacittassa. **Kammajarūpāni na uppajjanti** tesam tato paṭṭhāya anuppannattāyeva tato satta rasamaṃ cuticittaṃnāma hoti. No aññathāti. **Puretaranti** tassa sattarasamassa cittaṃ uppādakkhaṇaṃeva sandhāya vuttaṃ. **Tatoparanti** cuticittato parasmim soḷasacittakkhaṇaparimāṇe khaṇe. **Cittajāhārajarūpañcāti** cittajarūpasantānaṃ āhāraja rūpasantānañca vocchijjati anupādinnaśantāne tesam uppattiyā asambhavato. Yamettha vattabbaṃ taṃ rūpasamuṭṭhāne vuttameva. Bhāvadasakamānāma kāmarāganidānakammasamuṭṭhānaṃ hotīti tabbirāga bhāvanākammaṇibbatte rūpaloke tassa alābho vutto. **Āhārajakalāpānica na labbhanti** ajjhohaṭā hāra bhāvato, tato yevaca sarīragatassa ajjhattāhārassapi rūpasamuṭṭhānā bhāvato. Ācariyānandatthero pana tattha labbhamāna rūpakalāpesupi gandharasānaṃ ojāyaca abhāvaṃ vaṇṇeti. Rūpadhātuyā upapattikkhaṇe pañcāyatanāni pātubhavanti cakkhāyatanam rūpāyatanam, sotā yatanam, manā yatanam, dhammāyatananti ca, pañcadhātuyo pātubhavanti cakkhuhātu, rūpadhātu, sotadhātu, manoviññāna

dhātu, dhammadhātūtica, tayo āhārā pātubhavanti phassāhāro, manosañcetanā hāro, viññāṇā hāroti ca vibhaṅgevuttatā. Etthaca pāliyaṃ rūpaloke phoṭṭhabbe paṭikkhittepi kiccantarasabbhāvā mahābhūtānaṃ tattha paṭilābho avārito eva hoti. Gandhādīnaṃ pana kiccantameva natthi. Yena te dhammamattabhāvepi tiṭṭheyyaṃ tasmā tesam avacanaṃ tattha abhāvameva dīpetīti ācariyassa adhippāyo. Tathā pana bhūtatatukkaṃ tattha atthiyeva, yathāha-asaññasattānaṃ ekaṃ mahābhūtaṃ paṭicca tayo mahābhūtātiādi. Phoṭṭhabbāyatanam pana phoṭṭhabba dhātuca tattha paṭikkhittā. Tasmā sabbesaṃ sabhāvadhammānaṃ dhammabhāve samānepi yena kiccavisesena gandho raso phoṭṭhabbam kabaḷikārāhārotica vuccati. Tassa natthitāya tesam tena nāme na tattha anupalabbhamānataṃ sandhāya vibhaṅge kathāvatthumhi yamake sūti sabbattha tesam tattha paṭikkhepo. Mahābhūtānaṃ pana nisanda dhammamattabhāvena vijjamānaṃ tesam dhammāyatanadhammadhātūsu anupavesoti yutto siyāti vadanti. **Tīpīdasakāni jīvitānavakañcāti** ettha ācariyānanda matiyā cakkhusattakam sotasattakam vatthusattakanti evaṃ tīpi sakkāni jīvitachakkañcāti vattabbaṃ. **Abhiricchatīti** alabbhamāne pathamaṃ vajjite tattha labbhamānatāvasena avasissati. Atirekaṃvā hotīti attho. Etthaca rūpaloke viya kāmaloce jīvitānavakam kasmā visuṃ na vuttanti. Rūpaloke pana āhārupatthambhakkassa aññassaca sakalasarīrabhyāpino anupālaka jīvitassa abhāvā etadeva tadubhayaṭṭhāne ṭhatvā sakalasarīraṃ anupāletīti pākāṇaṃ tattha jīvitānavakanti visuṃ vuttaṃ. Kāmaloce pana aññāni upatthambhakā nupālakāni bahūni pākāṇāni hontī. Tasmā jīvitānavakam apākāṇanti katvā visuṃ na vuttaṃ siyā. Kāmalocepi pana etaṃ asitādīpācakaggivasena tassevaca udayabhūtassa sakalasarī rānupālakassa usmāsānkhatassa kāyaggino vasena pākāṇameva. Yaṃ sandhāya –

Āyu usmāca viññāṇaṃ, yadā kāyaṃ jahantimaṃ;
Apavidhho tadā seti, niratthamaṃva kalīgaranti vuttaṃ.

Tattha āyūti tesu dvīsu aggīsu patiṭṭhitam jīvitameva vuccati. Usmāti te dve aggayo vuccanti. Yesu tikkhamandavasena visama bhūtesu kāye nānābādhdā uppajjanti. Yathāha-bahvābādho hoti bahvātānko. Visamavepākiniyā gahaṇiyā samannā gato hoti atiuṇhāyaatisītālāyāti. Samabhūtesu pana sattā nirābādhdā hontī. Yathāha-appābādho hoti. Appātānko. Samavepākiniyāgahaṇiyā samannāgatohoti. Nātisītāya naccuṇhāya majjhimāya padhānakkhamāyāti. Keci pana asitādīpācakaggismiṃ eva etaṃmaññanti. Therenacānāmarūpaparicchedejīvitānavakam nāma, rūpaloke visuṃ siyāti vuttaṃ.

Visuddhimagge pana sesesu catusamuṭṭhānesu aṭṭhasu jīvitānava kañceva tīpi ojaṭṭhamakāni cāti tettimsa tettimsa rūpāni pākāṇāni hontīti vuttaṃ. Tattha aṭṭhasūti pācakaggiassāsa passāsavajjitesu tīsu tejjokotthāsesu pañcasu vāyo koṭṭhāsesūti aṭṭhasu. Iti kāmalocepi sakalasarīrabhyāpīsu tejjovāyo koṭṭhāsesu labbhamānattā etaṃ sakala sarīreeva daṭṭhabbanti. Ettha siyā, kasmā panettha kāmaloce viya rūpaloke rūpakalāpānaṃ nirodhakkamo na vuttoti. Visesābhāvato, rūpalokepi hi maraṇakāle pana cuticitto pari sattarasamacittassa ṭhitikāla mupādāya kammajarūpāni nuppajjantītiādikko nirodhakkamo kāmalocepi adiso yeva. Kevalam panettha āhājarūpa nirodhonāma natthi, tathā kaḷevara nikkhepoca. Tasmā tatthapi cuticittato param soḷasacittakkaṇa parimāṇe ekasmim khaṇe cittajarūpasantānaṃ vocchijjati. Tato param utusamuṭṭhānarūpaparamparā ekadvīti accharākālamattampi pavattitvā vocchijjati vuttaṃ. Naca ettakamattena kālena pavattamānāyapi rūpasantatiyā matakāḷevaramnāma sakkā laddhum. Passantānaṃ ekakkaṇena viya sarīrassa antaradhānassa paññāyanatoti. Yathāca rūpaloke, tathā kāmalocepi upapattidevānaṃ aññesaṇca opapātikananti. Tesāhi sarīrāni paṭisandhikkhaṇeyeva sabbaso paripuṇṇena kammajakāyena nibbattattā kammajarūpehi ghanapūritāni sallahukabharāni ca hontī. Itararūpāni kammajarūpesu patiṭṭhāya pavattanti. Tasmā tesam cutikāle kammajarūpesu niruddhesu tāni tinna patiṭṭhāni hutvā ciraṃ santānaṃ ghaṭṭetum nasakkonti. Thokam pavattitvā sabbaso nirujjhanti. Sarīranikkheponāma tesam natthīti daṭṭhabbam.

[203] Yaṃ pana vibhāvaniyaṃ

“Maraṇakāle pana brahmānaṃ sarīranikkhepābhāvato sabbesaṃpi tisamuṭṭhānāni dvisamuṭṭhānāni saheva nirujjhanti”ti vuttaṃ. Taṃ na sundaram.

Evañhi sati sabbesaṃ rūpabrahmānaṃ maraṇāsannacittāni rūpaṃ nasamuṭṭhāpentīti āpajjati. Na hi maraṇāsanna citta samuṭṭhitāni rūpāni kammajarūpehi saheva nirujjhantīti sakkā vattuntī. Yathācatāni kammajarūpanirodhato thokaṃ pavattitvā nirujjhanti. Tathā utujarūpanipi cittajarūpanirodhato thokaṃ pavattitvā nirujjhantīti na na sakkā viññātuṃ. Naca tāvattakena kālena tesu pavatta mānesupi sarīranikkheponāma sakkā bhavituntī. Brahmānaṃ pana thina middhādīnaṃ nīvaraṇajātīyānaṃ atthitāya tadanurūpaṃ cittajarūpānaṃ tadanugatikānañca utujarūpānaṃ lahukagarukatādīvikāro na na sambhavatīti lahutādittayampi gahetvā vuttaṃ **tevīsarūpesūti**. Ghānādittayabhāvadvayavajjāni tevīsarūpāni hontī. Tāniyeva cakkhu sotavatthu viññattidvayavajjāni asaṅṅīnaṃ sattaraseva rūpāni hontīti yojanā. Asaṅṅīnaṃ pana garulahutādīpakāro cinte tabbo. Na vā cintetabbo rūpadhammānaṃ ruppanavikārassa bahukāraṇattāti. **Upapattiyanti** kāmarūpāsaṅṅīnaṃ paṭisandhiyā uppādakkhaṇe. Uppādakkhaṇoeva hi ekantena upapattikhaṇonāma hotīti. **Pavattetūti** paṭisandhiyā ṭhitikkhaṇato paṭṭhāya sakale pavattikāle pana **nakiñcipi nalabbhati**. Labbhatiyevāti adhippāyo. Na hi idaṃnāma rūpaṃ pavatte nalabbhati. Paṭisandhiyaṃeva labbhātīti atthīti. [Rūpavattikkamo]

161. Evaṃ cittacetāsika rūpaṅgahaṃ katvā idāni yathā nuppattaṃ nibbānaṅgahaṃ karonto **nibbānaṃpanāti**di māha. Nibbānaṃ pana nibbānanti pavuccatīti sambandho. **Lokuttarasāṅkhātanti** lokuttaranti bhagavatā kathitaṃ, yathāha-katame dhammā lokuttarā. Cattāroca ariyamaggā cattārica sāmāññaphalāni asaṅkhatāca dhātu, ime dhammā lokuttarāti. Etena nibbānassa paññattimattabhāvaṃ nivatteti. Na hi lokavohārasiddhā paññatti lokuttarānāma sakkā bhavituntī. **Catumaggañāṇena sacchikātabbanti** cakkhumantena candamaṇḍalaṃviya cakkhunā paṭiladdhamaggañāṇehi ariyajanehi catūhi ariyamaggañāṇehi paccakkhato daṭṭhabbaṃ. Paṭivijjhitaṃbanti attho. Tattha **catumaggañāṇenāti** etena tādi samhā paṭipattimaggato vimukhānaṃ andhaputhujjanānaṃ jaccandhānaṃ viya canda maṇḍalassa tassa avīsayabhāvaṃ dasseti. Na ca jaccandhānaṃ cakkhumhi anupaladdhamattena candamaṇḍalaṃ natthināma hotīti. **Sacchikātabbanti** etena paramatthato vijjamānabhāvaṃ dasseti. Yañhi kiñci paramatthato vijjamānaṃ nahoti. Taṃ sarūpato kassa paccakkhamnāma bhavissatīti. Tadubhayena panassa paññavantānaṃ kalyāṇakaputhujjanānaṃ anumānato siddhataṃ dīpeti, na hi anumānatopi attano buddhiyaṃ asiddhassa apākaṭassa sacchikiriyāya vāyāmopināma atthi. Yena sacchikiriyā siddhiyāti. Evaṃ nibbānassa paramatthato vijjamānataṃ dassetvā idāni kevalaṃ vijjamānamattameva na hoti. Athakho mahātejavantaṃ mahojavantañca taṃ hotīti dassetuṃ **maggaphalānamālambaṇabhūtanti** vuttaṃ. Etena nibbānena vināmagga phalānaṃ akiccasiddhiṃ dasseti. Tato tassa mahātejavantaṃ mahojavantatañca dīpeti. Yathā hi mahiddhiko eko rājā hoti. Tassa raṭṭhe ekasmiṃ mahāgāme eko gāmahojako ekoca corajeṭṭhako mahāparivāro vasati. Teca aññamaññaṃ vadhāya parisakkantā vicaranti. Tattha gāmahojako nagaraṃ gantvā rājānaṃ upaṭṭhahi. So na cirasseva rājavallabho hoti. Rājato mahatiṃ āṇaṃ labhati. Taṃ sutvā corajeṭṭhako idāni idhavasantassa mamajīvitaṃ natthīti attano parivārena saddhiṃ aṭṭaviṃ pavīṭṭho. Gāmahojakoca taṃaṭṭaviṃ pavīṭṭhampi muñcituṃ adatvā gahetvā vadhi. Evaṃ sampadamidaṃ daṭṭhabbaṃ. Mahiddhikarājā viya hi nibbānaṃ. Gāma bhojako viya ñānaṃ. Corajeṭṭhako viya moho. Parivāra corā viya sesakilesā. Pubbe rañño anupaṭṭhā nakāle gāmahojako viya puthujjanañānaṃ. Upaṭṭhānakāle gāma bhojako viya maggañānanti. Taṃhā pavattamānā ajjhatabhiddhādi bhedesu khandhādidhammesu vinandhamānāva pavattati. Yathāha –

Antojaṭā bahijaṭā, jaṭāya jaṭitā pajāti.

Tasmā sā veḷugumbe veḷusākhā viya vinanaṭṭhena saṃsibbanatṭhena vānasamaññaṃ labhatīti vuttaṃ **vānasāṅkhātāyatanhāyāti**. **Nikkhantattāti** nissaṭattā. Tassā visayabhāvaṃ atikkamitvā ṭhitattāti attho. Etena vānato nikkhantanti nibbānanti imamattaṃ dasseti. **Sabhāvatoti** santilakkhaṇena. Ajjhattasambhūtānaṃ tividhavaṭṭasantaṭpānaṃ nibbutiatthena. Tesam sabbaso abhāvaṭṭhenāti attho. **Ekavidhampīti** yathā cittaṃ sabhāvato ekavidhampi jātidhammattā jātibhūmisampayogādi bhedenā kāla disādesapuggalabhedenāca vatthuto bhinnameva hoti. Na tathā idaṃ nibbānaṃ. Idaṃ pana sabhāvatoṃ viya vatthutoṃ bhinnameva hutvā ekavidhaṃ hoti. Idañhi anamatagge saṃsāre atīte etarahi anāgateca parinibbutānaṃ buddhānaṃvā paccakabuddhānaṃvā buddhasāvākānaṃvā sabbesaṃpi ekameva hoti.

Kasmā, aniddisitabbadhammattā. Viññāṇaṃ anidassanaṃ anantaṃ sabbatopabhanti hi bhagavatā vuttaṃ. Tattha viññāṇanti saṅkhatadhammānaṃ khayanirodhabhāvena siddhattā etaṃ tabbhāvenaeva suṭṭhu abhiyattaṃ katvā ñātabbaṃ. Anidassananti animittadhammattā bālaputhujjanānaṃ dassanavisayabhūtena kenacinimittena nidassituṃvā kālabhedena disādesapuggalasantāna bhedena hīnapañītādibhedena ca bhinnaṃ katvā nidassituṃvā nārahatīti attho. Anantanti pubbantāparantavirahitaṃ. Sabbatopabhanti vaṭṭadukkhapaṭipakkhasiddhehi anantehi guṇobhāsehi sabbato pabhāvantaṃ attho. Tathā aniddisitabbadhammattāca pana anamatagge saṃsāre sabbāsuca disāsu asukasmim nāma kāle asukāyanāma disāya natthīti navattabbaṃ. Kasmā, ariyamaggaṃ bhāventena yadā kadāci yattha katthaci avassaṃ adhigantabbatāvasena sabbadā sabbattha ca labbhamānattā. Vuttañhettaṃ vinaye, aṅguttare, udāneca –

Seyyathāpi bhikkhave yākāci loke savantiyo mahāsamuddaṃ appenti. Yāca antalikkhā dhārā papatanti. Na tena mahāsamuddassa ūnattaṃvā pūrattaṃvā paññāyati. Eva meva kho bhikkhave bahūcepi bhikkhū anupādisesāya nibbāna dhātuyā parinibbāyanti. Na tena nibbānadhātuyā ūnattaṃ vā pūrattaṃvā paññāyatīti.

Aṭṭhakathāsuca na tena nibbānadhātuyā ūnattaṃvā pūrattaṃvā paññāyatīti asaṅkhyeyyepi mahākappe buddhesu anuppajjantesu ekasattopi parinibbātuṃ nasakkoti. Tadāpi tucchā nibbāna dhātūti nasakkā vattaṃ. Buddhakāle pana ekekasmim samāgame asaṅkhyeyyāpi sattā amataṃ ārādhenti. Tadāpi nasakkā vattaṃ pūrā nibbānadhātūti vuttaṃ. Brahmanimantanasutteca viññāṇaṃ anidassanaṃ anantaṃ sabbatopabhanti vuttaṃ. Aṭṭhakathāyañca sabbatopabhanti sabbato pabhāsammaṃ. Nibbānato hi añño koci dhammo pabhassaratarovā jotivantatarovā parisuddhatarovā paṇḍara tarovā natthi. Sabbatovā pabhūtameva hoti. Nakatthaci natthīti sabbatopataṃ. Puratthimadisādisu hi asukadisāyaṃnāma nibbānaṃ natthīti navattabanti vuttaṃ.

Evamsantepe etaṃ niruddhatekālīkadhamma sannissayena viññāya mānattā niruddhadhammabhedena bhinnaṃ katvā upacarituṃ labbhatīti vuttaṃ **saupādisesā**tiādi. Tattha upādīyati taṇhādīṭṭhīhi bhusaṃ gaṇhīyatīti upādi. Upādinnakhandhapañcakaṃ. Soyeva ekadesenavā anavasesenavā pahīnehi kammakilesehi sesoti upādiseso. Saṃvijjati tasmim santāne upādiseso yassā adhigatakāleti saupādisesā. **Nibbānadhātūti** nibbūtisa bhāvo. Saupādisesāca sā nibbānadhātucāti samāso. Natthi tasmim santāne upādiseso yassā adhigatakāleti anupādisesā, anupādisesāca sā nibbānadhātucāti viggaho. Vuttañhettaṃ iti vuttake-dve mā bhikkhave nibbānadhātuyo. Katamā dve, saupādisesāca nibbānadhātu, anupādisesāca nibbānadhātūtiādi. Tattha purimā kilesanibbānaṃnāma. Pacchimā khandhanibbānaṃnāma. Purimāvā diṭṭhadhammika nibbānaṃnāma. Pacchimā samparāyika nibbānaṃnāma. Yathāha-ekā hi dhātu idha diṭṭhadhammikā saupādisesā bhavanetti saṅkhaṃ. Anupādisesā pana samparāyikāti. Aṅguttare pana sattaniṭṭhā ubhatobhāgavimutta paññāpi muttānaṃ dvinnāṃ khīṇāsavānaṃ khandhupādisesavasena kāyasakkhidiṭṭhipatta saddhāvimuttadhammānusārīsaṅkhātānaṃ catunnaṃ sekkhānaṃ āradhāvipassa kassaca yogīkalyāṇaputhujjanassa kilesu pādisesavasena saupādisesatā anupādisesatāca vuttā. Tattheva navanipāte antarāparinibbāyī, upahaccaparinibbāyī, asaṅkhāraparinibbāyī, sasaṅkhāraparinibbāyī, uddhaṃ sotaakaniṭṭhagāmīti pañcannaṃ anāgāmīnaṃ sakadāgāmissa tiṇṇaṃ sotāpannānanti navannaṃ sekkhapuggalānaṃ kilesupādisesavasena saupādisesatā vuttā.

Nettiyaṃ pana arahattaphalaṃpi saupādisesanibbānanti vuttaṃ. Taṃ idha nādhippettaṃ. Etthaca maggakkhaṇe kilesānaṃ khayā saupādi sesaṃnāma. Cuti anantare khandhānaṃ anuppādo anupādisesaṃnāma. Yasmā pana paṭisandhivandhānaṃ kilesesu satieva jāyanti. Asati najāyanti, tasmā tepi kilesakkhaṇena saheva khiyyanti. Yāvacutiyā pavattamānaṃ paccuppannakhandhasantānaṃ pana khīṇāsavassapi purimabhāve pavattakammakilesānaṃ phalanisandabhūtaṃ sabbasattānaṃ dhamma tāsiddhaṃ. Tasmā taṃ khīṇesupi kilesesu yāvacutiyā pavatta tiyeva. Cutikkhaṇe tassa nirodhopi dhammatānirodho eva. Yo pana tadanantare punabhavassa anuppādo. So kilesakkhaṇena saheva siddho. Na kevalaṃ tadanantare puna bhavasseva. Tato paraṃpi anamatagga saṃsāre bhavaparamparāya

anuppādopi tena saheva siddho. Sabbañcetaṃ ekameva nibbānaṃ. Evaṃsantepi khandhāvesesassa bhāvā bhāvalesaṃ upādāya ayaṃ bhedo vuttoti vuttaṃ **duvidhaṃ hoti kāraṇapariyāyena**ti duvidha paññāpanassa kāraṇalesenaṃti attho.

Yasmā pana saṅkhatadhammānāma sapaḷibodhadhammattā nānāpaḷibodhehi niccakālaṃ jaṇaṃ pīḷenti. Santasukhaṃnāma laddhuṃ nadenti. Sanimitta dhammattāca kilesānaṃ jarāmarañādināṅca sabbesaṃ anattānaṃ vatthu bhūtā bhūmibhūtā honti. Sapaṇihitadhammattāca sabbadukkhānaṃ mūlabhūtaṃ āsādukkhaṃnāma niccakālaṃpi janenti. Tasmā tappaṭipakkhasiddhena guṇabhedena tividhaṃbhedaṃ dassetuṃ **suññatanti**ādi māha. Tattha sabbapaḷibodha vivittattā suññataṃ. Sakkāyadīṭṭhiyā hi sati bālānaṃ yattakā pāpakammaḷibodhā apāya dukkhaḷibodhāca sandissanti. Paṇḍitānaṃca tato attānaṃ rakkhanatthaṃ yattakā kalyāṇakammaḷibodhā sandissanti. Sakkāyadīṭṭhinirodhoyeva sabbe te sakkāyadīṭṭhimūlake paḷibodhe nirodhetuṃ sakkoti. Na vinā tena añño koci. Tasmā sonirodho tehi paḷibodhehi vivitto hoti, tathā rāgakkhayoyeva rāgamūlake paḷibodhe nirodhetuṃ sakkoti. Na vinā tena añño koci. Dosakkhayoyeva dosamūlake. Mohakkhayoyeva mohamūlaketiādi vattabbaṃ. Iti nibbānaṃ sabbapaḷi bodhehi vivittattā suññataṃnāma.

Nimittaṃ vuccati uppādapavattamūlako oḷārikākāro. Yena samannāgatā saṅkhatadhammā sabbesaṃ kilesānaṃ jarāmarañāṅca vatthubhūtā bhūmibhūtā honti. Tathā sabbesaṃ mārānaṃ sabbesaṃ verānaṃ sabbesaṃ rogādi anattānaṃ vatthubhūtā bhūmibhūtā honti. Yato te māradheyyātipi maccudheyyātipi vuccanti. Kāla disā desa santānādi bhedenā hīnapaṇītiādi bhedenāca bhedaṃ gacchanti. Nibbānaṃ pana sabbesaṃ nimittadhammānaṃ khayanirodhabhāvena siddhattā natthi. Tasmim nimittanti **animittaṃ**. Tañhi sabbesaṃ kile sādīnaṃ anattānaṃ vatthubhūte nimittadhamme viddhaṃsetvā tesāṃ anattānaṃ abhāvaṃ sādhettaṃ niccaṃ tiṭṭhati. Naca taṃ kālabhedena bhinnaṃ hoti. Idaṃ atīte asukakappe asukabuddhassa nibbānaṃ, idaṃ anāgate, idaṃ etarahīti. Nāpi disābhedenā bhinnaṃ. Idaṃ dasasu disāsu asukāyanāma disāya nibbānaṃ, idaṃ asukāya nāmāti. Nacāpi desabhedenavā santānabhedenavā bhinnaṃ. Idaṃ manussaloke idaṃ devaloke idaṃ brahmaloketi vā idaṃ manussānaṃ idaṃ devānaṃ idaṃ brahmānantivāti. Tathā paṇītiādi bhedenā bhinnaṃ na hoti. Idaṃ sabbaññubuddhānaṃ. Idaṃ paccekabuddhānaṃ. Idaṃ buddhasāvakaṇanti.

Paṇihitaṃ, paṇidhānaṃ, paṇidhi, patthanā, āsā, jīghacchā, pipāsāti atthato ekaṃ. Saṅkhatadhammāca labbhamānāpi bhijjanadhammattā punappunaṃ laddhuṃ āsā dukkhaṃnāma vaḍḍhenti. Āsādukkhassa pariyaṇtonāma natthi. Sabbañca dukkhaṃ āsāmūlakaṃ hoti. Āsāsadisāṃ dukkhanidānaṃnāma natthi, nibbānaṃ pana sayāṃ pipāsavinayadhammattā āsāsaṅkhātaṃ sabbāṃ taṇhāpaṇidhiṃvā chandapaṇidhiṃvā vinentaṃ vidhantaṃ vattatīti natthi. Tasmim paṇihitanti **appaṇihitaṃ**. Etthaca duvidhaṃ sukhaṃ vedayasukhaṃ santisukhanti. Tattha manussa dibba brahma sampattiyo labhivā anubhavanavasena pavattaṃ pītisomanassa sukhaṃ vedayasukhaṃnāma. Taṃ pana khaṇekhaṇe vijjuviya bhijjanadhammaṃ. Sampattiyoca aniccadhammā. Sabbe te ariyaṇtaṃ āsādukkhaṃ bhiyyo vaḍḍhentiyeva. Tasmā sabbāṃ vedayasukhaṃnāma āsā dukkhajānakattā ekantena dukkhameva hoti. Yathāha-yaṃkiñci vedayitaṃ, sabbāṃ taṃ dukkhasminti. Dhammasenāpatināca katamaṃ taṃ āvuso sārīputta nibbāne sukhaṃ, yadettha vedayitaṃ natthīti puṭṭhena etadevettha āvuso nibbāne sukhaṃ, yadettha vedayitaṃ natthīti vuttaṃ. Santisukhaṃnāma attani uppannānaṃvā uppajjituṃ paccupaṭṭhi tānaṃvā kilesādīnaṃ apāyadukkhādīnaṅca attano sammāpayogaṃ paṭicca vimuccanasukhaṃ. Etadevettha ekantasukhaṃ acalasukhaṃ. Etasmiñhi asati puthujjanānaṃ manussa dibbabrahmasampattiyo anubhavatānaṃpi avassaṃ pattappaṭṭhena paccupaṭṭhitāneva honti avicinīraya bhayādīnīti. Tasmā sabbassa vedayasukhamūlakassa āsādukkhassa santisukhadīpakaṃ idaṃ appaṇihitapadaṃ nibbānassa ekaṃ mahantaṃ guṇapadaṃ hotīti.

Ākāra bhedenāti tividhassa suññatādīkassa guṇakoṭṭhāsassa bhedenā. Etthaca yadetaṃ anamatagge saṃsāre ajjhattaṃ anusayitvā āgatānaṃ kilesānaṃ maggakkhaṇe ajjhattameva nirujjanaṃ khiyyanaṃ. Taṃ khayadhātu nirodhadhātu saṅkhātaṃ ekaṃ dhammāyatanaṃ hoti. Ekā dhammadhātu hoti. Eko paramatthadhammo hoti. Khayaṭṭhena nirodhaṭṭhena sabhāvato vijjamaṇattā, na hi taṃ

paññattirūpaṃ hoti. Kāye ñāṇeca sarūpato upaladdhattā, duvidhañhi nibbānassa sacchikaraṇaṃ kāyasacchikaraṇaṃ ñāṇasacchikaraṇaṃ. Yathāha-chandajāto ussahati. Ussahitvā tuletī. Tulayitvā padahati. Pahitatto samāno kāyenaceva paramatthasaccaṃ sacchikaroti. Paññāyaca taṃ paṭivijjha passatīti. Tattha anamatagge saṃsāre ajjhataṃ niccaṃ santāpetvā paridayhitvā āgatānaṃ kilesānaṃ maggakkhaṇe ajjhataṃ eva nirujjhaṇaṃ nibbāyanaṃ kāyasacchikaraṇaṃ nāma. Evaṃ kāyena sacchikatvā puna paccavekkhanto ajjhataṃ taṃ nirujjhaṇaṃ ñāṇena paccakkhato passatī. Niruddhā me kilesāti jānāti, idaṃ ñāṇasacchikaraṇaṃ nāma. Tesu kāya sacchikaraṇaṃ anantaṃ aparimānaṃ vaṭṭadukkhaṃ khepeti. Nāṇasacchikaraṇaṃ anappakaṃ pītisomanassaṃ uppādeti. Paññattidhammesu eva rūpaṃ sacchikaraṇaṃ nāma natthīti. Tassa pana nirujjhaṇassa suññatadhammattā mandabuddhīnaṃ tasmīṃ tucchasaññā niratthakasaññā saññhāti. Animitta dhammattā tasmīṃ abhāvamattasaññā paramatthato avijjamaṇasaññā saññhāti. Appaṇihitadhammattā taṇhāvasikā janā tasmīṃ sukhaṃ nāma kiñci natthīti maññanti.

Ye pana yathāvuttaṃ khayanirodhamattaṃ nibbānaṃ nāma nahoti. Tañhi abhāvamattaṃ paññattirūpaṃ hoti. Nibbānañcaṇāma gambhīrādīnaṃ anantaḡuṇānaṃ vatthu hoti, naca abhāvamattaṃ tesam vatthu bhavitum arahati. Nibbānaṃ paramaṃ sukhaṃ vuttaṃ. Naca abhāvamatte kiñci sukhaṃ nāma sakkāladduṃ. Tasmā yo tassa khayanirodhassa paccayo atthi. Yassaca ānubhāvena so khayanirodho sījjhāti. Eta deva nibbānaṃ nāmāti icchanti. Tesampi vaṭṭadukkha santito atirekapayojanaṃ nāma nalabbhati. Nibbānassaca ḡuṇapadāni nāma anantānaṃ vaṭṭadhammānaṃ paṭipakkhavasena sījjhanti, no aññathā. Tasmā yattakāni aḡuṇapadāni vaṭṭadhammesu labbhanti, tattakāni tesam khaya nirodhe anantāni ḡuṇapadāni hutvā sījjhanti. Yo khayanirodhopi tāva visum dhammabhāvenaviññātuṃ dukkarogambhīro hoti. Yato taṃ abhāvamattaṃ paññattirūpaṃ maññanti. ḡuṇapadānaṃ panassa gambhīrabhāve vattabbamevanatthi. Santisukhañca nāma vaṭṭadukkhaṇaṃ vūpasantaṭāeva. Tesam vūpasamo sukhoti hi vuttaṃ. Vūpasantaṭātica tesam sabbaso khayanirodhoevāti vaṭṭadukkhapariyāpannaṃ sabba vedayītasukhānaṃ ukkaṃsagatā tassa khayanirodhassa paramasukhatā siddhā hotīti. Tassa pana paramatthato vijjamaṇabhāve tāva idaṃ suttaṃ.

Atthi bhikkhave ajātaṃ abhūtaṃ akataṃ asaṅkhatam. No ce taṃ bhikkhave abhaviṣsa ajātaṃ abhūtaṃ akataṃ asaṅkhatam, na yimassa jātassa bhūtassa katassa saṅkhatassa nissaraṇaṃ paññāyetha. Yasmā kho bhikkhave atthi ajātaṃ abhūtaṃ akataṃ asaṅkhatam, tasmā jātassa bhūtassa katassa saṅkhatassa nissaraṇaṃ paññāyatīti.

Tattha ajānaṃ ajātaṃ. Jātikkhayoti attho. Abhavanaṃ abhūtaṃ. Abhāvoti attho. Akaraṇaṃ akataṃ. Asaṅkharanaṃ asaṅkhatam. Uppādetumvā pavattetumvā saṅkhāradukkhasa abhāvoti attho. Jātikkhayotivā visum ekā dhammadhātu hoti. Tasmā visum dhammabhāvaṃ sandhāya natthi jātaṃ etthāti ajātantīpi yujjatiyeva. Idaṃ vuttaṃ hoti, saṅkhatadhammānaṃ paccaye sati jāyanti. Asati na jāyantīti jātaṃ viya ajātaṃ tesam atthi. Paramatthato vijjamaṇaṃ hotīti attho. Yadica ajātaṃ nāma natthi, jātameva atthi. Evaṃsati attani kilesānaṃ ajātathāya sammā paṭipajjantānaṃ pi sabbe kilesadhammā jātāyeva siyumu. No ajātā. Kasmā, ajātassanāma natthitāyāti. Esanayo sabbesu duccharitadhammesu apāyadukkhavatṭadukkhesu, diṭṭhadhammeca sabbesu rogābādhahayupaddavesu. Evañca sati loke sabbe purisakārā purisathāmā purisaparakkamā niratthakā eva siyunti imamatthaṃ sandhāya no cetam bhikkhave. La. Paññāyethāti vuttaṃ. Yasmā pana ajātaṃ nāma ekantena atthiyeva. Tasmā attani ajātathāya sammāpaṭipajjantānaṃ te ekantena najāyanti. Evaṃ sati sabbe purisakārā purisathāmā purisaparakkamā satthakā eva hontīti imamatthaṃ sandhāya yasmā kho bhikkhavetiādi vuttaṃ. Ettāvata avijjānirodhā saṅkhāra nirodho. Saṅkhāranirodhā viññāna nirodho. La. Dukkakkhandhassa nirodho hotīti evam vuttassa nirodhassa paramatthato vijjamaṇabhāvaṃ dasseti. Atthi saddassa vijjamaṇatthavacanattā. Tattha nirodho duvidho jātanirodho ajātanirodhoti. Tattha uppajjivā nirodho jātanirodhonāma. Maccūtica maraṇantica etassevanāmaṃ. Ajjhatapariyāpannaṃ kilesādīnaṃ uppādassapi sabbaso abhāvo ajāta nironāma. Yo sabbasaṅkhārasamatho sabbupadhinissaggo taṇhakkhayo virāgo nirodho nibbānanti vuccatī. Ayamidhāhippeto, ayameva hi sabbapalibodhehi suññattā suññatonāma. Kilesānaṃ jarāmarāṇādīnañca vatthubhūtassa nimittassa

abhāvā animittonāma. Sabbadukkhānaṃ nidānabhūtaṃ āsādukkhassa abhāvā appaṇihitonāma. Tena vuttaṃ **suññataṃanimittaṃ appaṇihitañceti** tividhaṃ hotīti. **Padantiādi** nibbānassa vevacaṇāni. Tañhi viṣuṃ asaṃmisso kevalo upalabbhamāno eko paramattha dhammoti padaṃ nāma. Koṭṭhāsatto hi padasaddo. Yathā padaso dhammaṃ vāceyyāti. Cavanābhāvena **accutaṃ**. Pubbantāparante atikkamma pavattattā **accantaṃ**. Saṅkharāṇakiccarahitattā **asaṅkhatāṃ**. Attano uttaritarassa kassaci dhammassa abhāvato **anuttaranti**. **Vānamuttā** taṇhā vimuttā, mahante sīlakkhandhādike dhamme esiṃsu adhigacchisūti **mahesayo**, buddhā.

Iti paramatthadīpaniyānāma abhidhammatthasaṅgahassa

Catutthavaṇṇanāya rūpanibbāna saṅgahassa

Paramatthadīpanā niṭṭhitā.

Samuccaya saṅgaha paramatthadīpanī

162. Evaṃ chahi paricchedehi cattāro paramatthe dassetvā idāni tesāṃ taṃtaṃrāsisaṅkhātaṃ samuccayaṃ dassento ādigātha māha. Ye salakkhaṇā dvāsattatividhā vatthudhammā mayā vuttā. Idāni tesāṃ samuccayaṃ yathāyogaṃ pavakkhāmīti yojanā. Tattha **salakkhaṇāvattudhammāti** padehi dasavidhāni anipphannarūpāni paṭikkhipati. Na hi tāni attano āvenikabhūtena sabhāva lakkhaṇena aniccatādi sāmāññalakkhaṇenaca salakkhaṇāni honti. Ekantaparamatthatāya abhāvato. Tatoyevaca vatthudhammāca nahonti. Sarūpato anupalabbhamānattā. Dabbavācako hi idha vatthusaddo. Dabbañcānāma idha sarūpato labbhamāno sabhāvo eva. Etena nibbānassapi maggaphala paccavekkhanaññesu sarūpato labbhamāna sabhāvātā vuttā hoti. Anipphannarūpānaṃ viya ca vatthudhamma sannissayena dissamānadhammattabhāvaṃ vā paññattidhammānaṃ viya parikkappitākāramattabhāvaṃvā sasavisāṇa kacchapalomādīnaṃ viya sabbaso abhūta parikkappita mattabhāvaṃvā nivāretīti vedītabbaṃ. Etthaca **dvāsattatividhāsallakkhaṇāvattudhammāti** vacane payojanaṃ nadissati. Tesu hi dvāsattatividhesu ekacce eva dhammā purimesu tīsu saṅgahesu āgatā. Pacchimeca sabbasaṅgahe anipphannarūpāni adhippetānievāti. Etthaca vatthudhammasallakkhaṇāti padehi anipphannarūpānaṃ salakkhaṇatā paṭikkhipane yaṃ vattabbaṃ. Taṃ rūpasamuddesa dīpaniyaṃ vuttamevāti. Ekantākusalajātiyānaṃ āsava catukkādīnaṃ saṅgaho **akusalasaṅgaho**, na akusala sampayuttattāyeva akusalabhūtānaṃ cittaphassādīnanti. Kusalā kusalābyākatamissakānaṃ saṅgaho **missakasaṅgaho**.

Bodhi vuccati catūsu maggesu ñāṇaṃ, bujjhanti etāyāti katvā. Bodhiyā pakkhā bodhipakkhā. Bodhisambhārāti attho. Bodhi pakkhesu bhavā antogadhāti bodhipakkhiyā. Tesāṃ saṅgahoti **bodhipakkhiyasaṅgaho**. Sabbesaṃ anavasesānaṃ paramatthadhammānaṃ saṅgaho **sabbasaṅgaho**. Cirapārivāsiyaṭṭhena madaniyaṭṭhena āsava sadisattā **āsavā**. Yadica tadubhayaṭṭhena āsavānāma siyuṃ. Ime lobhādayo eva āsavānāma siyuṃ. Pupphāsavādayo hi loke cha pañca rattimattaṃ vā sattaṭṭharattimattaṃ vā sayampi kumbhesu parivāsaṃ gaṇhanti. Kumbheca parivāsaṃ gāhāpentī. Ime pana anamatagge saṃsāre sayampi sattasantāne parivāsaṃ gaṇhanti. Sattasantānañca parivāsaṃ gāhāpentī. Sakalaṃ sattasantānaṃ sadā āsavapūritameva hoti. Yathāha-cakkhuṃ loke piyarūpaṃ sātārūpaṃ etthesā taṇhā uppajjamānā uppajjati. Ettha nivāsamānā nivāsatītiādi. Tattha esā taṇhā pariyaṭṭhānavasena uppajjamānā ettheva uppajjati. Uppajjitvāca puna anusayabhāvena parivāsaṃ katvā nivāsamānā ettheva nivāsatīti attho. Yāvaca ariyamaggadhovanaṃ nalabbhati. Tāva santānaṃ gūthapūritakūpaṃ viya dubbisodhaṃ katvā pavattati. Pupphāsavādayoca madam janentā muhuttameva janenti. Ime pana yāva ariyamaggaṃ nalabbhati. Tāva niccamadam janenti. Tasmā ekantena imeyeva cirapārivāsiyaṭṭhena madani yaṭṭhena āsavānāma bhavituṃ arahantīti.

Visandanaṭṭhena vā āsavasadisattā āsavā, yathā hi kudhita kuṭṭhino mahāvaṇamukhehi yūsasaṅkhāto

āsavo visanditvā pilotikakhaṇḍāni dūseti, evaṃ imepi chahidvārehi visanditvā chaḷārammaṇānidūsentīti. Āyamaṇvā saṃsāradukkhaṃ savantipasavanti vaḍḍhentīti āsavā. Athavā, bhavato ābhavaggā dhammato āgotratumhā savanti ārammaṇakaraṇavasena pavattantīti āsavā. Āsaddassa avadhīatthajotakattā. Avadhica duvidho mariyādavisayo abhividhivisayocāti tattha yassa sambandhinīkriyā avadhibhūtaṃ attānaṃ bahikatvā pavattati. So mariyādavisayo nāma. Yathā āpātaliputtā devo vuṭṭhoti. Yassa sambandhinīkriyā avadhibhūtaṃ attānaṃ byāpetvā anto katvā pavattati, so abhividhivisayonāma. Yathā ābrahmalokā bhagavato kittisaddo abbhuggatoti. Idha pana abhividhivisayo daṭṭhabbo. Tasmā bhavaggañca gotrabhuñca byāpetvā anto katvā savantīti attho veditabbo.

[204] Vibhāvaniyaṃ pana

Avadhica mariyādaabhividhivasena duvidhoti vatvā puna taṃ vibhāvento “tattha āpātaliputtā devo vuṭṭhotiādīsuvīya kriyaṃ bahikatvā pavatto mariyādo. Ābhavaggāsaddo abbhuggatotiādīsuvīya kriyaṃ byāpetvā pavatto abhividhi”’ti vadati. Taṃ na yujjati.

Na hi avavidhivisayabhūto bhavaggo lokattayabyāpakaṃ saddassa abbhuggamanakriyaṃ byāpetvā pavattati. Naca avadhibhūto attho kriyaṃ bahivā antovā katvā pavattatīti yutto. Kriyāeva pana taṃ bahivā antovā katvā pavattatīti yutto. Evañca katvā mūlaṭīkāyaṃ-duvidhohi avadhi abhividhivisayo anabhividhivisayoca. Abhividhivisayaṃ kriyābyāpetvā pavattati, ābhavaggā bhagavato yaso gatoti. Itaraṃ bahikatvā, āpātaliputtā vuṭṭho devoti. Kāmeti icchatīti kāmo. Soeva āsavoti **kāmāsavo**. Kāmīyatīvā oḷārikena kāmena icchīyatīti kāmo. Pañcakāmaguṇamukhena desito sabbo kāmāvacaradhammo. Idha pana taṃ nāmena tadārammaṇā taṇhāeva adhippetā, kāmoeva āsavoti kāmāsavo. Kāmāvacaradhammesu assādanābhinandana vasena pavatto kāmārāgo. Therena pana ayamatthova icchito. Vakkhati hi **kāmabhava nāmena tabbatthukā taṇhā adhippetāti**.

[205] Vibhāvaniyaṃ pana

Purimatthova vutto. So anupapanno, theramatānugatassa idhādhippetassa atthassa avuttattā.

Bhavāsavoti ettha duvidho bhavo kammabhavo upapattibhavo ca. Tattha mahaggatakusaladhammā kammabhavo. Taṃnibbattā vipāka dhammā upapattibhavo. Idhapi bhavasaddena tadārammaṇā taṇhāeva adhippetā. Bhavoeva āsavoti bhavāsavo. Tasmīṃ duvidhe bhava nīkantisena pavatto rūpārūparāgo.

[206] Yaṃ pana vibhāvaniyaṃ

“Sassata diṭṭhisahagato rāgo ettheva saṅgayhatī”’ti vuttaṃ. Taṃ na yuttaṃ.

Bhavāsavo catūsu diṭṭhigata vippayutta lobhasahagatesu cittuppādesu uppajjatīti hi aṭṭhakathākaṇḍe vuttaṃ. Yattha pana kāmataṇhā bhavataṇhā vibhavataṇhāti āgataṃ. Tattheva sassatadiṭṭhi sahagato rāgo yākāci kusalākusala kammabhavanikanti yākāci upapattibhavapatthanā. Sabbā bhavataṇhāyaṃ saṅgahitāti yuttā. Idha pana yathāvuttaṃ bhavāsavaṃ thapetvā sabbo lobho kāmāsavo eva saṅgahitoti yuttoti.

[207] Eteneva yañca **tattha** vuttaṃ.

“Tatiyo bhādiṭṭhisahagato”’ti. Taṃpi paṭikkhattaṃ hoti.

Yākāci diṭṭhi **diṭṭhāsavo**. Yokoci moho **avijjāsavo**. Ettha siyā, kasmā ime eva āsavāti vuttā. Nanu aññepi mānādayo cirapārivāsīyatṭhādiyuttā eva hontīti. Saccam. Imesu pana kāmāsavo parivuṭṭhe sati sabbekāmavisayā mānādayo parivuṭṭhāeva honti. Tasmīṃ vimutte vimuttāeva, tathā bhavāsavo

parivuṭṭhe sati bhavavisayā. Diṭṭhāsaveca parivuṭṭhe sati diṭṭhivisayāti. Avijjāpana tesam tiṇṇampi mūlabhūtāti. Iti ime eva pārivāsiyaṭṭhādīsu padhānabhūtā honti. Itare pana tadanubandhamattāeva sampajjanṭīti na te āsavāti visum vattum arahantīti. Attani patitaṃ janamaṃ anassāsikaṃ katvā ajjhottha ranto hanati māretīti **ogho**. Pakatimahogho. Tathā avahananaṭṭhena duttaraṭṭhenaca oghasadisāti oghā. Yadica avahaññanaṭṭheca duttaraṭṭhenaca oghānāma siyuntiādiko pasaṅgo mānādīnañca oghabhāva pariḥāro vutta nayena veditabbo.

Vaṭṭasmimvā bhavayantakevā satte yojentīti **yogā**. Bhavantaracutiyaṃ saha bhavantarapaṭisandhim gantenti ghaṭentīti **ganthā**. **Abhijjhāti** sabbassa rāgassetam nāmaṃ. Tasmā rūpārūpa rāgāpi ettha saṅgahitāti daṭṭhabbā. **Byāpādotipi** sabbo doso eva. **Idam saccāti nivesoti** idameva saccam, moghamaññanti pavatto micchābhiniveso. Vaṭṭadukkhato vimuttiyaṃ amaggabhūtaṃyeva gosīlagovatādikaṃ parato āmasanaṃ tathā tathā kappetvā gahaṇam **silabbataparāmāso**. Etthaca paratoti bhūtasabhāvapaccanikatoti attho. Kāyasaddo pana sabbattha rūpakāye nāmakāyeca pavattoti atitakāyena paccuppanna kāyamaṃ paccuppannakāyena anāgatakāyamaṃ gantheti ghaṭentīti **kāyagantho**. Athavā, kāye gaṇṭhoti kāyaganṭho. Ajjhatta gaṇṭhoti attho. Nigaṇṭhonāṭaputtotiādīsuvīya gaṇṭhasaddo gaṇṭhiyamaṃ pavatto. Bhusamaṃ ādiyanti amuñcanagāhamaṃ gaṇhantīti **upādānāni**. Kilesabhūto kāmoeva upādānaṃ **kāmu pādānaṃ**. Vatthubhūtaṃvā kāmamaṃ upādiyati kāmupādānaṃ.

Dvāsaṭṭhiditṭhiyo tividha mahādītṭhiyo aññāpivā sāsane lokeca sandissamānā viparītagāhabhūtā ditṭhiyo **diṭṭhupādānaṃ**. Yathāgahitaṃvā purimadītṭhim idameva saccamaṃ moghamaññanti upādiyati ditṭhupādānaṃ. Goṇakukkurādīnaṃ taṃtampakaticārittaṃ sīlamaṃ nāma. Tameva suṭṭhumaṃ samādinnaṃ vataṃnāma. Tadubhayaṃ saṃsāramuttiyaṃ maggoti daḷhagahaṇamaṃ **silabbatu pādānaṃ nāma**. **Attavādupādānanti** ettha attā vuccati parikappabuddhiyaṃ gahito ekekasmim satta santāne padhānissaro. Yamaṃ lokiyamahājanā sattotivā puggalotivā jīvotivā tathāgatotivā lokotivā sañjānanti. Yañca nānātittihīyā issaranimmitamaṃvā adhiccasamuppannaṃvā accantasassataṃvā ekaccasassataṃvā ucchedamaṃvā paññapentīti. Taṃ attānaṃ abhivadanticeva upādiyantica satta etenāti attavā dupādānaṃ. Vīsatividhā sakkāyaditṭhi. Tattha abhivadantīti viṣitṭhamaṃ padhānaṃ katvā vadanti. Upādiyanti daḷhamaṃ ādiyanti. Yathāha –

Tattha katamā sakkāyaditṭhi. Idha assutavā puthujjano rūpamaṃ attato samanupassati. Rūpavantaṃvā attānaṃ. Attani vā rūpamaṃ. Rūpasmimvā attānaṃ. Vedanaṃ attato samanupassati. Vedanāvantaṃvā attānaṃ. Attanivā vedanaṃ. Vedanāpavā attānaṃ. Saññaṃ. Saṅkhāre. Viññānanti.

Tattha rūpamaṃ attato samanupassati rūpameva attāti gaṇhāti. Rūpavantaṃvā attānanti attā me rūpavāti gaṇhāti. Attani vā rūpanti attānaṃ paṭicca rūpamaṃ tiṭṭhatīti gaṇhāti. Rūpasmimvā attānanti rūpamaṃ paṭicca attā tiṭṭhatīti gaṇhāti. Kathamaṃ rūpakāyamaṃ uddissa ajja aham thaddhomhīti vā ajja aham mudukomhītivā vadanto pathavi saṅkhātaṃ rūpamaṃ attato samanupassatināma. Ajja mama kāyo thaddhotivā mudūtivā vadanto sesadhammevā dhammamuttakamaṃvā attānaṃ gahetvā taṃ attānaṃ pathavīvantaṃ samanupassatināma. Ajja thaddhabhāvovā mudubhāvovā mayi jātoti vadanto attani pathaviṃsa manupassatināma. Ajjāhamaṃ thaddhabhāve ṭhitomhi mudubhāve ṭhito mhīti vadantopathavimhi attānaṃ samanussatināma. Ayamaṃ pathavimhi caturāvattikāya saṃkkāyaditṭhiyā pavattākāro. Sesesu sattavīsatirūpesu yathāsambhavaṃ vattabbo. Aham marāmi marissāmītiadinā hi aniccatāyampi sādītṭhi pavattatiyeva. Sesarūpesu vattabbaṃ natthi. Idamaṃ nāma aham pubbe saṃbhuñjimaṃ. Ajja saṃbhuñjāmi. Parato saṃbhuñjissāmītivā sukhitoṃ dukkhitomhītivā vedanaṃ attato samanupassati. Ajja mama kāyo sukhito dukkhitotivā mamacittaṃ sukhitamaṃ dukkhitantivā attānaṃ vedanāvantaṃ samanupassati. Ajjasukhamaṃvā dukkhamvā mayijātanti attani vedanaṃ samanupassati. Ajjāhamaṃ sukhita bhāve ṭhitomhi dukkhitabhāve ṭhitomhīti vedanāya attānaṃ samanupassati.

Saññāya sabbesuca paññāsamattesu saṅkhāresu visumaṃ visumaṃ vitthāretvā vattabbo. Aham passāmīti cakkhuvīññānaṃ attato samanupassati. Dassanaṃ meti attānaṃ viññānavantaṃ samanupassati. Mayidassanaṃnāma atthīti attani viññānaṃ samanupassati, aham dassane samatthomhīti viññānasmim

attānaṃ samanupassati. Ese vanayo sesesu pañcasu viññāṇesūti. Aha masmi ahaṃ eko satto ekopuggalo eko jīvo eko loko eko naro manusso devosakko brahmātivā ahaṃgacchāmi ahaṃ tiṭṭhāmi ahaṃ nisīdāmi ahaṃ nippajjāmi ahaṃ samiñjemi pasāremītiādinā vā khandhapañcakaṃvā ekamekaṃvā khandhaṃ samūhato gahetvā pavattipi vattabbā. Apariññātavatthukānañhi ekamuhutta mattepi yaṃkiñci attanovā parassavā attapaṭisaṃyuttavacanaṃ kathentānaṃ cittaṃvā vacanaṃvā yathāvutte rūpārūpadhamme kadāci attato upādiyitvā pavattati. Kadāci attaparivāra bhāvena. Kadāci attanissitabhāvena. Kadāci attanissayabhāvena. Kadāci ekekadhammavasena. Kadāci samūhadhammavasenāti.

Yasmā pana attanimittaṃnāma vasavattanākāraṃ paṭicca upaṭṭhāti. Vasavattanā kāroca rūpārūpadhammānaṃ paccayāyatta vuttikattaṃ khaṇi kattañca suṭṭhu passantānaṃ natthi. Tasmā pariññātavattukānaṃ atta paṭisaṃyuttavacanaṃ kathentānaṃpi cittaṃ paduminipatte udakabindu viya tesu dhammesu alaggitvāeva pavattatīti veditabbaṃ. Sattānaṃ cittasantāne kusale dhamme anuppannevā uppādetuṃ uppannevā vā setuṃ adatvā nīvārentīti **nīvaraṇāni**. Kāmanaṭṭhena kāmo, chandanaṭṭhenachandoti kāmacchando. Balavarāgo. Soevanīvaraṇanti **kāmacchandanivaraṇaṃ**. Paṭṭhāneāruppekāmacchandaṃ nīvaraṇaṃ paṭiccauddhaccanīvaraṇanti vuttattā pana thapetvā rūpārūparāge avaseso sabbolobho kāmacchande asaṅgahitonāma natthi. Jhānapaṭipakkhabhāvopana pañcakāmaguṇikarāgasseva hotīti veditabbo. Byāpajjanaṃ **byāpādo**. Cittassa pūtibhāvoti attho. Yokocidoso. Kasmā panettha **thinamiddha nīvaraṇanti** ca **uddhacca kukkucca nīvaraṇanti** ca dve dve dhammā ekaṃ nīvaraṇaṃ katvā vuttāti. Kiccato paccayato paṭipakkhatoca sadisattā. Tathā hi kiccato tāva thinamiddhadvayaṃ cittuppādānaṃ līnabhāvā pādanakiccaṃ. Uddhaccakukkuccadvayaṃ avūpasantabhāvāpādanakiccaṃ. Paccayato purimadvayaṃ tandivijambhi tatāpaccayaṃ. Pacchimadvayaṃ ñātibyasanādivitakkapaccayaṃ. Paṭipakkhato purimadvayaṃ vīriyapaṭipakkhaṃ. Pacchimadvayaṃ samathapaṭipakkhanti.

Anusentīti **anusayā**. Anurūpaṃ kāraṇaṃ labhitvā uppajjantīti attho. Anuanu sentītivā anusayā. Yāva maggaṃ napaṭilabhati. Tāva antarā aparikkhiyyamānā hutvā kāraṇalābhe sati punappunaṃ uppajjantīti attho. Uppajjanañcetta appahīnaṭṭhena uppajjanā rahabhāvo veditabbo. Na pana sarūpato uppatti, kathaṃ viññā yatīti ce. Yassa kāmarāgānusayo uppajjati, tasseva paṭighānusayo uppajjati vuttattā. Evañca katvā pāliyaṃ puthujjanassa sattapi anusayā anusayavāre saha anusentīti uppajjanavāre saha uppajjantīti vuttā. Yathāha puthujjanassa avijjānusayoca anuseti. Kāmarāga. Paṭigha. Māna. Diṭṭhi. Vicikicchā. Bhavarāgānusayoca anusetīti. Tathā uppajjanavārepīti.

Apica, sarūpato pariyoṭṭhānaṃ apatvā santāne pavattamānehi kusalākusalā byākatacittuppādehi saha anurūpā aviruddhā hutvā senti. Visuṃ sampayuttadhammabhāvena avuṭṭhitā hutvā sayitā hontīti anusayā. Anu anu sentītivā anusayā. Pakatiyā yathānusayitesueva kāmarāgādīsu punappunaṃ uppajjitvā diguṇa tiguṇādi vasena punappunaṃ senti. Sayanākārena uparupari paliveṭṭentīti attho.

Tīsu rāgādīnaṃ avatthāsu pathamāvattāya ṭhitānaṃ kāmarāgā dīnametaṃ adhivacanaṃ. Tisso hi avatthā anusayāvattā pariyoṭṭhānavatthā vītikkamāvattāti. Tattha ye kāmarāgādayo uppajjitvā kāyaṅgavācaṅgaṃ cāleni, tesam tathāpavattā avatthā vītikkamāvattānāma. Ye manasmiṃ eva javanacittasahajāta hutvā pavattanti, tesam tathāpavattā avatthā pariyoṭṭhānavatthānāma. Ye pana javanasahajātabhāvampi apatvā vāsanādhātuyo viya cikkasantānā nusayitā hutvā pariyoṭṭhānapattiyā bījabhāvena tiṭṭhanti, subhanimittādikeya ārammaṇe āpātamaḡate yesaṃ vasena āvajjanaṃ rāgādīpātubhāvattāya ayoniso bhavaṅgaṃ āvaṭṭeti, abhāvitañca cittaṃ yesaṃ vasena damathaṃ naupeti, tesam tathā pavattā avatthā anusayāvattānāma. Tadavatthikā kāmarāgādayo anusayānāma. Te pana aparamatthabhūtāpi na honti. Ekantaparamatthajātikattā. Naca kusalābyākatabhūtā ekantākusalajātikattā. Nāpi kusalābyākataviruddhā, visuṃ sampayuttadhammabhāvena anupaladdhattā. Nāpi kālattayavinimuttā, tekālikadhammasannissayena pavattanato. Yadā pana te samuṭṭha hitvā pariyoṭṭhānabhāvaṃ gacchanti, tadā visuṃ sampayuttadhamma bhāvāñca gacchanti. Sārammaṇādībhāvoca tesam paribatto hoti. Etadatthaṃ sandhāya kathāvattumhi tesam

sārammaṇadhammabhāvo saṅkhārakkhandhabhāvoca patiṭṭhāpito hotīti.

Yathā pana phaladhārimhi rukkhamhi visakaṇṭake dinne rukkhānusayito phaluppattiyā paccayabhūto sineho parikkhayaṃ gacchati. Samaye uppajjissamānāni phalāni nuppajjanti. Evaṃ sānusaye citta santāne yasmim̄ khaṇe maggo pātubhavati, tasmim̄ sahamagguppādā so so anusayo parikkhayaṃ gacchati. Parikkhīṇassa pana puna pariyuṭṭhānaṃnāma natthi, kuto vītikkamoti imamatthaṃ sandhāya maggo anāgatasāmaññaṃ kilesajātaṃ pajahatīti tattha tattha vutto. Tattha anāgatasāmaññanti anāgatasammatam, na ekanta anāgataṃ. Teneva hi aṭṭhakathāyaṃ maggo yekilese pajahati, te atītākivā anāgatātivā paccuppannātivā navattabbāti vuttaṃ. Etenaca maggo kilesamukhena yāni kusalākusalakammānīca upādinnakakhandhapañcaka pajahati, te atītātivāanāgatātivā paccuppannātivā navattabbāti dīpeti. Yadi evaṃ maggena pahīnā sabbe tebhūmakadhammā kālavimuttānāma atankhatā nāma apaccayānāma siyunti. Na. Tekālikajātikattā saṅkhata sapaccayajātikattā ca. Te hi magge anuppanne ime nāmadhammā uppajjissanti nirujjhissanti evaṃ saṅkhatalakkhaṇaṃ āhacca ñāṇena gahitattā lakkhaṇavasena tebhūmakādi bhāvaṃ bhajantīti. Evañca katvā viṣuṃ sampayuttadhammabhāvaṃ apattānaṃ anusayāvattāya vā vāsanāvattāyavā kammasamaṅgītāvattāyavā āsayajjhāsaya dhimutticaritavattāhāsuvā ṭhitānaṃ sabhāvānaṃ jātivāsena paramattha dhammatā akusalādītāca paccetabbā hotīti.

[208] Vibhāvaniyaṃ pana

“Appahīnā hi kilesā kāraṇalābhe sati uppajjanā rahā santāne anuanusayitā viya hontīti tadavattā anusayāti vuccanti. Te pana nippariyāyato anāgata kilesā. Atītapaccuppannāpi taṃsabhāvattā tathā vuccantī”ti vuttaṃ. Tattha anusayānāma santāne kadācīpi anuppanna pubbā anāgata kilesā evāti katvā santāne anu anusayitā viya hontīti vuttaṃ. Taṃ na yujjati.

Na hi te anuanusayitā viya honti. Ekantena anusayitāeva hontīti.

[209] Yañca tattha

“Te pana nippariyāyato anāgata kilesā”ti vuttaṃ. Taṃpi na yuttaṃ.

Na hi maggena appahīnā anusayā anāgatānāma honti. Pahīnāpīca nippariyāyato anāgatāti nasakkā vuttaṃ. Anāgata sāmāññassa adhippetattāti. Etena atītapaccuppannāpi taṃsabhāvattātathā vuccantīti idaṃvipaṭikkhittam hoti. Apīca, uppādaṭṭhitibhaṅga pattānaṃeva ekantena tekālikatā hotīti tadapattānaṃ anusayānaṃ paccuppannatā pariyāyova vuttaṃ yutto. Evañca katvā pāliyaṃ yassa kāmarāganusayo uppajjati, tassa paṭighānusayo uppajjātītiadinā paccuppannakāliko uppādavāro eva vutto, na nirodhavāro, naca atītānāgata vārāti. Yaṃ pana paṭisambhidāmagge hañci paccuppanne kilese pajahati. Tena hi ratto rāgaṃ pajahati, duṭṭho dosaṃ, muḷho mohanti vuttaṃ. Taṃ pariyuṭṭhānapattānaṃ ekantapaccuppannakhaṇaṃ sandhāya vuttanti daṭṭhabbaṃ. Teneva hi aṭṭhakathāyaṃ vattamānuppannaṃ bhutvā vigatuppannaṃ okāsakattuppannaṃ samudācārūpannanti catubbidham uppannaṃ na maggavajjhaṃ. Bhūmiladdhuppannaṃ ārammaṇā dhiggahi tuppannaṃ avikkhambhituppannaṃ asamugghāṭituppannanti catubbidham maggavajjhanti vuttaṃ. Tattha vattamānuppannaṃ samudā cārūpannanti idaṃ dvayaṃ khaṇapaccuppannameva. Bhutvāvigatuppannaṃ atītameva. Okāsa katuppannaṃ anāgatameva. Tadubhayaṃ pana paccuppannasamīpattā uppannanti vuttaṃ. Samīpapaccuppannanti vuttaṃ hoti.

Bhūmiladdhuppannaṃnāma attano khandhesu anusayitānaṃ maggena appahīnānaṃ anusayānaṃeva nāmaṃ. Ārammaṇādhiggahituppannaṃ nāma subhanimittādi ke ārammaṇe sakim̄ javitvā yāva tammūlako pariyuṭṭhānavego na vūpasammatī, tāva adhimattathāmagata bhāvena ṭhitānaṃ tesaññeva nāmaṃ. Anusayā hi nāma anamatagge saṃsāre punappunaṃ pariyuṭṭhānapattānaṃ kilesānaṃ vasena uparupari thira tara daḷhatara pattiyā pakatiyāpi thāmagatāevanāma honti. Na yenavā tenavā

vāyāmena pajahituṃ sakkuṇeyyā. Evaṃ santepi yadā yo yo anusayo paccayalābhena pariyuṭṭhāna bahulo hoti, tadā so so visesena adhimattathāma gatabhāvaṃ patvā ṭhito hoti. Yadā yo yo paṭipakkhadhamma samādānena niggahapatto hoti, tadā so so mandathāma gatabhāvaṃ patvā ṭhito hotīti. Avikkhambhituppannaṃnāma samatha vipassanāhi suṭṭhuaniggahitānaṃ tesaññeva nāmaṃ. Asamugghāti tuppannaṃnāma maggena appahīnānaṃ bhūmiladdhānaṃ tesameva nāmantī. Yasmā pana lokuttaradhammānāma kilesānaṃ accantapaṭipakkhā hontīti heṭṭhimā maggaṭṭhaphalaṭṭhā sekkhā attano maggaphalakkhaṇesu upari maggājjhehipi anusayehi sānusayātivā nirānusayātivā thāmavatātivā athāmagatātivā navattabbā. Tasmā anusayānaṃ tādise paccuppanna bhāve satipi hañci paccuppanne kilese pajahati. Tenahi thāmagato anusayaṃ pajahatīti vutta doso natthīti veditabboti. Kāmarāgoeva anusayo **kāmarāgānusayo**.

Samyojenti bandhantīti **saṃyojanāni**, tāni pana sakkāyaditṭhi vicikicchā sīlabbataparāmāso kāmacchando byāpādoti pañca orambhāgiyāni. Rūparāgo arūparāgo māno uddhaccaṃ avijjāti pañca uddhambhāgiyānīti suttante abhidhammeca dasasaṃyojanāni āgatāni. Itarāni pana abhidhammeva āgatānīti tato visesakaraṇatthaṃ **suttanteti** vuttaṃ. Kamo pana dvinnampi pāliya nasameti. Sabhāga dhammasaṅghavasena pana idha aññathā kamo vutto siyāti. Cittaṃ kilissanti vibādheti upatāpenticāti **kilesā**. Kilissantivā malīnabhāvaṃ nihīnabhāvañca gacchanti sattā etehīti kilesā. **Kāmabhavanāmenāti** vatthukāmadīpakena kāmānāmena rūpārūpabhavadīpakena ca bhavanāmena. Tādisaṃ kāma bhavaśāṅkhātaṃ ārammaṇabhūtaṃ vatthu etissāti **tabbatthukā**. **Tathā pavattanti** sīlabbatāni parato āmasanākārena idaṃ me saccaṃ moghamaññanti abhinivisanākārena khandhesu attābhinivesākārenaca pavattaṃ. **Vatthutoti** sabhāvadhammato. Ayaṃ pāpasāṅgaho akusalāṅgaho navadhā vuttoti yojanā. [Akusalasāṅgaho]

163. Missaka saṅgahe pāṇātipātādīni pāpakammāni karontānaṃpi cittassa ārammaṇe ujukaraṇaṃnāma jhānena vinā na sijjhatīti vuttaṃ **sattajjhānaṅgānīti**. Kalyāṇevā pāpakevā ārammaṇe ujukaṃ cittapaṭipādanasaṅkhātassa upanijjhāyana kiccassa āṅgānīti attho. Tattha domanassaṃ akusalajjhānaṅgaṃ. Sesāni kusalākusalābyākatānīti. Kalyāṇakamma pāpakammasaṅkhātāsu sugati duggati vivaṭṭasaṅkhātāsuca nānādisāsu taṃtaṃdisāti mukhappavattisaṅkhātā cittassa gatināma sammāvā micchāvā pavattehi dassanādīhi eva sijjhatīti vuttaṃ **dvādasamaggaṅgānīti**. Cittassa ujugatīyāvā vaṅkagatīyāvā gamanassa pathaṅgāni upāyaṅgānīti attho. Tattha micchādīṭṭhi micchāsaṅkappa micchāvāyāma micchāsamādhayo pāpakamma duggatibhava saṅkhātāsu ahitadisāsu cittassa vaṅkagatīyā gamanassa upāyaṅgāni, itarāni kalyāṇakamma sugatibhava vivaṭṭadhammasaṅkhātāsu hitadisāsu ujugatīyāti daṭṭhabbaṃ. Tattha pāṇātipātakamme vitakka vicāra domanassekaggatā saṅkhātāṃ caturaṅgikajjhānaṃ micchāsaṅkappa micchāvāyāma micchāsamādhi saṅkhāto tiyaṅgikamaggo veditabbo. Evaṃ sesesu sucaritaduccaritakammesu jhānamaggā uddharitabbā. Vibhaṅge pana suttantesuca micchāvācā micchākammanto micchāājīvo micchāsātīti imepi cattāro āgatā. Ime pana visuṃ cetasikadhammā nahonti. Tathā tathā pavattānaṃ catunnaṃ khandhānaṃ adhivacananti katvā idha nagahitā.

[210] Yaṃ pana **vibhāvaniyaṃ**

“Sugati duggatīnaṃ nibbānassa ca abhimukhaṃ pāpanato maggā; Tesāṃ pathabhūtāni āṅgāni maṅgānī”ti vuttaṃ; Taṃ na sundaraṃ;
Na hi āṅgāni maggānaṃ pathabhūtānīnaṃ hontī; Maggasaddoyeva pathapariyāyo aṭṭhakathāsu vutto na āṅgasaddoti;

[211] Yañca **tattha**

“Maggassavā aṭṭhaṅgikassa āṅgāni maggaṅgānī”ti vuttaṃ. Taṃpi anupapannaṃ.

Idha hi katthaci citte tiyaṅgiko katthaci caturaṅgikotiādinā nānamaggova adhippetoti.

Ādhipaccaṭṭhena **indriyāni**. Kiñca ādhipaccam. Attādhīnavuttike dhamme attano gatiyaṃ sabbaso vattetuṃ samatthabhāvo. Iti tesu tesu kicesu attano ādhipaccasankhātaṃ indaṭṭhaṃ karonti sādhentī indriyāni. Indaṭṭhaṃ kārentītipi indriyāni. Issarā adhipatinoti vuttaṃ hoti. Tatha pañcacakkhādīni dassanādikicesu cakkhuvīññāḍīnaṃ issarāhonti. Balavadubbalamanda tikkhādīsu attākārānuvattāpanato. Bhāvadvayaṃ itthākārādivasena pavattiyaṃ catusamuṭṭhānika rūpānaṃ sakalakhandhapañcakasseva vā issaro hoti. Aññathā appavattito. Tathā hi yasmiṃ santāne paṭisandhiyaṃ itthibhāvo pavattati. Tasmīṃ sabbe kammā dipaccayā catusamuṭṭhānarūpasantatiṃ samuṭṭhāpentā itthākārasahitameva samuṭṭhāpenti, no aññathā. Chandacittādhippāyāpi tasmīṃ mandākārasahitāva pavattanti. Tabbiparītena purisasantānaṃ veditabbaṃ. Jīvitadvayaṃ rūpā rūpasantānaṃ ratti diva māsa saṃvaccharānukkamena addhānapharaṇe saha jātadhammānaṃ issaro hoti. Tesam tadāyattavutti kattā. Mano vijānanakicce. Vedanāpañcakaṃ tathā tathā ārammaṇarasānubhavane. Saddhā ārammaṇāvīmuccane. Vīriyaṃ kammani alīna vuttibhāve. Sati ārammaṇupaṭṭhāne. Samādhi ārammaṇe niccalaṭṭhi tiyaṃ. Paññā asammohakicce sampayuttadhammānaṃ issaro hoti. Anaññābhibhavanīyabhāvena pavattanato. Yathā hi silāyaṃ pathavī saha jātehi anabhibhavanīyā hoti. Attanāvate abhibhavitvā viṣuṃ avijjamāneviya katvā pavattati. Yathā ca uduke āpo aggimhi tejo vāte vāyo. Evaṃ sampadamidaṃ daṭṭhabbaṃ.

Aññāyittha paṭivijjhittāti aññātaṃ. Na aññātaṃ anaññātaṃ. Catusaccadhammo. Amataṃvā padaṃ. Anaññātaṃ ñassāmi jānissāmīti anaññātaññassāmi. Ākhyātikampi hi padaṃ saññāsaddabhāve ṭhitam nāmikaṭṭhāne tiṭṭhati. Yathā makkhaligosālo ehipassi koti. Evañhi sati tassa padantarena saha samāsabhāvo navirujjhatīti. Anaññātaññassāmīti evaṃ paṭipannassa indriyaṃ **anaññā taññassāmīndriyaṃ**. Ādimanasikārato paṭṭhāya tādīsena ussāhena saha vipassanaṃ ārabhantassa tasmīṃ ussāhe apaṭipassaddheyeva sotāmatimaggam paṭilabhantassa indriyanti vuttaṃ hoti. Ājānātīti aññānaṃ. Tameva indriyanti **aññindriyaṃ**, pathamamaggena anaññātaṃ ñatvāpi kilesappahānakiccassa apariniṭṭhitattā tassa jānanakiccassa vipakatabhāvena yathā diṭṭhe tasmīṃ catusaccadhamme amatapadeeva vā punappunaṃ jānanakicca yuttānaṃ indriyanti vuttaṃ hoti. **Aññātāvindriyanti** aññā tāvino pariniṭṭhita ājānana kiccassa khīṇāsavassa indriyanti aññātāvindriyaṃ. Tividhaṃ petam tathārūpe jānane sampayutta dhammānaṃ issaro hotīti veditabbaṃ.

Tatha imesaṃ sattānaṃ pākāte rūpakāye attagāhadaḷhattaṃ tabbimuttica imesaṃ apariññāya pariññāyaca hotīti dīpetuṃ ādīto pañca pasādinriyāni vuttāni. Tassa attassa itthipuma tābhedo imesaṃ vasena hoti. Tasmīṃ vā itthipurisa gāho tabbimuttica imesaṃ apariññāya pariññāyaca hotīti dīpetuṃ kadanantaram bhāvindriyadvayaṃ vuttaṃ. Soca attā imassa vasena jīvasaññaṃ labhati. Tasmīṃvā jīvagāho tabbimuttica imassa apariññāya pariññāyaca hotīti dīpetuṃ tadanantaram jīvitindriyaṃ vuttaṃ. Idaṃ pana bhāvindriyato pure vattabampi rūpārūpa missakattā idha vuttanti daṭṭhabbaṃ. Nāmakāye attagāhadaḷhattaṃ tabbimuttica imassa apariññāya pariññāyaca hotīti dīpetuṃ nāmindriyesu manindriyaṃ ādīto vuttaṃ. Soca arūpī attā imesaṃ vasena saṃkiliṭṭho vipphanditoca hoti. Tasmīṃvā sukhitadukkhitaḷgāho tabbimuttica imesaṃ apariññāya pariññāyaca hotīti dīpetuṃ tadanantaram pedanindriyapañcakaṃ vuttaṃ. Tassa saṃkiliṭṭhassa vodānappattiyā taṃtaṃgāhavamuttiyāvā paṭipattidassanattaṃ tadanantaram saddhādīpañcindriyaṃ vuttaṃ. Tāya paṭipattiyā vodānappatti yā ādi majjha pariyosāna dassanattaṃ ante tīṇi lokuttarindriyāni vuttānīti.

[212] Vibhāvaniyaṃ pana

“Ettāvatā adhippetatthasiddhīti aññesaṃ agahaṇanti” vuttaṃ. Taṃ na yujjati.

Nahi santesupi aññesu indriyabhāvārahesu dhammesu ettāvatā adhippetatthasiddhiyā tesam aññesaṃ bhagavato therassaca agahaṇanti yuttaṃ vattuṃ. Indriyabhāvārahassa aññassa asambhavato. Yadi hi sambhaveyya, satampi sahasampi gaṇhissatiyevāti. Baliyanti uppannuppanne paṭipakkhadhamme sahani maddantīti **balāni**. Yathā abalānaṃ baliyanti. Maddantenam parissayāti. Ethhaca abalāti dubbalā. Nanti hīnavīriyaṃ janam. Baliyantīti balasā karonti ajjhottharanti. Parissayāti

abalā rāgādi parissayāti attho. Apica, paṭipakkhadhammehi akampiyatṭhena akkho bhaṇiyatṭhena balānīnāma. Tasmā assaddhiyaśāṅkhātena paṭipakkhadhammena kampetuṃ asakkuṇeyyatā **saddhābalaṃ**nāma. Kosajjaśāṅkhātena kampetuṃ asakkuṇeyyatā **vīriyabalaṃ**nāma. Muṭṭhasaccena kampetuṃ asakkuṇeyyatā**satibalaṃ**nāma. Uddhaccena kampetuṃ asakkuṇeyyatā**samādhībalaṃ**nāma. Avijjāyakampetuṃ asakkuṇeyyatā **paññābalaṃ** nāma. Sesadukadvayaṃ pana aññamaññaṃ paṭipakkhenayojetabbam.

[213] Vibhāvaniyaṃ pana

Pāpabaladukam paṭipakkhena yojetuṃ nalabbhatīti katvā “ahirikānottappadvayaṃ pana sampayuttadhammesu thirabhāve nevāti” vuttaṃ. Taṃ na sundaraṃ.

Sampayuttadhammesu thirabhāvotica paṭipakkhehi akampiyatā tica atthato nānattābhāvototi. Vīriyasamādhībalāni kusalākusalābyākatāni. Ahirikānottappāni akusalabalāni. Sesāni kusalābyākatānīti. **Adhipatīti** ettha patīti sāmi issaro. So pana padesa issaro sakalissaroti duvidho. Tattha indriyāni paresaṃ visaye sayam paravase vattitvā attano visayeeva parehi attano vase vattāpentīti padessarā nāma. Pubbāti śāṅkhārasena pubbāgamanavasena vā visesetvā pavattaṃ adhipatīṭṭhānaṃ patvā pana añño dutiyo issaronāma natthi. Tasmā adhiko patīti adhipati. Attā dhīnavuttīnaṃ patīti adhipatītica vadanti.

Chandoeva adhipatīti chandādhīpati. Chandavato kiṃnāma kammaṃ nasiijhatīti evaṃ pubbābhisaṅkhārasenavā pubbe atītabhavesu suṭṭhu āsevitachandāgamanavasenavā tesu tesu kalyāṇa pāpakammesu sampayuttadhamme mahoghoviya tiṇapaṇṇakasate attaparādhīne niccaṃ paggahitadhure katvā pavatto kattukamyatā chando. Esa nayo sesesupi. Nanu cettha pacchimā tayo dhammā adhipatibhāvaṃ gaṇhantā indriyabhāvaṃ avijahitvāva gaṇhantīti adhipatibhūtāva samānā indriyakiccavasena paravasepi vattantīti. Saccaṃ, aññaṃ pana adhipatikiccaṃ, aññaṃ indriyakiccanti natthettha dosoti. Yathā hi rājā cakkavattī ekassa attano purohitassa santike ekaṃ dibbavijjaṃ gaṇhāti. Na ettāvata rājā cakkavattināma nahoti. Naca vijjāhetu aññassa vasena vattati. Aññañhi cakkavattī rajjakiccaṃ, aññaṃ vijjāgahaṇa kiccanti. Evaṃ sampadamidaṃ daṭṭhabbaṃ. Tattha adhipatikiccaṃnāma tamtamkicca visesaṃ anapekkhitvā atulyabalena abhibhavitvā sahaṇāta dhamme attano attano kicesu anivattamāne katvā dhura vāhitā. Indriyakiccaṃ pana vijānanādikiccaṃ ārabba pavuccatīti.

Āharanti sahaṇātipaccayasāmaññaṃ atirekena asādhāraṇapaccayasattivisesena haranti pavattentīti **āhārā**. Āharantivā ajjhattasambhūtā te te paccayadhammā paccayuppannadhammāca attānañceva attano attano paccayakiccaṃ paccayuppannakiccaṇa suṭṭhu haranti vahantī etehīti āhārā. Yathāhasabbe sattā āhāraṭṭhitikāti. Ethaca sabbe sattāti etena sabbe ajjhattasambhūtā paccayapaccayuppannadhammā vuttā. Āhāraṭṭhitikāti paccayaṭṭhitikā. Yathārahaṃ catuvisatipaccayehi ṭhitisabhāvāti attho. Nanucettha paccayāhārova vutto. Na āhārapaccayo. Idha pana catubbidho āhārapaccayadhammova vuttoti. Saccaṃ, paccayaṭṭhena pana āhāranāmakānaṃ sabbesaṃ catuvisatipaccayadhammānaṃ majjhe yedhammā cattāro āhārāti visesetvā vuttā. Te tesam paccayāhāraṇampi āhārabhūtāti siddhā hontīti. Imasmiṃ atthe catunnaṃ āhāraṇaṃ mahanta bhāvo pākāto hotīti.

Tattha yathā yavabījānaṃvā sālibījānaṃvā ānubhāvo nāma kaḷiraṅkurānaṃ uppādāna padhānaṃ hoti. Tatoparaṃ pana sassabhāvaṃ patvā cha pañca māse vaḍḍhiyāvā ṭhitiyāvā pathavi rasaāporasānaṃ ānubhāvo padhānaṃ hoti. Evamevaṃ kabalī kārāhārūpajivīnaṃ kāmasattānaṃ kammaṃ ānubhāvonaṃ paṭisandhirūpuppādane padhānaṃ hoti. Tatoparaṃ pana yāvatāyukaṃ vaḍḍhiyāvāṭṭhitiyāvā utuāhāraṇaṃ ānubhāvo padhānaṃ hoti. Kammajarūpāni hi yāva āsannamaraṇā pavattamānānīpi utuāhārehi anuggahitānieva pavattanti. Utuca āhāru patthambhitoyeva attano kiccaṃ karoti. Tasmā tesam sattānaṃ catusantirūpaṃ kabalīkārāhārena anupatthambhīyamānaṃ ciraṃ napavattati. Upatthambhīyamānaṃeva yāvatāyukaṃ pavattati. Yathāca sakuṇāvā ḍaṃsamakasā dayovā tuṇḍena āhāraṃ gahetvā atabhāvaṃ posenti. Tuṇḍe asante āhāraṃ alabhantā maranti. Evameva ime

sattā phassena ārammaṇesu rasaṃ gahetvā vedanāsankhātāṃ upabhogaparibhogaṃ sampādetvā taṇhāvepullaṃ patvā tividhaṃ vaṭṭaṃ pūretvā yāvajjatanāpi vaṭṭe anukaṇṭhamānā pavattanti.

Yadi hi phassonāma na siyā, ārammaṇarasaṃ alabhivā vedanā paribhogarahitena taṇhuppattiyā okāso natthīti tividhavaṭṭameva nasiyāti. Yathāca te sakuṇādayo pakkhe viyūhitvā antarā apatamānā rukkhato rukkhaṃ vanato vanaṃ vicarivā attānaṃ yāpenti. Pakkhesu asantesu gamaṇaṃ asampādentā pativā maranti. Evamevaṃ ime sattā āyūhanalakkhaṇāya cetanāya cetayivā kamma samaṅgitaṃ sampādetvā bhavato bhavaṃ vicarivā yāvajjatanā vaṭṭe saṃsaranti. Yadi hi cetanānāma na siyā, kammavaṭṭassa abhāvo. Tadabhāveca vipākavaṭṭassa abhāvo. Tadabhāveca tadanusayitassa kilesavaṭṭassa abhāvoti vaṭṭaṃnāma na siyāti. Yathāca te sakuṇādayo cakkhunā gocarāṭṭhānaṃvā taṃtaṃdisābhāgaṃvā vibhāvetvā yāvajjivaṃ attānaṃ yāpenti. Cakkhusmiṃ asante kiñcigahetabbavatthumvā gantabbaṭṭhānaṃvā alabhivā tattheva maranti. Evamevaṃ sampayuttā dhammā ārammaṇavijānalakkhaṇena viññāṇena taṃtaṃārammaṇaṃ labhitvā tasmim̃ tasmim̃ phassādayo uppādetvā tividhaṃ vaṭṭaṃ vaṭṭenti. Yadi hi viññāṇaṃnāma na siyā, phassādīnaṃ ārammaṇalābhoyeva natthīti vaṭṭameva na siyāti. Tenāha **cattāro āhārā.La. Viññāṇaṃ catutthanti.** Saṃyuttakeca –

Cattārome bhikkhave āhārā bhūtānaṃ vā sattānaṃ ṭhitiyā sambhavesīnaṃvā sattānaṃ anuggahāya kabalīkāro āhāro oḷārikovā sukhumovā, phasso dutiyo, manosañcetanā tatīyā, viññāṇaṃ catutthanti vuttaṃ.

Tattha bhūtānanti vuddhippattānaṃ. Sambhavesīnanti kalalādi kāle ṭhitānaṃ. Catunnaṃpana āhārānaṃ yathāsambhavaṃ anamatagge saṃsāraṃvaṭṭevā tasmim̃ tasmim̃ bhavēvā ṭhitiyāvā anuggahāyavā pavatti ākāro vuttanayena veditabbo. Aṭṭhakathāyaṃ pana kopanettha āhāro. Kim̃ āhāretīti. Kabalīkāraṃ hāro ojaṭṭhamakarūpāni āhāreti. Phassāhāro tisso vedanā. Manosañcetanāhāro tayo bhave. Viññāṇā hāro paṭisandhināmarūpanti vuttaṃ. Taṃ pākaṭaphalavasena vuttanti daṭṭhabbaṃ. Ojaṭṭhamakarūpuppādanaṃ pana kabalīkārahārassa mahantaṃ kiccaṃ nahoti. Catusantatirūpupatthambhanaṃvā mahantaṃ. Teneva hi pāliyaṃ ṭhitiyātica anuggahāyātica vuttaṃ.

Apica yathā upanissayāsevanapaccayā suttanti kapariyāyā abhidhammapariyāyātica duvidhā honti. Tathā āhārapaccayopi duvidho. Tattha yaṃ vuttaṃ manosañcetanāhāro tayobhaveti. Taṃ suttantikapariyāyaṃ sandhāya vuttaṃ. Nahi paṭṭhāne arūpā hārā asahajātānaṃ dhammānaṃ āhāraṭṭhena paccayānāma hontīti. **Pañcaviññāṇesu jhānaṅgāni nalabbhanti.** Tāni hi dubbalakiccaṭṭhānavatthukattā rūpādisu abhinipātamatāni hontīti na tesu vijjāmānā vedanā ekaggatā jhānakiccaṃ sādhetīti. Vitakkapacchimakaṃ jhānantica vuttaṃ. Jhānaṅgānaṃ nāyakabhūtoca vitakko tesu natthīti tattha tāvedanā ekaggatāyo taṃ na sādhetīti. Vīriyupatthambharahitā dhammā sampayuttadhammesu thirabhāvappattā nahontīti avīriyesu soḷasāhetukacittesu samādhibalakiccaṃ na sādheti. Vīriyapacchimakaṃ balanti hi vuttanti āha **avīriyesu balāni nalabbhantīti.** Heturahitā ca dhammā vaṭṭassa vivaṭṭassaca pattiyā pathabhāvaṃ nagacchanti. Hetupacchimako maggoti hi vuttanti āha **ahetukesu maggaṅgāni na labbhantīti.** Vicikicchāsampayuttecitte ekaggatā adhimokkharahi tattā ekantena saṃsappanasabhāvāya vicikicchāya abhibhūtattā ca maggindriyabalabhāvāya balavatī nahotīti vuttaṃ **vicikicchā citta ekaggatā maggindriyabalabhāvaṃ na gacchatīti. Dvihetuka tihetuka javanesvevāti** ettha dvihetuka tihetukasaddena momūhadvayahasana javanāni nivatteti. Javanasaddena tibhūmakāni dvihetukatihetukavipākāni nivatteti.

[214] **Vibhāvaniyaṃ** pana

“Dvihetukatihetukagahaṇena ekahetukesu adhipatīnaṃ abhāvaṃ dasseti” ti vuttaṃ, javanabhāvasāmaññattā pana hasanacittepī tesāṃ abhāvo dassetabboyeva hotīti.

Yathāsambhavanti laddhapubbāti saṅkhārassa laddhapubbāgamassa ca ekekassa adhipatino

sambhavānurūpaṃ **ekova labbhati**. Na dutiyo. Itarathā adhipatieva nasiyāti. Evañca katvā paṭṭhāne yathā indriyapaccayavibhaṅge arūpinoindriyā sampayuttakānaṃdhammānaṃ taṃsamuṭṭhānānañca rūpānaṃ indriyapaccayena paccayoti vuttaṃ. Na tathā adhipatipaccayavibhaṅge. Tatha pana chandādhīpati chandasampayuttakānantiādinā ekekādhīpati vibhāgavaseneva vuttanti. Evañhi sati adhipati indriyānaṃ vireso pākaṭo hotīti. **Naveritāti** nava īritā kathitā. Kusalā kusalā byākatehi samākiṇṇo **kusalādi samākiṇṇo**. [Missakasaṅgaho]

164. Cattāri saccāni bujhatīti bodhi. Bujjhantivā tāni taṃ samaṅgino etāyāti bodhi. Catumaggañānaṃ. Vuttañhetam mahā niddese bodhi vuccati catūsu maggesu-ñāṇanti. Pakkhoti koṭṭhāso sambhāro. Bodhiyā pakkhe bhavāti bodhipakkhiyā. Adhisīlā dhicittā dhīpaññā saṅkhātāsu tīsu sikkhāsu pariyaṇānaṃ satthusāsanadhammānaṃ etaṇṇāmaṃ. Te pana koṭṭhāsato satta vidhā hontīti āha **cattārosatipaṭṭhānā**tiādi. Sampayutta dhammesu pamukhā padhānā hutvā kāyādīsu ārammaṇesu tiṭṭhanti nānārammaṇesu cittaḡamanaṃ nivattetvā tesveva kāyādīsu citta nibandhanavasena pavattantīti paṭṭhānāni. Satieva paṭṭhānānīti sati paṭṭhānāni. Cattārisatipaṭṭhānānīti vattabbe dhammabhāvaṃ apekkhitvā cattārosatipaṭṭhānā tivuttanti daṭṭhabbaṃ. Kāye anupassanā **kāyā nupassanā**. Rūpakāye rūpasamūhe assāsapassāsādīkassa avayavakāyassa taṃtaṃkāyabhāvenavā aniccādībhāvenavā yāva tasmīṃ tasmīṃ kāye sammoho pahiyati. Tāva punappunaṃ nirantaraṃ samanupassanāti attho. Navappabhedāsu vedanāsu sukhavedanādi kāyāvayavavedanāya taṃtaṃ vedanābhāvena udayabbayavasena ca anupassanā **vedanānupassanā**. Soḷasa pabhedesu sarāgā dīsu cītesu sarāgādīkassa avayavacittassa taṃtaṃ cittabhāvena udayabbayavasena ca anupassanā **cittānupassanā**. Pañcapabhedesu nīvaraṇādīsu dhammesu kāmacchandādīkassa avayavadhammassa taṃ taṃ dhammabhāvena udayabbayavasena ca anupassanā **dhammānupassanā**.

[215] Yaṃ pana **vibhāvaniyaṃ**

“Kucchitānaṃ kesādīnaṃ āyoti kāyo. Assāsa passāsānaṃvā samūho kāyo”ti vuttaṃ. Taṃ na sundara meva.

[216] Yañca **tattha**

“Kāyassa anupassanā kāyānupassanā”ti vuttaṃ. Taṃpi na sundaraṃ.

Kāye kāyānupassī viharatīti hi vuttaṃ. Etena hi kāye anupassanā kāyānupassanāti ayamatthova padhānato dassitoti.

[217] Yañca **tattha**

“Vedanānaṃ vasena anupassanā”ti vuttaṃ. Taṃpi na sundaraṃ. Vedanāsu vedanānupassīti hi vuttaṃ. Tathā cittānupassanā padepi.

[218] Yaṃpi **tattha**

“Saññāsāṅkhārānaṃ dhammānaṃ bhinnalakkhaṇānameva anupassanā dhammānupassanā”ti vuttaṃ. Taṃpi na sundarameva.

Na hi katthaci pāḷiyaṃ saññāsāṅkhārāva visesetvā dhammāti vuttā atthīti. Pāḷiyañhi chanīvaraṇā pathamaṃ dhammāti vuttā. Tato pañcupādānakkhandhā. Tato dvādasāyatanāni. Tato sattabojjhaṅgā. Tato cattāri saccānīti. Yadi evaṃ ekāya dhammānupassanāya vuttāya itarāpi siddhāti satipaṭṭhānaṃ ekameva vattabbaṃ, na cattāroti. Na. Yo hi dhammānupassanāyaṃ rūpakkhandho vutto. So ruppanalakkhaṇānupassanavasena vutto. Ruppanalakkhaṇāñhi nibbattitapara matthadhammo. Soca tathā anupassantassa visesato sukhumassa attavipallāsassa pahānāya hotīti. Kāyoti pana taṃtaṃ

samūhabhūtarūpadhammasavasena veditabbo. Naruppanalakkhaṇavasena. Naca taṃtaṃ kāyabhāvena gahito taṃtaṃ rūpadhammasamūho nibbattita paramatthadhammonāma hoti. Paññattimissakattā. Soca tathā anupassantassa visesato oḷārikassa subhādi vipallāsassa pahānāya hotīti. Tathā vedanācittesupi oḷārikavipallāso sukhumavipallāsoti dve dve vipallāsā honti. Tattha attupanibandhā nīccasukha vipallāsā oḷārikā. Attavipallāso sukhumo. Tattha vedanā citta nupassanā oḷārikavipallāsānaṃ pahānāya visum vuttā. Dhammesu vedanākkhandhaviññānakkhandhā sukhuma vipallāsa pahānāyāti. Tasmā cattārova satipaṭṭhānā vattabbāti. Sammā padahanti etehīti **sammappadhānāni**. Kāmaṃ tacoca nhāruca, aṭṭhica avasissatu. Upassussatu me sarīre maṃsalohitaṃ. Yantaṃ purisathāmena purisaparakkamena pattabbaṃ. Na taṃ apatvā vīriyassa saṅghānaṃ bhavissatīti evaṃ anivattanavutti vasena pavattassa sammāvāyāmassa etaṃ nāmaṃ. So pana tathā pavatto ekopi samāno kiccassiddhivasena catudhā hotīti. Vuttaṃ **uppannānantiādi**.

Tattha **uppannānaṃpāpakānanti** asukasmim kāle dese ṭhāne vā ahaṃ idañcidañca nāma pāpaṃ akāsim, idañcidañcanāma mayhaṃ uppannanti evaṃ attano santāne uppannabhāvena viditānaṃ akusalānaṃ. **Pahānāyāti** tesam attano santāne ajjatagge yāvapariniḥḥānāpuna anuppādadhmatāpādanakaraṇatthaṃ. **Vāyāmoti** sīla pūraṇa samatha vipassanābhāvanākkammesu daḷhaṃ vāyāmo. **Anuppannānanti** attano santāne uppannapubbanti aviditānaṃ parasantānesuvā suttantesuvā disvāvā sutvāvā viditānaṃ. **Anuppādāyāti** yesam akusala mūlānaṃ atthitāya imesaṃ sattānaṃ idisāni kilesajātāni vā pāpakammānivā uppajjanti. Tāni mayi vijjantīeva. Ahaṃpi tehi kilesehivā kammehivā aparimuttōyeva. Ahaṃpi ssevā parasuvevā bhavantaresuvā tāni attano santāne uppādessā miyevāti evaṃ paccavekkhitvā tesam akusalāmūlānaṃ attano santāne uppattiyā paccayasamucchindanattaṃ. **Anuppannānaṃkusalānanti** catubhūmakesu kusalahammesu sattavisuddhipabhedesu imenāma visuddhidhammā mayā appattā anadhigatāeva hotīti evaṃ ñatvā samaye anatikkanteeva appattānaṃ anadhigatānaṃ upari visuddhidhammānaṃ adhigamanatthāya.

Uppannānaṃ kusalānaṃ bhiiyo bhāvāyāti yāni sīlādīni kusalāni mayi uppannāni. Tāni yāva niyāmaṃ naokkamanti, tāva mayhaṃ etānīti vattaṃ nārahanti. Ssevā parasuvevā bhavantaṃ patvāvā bhijjissanti yevāti evaṃ paccavekkhitvā attano santāne uppannānaṃ tesam sabbaso akuppadhmatāpādanavasena suṭṭhutaṃ vaḍḍhanatthāya. Etesu pana catūsu mukhesu yena kenaci ekena mukhena uppanno vāyāmo catukiccasādhakoeva hotīti veditabbo. Aṭṭhakathāyaṃ pana maggakkhaṇe eva ekassa tassa catukiccasādhakatā vuttāti.

Ijjanānaṃ iddhi, tassa tassa yogakammasa siddhi samiddhi nibbattīti attho. Sā pana saṅkhepato abhiññeyyānaṃ dhammānaṃ abhiññāsiddhi, pariññeyyānaṃ pariññāsiddhi, pahātabbānaṃ pahānasiddhi, sacchikā tabbānaṃ sacchikaraṇasiddhi, bhāvetabbānaṃ bhāvanāsiddhīti pañcavidhā hoti. Ijhatītivā iddhi satthusāsane yogakammānaṃ sabbesaṃ mahaggata lokuttaradhammānaṃ nāmaṃ. Pajjati etenāti pādo. Iddhiyā pādoti **iddhipādo**. Iddhipattiyā balavupāyo padhānakaraṇanti vuttaṃ hoti. So pana catunnaṃ adhipatidhammānaṃ vasena catudhā hotīti vuttaṃ **cattāro iddhipādātiādi**. Adhipatibhūto chandova iddhipādoti **chandiddhipādo**. Esanayo sesesupīti. Etthaca sabbe mahaggatānuttarabhūtā uttarimanussa dhammānāma napākatikena chandenavā vīriyenavā cittenavā paññāya vā adhigantabbā honti. Yena kenaci palibodhena paṭibāhituṃ asakkuṇeyyena adhipatibhāvapattena chandādināeva adhigantabbā. Tasmā ime cattāro dhammā adhipatibhūtāva idha adhippetāti daṭṭhabbāti.

[219] Yaṃpana **vibhāvaniyaṃ**

“Ijhati adhiṭṭhānādikaṃ etāyāti iddhi, iddhividhaññānaṃ. Iddhiyā pādo iddhipādo”ti vuttaṃ. Taṃ saṃyuttake katamāca bhikkhave iddhi. Idha bhikkhave bhikkhu anekavihitaṃ iddhividhaṃ paccanubhoti. Ekopi hutvā bahudhā hoti. La. Yāva brahmalokāpi kāyena vasaṃ vatteti. Ayaṃ vuccati bhikkhave iddhīti imāya pāḷiyā sameti. Evaṃsantepi idha abhidhammapariyāyova adhippetoti taṃ na yujjatiyeva.

Vibhaṅge pana pathamavāre lokiya lokuttaramissakā citta cetasikarāsīeva iddhipādāti vuttā. Aṭṭhakathāyañca-pathamajjhāna parikkammaṃhi iddhipādonāma. Pathamajjhānaṃ iddhiṇāma.La. Nevasaññā nāsaññāyatanajjhānaparikkammaṃ iddhipādonāma. Nevasaññānāsaññā yatanajjhānaṃ iddhiṇāma. Sotāpattimagga vipassanā iddhipādo nāma. Sotāpattimaggo iddhiṇāma.La. Arahattamagga vipassanā iddhipādonāma. Arahattamaggo iddhiṇāmātica. Pathamajjhānaṃ iddhipādonāma. Dutiyajjhānaṃ iddhiṇāma. La. Ākiñcaññāyatanajjhānaṃ iddhi pādonāma. Nevasaññā nāsaññā yatanajjhānaṃ iddhiṇāma. Sotā pattimaggo iddhipādonāma. Sakadāgāmaggo iddhiṇāma.La. Arahattamaggo iddhiṇāmāti ca vuttaṃ. Taṃtaṃ pādakajjhānaṃ iddhipādonāma. Tato tato vuṭṭhahitvā uppāditamaggo iddhiṇāmātipi vuttuṃ vaṭṭatiyeva. Idha pana uttaracūḷabhājaniye āgatanayena cattāro adhipatidhammāeva iddhipādāti vuttā.

Tattha pana lokuttarabhūtāeva adhippetā. Idha lokiya lokuttara missakabhūtāti. Indriyabalāni atthato heṭṭhā vuttāneva. Pākaṭaṭṭhānato pana catūsu sotāpattiyāṅgesu saddhāya thāmo veditabbo. Yathāha-kattha bhikkhave saddhindriyaṃ daṭṭhabbaṃ. Catūsu sotāpattiyāṅgesu ettha saddhindriyaṃ daṭṭhabbanti. Catūsu sammappadhānesu vīriyassa. Yathāha-kattha bhikkhave vīriyindriyaṃ daṭṭhabbaṃ. Catūsu sammappadhānesu ettha vīriyindriyaṃ daṭṭhabbanti. Catūsu satipaṭṭhānesu satiyā. Yathāha-kattha bhikkhavesatindriyaṃ daṭṭhabbaṃ. Catūsu satipaṭṭhānesuettha satindriyaṃ daṭṭhabbanti. Catūsu jhānesu samādhissa. Yathāha-kattha bhikkhave samādhindriyaṃ daṭṭhabbaṃ. Catūsu jhānesu ettha samādhindriyaṃ daṭṭhabbanti. Catūsu ariyasaccesu paññāya thāmo veditabbo. Yathāha-kattha bhikkhave paññindriyaṃ daṭṭhabbaṃ. Catūsu ariyasaccesu ettha paññindriyaṃ daṭṭhabbanti. Sambodhi vuccati catūsu maggesu ñāṇaṃ, samantato bujjhati paṭivijjhati bujjhanti vā etāyāti katvā. Sā hi catusaccadhammaṃ bujjhamānā ekakkhaṇe soḷasahi atthehi saddhiṃ samantato bujjhati, na ekadesa totī tassā sambodhiyā samuṭṭhāpanaṭṭhena sambodhiyā aṅgo sahakāribalavapaccayoti **sambojjhaṅgo**. Satīeva sambojjhaṅgo **satisambojjhaṅgo**. Sā hi kāyādīsu catūsu attano gocaresu bhāvanāvasena suṭṭhasaṃvaḍḍhamānā anupubbena sabbapamāda pakkhaṃ vidhametvā sabbam appamādapakkhañca pūretvā catumaggaññāna saṅkhātāṃ sambodhiṃ samuṭṭhāpetīti. Vipassanāya bhūmibhūte ajjhata bahiddhādhamme vicināti kakkhaḷattaphusanādīhi aniccātādīhica vividhā kārehi cuṇṇavicuṇṇaṃ kurumānoviya tesu daṭṭhabbākāraṃ asesam upadhāretīti dhammavicayo. Soeva sambojjhaṅgoti **dhammavicaya sambojjhaṅgo**. Sopi hi attano gocarabhūtesu tesu dhammesu bhāvanāvasena suṭṭhasaṃvaḍḍhamāno anupubbena sabbasammoha pakkhaṃ vidhametvā sabbam asammohapakkhaṃ pūretvā sayam catumaggaññāna sambodhi hutvā samuṭṭhahatīti. Sammappadhānavīriyameva sambojjhaṅgoti **vīriyasambojjhaṅgo**. Tampī hi catubbidhesu attano gocaresu bhāvanāvasena suṭṭhu saṃvaḍḍhamānaṃ anupubbena sabbam kusalesu dhammesu līnasaṅkoca kosajjapakkhaṃ kilesajātaṃ vidhametvā sabbam dhurasamṃpagghapakkhaṃ pūretvā vuttappakāraṃ sambodhiṃ samuṭṭhā petīti.

Pītiyeva sambojjhaṅgo **pīti sambojjhaṅgo**. Sāpi hi vuttappakāresu gocaresu suṭṭhu saṃvaḍḍhamānā kusalesu dhammesu sabbam cittassa aratiukkaṇṭhapakkhaṃ vidhametvā sabbam dhammarati dhammanandidhammārāma pakkhaṃ pūretvā vuttappakāraṃ sambodhiṃ samuṭṭhāpeti. Passaddhīeva sambojjhaṅgo **passaddhi sambojjhaṅgo**. Sāpi hi vuttappakāresu gocaresu bhāvanāvasena suṭṭhu saṃvaḍḍhamānā sabbam cittassa sārāmbha darathapakkhaṃ vidhametvā sabbam vūpasantasītalapakkhaṃ pūretvā vuttappakāraṃ sambodhiṃ samuṭṭhāpeti. Samādhīeva sambojjhaṅgoti **samādhī sambojjhaṅgo**. Tassa sambodhisamuṭṭhāpanatā pākaṭā. Tatra majjhataṭṭhā saṅkhātā upekkhāeva sambojjhaṅgoti **upekkhā sambojjhaṅgo**. Sāpihi vuttappakāresu satiādīnaṃ gocaresu bhāvanāvasena suṭṭhu saṃvaḍḍhamānā sabbam cittassa līnuddhaccapakkhaṃ vidhametvā samavāhitapakkhaṃ pūretvā vuttappakāraṃ sambodhiṃ samuṭṭhāpetīti. Sammā aviparītato dassanaṃ **sammādiṭṭhi**. Sā pana dukkhe ñāṇaṃ, dukkhasamudaye ñāṇaṃ, dukkhanirodhe ñāṇaṃ, dukkhanīro dhagāminipaṭipadāya ñāṇanti catubbidhā hoti. Sammā aviparītato saṃkappanaṃ **sammāsaṅkappo**. Yathā sammādiṭṭhi daṭṭhabbasabhāvesu pharamānā pavattati tathā tassā saṃvidhānanti attho. Teneva hi so paññākkhandhe saṅgahitoti. Yathāha-yācāvuso visākha sammādiṭṭhi, yoca sammāsaṅkappo, ime dhammā paññākkhandhe saṅgahitāti. **Sammāvācā** dayo pubbe vuttatthāyeva. Sammā vāyamanti ekenāti **sammāvāyāmo**. Catukiccasādhakaṃ sammappadhāna vīriyaṃ. Passaddhidvayaṃ passaddhisāmañña

ekaṃ katvā **cuddasete sabhāvatoti** vuttaṃ. **Sattadhāti** vuttappakārānaṃ satipaṭṭhānacatukka sammappadhānacatukkādīnaṃ vasena sattadhā. Idāni tesam cuddasannaṃ kiccānaṃ ṭhānabhedam dassetuṃ **saṅkappapassaddhicāti**ādīmāha.

[220] Yampana **vibhāvaniyam**

“Sattadhā tattha saṅgahoti vatvā puna taṃ dassetuṃ saṅkappapassaddhicātiādīmāhā”ti vuttaṃ. Taṃ na yujjati.

Na hi tattha satta sarūpaṃ labbhatīti. Saṅkappo viratittayañca ekaṃ maggaṅgaṭṭhānaṃ pāpuṇāti. Passaddhica pītica upekkhāca ekaṃ bojjhaṅgaṭṭhānaṃ. Chandoca cittañca ekaṃ iddhipādaṭṭhānanti evaṃ navadhammā ekaṭṭhānikā honti. Ekaṃ vīriyaṃ catusammappadhāna iddhi pādindriya balabojjhaṅga maggaṅga vasena navaṭṭhānikaṃ. Ekā sati catusatipaṭṭhāna indriya bala bojjhaṅga maggaṅga vasena aṭṭhaṭṭhānikā. Eko samādhi indriya bala bojjhaṅga maggaṅga vasena catuṭṭhāniko. Ekāpaññā iddhipādindriya bala bojjhaṅga maggaṅga vasena pañcaṭṭhānikā. Ekā saddhā indriya bala vasena duṭṭhānikāti. Te pana sattatimsa pabhedā dhammā pubbabhāge nānārammaṇā nānākhaṇikāca honti. Maggaphalesu pana navaṭṭhānikaṃ vīriyaṃ ekameva nibbānaṃ ārammaṇaṃkatvā navasuṭṭhānesu atta paṭipakkhānaṃ pāpa dhammānaṃ paccaya yamuggahātavasena nava kiccāni sādhayamaṇaṃ ekameva pavattati. Esa nayo aṭṭhaṭṭhānikādīsu. Tasmā te ekakkhaṇe ekacitte sabbe ekato upalabbhantīti vuttaṃ **sabbe lokuttare hontīti**. **Navāsaṅkappa pītiyoti** ettha vāsaddo kvaci saddattho. Saṅkappo kvaci dutiyajjhānikā dīkēpītica kvaci catutthajjhānikādīke lokuttare nahontīti attho.

Lokiyepīti sīlavisoḍhanādivasena pavatte kāmā vacarakusalādīke lokiyakusala kriyacittuppādepi. **Yathā yoganti** sīlavisoḍhanakamma samathakammanāmarūpapariggahādīkammesu yujjitabbānaṃ viratittayādīnaṃ anurūpaṃ. **Chabbisuddhipavattiyanti** sīla visuddhādīnaṃ channaṃ visuddhīnaṃ anukkamena pavattikāle. Etena diṭṭheva dhamme maggaphalapatiṭṭhābhāvattāya pūrite catupārisuddhi sīlepi saddhāsatiādayo bodhipakkhiyesu saṅgahitā eva honti. Tathā maggapādakattāya uppādītesu mahagatajjhānesu mīti dasseti. Tathā hi bojjhaṅgasamuyuttake –

Evaṃ bhāvito kho kuṇḍaliya indriyaṣaṃvaro tīṇi sucaritāni paripūreti. Evaṃ bhāvitāni tīṇi sucaritāni cattāro satipaṭṭhāne paripūrenti. Evaṃ bhāvitā cattāro satipaṭṭhānā satta bojjhaṅge paripūrenti. Evaṃ bhāvitā satta bojjhaṅge vijjāvimuttiyo paripūrentīti vuttaṃ.

Aṭṭhakathāyampi nakevalaṃ balavavipassanā maggaphalesueva bojjhaṅge uddharanti. Vipassanāpādaka kaṣiṇajjhāna ānāpāṇā suka brahmavīhārajjhānesupi uddharantīti vuttaṃ. [Bodhipakkhiyaṣaṅgaho]

165. Sabbasaṅgahe **pañcakkhandhāti** pañca rāsayo. Atītādī bheda bhinnānaṃ rūpānaṃ khandho rāsīti **rūpakkhandho**. Ekasmīṃ ruppana lakkhaṇe rāsīṃ katvā ñāṇena pariggahitā rūpadhammāeva. Tathā ekasmīṃ vedayitalakkhaṇe sañjānana lakkhaṇe rāsīṃ katvā pariggahitā atītādībheda bhinnā vedanāsaññāyo **vedanākkhandho saññākkhandho** canāma. Saṅkharontīti saṅkhārā. Phassa cetanā dayo. Tehi chasuvā upapattidvāresu tīsu vā kammadvāresu ekato saṅgamma samāgamma phusanacetayitādīhi attano attano kiccehi dassanasavanādīni sādharāṇakiccānivā kāyika vācasikamānasikānivā sayana nisajjaṭṭhāna gamana kathana cintanādīni sabbāni kiccāni karonti vidahantīti. Vuttañhetam samuyuttake –

Kiñca bhikkhave saṅkhāre vadetha. Saṅkhatam abhisāṅkharontīti kho bhikkhave tasmā saṅkhārāti vuccanti. Kiñca saṅkhatam abhi saṅkharonti, rūpaṃ rūpatthāya saṅkhatam abhisāṅkharonti. Vedanaṃ vedanattāya saṅkhatam abhisāṅkharonti. Saññaṃ saññattāya saṅkhata abhisāṅkharonti. Saṅkhāre saṅkhāratthāya saṅkhata mabhisāṅkharonti. Viññāṇam viññāṇattāya saṅkhata mabhi saṅkharontīti. Saṅkhata mabhisāṅkharontīti kho bhikkhave tasmā

sāṅkhārāti vuccantīti.

Tattha rūpaṃ rūpatthāya sāṅkhatamabhisāṅkharontīti yasmim̐ yasmim̐ kāle sayana nisajjādivasena pavattā yā yā rūpavīkati icchīyati, tasmim̐tasmim̐ kāle tassā tassā rūpavīkatiyā jātatthāya iriyāpatha parivattanādi vasena taṃ taṃ rūpavīkatim̐ sāṅkhatam̐ abhisāṅkharontīti attho. Khajjabhojjādikam̐ vatthālaṅkāradīkam̐ mañca pīṭha geha rathādīkam̐ sabbaṃ upabhoga paribhogabhūtam̐ bāhira rūpampi gahetvā yojetuṃ vaṭṭatiyeva. Vedananti diṭṭhadhammīkam̐ samparāyikañca sabbampi vedanaṃ. Tattha diṭṭhadhammīkam̐ vedanaṃ sāṅkhatam̐ abhisāṅkharontā cittakammanaccagītādīni taṃ taṃ vedanupakaraṇāni sampādana vasena samparāyikañca abhisāṅkharontā mānusakamvā dibbamvā taṃtaṃ vedanaṃ patthetvā dāna sīlādi sampādana vasena abhisāṅkharonti. Esanayo sesesupi. Sāṅkhāresu pana phassaṃ phassatthāya cetanaṃ cetanatthāyātīdinā dānaṃ dānatthāya sīlaṃ sīlatthāya pāṇātipātamaṃ pāṇātipātattāyātīdinā vā sabbaṃ lokapavattim̐ ñatvā vitthāretabbāti. Ettha siyā, kasmā sāṅkhāresu pākāṭa cetanādayo vitakkādayo lobhādayo saddhāsatipaññādayoca dhamme viṣuṃ viṣuṃ khandhabhāvena avatvā vedanāsaññāva vuttāti. Vuccate.

Yathā hi cheko mahābhisakko bhesajjamūlāni gahetvā cuṇṇaṃ karonto tesu mūlesu imāni thūlānīpi mudūni honti. Imāni khuddakānīpi kakkhaḷāni hontīti ñatvā tato pathamataraṃ kakkhaḷāni viṣuṃ uddharitvā suṭṭhu koṭṭetvā cuṇṇaṃ karoti. Sesāni pana sabbāni mudūni ekato katvā koṭṭetvā cuṇṇaṃ karoti. Tato ubhayāni missetvā silāyaṃ pisetvā bhesajjakamme upaneti. Evaṃ karonto nakilamati. Evamevaṃ bhagavāpi nāmarūpadhammesu tilakkhaṇaṃ āropetvā nīccasukhaatta vipallāsānaṃ pahānatthāya anuyūñjantā devamanussā vibhāge akate tīsu dhammesu kilamissantīti ñatvā nāmadhammesu vedanāsaññācittasāṅkhāte tayo dhamme viṣuṃ uddharitvā ekamekaṃ khandhaṃ nāma katvā desesi. Tathā hi yathā macchānāma udake sati ukkaṅṭhitā nāma natthi. Asati pana ekantena ukkaṅṭhitāyeva honti. Yathāvā madhukarāvā bhamaṃrāvā yasmim̐ vane puppharasa phalarase labhanti, tattha ukkaṅṭhitānāma natthi. Alabhamānā pana ekantena ukkaṅṭhitāyeva honti. Evameva imesaṃ sattānaṃ sukha saññātesu patisaraṇesu vedanāsadisaṃ patisaraṇaṃnāma natthi. Manussadevabrahmasampattiyo assādentāpi sukhavedanatthāyaeva assādentī. Yadica tāhi vinā yathicchitaṃ sukhavedanaṃ labheyyuṃ. Konāma tā sādīyissati. Tathā phassacetanādīhi vitakkavicāravīriyādīhi lobhadosaḍḍīhi saddhāsatipaññādīhi ca sāṅkhārakkhandhadhammehi diṭṭhadhammīkam̐ samparāyikañca yaṃkiñci sāṅkhatam̐ abhisāṅkharontāpi sukhavedanatthāyaeva abhisāṅkharonti. Yadica tādisena abhisāṅkharāṇena vināpi yathicchitaṃ sukhaṃ labheyyuṃ, tehi dhammehi attho natthīti konāma te dhamme abhisāṅkharissatīti.

Iti sukhasaññātesu dhammesu vedanānāma imesaṃ sattānaṃ paramukkaṃsagataṃ sukhasaññātaṭṭhānaṃ hoti. Tasmā bhagavā taṃ viṣuṃ ekaṃ khandhaṃ katvā khandhadesanaṃ desetīti. Tathā imesaṃ sattānaṃ attasaññātesu patisaraṇesu saññāsadisaṃ patisaraṇaṃ nāma natthi. Tathā hi tasmim̐ tasmim̐ sattanīkāye uppannā te te sattā attāno attano visayesu sabbaṃ jānitabbaṃ saññāya saññānitvā viññuttaṃ āpajjanti. Tathā viññuttaṃ āpajjantā yattakaṃ pare jānanti. Tattakaṃ mayampi jānāma. Ko amhākaṃ uttaritaroti evaṃ loke ñāṇasammabhaṃ saññāṃ paramaṃ attānaṃ katvā vicaranti. Iti attasaññātesu dhammesu saññānāma imesaṃ sattānaṃ paramukkaṃ sagataṃ attasaññātaṭṭhānaṃ hoti. Tasmā bhagavātaṃpi viṣuṃ ekaṃ khandhaṃ katvā khandhadesanaṃ desetīti. Tathā imesaṃ sattānaṃ nīccasaññātesu patisaraṇesu cīttasadisāṃ patisaṃraṇaṃ nāma natthi. Tathā hi sattā sukhaṃ dukkhaṃnāma anīccaṃ sukhapattānaṃ dukkhaṃ natthi. Dukkha pattānaṃ sukhaṃ natthītivā. Saññānāma anīccā, kadāci pamussati kadāci napamussatītivā. Vīriyaṃnāma anīccaṃ. Kadāci ārabhati, kadāci na ārabhatītivā. Lobhānāma anīcco. Kadāci uppajjati, kadāci nauppajjatītivā. Dosaṃnāma anīcco. Kadāci uppajjati, kadāci na uppajjatītivā. Saddhānāma anīccā. Kadāci pasannacitto hoti, kadāci appasannacitto hotītivā. Paññānāma anīccā. Jānitabbaṃpi kadāci jānāti, kadāci na jānātītivā evaṃ cetasīkadhammānaṃ anīcca bhāvonāma kesañci lokiyajānānaṃpi pākāṭo hoti. Na pana cīttassa. Na hi sattā cīttamaṃnāma anīccaṃ. Kadāci uppajjati, kadāci na uppajjatīti gaṇhanti. Taṃ pana sayamaṃ nīccaṃ pavattamānaṃ hutvā kadāci sukkena yuttaṃ hoti, kadāci dukkhenātīdinā tasmim̐ nīccasaññāmeva uppādentīti. Iti cīttamaṃnāma nīccasaññātesu dhammesu paramukkaṃ sagataṃ nīccasaññātaṭṭhānaṃ hoti.

Tasmā bhagavā tampi visuṃ ekaṃ khandhaṃ katvā kandhadesanaṃ desetīti.

[221] Yaṃpana **vibhāvanīyaṃ**

“Bhājana bhojana byañjana bhakkāraka bhuñjaka vikappavasena pañceva vuttā”ti vatvā taṃ vibhāvanta “rūpañhi vedanā nissayattā bhājanaṭṭhāniyaṃ. Vedanā bhuñjittabbattā bhojanaṭṭhāniyā. Saññā vedanassāda lābha hetuttā byañjanaṭṭhāniyā. Saṅkhārā abhisāṅkharāṇato bhakkārakaṭṭhāniyā. Viññāṇaṃ upabhuñjakattā bhuñjakaṭṭhāniyaṃ. Ettāvatāca adhippe tatthasiddhīti pañceva vuttā”ti vuttaṃ. Taṃ sārato nadaṭṭhabbaṃ.

Na hi taṃ aṭṭhakathāyaṃ etapparamavinicchaye āgataṃ. Upamādīpaneva āgataṃ. Na ca bhagavatā bhājanādivikappasiddhimattaṃ uddissa pañceva kandhā vuttāti sakkā vattum. Tathāsiddhassa atthassa payoṇābhāvato.

[222] Yañca **tattha**

“Desanākkamepi idameva kāraṇaṃ. Yattha bhuñjati, yañca bhuñjati, yenaca bhuñjati, yoca bhojako, yoca bhuñjiti. Tesam anukkamena dassetukāmatā”ti vuttaṃ. Tampi asāraṃ.

Catunnaṃ upādānaṃ visayabhūtā kandhā upādānakhandhā. Sabba sabhāgadhamma pariādānavasena sāsavā anāsavāca dhammā pañcakkandhāti vuttā, vipassanā bhūmipariggahavasena sāsavāeva **pañcupādānakhandhāti** vuttā. Āyatanti attano phaluppattiyā bhusaṃ ussahantā viya hontīti **āyatanāni**. Āyatanasaddo pana chasu ajjhattikesu dvāradhammesu pavattamāno sañjātidessaṭṭhena nivāsaṭṭhānaṭṭhena ākaraṭṭhena, chasu bāhiresu ārammaṇadhammesu pavattamāno samosaraṇaṭṭhena, ubhayatthapi kāraṇaṭṭhena pavattati. Tattha citta cetasikā dhammā ekasmimvā bhava anamataggevā saṃsāre punappunaṃ saha jāyamānā cakkhādīsu chasu dvārapadesesueva jāyanti, na aññattha. Santānānubandhavasena nivasantāpi tesveva nivasanti, na aññattha. Ākiritvā thapitā viya pavattamānāpi tesveva pavattanti, na aññattha. Tasmā cakkhādīni chasañjātidessaṭṭhena nivāsaṭṭhānaṭṭhena ākaraṭṭhenaca āyatanānīnāma. Devāyatanam viya adhiṭṭhānaṭṭhenātipi vattum vaṭṭatiyeva.

Yathāca sampannapupphalesu khemesu rukkhesu tato tato pakkhino nilinatthāya āhāratthāyaca niccaṃ samosaranti. Evaṃ rūpādīsu chasuṭhānesu tato tato cittacetāsikā dhammā ārammaṇakaraṇatthāya niccaṃ samosaranti. Tasmā rūpādīni cha samosaraṇaṭṭhena āyatanānīnāma. Tadubhayāni pana tesam citta cetasikānaṃ kāraṇaṭṭhena āyatanānīnāma. Cakkhuca taṃ āyatanañcāti **cakkhāyatanam**. Evaṃ sesāni. Tattha cakkhusotāni sattānaṃ hitakriyāsu bahupakārattā kāmarūpa byāpitattā ca pākāṇānītiādimhi vuttāni. Tehi āsannattā tadanantaraṃ ghānaṃ. Tato jivhāti imāni cattāri padesaṃyatanānīnāma. Tato sakalākāyabyāpako kāyo. Tato tesam sabbesaṃ gocaravisayagghākaṃ manoti. Sesāni pana tesam visayattā tadanukkameneva vuttānīti.

Kassaci pana puggalassavā sattassavā manussassavā devassavā brahmunovā vasa avattitvā attanoeva sabhāvaṃ dhārentīti **dhātuyo**. Visuṃ visuṃ vavatthitasabhāvattāvā yathāsabhāvaṃ dhārīyanti sallakkhīyanti vavatthapīyanti dhātuyo. Apica, nissatta nijjivāṭṭhena dhātuyo. Tattha nissattaṭṭhenāti sattākāro bhāvaṭṭhena sattakiccābhāvaṭṭhena. Ko panettha sattākāro kiṃ sattakiccanti. Jīvayogo sattākāro. Īhāca byāpāro ca sattakiccaṃ. Nijjivāṭṭhenāti ekasmim bhava yāva namarati. Bhavaparamparāyavā yāva saṃsāro na nivattati. Tāva abhijjāmāno acchijjāmāno ekova vattatīti evaṃ gahitassa jīvassa abhāvaṭṭhena. Cakkhādayoca dhammā sabbaso sattākārarahitā satta kiccarahitāca honti. Naca sayam jīvānāma honti. Nāpi jīvayogāti. Iti nissattaṭṭhena nijjivāṭṭhenacathedātuyonāmāti. Tesam pana daṭṭhabbākāro aṭṭhakathāyaṃ vutto. Yathāha-bheritalaṃ viya cakkhudhātu daṭṭhabbā. Daṇḍo viya rūpadhātu. Saddoviya cakkhuvīññādhātu. Tathā ādāsatalaṃ viya cakkhudhātu. Mukhaṃ viya rūpadhātu. Mukhanimittaṃ viya cakkhuvīññādhātu. Athavā, ucchuyanta kilayantaṃ viya cakkhudhātu. Yantacakkayaṭṭhi viya rūpadhātu. Uccurasa telāni viya cakkhuvīññādhātu. Tathā

adharāraṇi viya cakkhudhātu. Uttarāraṇi viya rūpadhātu. Aggi viya cakkhuviññādhātu. Esanayo sotaviññādhātuādīsu. Manodhātu pana yathāsambhavato cakkhuviññādhātuādīnaṃ purecarānucarā viya daṭṭhabbā.

Dhammadhātuyā vedanākkhandho sallamiva sūlamivaca daṭṭhabbo. Saññā saṅkhārakkhandhā vedanāsalla sūlayogā āturā viya daṭṭhabbā. Puthujjanānaṃvā saññā āsā dukkhajananato rittamuttī viya ayathābhuccanimittagāhato vanamigoviya. Saṅkhārā paṭisandhiyaṃ pakkhipanato aṅgārakāsuyaṃ khipanapurisā viya. Jātidukkhānubandhato rājapurisānubandhacoro viya. Sabbānatthāvahassa khandhasantānassa hetuto visarukkhabījāni viya. Rūpaṃ nānāvidhupaddavanimittato khura cakkamviya daṭṭhabbā. Asaṅkhatāpidhātu amatato santato khemato ca daṭṭhabbā. Kasmā, sabbānatthapaṭipakkhabhūtattā. Manoviññādhātu gahitārammaṇaṃ muñcitvāpi aññaṃ gahetvā pavattanato vanamakkato viya, duddamanato assakhaluṅgo viya, yattha kāmanipātito vehāsaṃ khittadaṇḍo viya, lobhadosaḍi nānāppakāra kilesayogato raṅganaḍo viya daṭṭhabbā. **Ariyasaccānī**ti ettha santassa dhammassa bhāvo saccam. Santassāti bhūtassa tathassa aviparītassa. Apica, kenatthena saccanti. Tathatthena avitathatthena anaññathatthena. Yañhi cakkhussa dukkhataṃ, taṃ tathaṃ hoti avitathaṃ anaññathaṃ. Dukkhadukkha saṅkhāradukkha vipariṇāmadukkha saṅkhātehi tīhi dukkhehi taṃ samaṅgipuggalassa abhiñhapīlanato. Tattha saṅkhāradukkhaṃ nāma kammajānaṃ uppattiyā pageva taṃtaṃkammā bhisaṅkharaṇadukkhaṃ. Tathā utujādīnaṃ uppattiyā pageva taṃtaṃ utucittāhāraṇaṃ abhisaṅkharaṇadukkhaṃ.

Cakkhu hi nāma rūpibrahmānaṃpi purimabhava jhānabhāvanā saṅkhātaṃ mahantaṃ kammābhisaṅkharaṇa dukkhaṃ anubhavantānaṃyeva uppajjati. No aññathā. Kāmasattānaṃ pana purimabhava kammaṅsaṅkhāradukkhaṃ anubhavitvā uppannaṃpi yāvajīvaṃ pavattiyā āhārādisaṅkhāradukkhaṇca paṭijaggana dukkhaṇca anubhavantānaññeva pavattati, no aññathā. Pavattamānaṇca paccayavekallevā jāte antarāyevā āgate yadākadāci bhijjati. Maraṇakālaṃ patvā pana ekantena bhijjatiyeva. Tasmā taṃ assādetvā tadatthāya kammaṃvā āhārādipaccayaṃvā paṭijagganaṃ vā saṅkharontānaṃ anamatagge saṃsāre saṅkhāradukkhasa pariyaṇtonāma natthi. Iti sabbam cakkhu apariyanta saṅkhāradukkheṇa puggalaṃ abhiñhaṃ pīletiyeva. Idamassa saṅkhāradukkhaṃ. Idam cakkhu nāma paccayavekallevā jāte antarāyevā āgate yadā kadāci bhijjanajātikaṃ. Tasmā tassa bhijjanabhayena pageva paccaya sampādanadukkhaṃ rakkhāvaraṇaguttisaṃvidhānadukkhaṃ bhijjananimittāni disvā vā bhijjamānevā bhinnevā socanaparidevanādidukkhaṇca vipariṇāma dukkhaṃnāma. Iti sabbam cakkhu apariyanta vipariṇāmadukkheṇa puggalaṃ abhiñhaṃ pīletiyeva. Idamassa vipariṇāmadukkhaṃ. Dukkhadukkhaṃ pana tadubhayena dukkheṇa saheva sijjhati. Evaṃ cakkhu dukkhadukkha saṅkhāra dukkha vipariṇāma dukkhasaṅkhātehi tīhi dukkhehi taṃ samaṅgipuggalaṃ abhiñhaṃ pīletiyeva. Yaṇca tassa tathāpīlanam, taṃ tathaṃ hoti, avitatham, anaññathaṃ. Tasmā cakkhu dukkhasaccaṃnāma. Esa nayo sotādīsu tebhūmakadhammesu.

Sesasacesupi yaṃ lobhasseva dukkhasamudayattaṃ. Yaṃ nibbānasseva dukkhanirodhattaṃ. Yaṃ aṭṭhaṅgikamaggasseva dukkhanirodhamaggattaṃ taṃ kathaṃ hotītiādīnā vattabbaṃ. Yāvaca lobho na paḥiyyati. Tāva cakkhādīni assādetiyeva. Yāvaca tāni assādeti. Tāva tesam pavattiyā kammādīni saṅkharontiyeva. Yāvaca kammādīni saṅkharonti. Tāva cakkhādīni pavattantiyeva. Yāvaca tāni pavattanti. Tāva tesam vuttappakārehi saṅkhāra dukkhādīhi namuccatiyeva. Tasmā lobhassa dukkhasamudayattaṃ tathaṃ hoti. Cakkhādīsuca pavattamānesu vuttappakāraṃ sabbam dukkhaṃ āgacchatiyeva. Apavattamānesu nāgacchati. Tasmā tesam pavattinirodhabhūtassa nibbānasseva dukkhanirodhattaṃ tathaṃ hoti. Tathā lobhapahānato añño dukkhamuttimaggonaṃ natthi. Aṭṭhaṅgikamaggoca uppajja māno ekantena taṃ pajahati. Tasmā aṭṭhaṅgikamaggasseva dukkhanirodhamaggattaṃ tathaṃ hoti, avitatham, anaññathanti.

Evaṃsantepi saccasaddo pariyāya sacesupi vattatīti vuttaṃ **cattāriariyasaccānī**ti. Tattha dukkhasacce tāva sakkāyapariyā pannā ajjhataḍḍhammāeva ariyasaccaṃnāma. Teyeva hi asmimānassa adhiṭṭhānabhūtā hutvā yāvataṃ mānaṃ na samūhanati. Tāva dukkhakiccaṃ karonti.

Dukkha pariññācanāma yāvadeva asmimānasamugghātāya hoti. Asmimānoca tesveva ajjhata dhammesu nivisatīti tesu pariññātesu pariññākiccaṃ siddhameva hotīti. Tabbiparī tena pana anindriya baddhadhammā maggaphaladhammāca aṭṭhaṅgikavajjā udayabbaya pīlanato saṅkhāradukkha vipariññāmadukkhehica aparimuttattā dukkhasaccaṃ nāma. Samudayasacce eko lobhoyeva ariyasaccaṃnāma. Sohi attasamaṅgino satte attanica ārammaṇadhammesuca assādaṃ janayitvā niccaṃ vaṭṭadukkhatō anukkaṇṭhamāne karotīti tesam lobhasadiso añño ñātivā mittovā sahāyovā attāvā attaniyaṃvā natthiviya khāyati. Tasmā tamsadiso añño koci vaṭṭadukkhasaṃvidhāyakonāma natthi. Tañca pajahitūṃ sakkontassa añño dujjahonāma natthi. Avasesāpana sabbepi sāsavā kusalākusaladhammā samudayasaccaṃnāma.

Ettha siyā, nanu avijjāpi sabbassa vaṭṭadukkhasa mūlabhāvena vuttāti sāpi samudaye ariyasacceeve vattabbāti. Vuccate, yathāhi eko cheko uyyānapālo sampattiyuttaṃ bhūmi bhāgaṃ labhitvā attano ñāṇabalena bhūmibhāgañca nānābījānica abhisankharitvā nandanasadisaṃ uyyānaṃ māpesi. Tattha bhūmi uyyāna pālassa bījānaṃ rukkhānañca patiṭṭhānakiccaṃ sādheti. Bījānica aṅkuruppādanakiccaṃ sādheti, uyyānapāloyeva pana sabbakiccāni sādheti. So hi bhūmiyaṃ bījesu rukkhesuca yaṃyaṃ kattabbaṃ hoti. Taṃ sabbam karoti. Mamevanti pariggaṇhāti rakkhati. Tato uppanne bhoge bhūñjati. Tasmā ko idaṃ māpesi, kassedam uyyānanti vutte uyyānapāloyeva māpesi. Tassedam uyyānaṃ icceva vuccati. Na bhūmiṃ māpesi. Bījāni māpentī. Tesam idaṃ uyyānanti vuccati. Kā pana uyyānasampattiyā paccayaparaṃparāti vutte pana bhūmieva ādito vattabbā. Na uyyānapālo. Naca bījānīti. Evaṃ sampadamidaṃ daṭṭhabbaṃ. Paṭiccasamuppāda nayañhi patvā paccayaparaṃ paravasena dukkha dhammānaṃ pavatti nivattividhāne avijjāeva ādi pabhavapadhānabhūtā hoti, na taṇhā. Saccadesanāyaṃ pana tesam nibbattakadhammavidhāne taṇhāeva sāmijetṭhaka padhānabhūtā hoti. Na avijjāti natthi samudayāriyasaccabhāve avijjāya okāsoti daṭṭhabbo. Kilesānaṃ tadanānirodhāvikkhambhana nirodhā nirodhasaccaṃnāma. Nibbānaṃ nirodhāriyasaccaṃnāma. Chasu lokiyavisuddhīsu maggaṅgāni maggasaccaṃ nāma. Aṭṭhaṅgiko lokuttaramaggoeva maggaariyasaccaṃnāmāti.

Ariyasaddo cettha katthaci kadāci kesañci kutoci kathañci avitathabhāvena uttamattavācakoti. Vibhāvanīyaṃ pana aṭṭhakathāyaṃ vuttanayena saccasaddassa attho vibhāvito **dukkhaṃariya saccanti** ettha pīlanaṭṭho, saṅkhataṭṭho, santāpaṭṭho, vipariññāmaṭṭhoti imehi catūhi atthehi cakkhādikassa ekekassa tebhūmakadhammassa dukkhasaccatā veditabbā. Tattha saṅkhataṭṭha vipariññāmaṭṭhā pubbe saṅkhāra dukkhavipariññāmadukkhesu vuttanayāeva. Padatthatopana paccayehi saṅkharīyatīti saṅkhato. Pageva kammādi paccayābhisankharaṇadukkheṇa vinā na uppajjati, napavattatīti vuttaṃ hoti. Virūpo hutvā pariñāmo vipariñāmo. Parihāniceva paribhedoca. Pīlanaṭṭhoti ettha pīlitabbanti pīlanaṃ. Pīletīti pīlanaṃ. Pīlīyate pīlanaṃ. Atthoti sabhāvo. Pīlanaṃ attho yassāti viggaho. Tattha yathā ekissā duggatitthiyā kucchimhi putto uppajjati. Soca nānārogehi sayam niccaṃ pīlito hutvā paṭijjaganadukkhehi mātarañca niccaṃ pīletiyeva. Yañca tassā kucchimhi tādisassa puttassa uppajjanaṃ, tañca tassā itthiyā pīlanakiccomeva hoti. Evamevaṃ ye cakkhādayo dhammā jarāmarañehi niccaṃ pīlīyanti, te paṭijjaganadukkhehi taṃ samaṅgīnaṃ puggalaṃ niccaṃ pīlentiyeva. Yañca tassa santāne tesam uppajjanaṃ, tañca tassa pīlanakiccomevāti. Yathāhaya bhikkhave cakkhussa uppādo ṭhiti abhinibbatti pātubhāvo. Dukkhaseso uppādo. Rogānaṃ ṭhiti jarāmarañassa pātubhāvo. Yo bhikkhave sotassa ghānassa jivhāya kāyassa manassa uppādotiādi.

Santāpaṭṭhoti rāgaggiādīhi ekādasahi aggīhi bhusam paridayhanaṭṭho. Yathāha –

Cakkhum ādittam. Kena ādittam. Rāgaggiṇā ādittam. Dosaggiṇā. Mohaggiṇā. Jātiyā. Jarāya. Maraṇena. Sokena. Paridevena. Dukkheṇa. Domanassena. Upāyāsena ādittanti vadāmi. Sotaṃ ādittam. Ghānaṃ ādittam. Jivhā ādittā. Kāyo āditto. Mano ādittoti.

Ādipanaṃ santāpanaṃ paridayhananti idha atthato ekanti. Ettha siyā, ariyamaggopi cirakālam pāramitābhisankharaṇadukkheṇa antimabhaveca silādivisuddhibhāvanābhisankharaṇadukkheṇa

puggalaṃ susaṃ piḷetiyeva. Tathā vipariṇāmadhammoca. Tasmā sopi piḷanādiatthena dukkhasaccasaṅgaho siyāti. Na. Sabbadukkhasanti vaṃhattā. So hi vuttappakāraṃ abhisāṅkharāṇadukkhaṃ paripuṇṇaṃ anubhūtaṃ puggalassa sakīṃ uppajjamāno sabbāṃ kilesajātaṃ khepento uppajjati. Nirujjhamānoca sabbāṃ āyatīṃ anamatagge saṃsāre vaṭṭadukkhaṃ vūpasamento nirujjhati. Vūpasantaṃca anāgata dukkhaṃ upādāya vuttappakāraṃ abhisāṅkharāṇadukkhaṃ gaṇanupagaṃ nahoti. Bhijjantoca anuttaraṃ vimuttisukhaṃ datvāva bhijjati. Tasmā tassa vipariṇāmapaccayāpi puggalassa kāci hānināma natthīti na so dukkhasaccasaṅgahoti. Lokiyadhammā pana uppajjamānā pavatta mānāca pubbe vuttapakārehi saṅkhāradukkhehi bhusaṃ piḷetvā eva uppajjanti pavattantica. Nirujjhamānā mahantaṃ pariḷāhadukkhaṃ janetvā apariyante khuracakkasadiṣe vaṭṭadukkhaṃ hayante puggalaṃ yojentāva nirujjhanti. Tasmā teeva piḷanādiatthehi ekantadukkhaṃ hontīti. Etena nibbānassapi sampāpakapaccayābhisāṅkharāṇalesaṃ gahetvā dukkhasaccattapasaṅgo nivattito hotīti.

Dukkhasamudayo ariyasaccanti ettha bhavābhavasāṅkhātāṃ dukkhakkhandhaṃ samudeti. Punappunaṃ abbotchinnaṃ katvā udayati uṭṭhāpeti vaḍḍhetivāti dukkhasamudayo, āyūhanaṭṭho, nidānaṭṭho, saṃyogaṭṭho, palibodhaṭṭhoti catūhi atthehi lobhassa dukkhasamudayatā veditabbā. Tattha āyūhanaṭṭhoti bhavābhava saṅkhātassa ekekasmīṃ bhavepi vatthukāmapaṭisaṃyuttassa dukkhakkhandhassa bhiiyo paribyūhanaṭṭho rāsikaraṇaṭṭho nidānaṭṭhoti tadeva niraṇṭaraṃ katvā anuppadānaṭṭho niyyānaṭṭhoti vuttaṃ hoti. Saṃyogaṭṭhoti dukkhakkhandhasmiṃeva daḷhaṃ bandhanaṭṭho. Palibodhaṭṭhoti tato tassa tassa mucanupāyassa nīvāraṇa vasena palibundhanaṭṭho uparundhanaṭṭhoti attho. **Dukkhanirodho ariyasaccanti** ettha vaṭṭadukkhasa nirujjhanaṃ anuppāda dhammatāpatti vasena khiyyānaṃ dukkhanirodho. Dukkhaṃ vā nirujjhati napavattati etasminti dukkhanirodho. Nissaraṇaṭṭho vivekaṭṭho, asaṅkhataṭṭho, amataṭṭhoti catūhi atthehi nibbānassa dukkhanirodhatā veditabbā. Tattha nissaraṇaṭṭhoti nissaraṇa vimuttiyā vimuccanaṭṭho. Vivekaṭṭhoti vaṭṭadukkhaṃ palibodhato viviccanaṭṭho. Asaṅkhataṭṭhoti saṅkhāradukkhasa abhāvaṭṭho. Amataṭṭhoti maraṇadukkhasa abhāvaṭṭhoti.

Dukkhanirodhagāminipaṭipadāti ettha dukkhanirodhaṃ gameti sampāpetīti dukkhanirodhagāminī. Attano santāne paṭilābhakaraṇa vasena paṭipajjitabbāti paṭipadā. Dukkhanirodhagāminīca sā paṭipadā cāti viggaho. Niyyānaṭṭho, hetvaṭṭho, dassanaṭṭho, adhipateyyaṭṭhoti catūhi atthehi aṭṭhaṅgikamaggassa dukkhanirodhamaggatā veditabbā. Tattha niyyānaṭṭhoti avijjāpaccayā saṅkhārātiādikāṃ vaṭṭasotaṃ paṭinivattetvā avijjānirodhā saṅkhāranirodhotiādikāṃ vaṭṭapaṭisotaṃ abhimukhaṃ niggamanaṭṭho. Hetvaṭṭhoti sabbesaṃ ariyaguṇānaṃ suppatiṭṭhitabhāva sādhanaṭṭho. Dassanaṭṭhoti aññānaadassanasāṅkhātassa sammohassa pahāna vasena catusaccadhammassa paṭivijjhanaṭṭho. Adhipateyyaṭṭhoti taṇhā dāsabyavimuttiyā bhūjissabhāvapattivāsena sayameva attano adhipati hutvā virocanaṭṭho. Lokiyamaggā hi taṇhāya ārammaṇabhāve ṭhitā taṇhādāsabyaṃ nātivattantīti. Etthaca ime sattānāma ekantena dukkhapaṭikūlā honti dukkhabhīrukā. Yeca attani dukkhaṃ janenti. Tesu verisaññaṃ uppādentī. Attano pana ekantadukkhaṃvā ekantadukkhaṃjanakaṃvā te najānanti. Tasmā te attano dukkhamuttiyā yaṃ yaṃ kammaṃ āyūhanti. Taṃ taṃ attano dukkhavaḍḍhiyāeva sampajjati. Kiṃ pana ekantadukkhaṃ, kiṃca ekanta dukkhajanakanti. Atītānāgatapaccuppannabhūta attano attano attahāvapariyāpannā tebhūmakadhammāeva attano attano ekantadukkhanāma. Kasmā, tehi mutteeva sabbadukkhehi mucanato, amutteca amuccanatoti. Attano taṇhāeva attano ekantadukkhaṃjanakaṃnāma. Kasmā, tāya pahīnāyaeva ekanta dukkhehi mucanato, apahīnāyaca amuccanatoti.

Tathā ime sattā ekantena sukhakāmā honti sukhābhinandino. Yeca attani sukhaṃ janenti. Tesu piyamittasaññaṃ uppādentī. Attanopana ekantasukhaṃvā ekantasukhamaggaṃvāte najānanti. Tasmā te attano sukhaṃvaḍḍhiyā yaṃ yaṃ kammaṃ āyūhanti. Taṃ taṃ attano dukkhavaḍḍhiyāeva sampajjati. Kiṃ pana ekantasukhaṃ koca ekanta sukhamaggoti. Ekantadukkhadhammassa abhāvoeva attano ekanta sukhaṃnāma. Ekantadukkhaṃjanakassa pahānamaggoeva attano ekanta sukhamaggonāmāti imamatthaṃ dassento imāni catusaccapadāni kathesīti veditabbāṃ.

[223] Yaṃ pana vibhāvanīyaṃ

“Dukkassa anuppādanirodho ettha etenātivā dukkhanirodho”ti vuttaṃ. Tattha etenāti idaṃ nayujjati.

Na hi nibbānaṃ dukkassa anuppādanirodha kriyāsādhane dukkhena sahaṅgāri kāraṇaṃ hotīti. **Sesacetasiṅgā**ti vedanā saññāhi sesā paññāsa cetasikā. Atītādivasena tividha bhinnānaṃ ajjhattādi oḷārikādi hīnādi dūrādivasena duvidhabhinnānaṅca dhammānaṃ rāsaṭṭhena khandhavohāro hoti. Nibbānaṃ pana tādi so bhedo natthīti vuttaṃ **bhedābhāvenā**tiādi. Tañhi atītādiṅca tividhabhede ekampi na hoti. Kasmā. Aniddisitabba dhammā. Tañhi tekālikadhammānaṃ khayavirāganīrodhabhūto animitta dhammoyeva hoti. Tasmā idaṃ atīte asukabuddhakāle nibbānaṃ. Idaṃ anāgate. Idaṃ etarahīti evaṃ kālabhedena niddisitabbaṃ nahoti. Tathā disā desaṭṭhānabhedena parinibbutapuggalabhedena ca. Kevalaṃ pana anamatagge saṃsāraṅca yattakāni anattha padāni dissanti. Tappaṭipakkhasiddhehi guṇapadehieva taṃ kathe tabbanti. Dukesu pana ajjhattadukaṃ patvā taṃ bahiddhāeva hoti. Na ajjhattaṃ. Oḷārikadukaṃ patvā sukhameva hoti, na oḷārikaṃ. Hīnadukaṃ patvā paṇītameva hoti, na hīnaṃ. Dūre dukaṃ patvā dūreeva hoti, na santiketī. **Khandhasaṅgahanissaṭṭanti** khandhasaṅgahato vimuttaṃ.

Dvārālambaṇabhedenāti dvārachakka ārammaṇachakkānaṃ bhedenā. Āyatanāni dvādasa bhavanti yojanā. Etthaca dvārachakkaṃ dhammārammaṇamevāti sesadhammālambaṇaṃ sandhāya ārammaṇachakkaṃ vuttanti daṭṭhabbaṃ. **Dvārā.La. Pariyāyēnā**ti channaṃ dvārānaṃ channaṃ ālambaṇaṃ tesu dvārālambaṇesu uppannaṃ viññāṇaṅca kamena dhātuyo aṭṭhārasa bhavanti yojanā. Etthapi dvārachakke manodvāraṃ viññāṇekadesameva hoti. Dvārachakkaṃ viññāṇasattakaṅca dhammā lambaṇekadesamevāti. Maggo lokuttaro maggonāma matoti yojanā. Maggayuttā ekūnatimsadhammā phalabhūtaṅca sattatimsa dhammā catusacca vinissaṭṭa catūhi ariyasaccehi vinissaṭṭa vimuttā. Yamettha vattabbaṃ, taṃ heṭṭhā vuttamevāti.

Iti paramatthadīpanīyānāma abhidhammatthasaṅgahassa

Catutthavaṇṇanāya samuccaya saṅgahassa

Paramatthadīpanā niṭṭhitā.

Paccaya saṅgaha paramatthadīpanī

166. Evaṃ sattaḥi paricchedeḥi pathamassa nāmarūpapariccheda ṇāṇassa vidhānaṃ dassetvā idāni dutiyassa paccayapariggahaṇāṇassa vidhānaṃ dassento **yesaṃsaṅkhatadhammānā**tiādi māha. Idāni yesaṃ saṅkhatadhammānaṃ saṅkhatāsaṅkhatabhūta yedhammā yathā yehi hetādīhi paccayākārehi paccayā upakāraṅca honti. Taṃ vibhāgaṃ tesam saṅkhatadhammānaṃ paccayuppannabhūtaṃ vibhāgaṅca tesam paccayadhammānaṃ vibhāgaṅca tesampaccayākāraṅca iha vibhāgaṅca imasmim vuccamāne paccayaṅgahaṅca yathārahaṃ pavakkhāmīti yojanā.

[224] Vibhāvanīyaṃ pana

“Paccaye dassetu”nti vuttaṃ. Taṃ taṃ vibhāganti iminā na sameti.

[225] Yaṅca tattha

“Iha imasmim samuccaya saṅgahānantare ṭhāne”ti iha saddassa atthavibhāvaṃ vuttaṃ. Taṃ na yujjati.

Etasmiñhi atthe sati idāni saddo niratthako hotīti, paṭicca phalaṃ samuppajjati etasmāti paṭiccasamuppādo. Tattha paṭiccāti avinā, amuñcivāti attho. Avijjādiko paccayadhammoti vaṇṇenti. Athavā, samuppajjanaṃ samuppādo. Sahajātadhammehi saheva kalāpavasena abhinibbatti pātubhāvoti attho. Yathāsakaṃ paccayaṃ paṭicca tena avinābhāvīhutvā samuppādo paṭicca samuppādo, atthato pana sabbesaṃ paccayapaccayuppannabhūtānaṃ saṅkhata dhammānaṃ paccayāyattavuttitāsaṅkhātaṃ sabbasaṅkhataśādhāraṇaṃ ekaṃ sāmāññalakkhaṇaṃ. Yaṃ idappaccayatātica vuccati. Tatthaca idappaccaya tāti ayaṃ imassa paccayo ayaṃ imassa paccayoti evaṃ niddisitabbo ayaṃ paccayo etesanti idappaccayā. Saṅkhatadhammā. Idappaccayānaṃ bhāvo idappaccayatā. Yathāvutta sāmāññalakkhaṇaṃ evāti attho veditabbo, na paṭicca phalaṃ samuppajjati etasmāti paṭiccasamuppādo. Avijjādiko paccayadhammotica imesaṃ paccayā idappaccayā. Idappaccayāeva idappaccayatātica. Visuddhimagge pana samuppajjanaṃ samuppādoti ayamatto paṭikkhitto. Pāliyaṃ pana ayameva adhippeto viya dissati. Yathāha –

Katamoca bhikkhave paṭiccasamuppādo. Jātipaccayā bhikkhave jarāmarāṇaṃ, uppādāvā tathāgatānaṃ anuppādāvā tathāgatānaṃ t̥hitāva sā dhātu, dhammaṭṭhitatā dhammaniyāmatā idappaccayatāti.La. Avijjāpaccayā saṅkhārā uppādāvā.La. Idappaccayatā. Iti kho bhikkhave tatra tathatā avitathatā anaññathatā idappaccayatā. Ayaṃ vuccati bhikkhave paṭiccasamuppādoti.

Ettha hi t̥hitāva sā dhātūtiadinā tatra tathatā avitathatātiadināca yathāvuttaṃ idappaccayatā saṅkhātaṃ sāmāñña lakkhaṇameva paṭiccasamuppādonāmāti dasseti. Na cettha bhāvasādhane kate sati paṭiccasaddena saha samuppādasaddassa asamānakattutāsaṅkhāto byañjanayuttivirodho atthi. Yo paṭicca kriyāya kattā, tasseva samuppādakriyāyapi kattutā sambhavato. Na hi kriyānāma katturahitāsambhavatīti. Saṅkhatadhammesuca gambhīresu sati aniccatādilakkhaṇaṃ viya idaṃpi saṅkhatalakkhaṇaṃ gambhīrameva hotīti nayidha gambhīravacanavirodho sambhavati. Athakho saṅkhatadhammato saṅkhatalakkhaṇameva gambhīrataraṃ hotīti. Tādisena pana sāmāññalakkhaṇena sampannā yathāvuttā avijjādayo saṅkhatadhammā paṭiccasamuppānānāma. Yathāha-katameca bhikkhave paṭiccasamuppānādhammā jarāmarāṇaṃ bhikkhave paṭiccasamuppānaṃ.La. Avijjā bhikkhave paṭiccasamuppānāti. Iti sabbesaṃ paccayapaccayuppanna bhūtānaṃ saṅkhatadhammānaṃ paccayā satta vuttitāsaṅkhāto paṭiccasamuppādo ca so nīyati ñāyati paṭivijjhīyatīti katvā nayocāti **paṭiccasamuppādanayo**. Paṭhapeti saṅkhatadhamme nānāpakārehi paccayabhedehi pavatteti deseti etthāti paṭṭhānaṃ. Mahāpakaraṇaṃ. Paṭṭhāne desito nayo **paṭṭhānanayo**.

Tasmiṃ tasmiṃ paccayadhamme bhāve vijjamāne sati te te bhavanti sīlenāti tabbhāvabhāvino. Saṅkhatadhammā. Tesāṃ bhāvo tabbhāvabhāvībhāvo, imasmiṃ sati idaṃ hoti. Imassa uppādā idaṃ uppajjati evaṃ pavatto saṅkhatadhammaniyāmo. Tabbhāvabhāvībhāvovēva ākāro tabbhāvabhāvībhāvākāro. So eva **tabbhāvabhāvībhāvākāramattaṃ**. Mattasaddena hetā dipaccaya sattiniyamaṃ nivatteti. Tena upalakkhito nayo paṭiccasamuppāda nayo. **Āhaccapaccayaṭṭhitim ārabbhāti** ettha hetu ārammaṇā divasena tathātathā upakāratāsaṅkhāto paccayasatti viseso āhaccapaccayaṭṭhitināma. So hi avijjāpaccayā saṅkhārātiādīsu viya paccayadhammuddhāramatte aṭṭhatvā hetupaccayo ārammaṇapaccāhotiadinā paccayasatti visesuddhāravasena āhacca matthakaṃ pāpetvā desitattā āhaccapaccayaṭṭhitīti vuccati. Paccayadhammā tiṭṭhanti attano paccayuppannābhisaṅkharāṇa kiccaṃ patvā anosakkamānā hutvā pavattanti etāyāti katvā. **Ārabbhāti** paṭicca. **Vuccatīti** bhagavatā kathīyati.

Ubhayaṃ pana vomissitvā papañcenti ācariyāti idaṃ paṭicca samuppādaṃ papañcente sandhāya vuttaṃ. Tehi taṃ papañcayantā paṭṭhāna nayampi āharitvā papañcentīti. Yathā sūriyo udayanto andhakāre vidhametvā dabbasambhāre mahājanassa pākāṭe karoti. Evamevaṃ uppannaṃ catusaccaññaṃ avijjandhakāraṃ vidhamitvā catusacca dhammaṃ vidati pākāṭaṃ karotīti vijjā. Tappaṭipakkhattā moho avijjānāma. So hi uppajjamāno dhammesu aññānaadassana saṅkhātaṃ andhakāraṃ janetvāva uppajjati. Paṭicca phalaṃ eti āgacchati etasmā etenāti vā paccayo. Avijjāca sā paccayo cāti **avijjāpaccayo**. Tasmā avijjāpaccayā saṅkhārā sambhavanti sambandho. Saṅkhatam

kāyavacīmanokammaṃ abhisankharonti sattā etehīti **saṅkhārā**. Vijānātīti **viññāṇaṃ**. Vijānanti sattā etenāti vā viññāṇaṃ. Ārammaṇe namatīti **nāmaṃ**. Ruppāti vikāraṃ āpajjatīti **rūpaṃ**. Adhiṭṭhānatṭhena **āyatanam**. Devānaṃ devāyatanamiva. Phusatīti **phasso**. Phusanti sampayuttakā dhammā etenāti vā phasso. Vedayatīti **vedanā**. Vedayanti paccanubhavanti sattā etāyativā vedanā. Tassati paritassatīti **taṇhā**. Niccapipāsavasena ārammaṇahetu niccaṃ cañcalati pattheti vāti attho. Tassanti paritassanti cañcalanti sattā etāyāti vā taṇhā. Upādiyatīti **upādānaṃ**. Amuñcagāhaṃ gaṇhātīti attho. Upādiyanti sattā etenāti vā upādānaṃ.

Bhavati vaḍḍhatīti **bhavo**. Bhavanti jāyanti vaḍḍhanti sukhadukkhāni etenāti vā bhavo. Jananaṃ **jāti**. Jāyanti pātubhavanti saṅkhata dhammā etāyāti vā jāti. Jīraṇaṃ **jarā**. Jīranti jinṇabhāvaṃ gacchanti etāyāti vā jarā. Socanaṃ **soko**. Socanti cittapariḷāhaṃ gacchanti etenāti vā soko. Paridevanaṃ **paridevo**. Taṃ taṃ pavattim parikittetvā devanti kandanti etenāti vā paridevo. Khamituṃ sahituṃ dukkaranti **dukkhaṃ**. Dummanassa virūpacittassa bhāvo **domanassaṃ**. Bhuso āyāsaṃ **upāyāso**. Āyāsananti anassāsaṃ. Visīdananti attho. **Evanti** iminā yathāvuttena. Avijjādi saṅkhārādīpaccayapaccayuppanna paraṃparavidhinā samudayo hotīti sambandho. **Etassakevalassadukkhakkhandhassati** avijjādikassa etassa sakalassa dukkharāsissa kenaci sukkena asaṃmissassa vā dukkharāsissa abhinibbatti hotīti attho. Etthaca duvidho paṭiccasamuppādanayo suttantikanayo abhidhammanayoti. Tattha suttantikanayena tāva avijjā catubbidhā dukkhaṭṭhādīkā samudayaṭṭhādīkā nirodhaṭṭhādīkā maggaṭṭhādīkā aparanta paṭicchādīkā pubbantapaṭicchādīkā aparanta paṭicchādīkā pubbantāparantaṭṭhādīkā paṭiccasamuppādaṭṭhādīkāti catūhi saddhim aṭṭha vidhāti veditabbā.

Saṅkhārā suttantikanayena sāsavā kusalākusalacetanā apuññābhisaṅkhāro puññābhisaṅkhāro āneñjā bhisaṅkhāroti pana tividhā honti. Tattha dvādasa akusalacetanā apuññāti saṅkhāronāma. Kāmarūpa kusalacetanā puññābhisaṅkhāronāma. Arūpakusalacetanā āneñjāti saṅkhāronāma. Abhidhammanayena pana sabbāpi lokiyalokuttarabhūtā kusalākusalacetanā saṅkhārānāma. Kiriyacetanā pana sabbāpi vibhaṅge nagahitā. Aṭṭhakathāyañca kiriyadhammānaṃ pana yasmā neva avijjā na kusalā kusalamūlāni upanissayapaccayattaṃ labhanti. Tasmā kiriyavasena paccayākāro navuttoti vuttaṃ. Avijjāca kusalākusalāmūlā nica kiriyadhammānaṃ upanissaya paccayā na honti. Tasmā kiriyadhammā paṭiccasamuppādadesanāyaṃ nagahitāti vuttaṃ hoti. Saṃyuttepi yato kho bhikkhave bhikkhuno avijjā pahīnā hoti. Vijjāsuppannā. So avijjā virāgā vijjuppadā neva puññābhisaṅkhāraṃ abhisankharoti. Na apuññābhisaṅkhāraṃ. Na āneñjābhisaṅkhāraṃ abhisankharotīti vuttaṃ. Attano anurūpapaccayavasena pana tesampi paṭicca samuppādo avāritoyeva. Nahi koci paṭiccasamuppādarahito saṅkhatadhammonāma atthīti. Esa nayo viññāṇādīsupīti. **Viññāṇanti** bāttimsavidhaṃ lokiyavipākaviññāṇaṃ suttantikanayena. Abhidhammanayena pana kiriyacittavajjitaṃ ekūnasattatividhaṃ lokiyalokuttaraviññāṇaṃ. **Nāmarūpanti** lokiya viññāṇa sahaṅgataṃ vedanādīkhandhattayaṃ paṭisandhiyaṃ kammajarūpaṃ pavattiyaṃ cittaja rūpañca suttantikanayena. Abhidhammanayena pana sabbaṃ kusalākusala vipākasampayuttaṃ khandhattayaṃ vuttappakārarūpañca. Aṭṭhakathāyaṃ pana laddhapacchāṅgataṃ paccayaṃ sabbaṃpi catusamuṭṭhānarūpaṃ gahitameva.

[226] Vibhāvanīyaṃ pana

“Tadubhayampi idha paṭisandhiviññāṇasahagata”nti vuttaṃ. Taṃ anupapannaṃ.

Salāyatananti cha ajjhattikāyatanāni eva sabbattha pāliyaṃ vibhattāni. Ekacce pana ācariyā bāhirāyatanāni phassassa paccayā hontīti katvā tānīpi idha gaṇhanti. Taṃpi nidānavagga pāliyā sametiyeva. Yathāha –

Katamoca bhikkhave lokassa samudayo. Cakkhuñca paṭicca rūpeca uppajjati cakkhuvīññāṇaṃ. Tiṇṇaṃ saṅgati phasso. Phassapaccayā vedanā. Vedanāpaccayā taṇhā.La. Domanassupāyāsā sambhavanti ayaṃ lokassa samudayo. Sotañca.La. Manañca paṭicca dhammecca uppajjati manovīññāṇaṃ. Tiṇṇaṃ saṅgati phasso.La. Lokassa samudayoti.

Phassavedanādayopi nayadvaye taṃ taṃ viññāṇasampayuttā veditabbā. **Taṇhupādānāni** pākaṭāni. **Bhavo** duvidho kammabhavo upapattibhavoca. Lokiyakusalākusalabhūtā cetanāca. Cetanāsampayuttā abhijjhādayo anabhijjhādayoca kammabhavo. Yathāha-sabbampi bhavagāmikammaṃ kammabhavoti. Kammanibbattā pana sabbepi lokiyavipākakkhandhā sabbānica kammajarūpāni upapattibhavo suttantikanayena. Abhidhammanayena pana lokuttara khandhāpi vibhaṅge āgatāeva. **Jātijarāmarāṇāni** sabbesaṃ saṅkhata dhammānaṃ lakkhaṇapattāni. Sokādīsu ñātibyasanādīhi phuṭṭhassa socanākārena pavattā domanassavedanā **sokonāma**. Rodanākārena pavatto anittṭho cittajasaddo **paridevonāma**. Kāyikā dukkhavedanā **dukkhaṃnāma**. Cetasikā dukkhavedanā **domanassaṃnāma**. Ñātibyasanādinimittam saṃsīdanavisīdanākārapavatto doso **upāyāsonāma**. Ayamettha vibhāgo. Yesaṃ pana khandhadukkhe avijjā appahīnā hoti. Tesam itarasaccesupi sā appahīnāeva hotīti te khandhapavattiyameva sukhasaññaṃ labhanti. Khandhanirodhe dukkhasaññaṃ. Khandhapavattimaggeeva sukhamaggasaññaṃ labhanti. Khandhanirodhamagge dukkhamaggasaññaṃ. Tasmā khandhapavattipaccayabhūtā puññā puññāneñjābhisaṅkhāraddhammāeva tesam avijjānivūṭṭānaṃ sukhakāmānaṃ dukkhapaṭikūlānaṃ sattānaṃ paṭisaraṇā hontīti vuttam **avijjāpacca yāsaṅkhārāti**. Etthaca visesato paccuppannakhandhapaṭicchādikāya avijjāya duccharitabhūtā apuññābhisaṅkhārā sambhavanti. Anāgata khandhapaṭicchādikāya avijjāya sucaritabhūtā puññāneñjābhisaṅkhārā sambhavanti veditabbā. Saṅkhāresu sati appahīnabhavataṇhānaṃ sattānaṃ cutianantaram punabhavābhiniṃbattiyā koci vibandho nāma natthi. Tasmā saṅkhārapaccayā viññāṇam nāmarūpaṃ saḷāyatanaṃ phasso vedanāti ime attabhāvasaññitā pañcadhammā bhavantare pātu bhavanti. Tattha pana viññāṇameva padhānaṃ jeṭṭhakaṃ hotīti vuttam. **Saṅkhārapaccayāviññāṇanti** viññāṇeca sati tassa udayabhūtānaṃ nāmarūpānaṃ uppattiyā vibandhonāma natthīti vuttam. **Viññāṇapaccayānāma rūpanti**. Ettāvata sāmāññato pariṇaṇṇānaṃ kāyo rūpa kāyoca vutto hoti. Evaṃsantepi tesu dvīsu kāyesu yedhammā sattapaññattiyā padhānaṅgabhūtā hontīti. Yehica phassā dīni upari aṅgāni āgatāni hontīti. Yesuca sattā attagāhaṃ daḷhataṃ gaṇhanti. Te viṣuṃ nīharitvā dassetuṃ **nāmarūpapaccayā saḷāyatanaṃ** vuttam. Nāmarūpe sati tesampi uppattiyā vibandho natthiyeva. Saḷāyatanaṃ samuṭṭhitoca phasso saḷāyatane sati ekantena sambhavatīti vuttam **saḷāyatanaṃ paccayāphassoti**. Phassasamuṭṭhitāca vedanā phasse sati ekantena sambhavatiyevāti vuttam **phassapaccayāvedanāti**. Sukhavedanāsadiso taṇhāya avassayonāma natthīti vuttam **vedanāpaccayātaṇhāti**. Kāmupādānañcaṇāma ekasmiṃ ārammaṇe punappunaṃ samudācaritvā daḷhattappattā taṇhāeva, diṭṭhiyoca attanica attano ārammaṇesuca assādāna khamana rocana bhūtāya taṇhāya vasena daḷhattam āpajantīti vuttam **taṇhāpaccayāupādānanti**. Upādiyantaṃ tassa tassa upādāniyassa atthassa hitavuḍḍhisaññitaṃ taṃtaṃ kammabhavaṃ āyūhantiyevāti vuttam **upādānapaccayābhavoti**. Bhavasaddo hettha vaḍḍhipariyāyo. Yathā –

Suvijāno bhavaṃ hoti, duvijāno parābhavoti.

Kammabhava sati ekantena punabhavopi sambhavatīti vuttam **bhavapaccayājātīti**. Jātiyāca sati ekantena jarāmarāṇam hotiyevāti vuttam **jātipaccayājarāmarāṇanti**. Ayamettha tabbhāvabhāvavividhi. Sokādivacanañcettha īdisena tabbhāva bhāvabhāvena pavattassa sakalassa vaṭṭadhammassa ādīnavarāsīdassa nattham vuttanti. **Etthāti** imasmiṃ paccayasaṅgahe. **Tatthāti** tasmim paṭiccasamuppādanaye. Addhānavante dhamme bhuso dhāretīti addhā. Kālo. So hi tekālike dhamme santānānupabandhasena kappaparaṃparā vassa utu māsa pakkha ratti diva paraṃparāca hutvā apatamāne dhārento viya upaṭṭhātīti. Athavā, bhuso dahanti tiṭṭhanti pavattanti tekālikā dhammā etthāti addhā. Kāloyeva. So pana sayam abhinno pi bhedaṃ dhamme upādāya bhinno viya upacariṭṭam yuttoti vuttam **tayoaddhāti**.

[227] Yaṃ pana **vibhāvanīyaṃ**

“Atati satataṃ gacchati pavattatīti addhāti vuttam”. Taṃ na sundaram.

Evañhi sati addhānanti nasijjhati. Yathā addhānamaggapaṭipannoti. **Aṅgānīti**

avayavapadhānaṅgāni. Padhānasambhārāti vuttaṃ hoti. **Ākārāti** avayavakoṭṭhāsā. Koṭṭhāsatto hettha ākārasaddo. Yathā dvattiṃsākārāti. Ākiranti tattha tattha pakiritvā thapitā viya hontīti ākārātipi vadanti. **Sandhīti** dvinnaṃ dvinnaṃ saṅkhepānaṃ saṅghaṭanaṭṭhānaṃ. Saṅkhepāti padhānadhammasaṅgahā. Vaṭṭanti punappunaṃ āvaṭṭantīti **vaṭṭāni**. Mūlayanti sabbepi vaṭṭadhammā ettha tiṭṭhanti tadāyattavuttitāyāti **mūlāni**. Patiṭṭhā. Pabhavāti attho. Yasmā eko puriso ekāya aṅguliyaṃ samuddo dakaṃ gahetvā mahājanassa mukhe pakkhipitvā catūsu mahāsamuddesu udakassa loṇabhāvaṃ saññāpento viya bhagavāpi avijjā paccayā saṅkhārātiādinā ekameva paccuppanabhavaṃ paripuṇṇaṃ desetvā anamataggassa sakalassa saṃsāravaṭṭassa pavattiṃ ñāpesi. Paripuṇṇaṃ desentenaca nāma tassa ekassa bhavassa hetuca desetabbo hoti. Phalañca desetabbaṃ hoti. Tattha hetū nāma purimabhava siddhā avijjā saṅkhārā. Phalaṃnāma anāgatabhave jāti. Iti ekabhavavisayāpi ayaṃ desanā ekadesena atītānāgata sādharmaṇaca hotīti vuttaṃ **avijjāsaṅkhārāatītoaddhātiādi**. Etthaca addhuno addhāvantañca abhedam viya katvā vacanaṃ dhammato visuṃ addhāsaṅkhātassa kālassa abhāvaṃ dasseti. Kāloyeva lokaṃ pavatteti nivatteti pavattaṃ micchāvādañca nīvāreti. Na hi sayam abhāvabhūto kālo kassaci pavattako nivattakoca bhavituṃ yuttoti. Kasmā panettha ekamekassa paccuppanassa attabhāvassa pavattiṃ dassento bhagavā atītābhava hetuñca anāgatabhave phalañca dasseti. Ahetuvisamahetudiṭṭhīnaṃ nīvāraṇattham atītahetu dassanaṃ. Uccchedadiṭṭhi nīvāraṇattham anāgataphaladassanaṃ. Sassata diṭṭhinīvāraṇattham ubhayadassananti daṭṭhabbaṃ. Tattha ahetu apaccayā sattā pavattanti nivattanti saṃkilissanti visujjhantīti pavattā diṭṭhi ahetudiṭṭhināma. Brahmā pajāpati issaranimmānādivasena abhūta hetudassanaṃ visamahetudiṭṭhināma. Sattā maraṇe ucchijjanti, anāgate jātināma natthīti pavattā diṭṭhi ucchedadiṭṭhināma. Attānicco dhuvo, sova bhavato bhavaṃ sandhāvati saṃsarati pavattā diṭṭhi sassatadiṭṭhināma. Evaṃ nicco hutvā sandhāvantaṃ avijjādīhi sādhetabbo nahoti. Tasmā avijjāsaṅkhārehi bhavantare puna viññāṇuppattiṃ vadantena sassatadiṭṭhi nīvāritā hotīti.

Kasmā panettha sokādayo aṅgesu nagahitāti. Jātiyā sati sokādayo ekantena sambhavanti evaṃ tabbhāva bhāvibhāva lakkhaṇassa abhāvato. Satipi hi jātiyā rūpa loke arūpalokeca te na sambhavanti. Kāmalokepi kesañci na sambhavantiyevāti. Yadievaṃ kimatthaṃ tesam vacananti. Jātiyāvā avijjādikassavā vuttappakārassa sakalassa vaṭṭapavattassa mahāādīnavarāsīdassanantanti dassetuṃ **sokādivacanam panettha nissanda phalanidassananti** vuttaṃ. Tattha nissandaphalanidassananti jātiyā mahāādīnava rāsisaṅkhātassa udayaphalassa nidassananti attho. Kasmā pana imassa paccuppana bhavassa atītapaccayā dve avijjā saṅkhārā eva pāliyaṃ vuttā. Kiṃ pana te eva dve imassa paccayā hontīti. Aññepi hontīyeva. Atha kasmā te pāliyaṃ na vuttāti. Avuttānaṃpi tesam atthato laddhattāti. Kathaṅca te avuttāpi laddhāti. Tabbhāva bhāvibhāvalakkhaṇena tadavinābhāvibhāvalakkhaṇena laddhāti dassento **avijjāsaṅkhārāggahaṇenātiādi māha**. Esa nayo paratthapi. Tattha avijjā saṅkhārāggahaṇenāti pāliyaṃ ādito vuttana avijjāsaṅkhāra vacanena. **Ṭaṇhupādānabhavāpi gahitā bhavanti** avijjābhāve bhāvato, abhāveca abhāvato avijjāgahaṇena ṭaṇhupādānāni gahitāni bhavanti. Saṅkhārābhāveca bhāvato, abhāveca abhāvato saṅkhārāggahaṇena kammabhavopi gahito bhavati attho.

Vibhāvanīyaṃ pana

Kilesabhāvasāmaññato avijjāgahaṇena ṭaṇhupādānāni. Kammabhāva sāmaññato saṅkhārāggahaṇena kammabhavo gahitoti vuttaṃ. Taṃpi yujjati.

Tathā avijjā saṅkhārā gahitā bhavanti sambandho. Tadavinā bhāvibhāvena ṭaṇhupādānavacanena avijjāca bhāvavacanena saṅkhārāca gahitāti attho. Lakkhaṇadhammānaṃ lakkhitabbadhammehi avinābhāvibhāvato tadavinābhāvibhāvena **jātijarā.La. Gahitanti** vuttaṃ. **Itikatvāti** iminā kāraṇena. Vīsatākārā bhavanti sambandho. Pathamaṃ hetupaṅcakaṃ eko saṅkhepo. Dutīyaṃ phalapaṅcakaṃ eko. Tatīyaṃ hetupaṅcakaṃ eko. Catutthaṃ phalapaṅcakaṃ eko saṅkhepoti catusaṅkhepā hontī. Cattāro saṅgahā hontīti attho. Catūsu pana saṅkhepesu siddhesu pathamena dutīyassa dutīyena tatīyassa tatīyena catutthassāti evaṃ tisso sandhiyopi sijjhantiyevāti vuttaṃ **tisandhi catusaṅkhepāca bhavanti**. Etthaca hetupaṅcakaṃ phalapaṅcakanti etaṃ lokassa pākaṭavohārasena vuttaṃ. Hetuphala saddā pana

paccayapaccayuppannapariyāyā eva hontīti dutīyapañcakassa pathamaṃ upādāya phalapañcakatā tatīyaṃ upādāya hetupañcakatāca na na sambhavati. Tathā tatīyassapi catuttham upādāya hetupañcakatā dutīyaṃ upādāya phalapañcakatācāti. Evañhi sati hetuto phalameva siyā. Na phalato hetūti codanā anokāsāeva hotīti. Dvīsu pana hetupañcakesu sañkhārakammabhavānaṃ vireso aṭṭhakathāyaṃ vuttoyeva. Yathāha-dānaṃ dassāmīti cittaṃ uppādetvā māsampi saṃvaccharampi dānupakaraṇāni sajjantassa uppannā purimacetanāyo āyūhanasañkhārānāma. Paṭiggāhakānaṃ pana hatthe dakkhiṇaṃ patitthāpayato uppannā cetanā bhavoti vuccati. Ekāvajjanesuvā chasu javanesu cetanā āyūhana sañkhārānāma. Sattamajavanacetanā bhavo. Yākācivā pana cetanā bhavo. Taṃsampayuttā āyūhana sañkhārānāmāti. Kammabhavo upapattibhavoti dve bhavā dvādasasu aṅgesu ekasseva bhava aṅgassa avayavānāma hontīti vuttaṃ **kammabhavasañkhātobhave kadesotiādi**. Etthaca sañkhārakammabhavānaṃ vireso vutta nayeneva veditabbo.

[228] Yaṃ pana **vibhāvaniyaṃ**

“Kammabhavasañkhāto bhavekadesoti ettha āyatim paṭisandhiyā paccayacetanā sañkhārāti veditabbā”ti vuttaṃ. Taṃ idha na yujjati.

Tesaṃ dvinnampi dvīsu hetupañcakesu saṅgahitattāti. Yathā rutapāḷinayenavā etaṃ vuttanti datṭhabbaṃ. **Avasesācāti** idam jātijarāmarañehi saddhiṃ viññāṇādiphalapañcakaṃ sandhāya vuttaṃ. Etthaca yadetaṃ pubbe jātijarāmarañaggahaṇena viññāṇādi phala pañcakaṃ gahitaṃ. Taṃ atthato upapattibhavoeva. Nahi phalapañcakato añño upapattibhavonāma atthīti. Evaṃ santepi dhammavibhāga rakkaṇatthaṃ upapattibhavasaddena catutthapañcakaṃ gahitanti vuttaṃ. Dvādasasu aṅgesu avijjānāma moho. Soca akusalamūlaṃ. Taṇhānāma lobho. Soca akusala mūlanti vuttaṃ **avijjā taṇhāvasena dve mūlānīti**. Athavā, mūlanti sīsaṃ. Dve vaṭṭasīsānīti attho. Aṭṭhakathāyaṃ pana purimaṃ pañcakadvayaṃ ekaṃ bhavacakkaṃ pacchimaṃ pañcakadvayaṃ ekaṃ bhavacakkanti katvā purimaṃ avijjāmūlaṃ. Tañca ditṭhacaritānaṃvā apāyagāmīnaṃvā cakkaṃ. Pacchimaṃ taṇhāmūlaṃ. Tañca rāgacaritānaṃvā sugatigāmīnaṃvā cakkanti dassitaṃ. Cakkanti pana yato paṭṭhāya vaṭṭasantānassa ārabbo hoti. Tasmim puna āgateeva cakkaṃnāma siyā. Tasmā idha dutīyena hetuphala yugaḷena saddhiṃ sabbaṃ ekameva cakkanti vuttaṃ.

Kasmā panettha āgamanasambhāresu avijjāeva sīsaṃ katvā vuttā. Gamanasambhāresuca taṇhāeva. Nanu ubhayattha ubhayampi sīsaṃ katvā vattabbanti. Vuccate, sukhavedanāsadiso hi taṇhāya āhāronāma natthi. Tasmā vedanaṅgato paraṃ vaṭṭaṅgaṃ ghaṭentena vedanā nurūpātaṇhāeva vattabbā. Na avijjāti gamanasambhāresu tāva avijjāya okāso natthi. Sabbapathamaṃ ārabbaṭṭhāneca sabbapadhānā avijjāeva vattabbā hoti. Sāca sañkhārupādane avirajjhanakaṅgabhūtāti na tesam antare ekassa aṅgassa athāya kiñci vattabbam atthīti āgamanasambhāresu taṇhāya okāso natthīti. Ayañhi paṭiccasamuppādadesanānāma padhānaṅgapariggaha vasena pavattā. Na labbhamāna sabbadhamma pariggaha vasenāti.

Yaṃ pana **vibhāvaniyaṃ**

Pubbantassa avijjāmūlaṃ. Aparantassa taṇhāmūlanti vuttaṃ.

Tattha pubbantassāti pubbassa hetuphalakoṭṭhāsassa. Aparantassāti pacchimassa hetuphala koṭṭhāsassāti atthoti. Kasmā panetāni dvemūlānināma hontīti āha –

Tesamevaca mūlānaṃ, nirodhena nirujjhatīti.

Tesaṃ samudayena sakalavaṭṭaṃ samudeti. Nirodhenaca nirujjhati. Tasmā tāni dvemūlānināmāti vuttaṃ hoti. Keci pana paṭiloma paṭiccasamuppāda dassanametanti vadanti. Paṭiloma paṭicca samuppādonāma avijjānirodhā sañkhāranirodho sañkhāranirodhā viññāṇanirodhotiādikiko nirodhavāro.

Idāni sokādi vacanaṃ na kevalaṃ nissandaphala nidassanatthameva hoti. Athakho jarāmarāṇena saddhiṃ ekaṃ aṅgaṃ hutvā upari vaṭṭamūladhammapaṭipādakānaṃ dukkhadhammānaṃ nidassanatthampi hotīti dassento **jarāmarāṇa mucchāyāti**ādi māha. Tattha mucchāsaddena sokādīnaṃ gahaṇaṃ. Tepi hi sayama āsavasambhūtā hutvā puna āsavuppādāya paccayā hotīti etena tesama jarāmarāṇaṅge gahaṇaṃ siddhaṃ bhavati. Jarāmarāṇamucchāya abhiṅhaso pīlītaṃ bālānaṃ āsavā abhiṅhaso samuppajjanti. **Āsavānaṃsamuppādāavijjāca pavaḍḍhati**. Āsavasamudayā avijjāsamudayoti hi vuttaṃ. Evañca sati avijjāpaccayā saṅkhārāti puna ābandhameva vaṭṭanti attho. Etthaca –

Nānā byasanaphuṭṭhassa, sokādīnaṃ pavattito;
Avijjā taṇhā vaḍḍhanti, yato vaṭṭaṃ pavattatī tipi.

Vattabbaṃ. Yathāha-katamoca bhikkhave dukkhassa vipāko. Sammohavepakkama vāhaṃ bhikkhave dukkhaṃ vadāmi. Pariyettihivepakkamvāti tattha sammoho avijjā. Pariyetti taṇhā. Tadubhayaṃ vipākaṃ etassāti katvājarāmarāṇasokādikaṃ dukkhaṃ sammohavepakkama pariyettihivepakkantica vuccatīti. Tattha sammohonāma nītibyasanā dinā phuṭṭhosocati paridevati uratāli kantati, sammohaṃ āpajjatīti evaṃ āgato sammoho. Pariyettihināma yathā jigacchāti pīlito. Bhojanaṃ pattheti pariyesati pipāsābhipīlito. Pāṇiyaṃ pattheti pariyesati, evaṃ kenaci dukkhena phuṭṭho sukhaṃ pattheti pariyesatīti evaṃ pavattā pariyettihitaṇhā. Ettha pana yasmā jarāmarāṇasadiṣaṃ mahantaṃ visaṭṭaṃ niyatañca imassa lokassa dukkhaṭṭhānaṃnāma natthi. Dukkhanissaraṇatthañca satthusāsaṇaṃ. Tasmā ayaṃ paṭiccasamuppādadesanā jarāmarāṇanidānā hoti. Yathāha-kicchaṃ vatāyaṃ loko āpanno jāyatica jīyatica miyyatica cavatica upapajjatica. Athaca panimassaṃ dukkhassa nissaraṇaṃ nappajānāti jarāmarāṇassātiādi. Yesu pana aṅgesu ādito paṭṭhāya nītesu jarāmarāṇaṃ samūlaṃ khanitvā tato attānaṃ mocetuṃ sakkoti. Tāni dassetuṃ jātiādīni purimāni aṅgāni desitāni. Apica. Ekasmiṃ bhava ṭhatvā āgamasambhārehica gamanasambhārehica āgatiyāca gatiyāca saddhiṃ attabhāvanibbattiyā dassitāya atīte anāgateca sakalasaṃsāre tasmim tasmim bhava tassa tassa attabhāvassa nibbatti dassitāeva hoti. Sabbānica diṭṭhigatāni nivattitāni. Bhavacakkañca anādimantaṃ hutvā ābandhatiyeva. Tasmā jarāmarāṇavacanenaṃ sokādivacanenaṃ avijjama acintetvā vaṭṭapavattassa mahāādīnavarāsidadassanaṃ paccetabbanti. **Icevanti**ādi nigamaṃ. Icevaṃ avijjāpaccayā saṅkhārātiādinā nayena paṭṭhapesīti sambandho. Icevaṃ ābandhaṃ anādikaṃ tebhūmakama vaṭṭantipi vojenti.

Tattha icevaṃ ābandhanti jarāmarāṇamucchāyātiādinā vutta nayena punappunaṃ ābandhaṃ. **Anādikanti** kasmā vuttaṃ. Nanu avijjā ādimhi vuttatī. Vuccate, vaṭṭassa ādibhūtattā sā ādimhi vuttā na hoti. Vaṭṭakathāya sīsa bhūtattāeva sā ādimhi vuttā. Evaṃ vuttāya pana tāya vaṭṭassa anādikabhāvopi dassito. Avijjā hi nāma bahiddhā na labbhati. Sattasantāne eva labbhatīti paccakkhatova siddhametaṃ. Tasmā idha atītabhave avijjāya siddhāya tassāadhiṭṭhānabhūto attabhāvopi tasmim bhava sijjhatiyeva. Sijjhanto ca imassaṃ dasanoyaṃ vutta nayena aññāya avijjāya eva sijjhati, na aññathā. Evañca sabhi puna tassapi adhiṭṭhānabhūto attabhāvo sijjhatiyevāti avijjā attabhāvocāti ubhayaṃ petama anavaṭṭhitama anādikameva hotīti. Vaṭṭassa pana tividdhassapi padhānapaccayabhūtattā sā vaṭṭakathāya sīsabhūtā hoti. Yadi sā vaṭṭassa ādibhūtā na hoti. Atha tassapi paccayo vattabboti. Saccama. Tassā pana paccaye vuttepi tassa paccayassapi paccayo vattabboti āgacchatiyeva. Evañca sati tassa tassāti niṭṭhānameva napaññā yeyyāti. Aññattha pana vuttoyeva. Yathāha-āsavasamudayā avijjāsamudayoti. Yathācāha-avijjama pāhaṃ bhikkhave sāhāraṃ sanidānaṃ vadāmi. Kocassā āhāro. Pañcanīvaraṇā tissa vacanīyanti. Yathācāha-avijjā paccayo, saṅkhārā paccayuppannā. Ubhayaṃmetama paṭicca samuppannanti. **Paṭṭhapesīti** paññāpesi desesīti attho. [Paṭiccasamuppādanayo.]

167. Idāni paṭṭhānanayaṃ dassetuṃ **hetupaccayoti**ādi āraddhaṃ. Tatthahetuca so paccayocāti **hetupaccayo**, hetu hutvā paccayo hetubhāvena paccayoti vuttaṃ hoti. Tattha kenatṭhena hetūti mūlaṭṭhena, koca mūlaṭṭhoti. Rukkhaṇaṃ rukkhamūlassa viya bhūmiyaṃ sahaṅgādhamaṃ ārammaṇesu suppatīṭhi tabhāvasādhanaṭṭho mūlaṭṭhonāma. Sahaṅgādhamaṃ kusalādi

bhāvasādhanattho mūlaṭṭhonāmātipi vadanti. Yaṃ panettha vattabbaṃ. Taṃ heṭṭhā vuttameva. Saddatthato pana hinonti vuddhivirulḥivepullapattivāsena suṭṭhu patiṭṭhahanti sahaḥāṭadhammā ettha etenavā ārammaṇe daḥanipātinā thāmabalasampannēti hetu. Paccaya saddo pana upakārakaṭṭho. Upakārakotica sayāṃ yādisena sabhāvena upalabbhamāne anuppannāvā dhammā uppajjanti. Uppannāvā tiṭṭhanti ṭhitāvā uparuparivuddhivirulḥiyā paccayattaṃ upagacchanti. Tādi senasabhāvena upaladdhiyeva. Nahi sabhāvadhammesu ihāvā byāpārovā upalabbhati. Yena kattāvā kāretāvā upalabbheyyāti. Tathā upaladdhiyaṃ pana sati anurūpānaṃ paccayuppannadhammānaṃ anuppannānaṃvā uppajjanato uppannānaṃvā ṭhitibhāvapattito ṭhitānaṃ vā uparuparivuddhivirulḥiyā paccayattupagamanato suṭṭhu karānto viya sādheṭto viya hotīti katvā upakārako tveva vuccatīti. Iti ārammaṇe thirabhāvavuddhi virulḥibhāvasādhana saṅkhātena mūlabhāvena upakārakā chahetudhammā hetupaccayo nāma.

Āramanti cittacetāsikā dhammā suṭṭhu ratiṃ anubhavantā viya ajjholambamānā pavattanti etthāti ārammaṇaṃ. Ārammaṇabhāveva upakārakā chaḥārammaṇadhammā **ārammaṇapaccayo**. Adhipati saddattho heṭṭhā vuttoyeva. Adhipati bhāvena upakārako dhammo **adhipatipaccayo**. So duvidho ārammaṇādhipati sahaḥāṭadhipativāsena. Ārammaṇadhammāpi hi keci garukatā attano ārammaṇikadhamme sāmīno viya dāse attano vasevattayamānā attani niccaṃ ninnapoṇapabbhāreeva karontīti. Natthi antaraṃ etassāti anantaro, anantarabhāvena upakārako dhammo **anantarapaccayo**. Suṭṭhu anantarabhāvena upakārako dhammo **samanantarapaccayo**. Imesaṃ dvinnaṃ paccayānaṃ dhammato viseso natthi. Atthato pana purimacitte niruddhepi pacchā santānaṃ ucchijjituṃ adatvā santānānubandhavasena sārammaṇadhamma bhāvena attasadisassa dhammantarassa uppādanaṃ anantarapaccayatā. Dhammantare uppādiyamānepi yaṃkiñci dhammaṃ anuppādetvā paṭisandhādīnaṃ kiccaṭṭhānānaṃ paṭipāṭiyā cittaniyāmaṃ nāma sādhetvā anurūpasseva dhammantarassa uppādanaṃ samanantarapaccayatāti. Evañhi sati nirodhā vuṭṭhahantassa asaṅṅasattā cavantassaca purimapacchimabhāgapavattānaṃ cittuppādānaṃpi anantaratā samanantaratāca upapannā hotīti. Nahi abhāva bhūto antare kālo tesāṃ antaraṃ karotīnāma. Naca aññasantānabhūto antare rūpadhammo. Aññāñhi rūpasantānaṃ, aññaṃ arūpasantānaṃ. Aṭṭhakathāyaṃ pana kālānantaratā samanantarapaccayoti vādaṃ paṭikkhipitvā saṅṭhānābhāvato suṭṭhu anantarāti samanantarāti vuttaṃ. Etena yathāsaṅṭhānavantānaṃ rūpadhammānaṃ anantaratānāma majjhe paricchedasahitāyeva hoti. Na tathā saṅṭhānarahitānaṃ arūpadhammānaṃ. Tasmā purimapacchimānaṃ tesāṃ ekībhūtānaṃ viya pavattisamanantaratānāma. Tathā pavattana samatthātā samanantarapaccayatāti dasseti.

Ye pana dhammā attani jāte eva jāyanti, no ajāte. Attanā sahevaca jāyanti, no pure pacchāca, tesāṃ jātatthāya viya sayāṃ tehi saha jātabhāvena upakārako dhammo **sahajātapaccayo**. Pakāsassa padīpo viya. Padīpajālañhi uppajjamānaṃ pakāsasaṅkhātena ālokena saheva uppajjatīti. Aññamaññaṃ upatthambhantaṃ tidaṇḍaṃ viya aññamaññaṃ upatthambhanavasena upakārako dhammo **aññamaññapaccayo**. Evañca sati imassa paccayassa purimena saha viseso pākāto hoti. Nahi saha jātasaddo evarūpaṃ aññamaññopatthambhanaṃ bodhetīti. Nissayanti etthāti nissayo. Nissayabhāvena upakārako dhammo **nissayapaccayo**. So pana sahaḥāṭanissayo vatthupurejāta nissayoti duvidho hoti. Tattha sahaḥāṭova samāno paṭakoṭṭhako viya cittaḥāmmānaṃ patiṭṭhābhāvena upakārako dhammo sahaḥāṭanissayo. Pathavī viya tiṇarukkhādīnaṃ pure jāto hutvā adhiṭṭhānabhāvena upakārako vatthupurejāta nissayo. Balavataro pana nissayo **upanissayo**. Yathā hi sālibhattassa uppattiyā sūdovā ukkhalivākaṭṭhaṃvā aggivānissayo eva hoti, na upanissayo. Sālikhettavuṭṭhidhārā eva pana upanissayo, na hi tāsuasati bhattupattiyā sūdādīnaṃpi thāmonāma atthīti. Tathā yaḥiṃ paccaye asati nissayadhammāpi natthi. Kuto nissitadhammā. So paccayo nissayatopi balavataratṭhena upanissayoti vuccatīti.

So pana ārammaṇūpanissayo anantarūpanissayo pakatūpanissayoti tividho hoti. Tattha garukatā ārammaṇa dhammā garukatattāeva adhipatibhūtā balava nissayabhūtāca hontī. Anantarapaccayadhammāca tehi vinā cittasantānapavattiyā eva abhāvato balavanissayāeva hontī. Pakatūpanissayoti ettha pana pakato upanissayoti pakatūpanissayo. Pakatotica yathā kate sati anurūpe

kāle tasmimsantāne ekantena paccayuppannadhammā pātubhavanti, tathā suṭṭhu katoti attho. Karaṇaṅcettha saddhā silaṃ sutam cāgo paññātica rāgo doso moho māno diṭṭhi patthanātica vuttānaṃ dhammānaṃ attano santāne pubbhāge vuttappakārena suṭṭhu uppādanaṃ. Kāyikaṃ sukhaṃ kāyikaṃ dukkhaṃ puggalo utu bhojanaṃ senāsananti evaṃ vuttānaṃ dhammānaṃ suṭṭhu upasevanañca veditabbaṃ.

Puretaraṃ uppajjitvā vattamānabhāvena upakārako dhammo **purejātapaccayo**. So duvidho ārammaṇapurejāta nissaya purejāta vasena. Nissayārammaṇadhammā eva hi keci purejāta tāmattavisiṭṭhā purejātapaccayoti vuttāti. Ācariyānandattherena pana nissayārammaṇākārādīhi visiṭṭhā purejātākārena upakāratā purejātapaccayatāti vuttaṃ. Evaṃ santepi pure jātāvisiṭṭhehi nissayārammaṇasattivisesehi añño visuṃ purejātasattivisesonāma nadissatiyeva. Pure ropetvā jātānaṃ rukkhapotakānaṃ viya pacchā āsiñciyamānaṃ udakaṃ pure jātānaṃ catusamuṭṭhānikarūpadhammānaṃ vuddhavirulhabhāvañca pacchāpi attanā sadisassa rūpasantānassa pavattiyā paccayabhāvañca pāpetvā upatthambhanavasena upakārako pacchājāto arūpadhammo **pacchā jātapaccayo**. Aṭṭhakathāyaṃ pana gijjhapotakasarīraṇaṃ āhārāsā cetanāvīyāti vuttaṃ. Mūlaṭṭikāyañca etena manosañce tanāhāravasena pavattamānehi arūpadhammehi rūpakāyassa upatthambhita bhāvaṃ dasseti, teneva āhārāsā viyāti avatvā cetanāgahaṇaṃ karotīti vuttaṃ. Sā pana pacchājātā sasampayuttā āhārāsā cetanā purejātānaṃ tesam gijjhasarīrarūpānaṃ cirakālaṃ kabaḷikārāhārena vināpi amilāta bhāvaṃ uparūparica vuddhavirulharūpasantānuppattiyā paccayabhāvaṃ pāpetvā upatthambhatiyeva. Yasmā supākaṭena pacchājātapaccayeka desena sakalassa pacchājātapaccayassa sādhanatthāya ayaṃ upamā idha vuttā viya dissati. Cetanā gahaṇaṇca pacchājāta paccayaṃ patvāpi cetanāeva padhānā jātāti dassanattham gahitanti na na sakkā vuttaṃ. Evañhi sati pacchājātassa atthassa pacchā jātāya eva upamāya sādhanam upapannaṃ hotīti. Yathāvutta ṭīkāpāṭhepi ayamatto labbhatiyeva.

Āsevanti taṃ suṭṭhu bhajanti aparāparaṃ uppajjamānā dhammā suṭṭhu sevamānā viya bhajamānā viya tassa purimassa sabbapāripūram ākāraṃ gahetvā eva punappunaṃ pavattantīti āsevanam. Āsevetivā te dhamme attano parivāsaṃ suṭṭhu gāhāpeti. Vaḍḍhetītivā āsevanam. Apica kusalādibhāvena attanā sadisassa payogena karaṇīyassa anantaradhammassa punappunaṃ karaṇam pavattanaṃ attasadisassavā attasadisabhāvāpādanaṃ vāsanaṃ āsevanatṭhoti mūlaṭṭikāyaṃ vuttaṃ. Tattha payogena karaṇīyassāti etena āvajjanaadvayañca sabbavipākadhammeca nivatteti. Nahi āvajjana dvayassa dvattikkhattuṃ pavattamānassapi vaḍḍhetuṃvā hāpetuṃvā payogena karaṇīyatānāma atthi paridubbalattā. Vipākesuca ariyaphalāni parikammaṃpayogena karaṇīyānīpi maggacetanānubhāvena vinā kevalena tena payogeneva sādhetabbāni na honti. Kevalam kammavegena santāne pātesu lokiyavipākesu vattabbameva natthīti. Punappunaṃ karaṇam pavattananti uparupari paṇaṃ balavabhāvāpādanena saha pavattanaṃ sandhāya vuttaṃ. Evañhi sati pariyattidhamma vijjāsippuggahaṇesu purimābhiyogo viya āsevanatṭhena anantare pavattānaṃ sajātiyānaṃ dhammānaṃ paṇaṃbalavabhāvāya upakārako dhammo **āsevanapaccayo** nāmāti siddham hotīti.

Kāyaṅgavācaṅgacittaṅgābhisāṅkharāṇabhūtena cittappayogaṅgāhāte na kiriyābhāvena upakārako dhammo **kammapaccayo**. So duvidho sahaṅgānānākkhaṇīkavasena. Tattha jeṭṭhasissa mahā vaḍḍhakiādayo viya sakiccaparakiccasādhanavasena pavattā sabbāpi sahaṅgācetanā sahaṅgātapaccayo. Yathā pana itthipurisānaṃ sakiṃ sannipātappayogo kāmasukhānubhavanakiccañca kālantare puttāpātubhāvattāyavatthumhi bījanidhāna kiccañca sampādeti. Evamevaṃ yathāvuttābhisāṅkharāṇakiccañca tadabhisāṅkharāṇavegajanitaṃ kālantare vipākakataṭṭārūpānaṃ pātubhāvattāya santāne kiriyā visesanidhāna kiccañca sampādetvā niruddhā kusalākusala cetanā nānākkhaṇīkakammaṃpaccayonāma. Vipaccanamattabhāvena upakārako dhammo vipākappaccayo. Vipaccana bhāvoca nāma loke sabbesaṃ pupphaphalādīnaṃ suṭṭhu vipakkabhāvaṃ pattakāle sabbākārena mandabhāvo hoti. Evaṃ nirussāhasanta bhāvasaṅkhākena mandamandākārena santāne pātubhāvo. Tatoyevaca vipākānaṃ pavatti avibhūtā hoti. Sabbarattim niddāyantassa purimabhavasiddhe kammādi ārammaṇe pavattānīpi tāni vuṭṭhitakāle kiñcijananacitta pavattiyā paccayā nahontīti. Pañcaviññāṇādīni pana pacchājānanacitta pavattiyā paccayā hontānīpi vatthārammaṇa ghaṭṭānānubhāva

balena saheva honti. Na tesam ussāhabyāpāramatta vassenāti daṭṭhabbam.

Arūpino tayo āhārā sahajātadhammānaṃ jananaṭṭhena upatthambhanaṭṭhena, kabaḷikārāhāro pana imassa catusamuṭṭhāni kassa kāyassa upatthambhanaṭṭheneva upakāratā **āhārapaccayo**. Apica, āhāraṭṭhonāma upatthambhanaṭṭhāno hoti. Teneva hi pāḷiyam kabaḷikāro āhāro āhārasamuṭṭhānassa rūpassa āhārapaccayena paccayoti avatvā imassa kāyassa āhārapaccayena paccayotveva vuttam. Tasmā arūpāhārānaṃpi āhāraṭṭho upatthambhanavaseneva veditabbo. Janayantāpi hi āhārā attanā janitānañca tadaññesañcasantānaṭṭhitiyā paccayabhāvattāya upatthambhanena saheva janentīti.

Issariyaṭṭhena upakārako dhammo **indriyapaccayo**. So tividho sahajātādivasena. Tattha sahajātadhammānaṃ attano attano kicesu issarabhūtā arūpindriyadhammā sahajātindriyapaccayo. Pacchā jātānaṃ pañcaviññāna dhammānaṃ dassanādi kicesu issarabhūtā pure jātā pañcavasādindriyadhammā pure jātindriyapaccayo. Sahajātānaṃ kaṭattārūpānaṃ ciratarapavattiyam issarabhūtam rūpajīvitam rūpajīvitindriyapaccayo. Kasmā panettha bhāvindriyadvayam idha na gahitanti. Vuccate, yassa janakattamvā upatthambhakattamvā anupālakattamvā atthi. So paccayadhammānaṃ. Bhāvadvayassa pana sahajāta dhammānaṃ atthāya etaṃ tayampi natthi. Kevalam pana taṃsahite santāne kammādīhi attano attano paccayehi pavattamānaṃ catusamuṭṭhānikadhammānaṃ itthākārādivaseneva yo pavattiniyamo atthi, so bhāvarūpā nubhāvena siddho. Tasmā tesam dhammānaṃ tādise niyāmakicce issarattāyeva dvayam indriyamānaṃ hoti. Na indriyapaccayatte nāti tam idha nagahitanti daṭṭhabbam. Ārammaṇam upagantvā tasmim bhusam daḷham nipatitvā viya jhāyanaṭṭhena olokanaṭṭhena upakārako dhammo **jhānapaccayo**. Duggati sugati nibbāna sampāpakaṭṭhena upakārako dhammo **maggapaccayo**. Ethaca yenayena sammādassanādinā lakkhaṇavisesena sampannattā kusalabhūtā sammādiṭṭhādayo sugati nibbāna sampāpakaṭṭhena maggapaccayānāma honti. Abyākatabhūtānaṃpi tesam so so lakkhaṇaviseso atthiyevāti tesampi tenevaṭṭhena maggapaccayatā vuttāti daṭṭhabbā. Satipi maggaṅgānaṃ tamtam sampāpakaṭṭhena upakārakatte taṃsamuṭṭhitānaṃ rūpadhammānaṃ so attho na pāpuṇāti. Tesam pana maggapaccayadhammehi samuṭṭhitattāyeva maggapaccayuppannatā paccetabbā. Esanayo hetukamindriyājhāna paccayesupīti.

Ekuppādatādīhi pakārehi samaṃ ekībhūto viya hutvā aññamaññayuttabhāvena upakārako dhammo **sampayuttapaccayo**. Samānepi sahajātabhāvena nissaya nissita bhāvenaca yuttabhāve ekuppādatādīkassa sampayogalakkhaṇassa virahato vippayuttabhāvena upakārako dhammo **vippayuttapaccayo**. Yattha sampayuttā saṅkā sambhavati, tattheva tadāsaṅkā vīgamanattham ayam vippayuttapaccayonāma vuttoti tadāsaṅkhā rahitesu ārammaṇānantarādīsū vippayuttapaccayapasaṅgo natthīti veditabbo. Heṭṭhāvuttappakāresu eva paccayadhammesu yo yo atthitā saṅkhātena khaṇapaccuppanna samaṅgibhāvena tādisasseva khaṇapaccuppanna samaṅgino dhammassa sahajātādivasena upakārako so so **atthipaccayo**. Yasmiṃ vijjāmāne sati añño uppajjitum okāsam nalabhati. So tassa aññassa okāsadāna saṅkhātena sayam antarahitabhāvena upakārako dhammo **natthipaccayo**. Ayampi visum sattiviseso na hoti. Teneva citta gacchati nisīdati tiṭṭhatītiadinā pacchimacitte ṭhitānaṃpi purimacittam vattatiyevāti lokassa abhimāno hoti. Tasmā yattha atthitāsaṅkā sambhavati. Tattha tadāsaṅkā nivattanattham ayam paccayo vuttoti veditabbo.

Vināsam gato vīgato. Yasmiṃ avigate añño uppajjitum okāsam nalabhati, so tassa okāsadāna saṅkhātena sayam vīgatabhāvena upakārako dhammo **vīgatapaccayo**. Vattamānatā saṅkhātena avigatabhāvena tādisasseva dhammassa upakārako dhammo **avīgatapaccayo**. Purimapaccaya dukameva cettha nānattha pasaṅganivattanattham ṇaṇavisadatthañca pariyāyantarena vīgatadukamānaṃ katvā desitanti veditabbam. Tathā hi atthīti kho kaccāna ayameko anto. Natthīti ayam dutīyo antotiadinā nānatthadīpakā atthi natthi saddā sāsane lokeca dissanti. Pubbe vuttasseva ca atthassa puna pariyāyantarena vacanam sotūnam ṇaṇavisadatthāya hotīti. Ṭīkākāra pana bahum tesam paccaya dukānaṃ nānatthasambhavam vaṇṇentiyevevāti. [Paccayuddeso]

168. Idāni yathā uddiṭṭhe catuvīsatiṭṭhāyā pathamaṃ chahi rāsīhi saṅgahetvā puna rāsīnaṃ anukkamena tesāṃ paccayānaṃ niddesaṃ dassento **chadhānāmantunāmassāti** gāthādvaya māha. Nāmaṃ nāmassa chadhā chabbidhehi paccayehi paccayo hoti. Nāmaṃ nāmarūpīnaṃ pañcadhā. Puna nāmaṃ rūpassa ekadhā, rūpaṃ nāmassa ekadhāeva. Paññattināmarūpāni nāmassa duvidhā, dvayaṃ nāmarūpaṃ dvayasēva nāmarūpassa navadhāti evaṃ chakkapañcakādivasena paccayā chabbidhā honti. Kathaṃ hontīti yojanā.

[229] Yaṃpana vibhāvanīyaṃ

“Paññattināmarūpāni nāmassa dvidhā dvipakārā paccayā hontīti vuttaṃ”. Taṃ na sundaraṃ.

Paccayakathā hi nāma paccayato paccayuppannato paccayasattitoti tīhi pakārehi vuttāyeva suvuttā hotīti. Yasmā pana anantarādipaccayānāma cittasantānassa avicchedāya kiccaṭṭhānānukkamaṃ paṭipādanāya eva ca honti. Tasmā kusalādīsū arūpadhammesu yokoci dhammo yassa kassaci aviruddhassa dhammassa paccayo na na hotīti vuttaṃ **anantaraniruddhācittacetāsikādharmāti**tiādi. Tattha aviruddhassātiētena aññamaññāviruddhānaṃ kusalākusalānaṃ somanassadomanassānañca aññamaññaṃ anantara paccayapaṭikkhepo veditabbo. **Paṭuppannānanti** punuppannānaṃ paṭipāṭiyā uppannānaṃvā. Punappunaṃ santānaparibhāvanāvasena pavatto āsevanapaccayonāma, kevalaṃ payogasāadhanīyesu javavega sahitesu cittuppādesu eva labbhatīti vuttaṃ **purimāni javanānīti**tiādi. Tattha **javanānīti** maggaphalajavanavajjāni lokiya kusalā kusalakriyajavanāni **pacchimānaṃ javanānanti** phalajavanavajjānaṃ kusalākusalakriyajavanānaṃ. Bhinnajātikā hi dhammā aññamaññaṃ sabbākārapāripūraṃ parivāsaṃnāma gahetumvā gāhāpetumvā na sakkonti. Yadi sakkuṇeyyumaṃ, jātimattenapi dhammā pubbāparaṃ abhinnāeva siyunti. Tasmā bhinnajātikaṃ phalajavanaṃ maggato parivāsaṃ gahetum na sakkoti. Maggopi attano parivāsaṃ phalassa dātum na sakkoti. Phalacittānīca parikammaṃ payogabalena javana kiccāni hontīti, na aññamaññaṃ parivāsādāna gahaṇa balenāti. Yasmā kāmāvacarabhāvato mahaggaṭā nuttara bhāvappattināma āsevanabalena hoti, tasmā gotrabhu jhāna maggānaṃ bhūmi bhedo idha appamaṇanti daṭṭhabbaṃ.

Hetu.La. Nāmarūpānanti ettha hetumaggaṅgāni ahetukavajjitānaṃ, jhānaṅgāni pañcaviññānavajjitānaṃ saḥajātānaṃ nāmarūpānaṃ. Saḥajātarūpalakkhaṇaṃ pana sayameva vakkhati. Cetanānaṃ pavattamānā dve kiccāni sādheti saḥajātānaṃ saṃvidhānañca āyatim vipākapaṭu bhāvatthāya tasmim santāne attano pavattā kārasaṅkhātā bījanidhānañcāti. Tattha saṃvidhānakiccaṃ sabbacetanā sādhaṇaṃ hoti. Bījanidhānakiccaṃ pana kusalākusalabhāvappattāyeva cetanāya hotīti vuttaṃ saḥajātācetanātiādi. Tattha **saḥajātācetanāti** antamaso pañcaviññāna saḥajātāpi cetanā. Sāpi hi saḥajātānaṃ saṃvidahanasaṅkhātēna kammabhāvena pavattattā kammaṃevanāma hotīti. Yasmā attano pavattākārasaṅkhātassa vipākabījassa nidhanaṃnāma, na tāvadeva bījakiccaṃ sampādeti. Ambabījādīni viya pariṇātabhāvaṃ patvā khaṇantareeva sampādetīti vuttaṃ nānākkhaṇikā cetanātiādi. Tattha **nānākkhaṇikācetanāti** attano paccayuppannadhamma pavattikkhaṇato visum bhūte atītakāle siddhā kusalā kusalacetanā. Kusalākusalacetanātivā paṭho siyā.

Vipākakkhandhāaññamaññaṃ saḥajātānaṃ rūpānanti ettha aññamaññaṃ assaca saḥajātarūpānañcāti attho. Yathānāma pure jātā sālārukkhopakā pacchā anuvassaṃ vassantānaṃ vuṭṭhidhāraṇaṃ vasena vuddhim viruḷhim vepullaṃ patvā tasmim ṭhāne yāvakkappāvasānāpi mahantassa sālavanasaṅgassa pavattiyā paccayā hontīti. Evaṃ paṭisandhikkhaṇato paṭṭhāya purimacittakkhaṇesu uppannā sakalasarīre kammajakāyo cittajakāyo utujakāyo āhāraja kāyoti sabbe sakalasarīraṭṭhakā catusamuṭṭhānika rūpadhammā pacchājātānaṃ pathamabhavaṅgādīnaṃ cittacetāsikānaṃ vasena vuddhim viruḷhim vepullaṃ patvā uparupari catusamuṭṭhānika rūpaparaṃ parāpavattiyā paccayattaṃ upagacchantīti vuttaṃ **pacchājātā cittacetāsikā dhammāti**tiādi. Tattha **purejātassāti** atītanantaracitte jātassāti vadanti. Yāva aṭṭhamacittāvā purejātassa. Ettako hi kālo rūpadhammānaṃ vaḍḍhanakālonāma.

Tatoparaṃ hāyanakāle pacchājātena payojanaṃ natthīti. Yāva soḷasamacittā eva vā purejātassa. Yadaggena hi maraṇāsannakāle vatthurūpaṃ cuticcitassa purejātapaccayataṃ upagacchati. Tadaggena cuticcitampi tassa vatthurūpassa pacchājātapaccayo na hotīti navattabbo. Tathā sesarūpānañca. Yathā hi upatthambhanto āhāro vaḍḍhanapakke ʘhitameva upatthambhati. Hāyanapakke ʘhitam nupatthambhatīti natthi. Tadāpi tadanurūpassa upatthambhanassa icchitabbatā. Evamayampīti.

Arūpadhammānaṃ ānubhāvonāma mahāvippahāro hoti. Tasmā te kāyekadesse vatthumhi uppannāpi sakalaṃ imaṃ catujakāyaṃ upatthambhetuṃ sakkontiyevāti vuttaṃ **imassakāyassāti**. Cakkhādīni pasādavatthūni rūpādīhi sahaladdhaghaṭṭanānieva viññāṇassa ādhārabhāvaṃ gacchanti. Ghaṭṭanañca ʘhitipattakāleevāti tesam niccakālaṃpi attano viññāṇassa purejātapaccayatā siddhi hoti. Viññāṇaṇcaṇāma pañcavokārabhave vatthunissayena vinā uppajjitum nasakkotīti, yadā purejātamvā vaḍḍhanapakke ʘhitamvā vatthum na labhati, tadā paṭisandhikālevā maraṇāsannakālevā yaṃ yaṃ labhati, tam tam nissāya uppajjatiyeva. Yadā pana pure jātam suṭṭhu balavantañca vatthum labhati, tadā tadeva nissāya pavattati. Tañca niyamato pavattikāleeva labbhati, no paṭisandhikāle. Nahi tadā viññāṇapaccayena uppannaṃ vatthupurejātam bhavitum sakkotīti vuttaṃ **chavatthūni pavattiyanti**.

Pañcālambaṇaṇica pañcaviññānavīthiyāti idam niyamasiddhigahaṇa vasena vuttaṃ. Sabbāni pana paccuppanabhūtāni nipphannarūpāni manoviññāṇa vīthiyā purejātapaccayā hontiyeva. Evañca katvā paṭṭhāne paccuppanno dhammo paccuppannaṃ dhammassa purejātapaccayena paccayo. Ārammaṇapurejātam cakkhum aniccato dukkhato anattato vipassati. Sotaṃ, ghānaṃ, jivhaṃ, kāyaṃ, rūpe, sadde, gandhe, rase, phoṭṭhabbe, vatthum, paccuppanne khandhe aniccato dukkhato anattato vipassati, paccuppannaṃ cakkhum assādeti abhinandatītiādi vuttaṃ. Aṭṭhakathāyañca uppādakkaṇaṃ atikkamitvā ʘhitipattam aṭṭhārasavidhaṃ rūpameva purejātapaccayoti vuttanti. Etthaca kiñcāpi paṭṭhāne paccuppannārammaṇaṃ paṭisandhiccittam paccuppannārammaṇassa bhavaṅgassaanantarapaccayena paccayoti evam paṭisandhibhavaṅgānaṃpi paccuppannārammaṇatāya vuttatā paccuppanabhūtāni kammanimitta gatinimittāni ārabba pavatti kāle paṭisandhiccittānaṃpi ārammaṇapurejātam labbhamānaṃ viya dissati. Evaṃsantepi purejātapaccayassa paccaniye paṭisandhikkhaṇe vipākā byākato eko khandhotiādinā pāḷiyameva tam paṭikkhattanti. Etthaca āruppe viya paṭisandhikkhaṇepi vatthupure jātassa abhāvā aparibhattatāvā tassa ārammaṇassa ārammaṇamattabhāveeva ʘhitatā paṭikkhattanti kāraṇaṃ vadanti. **Ārammaṇamevagarukatanti** paccavekkhanavasena assādanādivasenaca garukataṃ iṭṭhārammaṇa māha. Tañca kho tassatassa puggalassa icchāvasena veditabbaṃ. Gūthakuṇapādīnīpi hi tadabhinandantānaṃ kimimakkhika sunakha giṃjha kākādīnaṃ garukatānieva ārammaṇāni hontīti.

[230] Yaṃ pana vibhāvaniyaṃ

“Garukatanti garuṃ katvā paccavekkhita” ntiādi vuttaṃ. Tam anupapannaṃ.

Cakkhum garuṃ katvā assādeti abhinandatītiādinā assā danādivasenapi assa niddesassa pavattatāti. **Rāgādayo pana dhammāti** etena rāgo doso moho māno diṭṭhi patthanāti evam vuttehi dhammehi saha dasa akusalakammaṃpathā pañcaanantariya kammānīca gahitāni honti. Tattha anantariyavajjāni tāni samatikkamamukhena yathārahaṃ ajjhataṃ sabbesaṃ catubhūmaka kusalānaṃ anantariyakammāni pana kāmvāvacarakusalānameva uppattiyā balavanissayā honti. Tāniyevaca sabbāni yathārahaṃ ajjhatañca bahiddhāca rāgādīnaṃ paṇātipātādīnañca sabbesaṃ akusalānaṃ kāyikasukhadukkhādīnañca abyākatadhammānaṃ uppattiyā balava nissayā honti. **Saddhādayoti** etena saddhā sīlaṃ sutam cāgo paññāti evam vuttehi dhammehi saha sabbe dānasīlādayo catubhūmakaku salānaṃ rāgādi akusalānaṃ sukhadukkhādīcatubhūmaka abyākatā nañca uppattiyā balavanissayā hontīti. **Sukhaṃ dukkhaṃ puggalo bhojanaṃ utusenāsananti** etena nibbānavajjā sabbe catubhūmakā byākatā gahitā, tepi hi yathārahaṃ ajjhatañca bahiddhāca kusalākusalā byākatadhammānaṃ uppattiyā balavanissayā hontīti. **Kammaṃvipākānanti** ettha suṭṭhu balavaṃ kammaṃ adhippetam, na dubbalanti. Kasmā panettha rūpadhammā paccayuppannesu na gahitā. Nanu tesampi bahiddhā rukkhatīṇādīnaṃ vuddhivirulhi vepullatthāya ajjhatañca ārogyādiatthāya pathavirasa āporasa vassodaka bijamūlabhesajjādayo

balavanissayā hontīti. Ayaṃ panattho mūlaṭīkāyaṃ kathitoyeva. Vuttañhi tattha –

Nahi rūpābyākatam pakatūpanissayam labhati. Acetanena rūpasantānena pakatasseva abhāvato. Yathā hi arūpasantānena kattubhūtena saddhādayo nipphādītā utubhojanādayoca upasevitā. Na evaṃ rūpasantānena. Yasmiñca utubjādi ke kammādi keca sati rūpaṃ pavattati. Na taṃ tena rūpena pakataṃ hoti. Sacetanasseva hi uppādanupasevanapayogavasena cetanam pakappanam pakaraṇam. Rūpañca acetananti.

Idaṃ vuttam hoti, duvidham santānam rūpasantānam arūpasantānanti. Tattha yena santānena pubbe kiñci suṭṭhuuppāditamvā hoti upasevitamvā, tasseva pubbe attanā uppāditupasevitā dhammā kālantare attano upanissayapaccayā hontī. Pakaraṇasañkhātāñca tathā uppādanupasevanamnamā sacetane arūpasantāneeva labbhati, na acetane rūpasantāneti. Tasmā rūpadhammā upanissayamnamā nalabbhantīti. Imasmim sati idaṃ hoti, asati na hotīti evaṃ vuttena suttantikapariyāyena pana upanissayo nāma rūpadhammānam majjhepi vattabboyevāti.

[231] Vibhāvaniyam pana

“Yathārahaṃ ajjhatañca bahiddhāca rāgādayo.La. Senāsanañcāti” viyojetvā “rāgādayo hi ajjhataṃ nipphādikā. Puggalādayo bahiddhā sevītīti” vuttam. Tam nasundaram.

Na hi attano parassaca uppannā rāgādayo parassa attano ca santāne rāgādīnam balavanissayā na hontī. Samānacchandānam itthi purisādīnam manopadosika devādīnañcetta rāgādayo nidassanam.

[232] Yāca tattha

“Yathāṭhitavasena yojanam” katvā “attanohi rāgādayo” tiādīnā atthavibhāvanā katā. Sāpi anupapannāyeva.

Tāya hi attano rāgādayo saddhādayoca ajjhataṃ kusalādīnam attano saddhāyo pana bahiddhā kusalassāti evaṃ aparipuṇṇassa atthassa vibhāvitattāti.

[233] Yañca

“Tatthā” tiādīnā attanorāgādayonissāyaaajjhataṃ kusalākusalānameva uppattividhānam vuttam. Tampi anupapannameva.

Nayadassanamattabhūtampi hi saṃvaṇṇanāvākyamnamā nayamukham paripuṇṇam katvā vattabham hotīti. **Garukataṃārammaṇanti** ettha sabbam lokiyakusalam heṭṭhimamaggaphalanibbānāni ca kāmāvacara kusalassa arahattamaggaphalanibbānāni catunnam nāṇasampayutta mahākriyajavanānam. Nibbānam aṭṭhavidhalokuttarassa thapetvā paṭighadvaya momūha dvaya dukkhasahagata kāyaviññānāni avasesam sabbam lokiya kusalākusalābyākatadhammajātam lobhasahagatacittassāti evaṃ paccaya paccayuppanna vibhāgo veditabbo.

[234] Yam pana vibhāvaniyam

“Garuka taṃālambaṇanti paccavekkhanaassādādīnā garukataṃ ārammaṇa” nti vatvā tam vibhāventena “tañhi jhānamagga phalavipassanā nibbānādibhedam paccavekkhana assādādimagga phalādīdhamme attādīhīne karotīti ārammaṇādhipatināmā” ti vuttam. Tam na sundaram.

Dāna sīla uposathakamma pubbe suciṇṇagotrābhū vodāna maggaphala nibbānāniveva rāgadiṭṭhacakkhusotādinicāti pana vattabbaṃ. Vipassanātica idaṃ gotrābhūvodānāniveva sandhāya vuttaṃ siyā. Naca tāni nibbānārammaṇāni vipassanānāma hontīti. **Sahajātanamṇāmarūpānanti** dvihetuka tihetuka javanasaha jātananti adhippāyo. **Aññamaññaṃ sahajāta rūpānācāti** aññamaññaṃ assaca paṭisandhikkhaṇe kammasamuṭṭhānarūpānaṃ pavattiyāṃ citta samuṭṭhānarūpānaṃ. Esa nayo paratthapi. Pañcavokārabhave paṭisandhikkhaṇe viññānaṃ vatthunā vinā patiṭṭhaṃ nalabhati. Vatthucateṇa vinā patiṭṭhaṃ nalabhatīti vuttaṃ **paṭisandhikkhaṇe vatthuvipākā aññamaññanti**. Aññamaññapaccaye yo attano upatthambhakaṃ paccupatthambhati. Soeva paccayuppannabhāvaṃ gacchati. Cittasamuṭṭhāna rūpānā cittaṃ kiñci upatthambhetuṃ nasakkonti. Tathā upādārūpānā mahābhūtetī vuttaṃ **cittacetāsikā dhammāññamaññanti**ādi.

[235] Vibhāvaniyaṃ pana

“Yasmā pana aññamaññūvatthambhanavaseneva aññamaññapaccayatā. Na sahajātamattatoti pavattiyāṃ rūpaṃ nāmānaṃ aññamaññapaccayo na hoti. Tasmā vuttaṃ cittacetāsikā dhammā aññamaññanti” vuttaṃ. Tattha na sahajātamattatoti etena yadi sahajātamattato aññamaññapaccayatāsīyā. Evaṃsati pavattiyāṃ rūpaṃ nāmānaṃ aññamaññapaccayo siyāti anuññātaṃ hoti. Sahajātapaccayepi pana pavattiyāṃ rūpaṃ nāmānaṃ paccayo nahotiyeva. Tasmā na sundarametanti.

Chavatthūni sattanaṃ viññāṇadhātūnanti ettha vatthusahajāta nissayo vatthupurejātanissayo vatthārammaṇapurejātanissayoti tividho vatthunissayo. Tattha paṭisandhikkhaṇe vatthu vipākānaṃ khandhānaṃ vatthusahajātanissayo. Yaṃ pana pavattiyāṃ purejātaṃ, vatthuṃ nissāya cittaṃ uppajjati, taṃ tassa cittassa vatthupurejātanissayonāma. Yaṃ pana purejātaṃ vatthu yassa cittassa nissayoceva hoti ārammaṇāna, taṃ tassa vatthārammaṇa purejātanissayonāma. Vuttañhetuṃ paṭṭhāne ārammaṇa nissaya purejātavippayutta atthiavigatanti tīṇīti. Kathaṅca taṃ cittassa nissayoca ārammaṇāna hotīti. Paccuppannaṃ vatthuṃ ārabba sammasanavasena vā assādanādivasena vā iddhividhakiccādhīṭṭhānavasena vā cittaṃ uppajjati, evaṃ taṃ cittassa nissayoca ārammaṇāna hotīti. Vuttañhetuṃ paṭṭhāne-ajjhataṃ vatthuṃ aniccato dukkhato vipassati, assādeti. Abhinandati. Taṃ ārabba rāgo uppajjati, diṭṭhi uppajjati, vicikicchā uppajjati, uddhaccaṃ uppajjati. Domanassaṃ uppajjati.

Ettha pana ācariyā imaṃ vatthārammaṇapurejātanissayaṃ nāma maraṇāsannakāleeva vācanāmaggaṃ āropayimsu. Ayaṃpanettha tesāṃ adhippāyo. Aṭṭhakathāyaṃ tāva anīṭṭhe ṭhāne āvajjanena vinā vīthiccittānaṃ pavatti paṭisiddhā hoti. Tathā ekāvajjanavīthi yaṅca cittānaṃ ārammaṇaṃ nāma dhammatoca kālatoca abhinnameva icchanti aṭṭhakathācariyā. Pakatikāleca cittānānaṃ pacceka vatthunissayāni honti. Tasmā yadā paccuppannaṃ ajjhataṃ vatthuṃ ārabba aniccādivasena sammasanti, etaṃ mamātivā assādeti, tadāyaṃ vatthu āvajjitaṃ hoti. Javanānipi tadeva gaṇhanti. Na attano attano nissayavatthūni. Yadi hi tānivā aññaṃ vā ārammaṇaṃ gaṇheyyuṃ. Nirāvajjanānānaṃ javanāni honti. Kasmā, āvajjanena āvajjitaṃ agahetvā aññaṃ gahetvā pavattanatoti. Bhinnā rammaṇānānaṃ honti. Pacchā uppannāni paccekavatthūnivā aññaṃ vā gahetvā pavattanatoti. Naca tathā sakkā bhavituṃ aṭṭhakathā virodhato. Tasmā so vatthārammaṇa purejātapaccayo pakati kāle na sakkā laddhanti. Maraṇāsannakāle pana sabbāni āvajjanādīni cittāni ekameva vatthuṃ nissāya pavattantīti taṃ ārabba pavattānaṃ āvajjanādīnaṃ tesāṃ tadeva vatthuca ārammaṇāna hoti. Evañhi sati tesāṃ nirāvajjanatāvā bhinnārammaṇatāvā natthīti ayaṃ tesāṃ adhippāyoti.

Tattha pana yadi āvajjanena āvajjitaṃ vatthuṃ agahetvā attano attano nissayavatthūni gaṇheyyuṃ. Nirāvajjanānānaṃ javanāni bhavēyyunti idaṃ tāva na yujjati. Āvajjanena āvajji tappakārasseva gahaṇato. Yathā hi āvajjanampi vatthuntveva āvajjati. Tathā javanānānaṃ vatthuntveva javanti. No aññathāti natthi javanānaṃ nirāvajjanatāti. Yathā ca nirāvajjanatā natthi, tathā bhinnārammaṇatāpi tesāṃ natthiyeva. Kasmā, vibhāgassa asambhavato. Nahi santatighanavasena ekībhūtamiva pubbāparaṃ

pavatta mānesu bahūsu vatthusu ekamekaṃ vatthum idamevāti visum katvā āvajjanaṃvājavanānivā gahetuṃ sakkonti. Naca tathā asakkuṇeyyesu ṭhānesu ekantena dhammatovā kālatovā bhinnā rammaṇatānāma sakkā laddhanti iti bhinnārammaṇatāpi tesam natthi yevāti. Ettāvatā imassa vatthārammaṇapurejātanissaya vidhānassa pakatikālepi labbhamānatā sādhitā hotīti.

Apica, sabbaṃ paccuppannaṃ attano rūpakāyaṃ ārabba rūpaṃ me aniccantivā etaṃ mamātivā samanupassantānaṃ ajjhatarūpesu idaṃ nāmarūpaṃ tassacittassa ārammaṇaṃ nahotīti navattabbaṃ. Ārammaṇa bhūtesu pana tesu kiñci ārammaṇamattaṃ kiñci ārammaṇapurejātaṃ kiñci vatthārammaṇapurejātaṃ hotīti sakkā vattuntī. **Kabaḷī kāro āhāroti** kāmāvacarasattānaṃ paṭisandhito paṭṭhāya uppanno catusamuṭṭhānika rūpāhāroceva bahiddhāhāroca. Gabbhaseyyakānañhi yāva mātuyā āhārapharaṇaṃ nalabbhati, tāva kalalādikālesu tisamuṭṭhāniko ajjhattāhāroceva upatthambhanakiccaṃ sādheti. Vuttañhetam paṭṭhāne-paṭisandhikkhaṇe kabaḷīkāro āhāro imassa kāyassa āhārapaccayena paccayoti, ojaṭṭhamakarūpasamuṭṭhāpanaṃ panassa bahiddhāhārupatthambhanaṃ laddhakāleyevāti daṭṭhabbaṃ. Yadi evaṃ –

Yañcassa bhūñjati mātā, annaṃ pānañca bhojanaṃ. Tena so tattha yāpeti, mātukucchigato tiroti

Kasmā vuttanti. Pākaṭāhārena tassa yakkhassa bodhanatthanti. **Imassakāyassāti** gabbhaseyyakānaṃ tāva paṭisandhicittassa uppādakkhaṇe ekasamuṭṭhānikassa ṭhitibhaṅgakkhaṇesu dvisamuṭṭhāni kassa tatoparaṃ tisamuṭṭhānikassa ojaṭṭhāraṇakāle catusamuṭṭhānikassaca kāyassa. Itaresampi yathāsambhavaṃ vattabbaṃ. Rūpaloke pana vināpi duvidhena ojaṭṭhāraṇakāle appanāpatta kammavisesena siddhassa suciraṃpi addhānaṃ pharituṃ samatthassa rūpa jīvitindriyassa tathārūpānañca bhavaṅgapariyāpannānaṃ arūpāhāraṇaṃ vasena anekakappānīpi attabhāvassa pavatti veditabbā. Etenupāyena kammajakāyabahutaresu devesu petanirayesuca suciraṃpi kālaṃ bahiddhāhārena vinā attabhāvassa pavatti vattabbā. Tesu pana ajjhattāhāropi labbhatiyevāti kiñcāpi okkantikkhaṇe vipākakkhandhāpi vatthussa vippayuttapaccayā honti. Te pana **cittacetasi kādhammā saha jātārūpānanti** ettha saṅgayhissantīti katvā **okkantikkhaṇevatthuvipākānanti** vuttaṃ.

Sabbathāti sabbapakāraṃ saha jātāntiādinā yojetabbaṃ. Pakāroca tividho hoti saha jātāpaccayotiādivasena veditabbo. **Rūpajīvitamiccayanti** evaṃ porāṇehi vutto ayaṃ atthipaccayo avigatāpaccayocāti yojetabbaṃ. Nanu kabaḷīkārahāro rūpajīvitindriyañca saha jāte saṅgahetabbaṃ. Evañhi sati tividhova atthipaccayo siyāti. Na. Sahajananasañkhātassa sahauppādanalakkhaṇassa abhāvā. Sahauppādanalakkhaṇo hi saha jātāpaccayo. Kabaḷīkārahāroca ojaṭṭhamakarūpāni uppādentopi attano ṭhitikkhaṇeeva uppādeti, no uppādakkaṇe. Yathāca mahābhūtā saha jātārūpāni upatthambhantā attanā saha uppādanapubbakāeva upatthambhanti, na tathā so āhāro. So pana vināva sahauppādanakiccena saha jātānīpi asaha jātānīpi upatthambhatīti rūpajīvitampi saha uppādanakiccena vināva saha jātārūpāni anupāleti. Iti ime dvepi dhammā saha jāta lakkhaṇābhāvāeva saha jātāpaccaye asaṅgahitā. Idāni sabbepi catuvīsātipaccayā saṅgayhamānā cattāropaccayā hontīti dassetuṃ **ārammaṇūpanissaya.La.** **Samodhānaṃ gacchantīti** vuttaṃ. Tatrāyaṃ samodhānavidhi, catuvīsatiyā paccayesu adhipati paccayo tāva duvidho ārammaṇasaha jātavasena. Tattha ārammaṇādhipati tīsu kammavajjesu samodhānaṃ gacchati. Ārammaṇa mattampi hi kamma saha samodhānaṃ nagacchati. Kuto adhipati bhūnti.

Ettha siyā, kasmā ārammaṇamattaṃpi.La. Na gacchatīti vuttaṃ. Nanu kammārammaṇāpi paṭisandhibhavaṅgacutiyo hontīti. Saccam. Ettha pana mūlaṭṭikāyaṃ kammaṃ pana tasmim kate pavattamānānaṃ katūpacita bhāvena kamma paccayo hoti. Na ārammaṇākārena. Visaya mattatāvasenaca ārammaṇapaccayo hoti. Na santānavisesanaṃ katvā phaluppādanasañkhātēna kamma paccayākārena. Tasmā te paccayākāra visabhāgattā saha ghaṭanaṃ nagacchantīti visajjitanti. Saha jātādhipati pana atthipaccaye. Nissayapaccayo tividho saha jātō vatthupurejātō vatthārammaṇapurejātōti. Tattha purimā dve atthipaccaye, pacchimo pana dvīsu ārammaṇatthi paccayesu. So ce garukato hoti upanissayepīti. Purejātāpaccayo tividho ārammaṇapurejātō vatthupure jātō vatthārammaṇapurejātōti. Tattha

vatthupurejāto atthipaccaye. Itare dve dvīsu ārammaṇatthipaccayesu. Tece garukatā honti. Upanissayepīti. Kammaṇapaccayo duvidho sahaḥjāto nānākkhaṇikoti. Tattha sahaḥjāto atthipaccaye. Nānākkhaṇiko pana duvidho balavā dubbaloca. Tatthaca balavā duvidho akālīko kālīkoca, tadubhayāpi upanissaye. Dubbalo pana visuṃ kammaṇapaccayoyeva. Sabbo āhārapaccayo sabbo ca indriyapaccayo atthipaccaye.

Vip̄payuttapaccayo catubbidho sahaḥjāto vatthupurejāto vatthārammaṇapurejāto pacchājātoti. Tattha purimā dve pacchimoca atthipaccaye. Tatīyo pana dvīsu ārammaṇatthi paccayesu. So ce garukato hoti, upanissayepīti. Sesesu pana sattarasapaccayesu hetu, sahaḥjāto, aññamañña, vipāka, jhāna, magga, sampayutta, avigatavasena atthapaccayā pacchā jātoca atthipaccaye. Anantara samanantara āsevana natthi vigata vasena pañcapaccayā upanissayeti. Iti sabbepi catuvīsatiṇipaccayā sabhāgasaṅghavasena saṃkhippamānā ārammaṇādīsū catūsū paccayesu samodhānaṃ gacchantīti.

[236] Vibhāvanīyaṃ pana

Tesu catūsū ekekasmim̄pi sabbe catuvīsatiṇipaccayā samodhānaṃ gacchantīti iminā adhippāyena yaṃ vuttaṃ “nahi so kocipaccayoti”ādi. Taṃ sabbaṃpi ācariyassa matimattameva.

[237] Yañhi tattha

“Nahi so kocipaccayo atthi. Yo cittacetasi kānaṃ ārammaṇabhāvaṃ nagaccheyyāti” vuttaṃ, taṃ tāva na yujjati. Nahi idha dhammasarūpamattena samodhānaṃ adhippetam̄. Paccayaṭṭhena saheva adhippetam̄. Naca hetādiṇipaccayaṭṭho ārammaṇādiṇipaccayaṭṭho hotīti. Esanayo “saka sakapaccayuppannassa upanissayabhāvaṃ nagacchatīti” etthāpi.

Ettha pana yo sakasakapaccayuppannassa upanissayabhāvaṃ nagacchati. Nahi so koci paccayo atthīti yojanā.

[238] Yañca tattha

“Kammahetukattāca lokappavattiyā phalāhetūpacāra vasena sabbepi kammaṇabhāvaṃ nātivattantīti” vuttaṃ.

[239] Yañca

“Teca paramatthato lokasammutivasenaca vijjamānā yevāti” vuttaṃ. Tadubhayaṃ pana sabbaso sāsanayutti yāpi viruddhamevāti.

Etthāti etasmim̄ paṭṭhānanaye. **Sabbatthāpīti** sabbesu saha jātasabhāgesu paccayesu. Yasmā pana paṭṭisandhiviññānaṃ nāma nāmarūpaṇaṃ aññamaññaṇapaṭṭibaddhaokāse cutiparicchinnassa sakalassa tassa tassa bhavassa sīsabhūtaṃ bījabhūtaṇca hoti. Yato sakalakāyabhūtassa nānarūpārūpasantānassa nibbatti hoti. Bījato viya mahārukkhassa. Yathāha –

Viññānaṇca hi ānanda mātukucchismim̄ na okkamissatha. Apinukho nāmarūpaṇaṃ mātukucchismim̄ samuccissathāti. No hetam̄ bhante. Viññānaṇca hi ānanda mātukucchismim̄ okkamitvā vakkamissatha. Apinukho nāmarūpaṇaṃ itthattāya abhinibbattissathāti. Nohetam̄ bhante. Viññānaṇca hi ānanda daharasseva sato vocchijjissatha kumārassavā kumārikāyavā. Apinukho nāmarūpaṇaṃ vuddhim̄ viruḥhim̄ vepullam̄ āpajjissathāti. Nohetam̄ bhante. Tasmā hi ānanda eseva hetu esa nidānaṃ esa samudayo esa paccayo nāmarūpassa. Yadidaṃ viññānanti.

Tattha samuccissathāti vaḍḍhissatha. Nāmarūpaṇhi viññānaṇssa vaḍḍhiyevāti. Vakkamissathāti

bhijjissatha. Itthatthāyāti īdisassa attabhāvassa atthāyāti attho. Vuddhiṃ viruḷhiṃ vepullanti pathamavayavasena vuddhiṃ. Majjhimavayavasena viruḷhiṃ. Pacchimavayavasena vepullanti atthakathāyaṃ vuttaṃ. Tasmā paṭisandhikkhaṇe rūpuppattiyā ekantena viññānapaccayatā veditabbā. Evaṃ uppannañca panetaṃ paṭisandhirūpaṃ puna sayāṃ tasmim bhava yāva cutiyā pavattamānānaṃ sabbāsaṃ catusamuttānikarūpasantatīnaṃ sita bhūtaṃ bījabhūtañca hoti. Atibalavantampi hi cittaṃ purimuppannāya rūpapaveṇiyā asati rūpaṃ janetuṃ nasakkoti. Evaṃ utu āhārāpīti. Tatoyeva hi arūpabhava kāmāvacarādīni rūpajanakacittānīpi tattha rūpaṃ najanentīti. Asaññasattepi utu samuttānarūpasantatiyo pathamuppannāya kammajarūpasantatiyā vijja mānattāeva uppajjantīti. Vuttañhi vibhaṅgaṭikāyaṃ arūpaṃ pana rūpassa okāso na hotīti yasmim rūpe sati cittaṃ aññaṃ rūpaṃ uppādeyya. Tadeva tattha natthīti attho. Purimarūpassāpi hi paccayabhāvo atthi puttassa pitisadisatādassanatoti. Etthaca puttassa pitisadisatādassanatoti etena imamattaṃ dasseti. Yathā tiṇarukkhaṇaṃ bījabhāvasaṅkhātaṃ niyāmarūpaṃnāma atthi. Yassa ānubhāvena tannibbattātiṇarukkhaṃ vaḍḍhantā yathāvā tathāvā avaḍḍhitvāattanā samānabījehieva tiṇarukkhehi sabbaso sadisā kāraṃ gahetvā vaḍḍhanti. Evamevaṃ gabbhaseyyakānaṃ sattānaṃ yoni bhāvasaṅkhātaṃ niyāma rūpaṃnāma atthi. Yassānubhāvena te samāna jātikheieva kulehi visesato mātāpitūhi eva sabbaso sadisarūpasanṭhānā hontī. Iti bījanīyāmo viya yoninīyāmo pi hoti. Soca paṭisandhirūpasseva ānubhāvoti veditabbo.

Apica, ayaṃ yoninīyāmonāma kalalakālādīsu puttānaṃ sarīresu mātāpitūhi samudāgataṃ utujarūpasantānaṃeva. Yassa ānubhāvena taṃsantānaṃ samānajātikasattasanṭhānasadisāṃ attano ñātikulasadisāñca hoti. Yathāhiitthibhāvādirūpaṃ sattānaṃ itthilingādīni bījarūpañca tiṇarukkhaṇaṃ taṃtaṃvaṇṇasanṭhānā dīni niyāmeti. Evaṃ yonirūpaṃ nānājātivaseṇa sattānaṃ niyāmakāṃ vavattāpakāṃ hotīti. Ettāvataṃ pavattiyāṃ thapetvā cittajarūpaṃ sabbesaṃ tisamuttānikarūpaṃ uppattiyā cittanirapekkhatā purimuppanna rūpapaveṇi paṭibaddhatāca sādhitā hoti. Tenevaca tesāṃ cittassa thitibhaṅgakkhaṇesupi cittarahite nirodhasamāpatti kālepi uppatti hotīti. Tena vuttaṃ **sahajātarūpanti panetthāti**ādi. Ittiādi nigamaṇaṃ. Tattha **sambhavaṃ**ti yathā sambhavaṃ. Sambhavātivā sambhūtā. **Ajjhattaṅcāti** ajjhattabhūtāca. **Bahiddhācāti** bahiddhābhūtāca. **Sanṅhatāti** sanṅhatabhūtā. **Asanṅhatāti** asanṅhatabhūtā. Evaṃ tekālikāca kālamuttāca ajjhattabahiddhā sambhūtāca. Tathā sanṅhatāsanṅhatabhūtāca paññatti nāmarūpaṇaṃ vaseṇa tivadhā thitā dhammā paṭṭhāne sabbathā catuvīsati paccayānāma hontīti yojanā. Etthaca tivadhā thitānaṃ dhammānaṃ tekālikādibhāve sati catuvīsati paccayānaṃ pi yathāsambhavaṃ tekālikādibhedo siddho hoti. Tattha ārammaṇaadhīpati upanissayapaccayā tekālikā kālamuttāca hontī.

[240] Vibhāvaniyaṃ pana

“Ārammaṇaadhīpati upanissayapaccayānaṃ tikālikānanti” vuttaṃ. Taṃ na yujjati.

Paññattinibbānānaṃ pi kālamuttānaṃ tesu pavitṭhattāti. Tattha imasmim bhava abhinavānaṃ dhanadhaññabhogānaṃvā vijjāsippasutapari yattīnaṃvā sīlasamādhīpaññānaṃvā bhavantare bhavasampattibhoga sampatti maggaphalasampattīnaṃvā paṭilābhatthāya pubbayogaṃ karontassa anāgatānaṃ tāsāṃ upanissayapaccayatā veditabbā. Paṭṭhāne pana anāgataṃ cakkhusampadaṃ patthayamāno sota, ghāna, jivhā, kāyasampadaṃ, vaṇṇasampadaṃ, sadda, gandha, rasa, phoṭṭhabbasampadaṃ patthayamāno anāgate khandhe patthayamāno dānaṃ deti sīlaṃ samādiyatītiādinā bhavantarapariyāpanāeva sampattiyo vuttā. Tā pana dānādīnaṃ kammānaṃ anurūpavasena vuttāti daṭṭhabbā. Kamma paccayo pana paccuppannātīvasena dvikāliko. Anantara samanantara āsevana natthi vigata paccayā atītakālikā. Sesā pannarasa paccayā paccuppannakālikāti. Ajjhattabahiddhāduke ārammaṇā dhīpati saha jāta añña māñña nissaya upanissaya purejāta āhāra atthi avigatā ajjhattabahiddhā hontī. Sesā cuddasa paccayā ajjhattāva. Ārammaṇa adhīpati upanissayā sanṅhatā asanṅhatāca hontī. Sesā sanṅhatāvāti. **Pañcavidhampiarūpanti** pavuccati. Kasmā, kadācīpi rūpasanṅkhātaṃ sanṭhānatthaṃ anupagamanato nāmantica pavuccati. Kasmā, adhivacanasanṅkhātanāmābhīdhānavaseneva suṇantehi gahetabbabhāvupagamanatoti.

169. Paññapīyatīti paññatti. Ayaṃpi eko vacanatthoti lokiyamahājanehi thapīyati. Voharīyati ceva sampaticchī yaticāti attho. Yokoci sammutisaccabhūto byañjanattho. Tathā paññāpetabbā atthā paññapīyanti etāyāti paññatti. Byañjanatthajotako paññattisaddoti evaṃ duvidhā paññattīti vuttaṃ **tatoavasesā.La. Duvidhāhotīti**. Tattha **paññāpīyattā paññattīti** attha paññattimāha. **Paññāpanatopaññattīti** saddapaññattiṃ. **Taṃtaṃbhūtavipariṇāmākāranti** pathaviyādīnaṃ tesam tesam mahābhūtānaṃ adhimattabhāvappakārasaṅkhātāṃ tathā tathā pariṇā mākāraṃ. Pavattivisesākāranti attho. **Upādāyāti** paṭicca. Nissāya. Pathamaṃ cittaṃ gahetvāti attho. **Tathātathā paññattāti** ayaṃ pathavīnāma ayaṃ pabbatonāmāti evamādi nayena mahājanena paññattā, kathitā, voharītāti attho. **Pathavipabbatādīkāti**ādisaddena nadi samuddādīkāyo saṅgaṇhati. Ayaṃ samūhapaññattināma.

[241] **Vibhāvaniyaṃ** pana

“Saṅghānapaññattīti” vuttā. Sā yuttā viya nadissati.

Nahi idha saṅghānaṃ padhānaṃ hotīti. **Sambhārasannivesākāranti** kaṭṭhādīnaṃ sambhāraṇaṃ tathā tathā sannivesākāraṃ. Etthāpi ādisaddena nāvādayo saṅgaṇhati. Ayaṃ saṅghāna paññatti. Kaṭṭhādayo eva hi gehākārena saṅghitā gehanti rathākārena saṅghitā rathoti vuccantīti.

[242] **Vibhāvaniyaṃ** pana

“Samūhapaññattīti” vuttaṃ. Taṃ na yujjati.

Nahi idha samūho padhānanti. Purisapuggalādīkā sattapaññatti upādāpaññattītipi vuccati. **Candāvaṭṭanādīkānti** candasūriyādīnaṃ sineruṃ padakkhiṇaṃ katvā āvaṭṭanādīkaṃ. Yato candimasūriyā uđenti, sā pubbadisānāma. Pubbataraṃ laddhappakāsattā. Yattha pana atthaṃ gacchanti, sā pacchimadisānāma. Pacchāladdhappakāsattā. Tāsaṃ dakkhiṇapassā disā vuḍḍhiatthena dakkhiṇadisānāma. Itarā pana uccataraṭṭhena uttarādisātī vuccati. Yadā sūriyo uđeti, tadā sakalassa ahasa pubbhāgatā pubbanhoti vuccatīti. Evamādikā disā paññatti kālapaññattiyonāma. Ādisaddena thalaninnādīkā desapaññatti saṅgahitāti. **Asamphuṭṭhākāranti** mahābhūtānaṃ aññamaññaṃ asamphusanākāraṃ. Ayaṃ ākāsapaññattināma. **Taṃ taṃ bhūtanimittanti** pathavīkasiṇādīkaṃ uddhumātakādīkaṃca bhūtanimittaṃ. Nīlakasiṇādīkaṃ vaṇṇanimittaṃca ettheva saṅgayhati. **Bhāvanā visesanti** parikkammādīkaṃ bhāvanāvisesaṃca. Etena parikkammanimitta ugghanimitta paṭibhāganimittānaṃ siddhakāraṇaṃ vadati. Ayaṃ nimittapaññattināma.

Evamādibhedāti ettha ādisaddena aṭṭhakathāyaṃ āgatā upādāpaññatti upanidhāpaññattīdayo saṅgahitā. **Paramatthato avijjamānāpīti** etena sammutito laddhabhāvaṃ dasseti. Teneva hi tāsaṃ vijjamānabhāvaṃ gahetvā tathā tathā voharantānaṃ musāvādonāma nahotīti. **Atthacchāyākārenāti** taṃ taṃ bhūtādīnaṃ paramatthānaṃ samūhasaṅghānādīchāyākārena. Atthacchā yākārenātīvā saddābhidheyyasaṅkhātēna dabbapaṭibimbākārena saviggahākārenāti attho, **taṃtaṃupādāyāti** paramatthadhammānaṃ taṃtaṃpavattivisesaṃ upādāya. **Upanidhāyāti** olumbiya. **Parikkappiyamānāti** parikkappabuddhiyā parikkappetvā gayhamānā. Ettha pana evamādipabhedā ālambaṇabhūtā parikkappiyamānā sabbā paññatti paññāpīyatīti atthēna paññattīti yojanā. **Saṅkhāyatīti** gaṇīyati. Gaṇanupagaṃ katvā thapīyatīti attho. **Samaññāyatīti** sammannīyati. Nāmaṃ, nāmakammaṃ, nāmadheyyaṃ, nirutti, byañjanaṃ, abhilāpoti ime cha **nāma nāmakammā**. Tattha atthe namatīti nāmaṃ. Atthavisayaṃ eva hutvā pavattatīti attho. Attanica atthaṃ nāmetīti nāmaṃ. Piṭakattayasāṅkhāte hi nāme satī taduggaṇhantānaṃ sabbe tadatthā padepade vākyevākye āgacchanti yevāti.

Apica suṇantānaṃ ñāṇaṃ taṃtaṃatthābhīmukhaṃ nāmetīti nāmaṃ nāmagahaṇavasena kattabbattā nāmaeva kammanti nāmakammaṃ. Dhīyati dhārīyatīti dheyyaṃ. Nāmaeva dheyyanti nāmadheyyaṃ. Aviditapakkhe ṭhito attho etāya tato nīharitvā vuccati kathīyatīti nirutti. Atthassa

byañjanato pākaṭakaraṇato byañjanam. Abhibyattam katvā lapīyati kathīyati attho etenāti abhilāpo. Etthaca vaṇṇapaññatti, akkharapaññatti, sarapaññatti, dīghapaññatti, rassa paññatti. Byañjanavaggaghosāghosapaññatti, līngapaññatti. Padapaññatti, vākyapaññattiyopi etasseva pabhedāti daṭṭhabbā. Paramatthato vijjamānesu atthesu pavattā paññatti **vijjamānapaññatti** nāma. Avijja mānesu bhūmipabbatādīsu pavattā paññatti **avijjamānapaññatti** nāma. Etā eva samāsaṭṭhānam patvā dvipadasamyogavasena itarā catassopi hontīti dassetum **tatthātiādi** vuttam. **Etāya paññāpentīti** etena vijjamānam attham paññapenti etāyāti vijjamānapaññattīti imamatham vadati. Esanayo paratthapi. Cha abhiññā assāti chaḷabhiññoti katvā visesanabhūtānam channaṃ abhiññānam vijjamānattā visesitabbabhūtassa puggalassa avijjamānattā chaḷa bhiññoti **vijjamānenaavijjamānapaññatti** nāma. Itthī avijjamānā saddo vijjamānoti itthiyāsaddo itthisaddoti **avijjamānena vijjamāna paññatti** nāma. Cakkhuca cakkhuviññāṇa ubhayampi vijjamānanti cakkhusmiṃ viññāṇam cakkhuviññāṇanti **vijjamānavijjamānapaññatti** nāma. Rājāca puttoca dvepi avijjamānāevāti rañño putto rājaputtoti **avijjamānenaavijjamānapaññattināmāti** imamatham dassento **ubhinnantiādimāha**.

Ettha pana vacanato ca vacanatthato ca vinimuttā saddasabhāvā nāmapaññattināma visum natthīti vadanti. Tam na yujjati. Atthajotaka bhāvena visum siddhattā. Saddo hi nāma akkharapadabyañjanabhāvam upagato yeva atthajotane samattho hoti. Paramattha saddoca khaṇiko cuṇṇavicuṇṇabhūto tabbhāvam upagato nahotīti. Tasmā saddasabhāvānāma paññattināma visum atthiyeva. Atthibhāvocassā vacanasaddam sutvā anantare akkhara pada byañjanagocaracittassa tadanantareca tadatthavijānanacittassa pavattiyā pākaṭoti dassento gāthādvayam āha. Tattha **vacīghosā nusārenāti** uccāriyamānasaddasaṅkhātassa vacīghosassa ārammaṇakaraṇasaṅkhātena anusārena uppannāya sotaviññāṇa vīthiyā pavattiyā anantare uppannassa manodvārassa gocara bhūtā sāyam paññattīti sambandho. Kīdisī pana sāyam paññattīti āha **atthāyassā.La. Tatoparanti**. Tattha **tatoparanti** tato nāmapaññattārammaṇassa manodvārassa uppattito param atthā viññāyantīti sambandho. Yassā nāmapaññattiyā anusārena paramatthapaññattibhūtā atthā viññāyanti. Sā ayam paññatti lokasaṅketanimmitāti viññeyyāti yojanā.

Etthaca **sotaviññāṇavīthiyāti** ettha atītasaddamattā rammaṇā tadanuvattikānāma manoviññāṇavīthipi saṅgahitāti daṭṭhabbā. Vuttañhi sārattadīpaniyam-tena vuttavacane yattakāni akkharāni honti. Tesu ekamekam paccuppannam atītaṇca gahetvā sota viññāṇavīthiyā manoviññāṇavīthiyāca uppajjitvā niruddhāya avasāne tāni akkharāni sampiṇḍetvā akkharasamūham gahetvā ekā manoviññāṇavīthi uppajjitvā nirujjhati. Tadanantaram ayam akkharasamūho etassa nāmanti nāmapaññattigahaṇavasena aparāya manoviññāṇa vīthiyā uppajjitvā niruddhāya tadanantaram uppannāya manoviññāṇa vīthiyā ayametassa atthoti pakatiyā tadatthavijānanam sambhavatīti. Maṇisāramañjūsāyam pana tadanuvattikavīthito param ekam vinicchayavīthim viññattigahaṇavīthiṇca vadati. Tato param ekakkhare sadde ekatthajotikāya nāmapaññattiyā gahaṇam hoti. Yā vadantassa pubbhāge manasā vavatthāpito paññattisaddonāma vuccati. Tatoparam tadatthagahaṇanti. Īdisesu pana ṭhānesu tattha tattha javanavīthivārānam paṭipāṭikathanam nāma padhānapākaṭagahaṇavasenevāti daṭṭhabbā. Ekaccharakkhaṇe aneka koṭisatasahassāni cittāni uppajjantīti hi vuttam. Tathā –

Ekamatto bhava rasso, dvimatto dīghamuccate;
Timattotupluto ñeyyo, byañjanam addhamattikanticam.

Na ca paramatthasaddasaṅghāṭānam satasahassampi ekakkharam nāma bhavitum pahoti. Tasmā idha bahum vicāraṇā amhehi nakatāti.

Iti paramatthadīpaniyānāma abhidhammatthasaṅgahassa

Catutthavaṇṇanāya aṭṭhamassa paccayasāṅgahassa

Paramatthadīpanā niṭṭhitā.

Kammaṭṭhāna saṅgha paramatthadīpanī

170. Evaṃ aṭṭhahi paricchedehi sapaccayapabhedam nāmarūpa vibhāgam dassetvā idāni viditanāmarūpa vibhāgassa kammaṭṭhānavidhānam dassento **samathavipassanānanti**ādī māha. Ito paccaya saṅghato paraṃ samathavipassanānam bhāvanānam duvidhampi kammaṭṭhānam yathākkamaṃ pavakkhāmīti yojanā. Tattha kilese aññepivā vitakkādayo oḷārikadhamme sametīti **samatho**. Tathā pavatto ekaggaṭṭāsāṅkhāto samādhi. Viseseṇa passanti etāyāti **vipassanā**. Aniccānupassanādikā bhāvanāpaññā. Tāya hi yogino khandhesu lokiyamahājanena passitaṃ itthipurisādikaṃ niccasukhādikaṃca atikkamitvā viseseṇa aniccādikameva passantīti. Bhāvetabbāti **bhāvanā**. Bhāventivā cittasantānam etāhīti bhāvanā. Kiriyā kammaṃ. Tiṭṭhati etthāti ṭhānam. Kammaṃsa ṭhānanti **kammaṭṭhānam**. Vīriyārabhāsāṅkhātassa yogakammaṃsa pavattiṭṭhānanti attho. Kasīṇamaṇḍalādikaṃ kasīṇabhāvanādikaṃca. Ādimajjha pariyoṣānānañhi samudāyabhūkaṃ ekametam pathavīkaṣiṇa bhāvanādikaṃ bhāvanākammaṃpi attano avayavabhūtaṃsa yoga kammaṃsa pavattiṭṭhānam sambhavatīti.

Vibhāvanīyaṃ pana

Uttaruttara yogakammaṃsa padaṭṭhānatāya kammaṭṭhānabhūtam bhāvanāvidhiṅcātipi vuttam. Tampi yujjatiyeva.

Yogakammamevavā sukhavisesānam adhiṭṭhānaṭṭhenaṭṭhānanti kammaṭṭhānam. **Tatthāti** tasmim duvidhepi kammaṭṭhāne. **Samathasaṅgaheti** samatha kammaṭṭhānasaṅgahe. **Dasakasiṇānīti** dasakasiṇamaṇḍalāni kasīṇajjhānānīca. Tadubhayānīpi hi yogānuyogasaṅkhātassa samatha kammaṃsa pavattiṭṭhānattā samathakammaṭṭhānānīnāma hontīti. **Dasaasubhāti** dasaasubhavatthūni asubhajjhānānīca. **Dasaanussati yoti** buddhaguṇādīni dasaanussatiṭṭhānāni anussaraṇasati yoca. Sesānīpi yathānurūpaṃ vattabbānīti. Caraṇam cariyā. Samudācaraṇanti attho. Pavattibahulatāti vuttam hoti. Rāgassa cariyā **rāgacariyā**. Rāgacaritāti pāṭho, so aṭṭhakathāyaṃ natthi, puggaḷaṭṭhāneeva so yuttoti. Esanayo sesesupi.

[243] Yo pana vibhāvanīyaṃ

Cariyānam saṃsaggabhedo vutto. So idha nādhīpeto.

Nahi kammaṭṭhānānamnāma saṃsaggacaritassapi ekassa dve tīṇi dātabbāni hotīti. Teneva hi so bhedo aṭṭhakathāyaṃ nagarukatoti. Sabbāpi appanāya pubbabhāgapavattā kāmāvacara bhāvanā parikammabhāvanānāma. Sā pana appanāya āsanne dūreti duvidhā hoti. Tattha yā āsanne, sā appanam upecca samīpe ṭhatvā pavattattā upacārabhāvanāti vuccati. Itarā pana parikamma bhāvanāevanāma. Iti parikammabhāvanāpi samānā pubbāparavisesa pākāṭabhāvattam aṭṭhakathāsu dvīhi nāmehi gahitāti vuttam **parikammabhāvanā**. **La. Tissobhāvanāti** tāsam pana viseso parato āgamissati. **Parikammanimittanti** parikammabhāvanāya ārammaṇabhūtam kasīṇamaṇḍalādinimittam. Tañca tassā ārammaṇa bhāvena ekampi samānam pubbāparavisesapākāṭabhāvattam parikammanimittam uggahanimittanti dvidhā bhinditvā vuttam. Tesampi viseso āgamissati. Vidatthīcaturāṅgulasāṅkhātēna parittapamāṇēnavā khala maṇḍalādisāṅkhātēna mahantapamāṇēnavā kataṃ akataṃvā pathavī maṇḍalatalameva asesapharitabbaṭṭhena kasīṇanti pathavīkaṣiṇam. Sakalasaddapariyāyo hi kasīṇasaddo. Yathā kasīṇena jambudīpassati. Tasmā yattake pathavītale nimittam gaṇhāti, tattakam cittena asesam pharivā eva gahetabbaṃ hoti. Na pana tassa ekadesē ṭhatvāti, tena vuttam pathavīmaṇḍalatalameva asesapharitabbaṭṭhena kasīṇanti pathavīkaṣiṇanti. Esanayo sesakasiṇesupīti. Etthaca, avibhūtavaṇṇāya pathavīyā eka talabhāvenasannivīṭṭhāsāṅṭhānapaññattīdhapathavīkaṣiṇamnāma. Tathā **āpokasiṇam tejakasiṇāca**. Phuṭṭhaṭṭhāne cittena saṅṭhānam katvā gahitā vāyuvattī **vāyokasiṇamnāma**. Nīlavaṇṇavisīṭṭhāekā saṅṭhānapaññattī **nīlakasiṇamnāma**. Tathā **pītalohito dātakasiṇānīpi**. Candasūriyaaggobhāsavisīṭṭhā katthaci dissamānā saṅṭhānapaññattī **ālokakasiṇamnāma**. Tittichiddavāta

pānachiddādīsu dissamānā ākāsavisiṭṭhā saṅghānapaññatti **ākāsakaṣiṇaṃnāmāti**. Ativiya dhumātaṃ sunabhāvaṃ gatanti uddhumātaṃ. Tadeva kucchitattā **uddhumātaṃ**. Tathābhūtaṃ chavasariṃsasettaṃ nāmaṃ. Tadeva pūtibhāvaṃ gatakāle purimavaṇṇaṃ vijahitvā puna nīlabhāvaṃ pattāṃ **vinīlakāṃ**. Tadeva puna paccitvā tato tato visandamānapubbayuttaṃ **vipubbakāṃ**. Yuddhabhūmiyādīsu satthena majjhe chinditvā thapitaṃ virūpachinnasarīraṃ **vicchinnakāṃnāma**. Soṇa siṅgālādīhi vividhākārena khāyitapadesayuttaṃ sarīraṃ **vikkhāyitakāṃnāma**. Soṇasiṅgālādīhi eva khaṇḍākhaṇḍikāṃ katvā apakaḍḍhitvā tato tato khittaṅgapaccaṅgayuttaṃ sarīraṃ **vittakkhikāṃ** nāma. Aṅgapaccaṅgesu satthena hanitvā khaṇḍākhaṇḍikāṃ katvā tato tato khittaṅgapaccaṅgayuttaṃ sarīraṃ **hatavikkhittakāṃnāma**. Paggharita lohitasarīraṃ **lohitaṃ** nāma. Puḷuvaparipūraṃ sarīraṃ **puḷuvakāṃ**. Sakalo aṭṭhisāṅghāṭovā ekamekaṃvā aṭṭhi **aṭṭhikāṃ** nāma. Punappunaṃ nirantaraṃ saraṇaṃ anussati. Buddhaguṇassa anussati **buddhānussati**. Esa nayo sesāsūpīti. Tattha arahatādiguṇo buddhaguṇonāma. Svakkhātādiguṇo dhammaguṇonāma. Suppaṭipannaṭādiguṇo saṅhaguṇo nāma. Attano sīlassa akhaṇḍatādi guṇo sīlaguṇonāma. Attano dānassa vīgatamalamaccheratādi guṇo cāgaguṇonāma. Attānaṃ devattaṃvā sakkattaṃvā brahmattaṃvā vahitūṃ samatthā attano saddhādiguṇā devatāguṇānāma. Vatta paṭipattivasenavā dhutaṅgasamādānavasenaṃvā jhānasamāpattivasenaṃvā vipassanāvasenaṃvā attano santāne ciraṃvikālaṃ vikkhambhitānaṃ kāmarāgādīnaṃ vūpasamo attanādhigatanibbānaṃ upasamonāma. Ekabhavapariyāpannaṃ attano khandhasantānaṃ bhedo maraṇaṃ nāma. Kesakāyādīnaṃ nānakāyānaṃ samūhabhūto ayaṃ kāyo kāyonāma. Attani nirantaraṃ pavattamānā assāsa passāsā ānāpāṇaṃnāma. Mijjati siniyhatīti **mettā**. Yaṃ ārabba uppajjati. Tassa hitasukhaṃ avippakīṇaṃ katvā saṅgaṇhatīti attho. Mittassavā eṣā mittesuvā bhavāti mettā. Atthato pana parasattānaṃ hitūpasamhāravasena pavatto adosoeva. Parasattānaṃ hitūpasamhāra hitamodana ahitāpanayanasaṅkhātāṃ byāpāratayaṃ pahāya tesāṃ kammaṣakatānubrūhanavasena upapattito yuttito pekkhatīti **upekkhā**. Tathā pavattā tatramajjhataṭṭhāeva. Appamāṇesussattesu bhavāti **appamaññā**. Na hi ettakesu eva sattesu etā pavattetabbā. Na tato aññesūti evaṃ etāsaṃ visayaparicchhedonāma atthīti. Evaṃsantepi ādikammaṃ kena ādito ekasmiṃ puggale attano bhāvanācittaṃ laddhāsevaṃ laddhāvesesaṅgaṃ katvā pacchā dvīsu tīsūtiādīnaṃ vaḍḍhitvā sīmasambhedo odhisoparaṇa anodhisoparaṇa disāpharaṇāniva kattabbānīti. Yaṃ pana vibhaṅge mettāsahagatena cetāsā ekaṃ disaṃ pharivā viharatītiādīnaṃ paṭisambhidāmaggeca sabbesattā averā hontūtiādīnaṃ mettāvidhānaṃ nāma vuttaṃ. Taṃ mettājhāne vasībhāvappattānaṃ vasena vuttanti daṭṭhabbaṃ. Etā pana visesena dosapakkhikānaṃ kilesānaṃ ujupaṭipakkhabhūtā hontīti taṃsamaṅginoca niccaṃ sommahadayaabhāvena brahmasādi sattā brahmānonāma. Tesāṃ viharoti **brahmavihāro**. Seṭṭhānaṃvā seṭṭhabhūtovā viharoti brahmavihāro. **Āhāreti** asita pīta khāyita sāyita vasena catuppabhede ajjhohatāhāre. **Paṭikūlasaññāti** āhārahetu anubhavitabbānaṃ dukkhadhammānaṃ paccavekkhanavasena sarasapaṭikūlatā paccavekkhanavasena āsayanidhāna pakkāpakkaphalanissandapaccavekkhana vasena ca tattha nikanti pahānasaññā. **Catudhātuvavatthānanti** sarīragatānaṃ pathaviādīnaṃ catunnaṃ mahādhātūnaṃ salakkhaṇā divasena visuṃ visuṃ paricchinditvā samanupassanaṃ. Tañhi catasso dhātuyo vavatthapiyanti vinicchiyanti sallakkhiyanti etenāti catudhātuvavatthānanti vuccatīti. Asubhasaññā bhāvetabbā rāgassapahānāyāti vacanato **dasaasubhā.La. Rāgacaritassa sappāyāti** vuttaṃ. Tattha rāgena caratīti rāgacarito. So hi kāmaṃ kadāci dosena caratī. Kadāci mohena. Kadāci saddhādīsūpi aññatarena. Rāgo panassa ussanno. Tasmā ussanna rāgena so rāgacaritoti saṅkhyāṃ gacchatīti. Esanayo sesesūpi. Mettā bhāvetabbā byāpādassa pahānāyāti vacanato mettādīnaṃ tiṇṇaṃ brahmavihāraṇaṃ yathākkamaṃ byāpādavihiṃsā aratūnaṃ nissaraṇatāvacaṇato suparisuddhānaṅga vaṇṇakasiṇānaṃ dosavatthuttābhāvato **catassoappamaññāyo.La. Dosacaritassāti** vuttaṃ. Etthaca ādikammikasavāyaṃ cariyavibhāgo. Upekkhāca ādikammikassa nasambhavati. Vakkhatīhi **upekkhāpañcamajjhānikāti**. Tasmā yassa purimā tisso sappāyā. Tassa tadanugatikā upekkhāpi sappāyānāma hotīti katvā catasso appamaññāyoti vuttanti daṭṭhabbaṃ. Itarathā nissaraṇañhetāṃ rāgassa. Yadiḍaṃ upekkhā cetō vimuttīti vacanato upekkhā rāgacaritassāti vattabbaṃ siyāti. **Nīlādīna cattāri kasiṇānīti** idaṅga manāpiyarūpāni nīlādīni sandhāya vuttaṃ. Amanāpiyāni pana tāni rāgacaritasseva sappāyānīti. Ānāpāṇasati bhāvetabbā vitakkupacchedāyāti vacanato **ānāpāṇavittakkacaritassāti** vuttaṃ. Mohacarito pana pakatiyā pamādadabahuḷo hoti vikkhittacittoca. Ānāpāṇānaṃ nirantaraṃ pavattamānaṃ tassa satīṃ uppādentāṃ viya pavattatīti taṃ **mohacaritassasappāyanti** vuttaṃ siyā.

[244] Vibhāvanīyaṃ pana

Buddhivisayabhāvena mohapaṭipakkhattāti kāraṇaṃ vuttaṃ. Taṃ yuttaṃ viya na dissati.

Evañhi sati so buddhacaritena saha vattabbo siyāti. Kāmañca buddhaguṇādayopi ekantena buddhivisayāeva honti. Te pana visesato saddhaṃ upabrūhayantīti vuttaṃ **buddhānussati ādayo.La. Saddhācaritassāti.** Paramatthato sukhumatarāni maraṇādīni vipulabuddhīnaṃ eva visayānāma hontīti vuttaṃ **marāṇa. La. Buddhicaritassāti. Sesānipanasabbānipīti** cattāri bhūta kasiṇāni dve ālokākāsakasiṇāni cattāro āruppācāti dasavidhāni kammaṭṭhānāni. **Tatthāpīti** tesu dasasu sesa kammaṭṭhānesupi. Puthulaṃ khalamanḍalādīpamaṇaṃ mohacaritassa sappāyaṃ. Sambādhasmiñhi okāse cittaṃ bhiyyo saṃmohaṃ āpajjati. Khuddakaṃ vidatthacaturaṅgulapamaṇaṃ vitakkacaritasseva sappāyaṃ. Mahantañhi vitakkasandhāvanassa paccayo hotīti. Tatthaca **vitakkacaritassevāti** ettha evasaddo khuddakantipade yujjati. Vitakkacaritassa khuddakameva sappāyaṃ. Na puthulanti. Sabbañcetaṃ ujuvipaccanikavaseneva atisappāyatāyaca vuttaṃ. Rāgādīnaṃ pana avikkhambhikā saddhādīnañca anupakārikā kusalabhāvanānāma natthītipi aṭṭhakathāyaṃ vuttaṃ. **Sabbatthāpīti** sabbesupi cattālīsa kammaṭṭhānesu. **Parikammabhāvanā labbhateva** parikammaena vinā ekassapi kammaṭṭhānassa asampajjanato. **Dasasukammaṭṭhānesuupacārabhāvanāva sampajjati natthi appanā.** Kasmā iti ce. Buddha dhamma saṅgha sīla cāga devatā upasama guṇānaṃ tāva gambhīratāya nānāppakāraguṇā nussaraṇādhimuttatāyagāti hi aṭṭhakathāyaṃ vuttaṃ. Tattha gambhīra tāyāti etena ekekassapi guṇapadassa gambhīratā tabbisayo samādhi mahāsamudde sasako viya tattha appanaṃ patvā niccalabhāvena patiṭṭhātuṃ nasakkotīti dasseti. Nānāppakāra guṇānussaraṇādhimuttatāyavāti etena tesam guṇānaṃ atappa niyasabhāvattā ettakeeva guṇapade ṭhatvā appanaṃ pāpessāmīti attano cittaṃ sandhāretuṃpi nasakkotīti dasseti. Sesesu pana maraṇasaññāvavattānesu maraṇaṃ tāva sabhāva dhammattā saṃvejanīyadhammattāca itarānica dve sabhāvadhammatāya gambhīratā appanāya patiṭṭhā nahontīti. Yadiyaṃ kasmā lokuttarajjhānāni atigambhīre nibbānasaṅkhāte sabhāvadhamme appanaṃ pāpuṇanti. Dutīyacatutthāruppajjhānānica pathamataṭṭīyārūpa saṅkhāte sabhāvadhammeti. Vuccate, lokuttarajjhānāni tāva visuddhito sammāsanañānatoca paṭṭhāya anukkamena uparuparipavattānaṃ visuddhibhāvanānaṃ balena atigambhīrepi nibbānasaṅkhāte sabhāvadhamme appanābhāvena patiṭṭhātuṃ sakkonti. Āruppajjhānānica appanāpattasseva pañcamajjhānasamādhissa udayamattāni hontīti ārammaṇasamatikkamanamattakaraṇena sabhāvadhammepi ārammaṇe appanābhāvena patiṭṭhātuṃ sakkontīti. **Tatthāpīti** tesu samatiṃsaappanākammaṭṭhānesupi. Pañcakajjhāne niyuttāni **pañcakajjhāni kāni.** Jhānapañcakassa ārammaṇabhāvayogyānīti vuttaṃhoti. Paṭikūlārammaṇānīnāma atianiṭṭhāni lūkhāni cīttarabhījanane paridubbālāni hontīti na tāni attani cittaṃ rocetvā thapetuṃ sakkonti. Tasmā vitakkena vinā cittaṃ tattha ekaggaṃ hutvā na tiṭṭhati. Vitakkabaleneva tiṭṭhatīti vuttaṃ **dasaasubhā.La. Pathamajjhānikāti.** Yadiyaṃ kathaṃ tesu somanassajjhānaṃ hotīti nīvaraṇasantāpaṃ pahānabalenaceva taṃ taṃ ānisaṃsadassana nīnābalenaca. Byādhidukkhapīlītaṃ rōgino vamanavirecanapavattiyāṃ viya bahuṃ dāni vettanaṃ labhissāmīti ānisaṃsadassāvino pupphacchaṭṭakassa gūtharāsīdassane viya cāti daṭṭhabbaṃ. Mettādayo tayo brahmavihārā domanassasamuṭṭhitānaṃ byāpādavihiṃ sāratīnaṃ nissaraṇabhūtā hontīti na te kadāci somanassena vinā appanaṃ pāpuṇantīti vuttaṃ **mettādayo tayo catukkajjhānikāti.** Upekkhā pana sattesu sabbaso udāsinapakkhe ṭhatvā bhāvitabbattā kadāci upekkhāvedanāya vinā appanaṃ napāpuṇātīti vuttaṃ **upekkhāpañcamajjhānikāti. Cattāropanāruppāti** kasiṇuggahātimākāsādīni cattāri āruppārammaṇāni. **Sabbatthāpīti** sabbesupi cattālīsakammaṭṭhānesu. **Yathārahanti** taṃtaṃārammaṇānurūpaṃ. Ārammaṇena vinā parikammaṇnāma na sijjhati. Ārammaṇassa suṭṭhu daḷhavihbhūtagahaṇasaṅkhātena uggahena vinā ārammaṇasampatti nāma natthi. Asatica ārammaṇasampattiyā upacārajjhānaṃpi tāva na sampajjati. Pageva appanājjhānanti vuttaṃ **parikammanimittaṃ.La. Labbhantevāti.** Tattha **sabbatthāpīti** sabbesupi cattālīsakammaṭṭhānesu. **Yathārahanti** taṃtaṃkammaṭṭhānānurūpaṃ. **Pariyāyenāti** idaṃ pana kassaci ārammaṇassa cakkhunā passantasseva avibhūtatarattā vuttaṃ. Yattha pana pathamaṃ sabhāvadhammaṃ gaṇhitvā pacchā tādise tadākāre taṃsaṅghāne paññattārammaṇe upacārovā appanāvā pavattati. Tattheva paṭibhāganimittamaṇnāma labbhatīti vuttaṃ **paṭibhāga nimittaṃpanāti**adi. Vuttamevatthaṃ daḷhaṃ karonto **tatthahīti**ādīmāha. Evaṃ samathakamme

pathamaṃ uggahakosallaṃ dassetvā idāni ādito paṭṭhāya bhāvanāvidhānaṃ dassento **kathanti**ādi māha. **Nimittaṃ uggāṇhantassāti** ārammaṇassa yathā saṅghitaṃ ākāraṃ citte uparupari vibhūtaṃ katvā gaṇhantassa samanupassantassa. **Sācabhāvanāti** uggāṇhāṅkārena pavatta javanavīthiparaṃparasāṅkhātā sā cittabhāvanā parikkammabhāvanā nāma. Punappunaṃ karaṇavasena vaḍḍhanākārasaṅghitattā. Samuggahitaṃ hotīti vatvā yathā suṭṭhu uggahitaṃ samuggahitaṃnāma hoti taṃ dassetuṃ **cakkhunāpassantassevamanodvārassa āpātamaḡatanti** vuttaṃ. Tattha **manodvārassaāpātamaḡatanti** cakkhūni nimmilitvāvā aññasmiṃ ṭhāne ṭhatvāvā āvajjantassa cakkhunā diṭṭhasadisamaṃ manodvāre paccupaṭṭhitaṃ hoti. Uggahanimittaṃnāma. Suṭṭhu avinassamānaṃ katvā gahitattā. Sāca bhāvanā samādhīyati. Na tāva bhāvanantarabhāvaṃ pāpuṇāṭīti adhippāyo. **Tathā samāhitassāti** tena matthakapattena parikkammamādhinā samāhitassa etassa yogino. **Tatoparanti** uggahanimittupatti to paraṃ. Bhāvanamanuyuñjantassa citte sannisinnanti sambandho. Tattha **anuyuñjantassāti** nirantaraṃ padahantassa. **Tappaṭibhāganti** sabhāva dhammabhūtena tena uggahanimittena sadisaṃ. **Vatthudhammavimuccitanti** meghavalāhakantarato vā rāhumukhatovā nikkhantacandamaṇḍalaṃ viya sabhāvadhammabhūtā uggahanimittato vimuccitvā visuṃ upaṭṭhitaṃ. Tatoyeva paññattisaṅkhātamaṃ nimittapaññattiiti kathitaṃ. **Bhāvanā mayanti** kevalaṃ bhāvanācittabalena pasiddhaṃ. **Ālambaṇanti** tadeva samuggahitaṃ nimittālambaṇaṃ **cittesannisannaṃsamappitaṃhotīti** manodvārikacittasantāne sannisinnaṃ niccalabhāvena saṅghitaṃ hutvā suṭṭhu appitaṃ pavesitaṃ hoti. **Tanti** nimittālambaṇaṃ pavuccatīti sambandho. Yasmā candamaṇḍalādīkassa viya tassa nimittālambaṇassa parisuddhapariyodātabhāvena upaṭṭhitatānāma kilesamalavikkhambhanaena parisuddhapariyodātabhāvaṃ patvā obhāsajātassa cittassa vaseneva hoti. Na tassa ālambaṇassa vasena. Nahi paññatti dhamme tādiso guṇonāma upalabbhatīti. Tasmā paṭibhāga nimitte samuppanne nīvaraṇasaṅkhātānaṃ paṭibandhakadhammānaṃ vikkhambhitatā siddhā hotīti vuttaṃ **tatopaṭṭhāyati**ādi. Paṭibandhanti nīvārenti nissaraṇapakkhikaṃ cittaṃ pātenti paṭibandhā. Nīvaraṇa dhammā. Visesena pahīnā paṭibandhā etāyati paṭibandhavippahīnā. **Samāsevantaṃsāti** suṭṭhu āsevantaṃ. Sattavidhaṃ nimitta rakkhaṇavidhānaṃ sampādetvā cakkavattigabbhaṃ viya suṭṭhu rakkhitvā punappunaṃ bhāvanāvasena sevantaṃsāti attho.

Āvāso gocaro bhassaṃ, puggalo bhojanaṃ utu;
Iriyāpathoti satte te, asappāye vivajjaye.

Sappāye satta sevetha, evaṅhi paṭipajjato;
Nacireneva kālena, hoti kassaci appanāti hi vuttaṃ.

Rūpāvacarapathamajjhānaṃappetīti kāmataṅhāya visayabhāvaṃ atikkamitvā sātisaṃyamaṃ saṅhasukhumabhāvappattaṃ upacārajjhānato sataguṇenavā sahaṃsaguṇenavā thiratarajjhānaṅgayuttaṃ rūpāvacara saṅkhātamaṃ pathamajjhānaṃ tasmīṃ nimitte anupavisitvā viya vattatīti attho. Tameva pathamajjhānaṃ vasībhūtaṃ katvāti sambandho. Pañcasu vasītāsu pana pathamajjhānato vuṭṭhāya pathamaṃ vitakkaṃ āvajjati. Tato vicāraṃ. Tato pītiṃ. Tato sukhaṃ. Tato samādhīṃ. Tato puna vitakkaṃ. Tato vicāranti evaṃ punappunaṃ jhānaṅgāni āvajjantassa yadā taṃtaṃjhānaṅgālambaṇā cittavārā antarantarā katipayabhavaṅgehi antaritā hutvā nirantarabhūtā viya pavattanti. Tadā āvajjana paccavekkhana vasitāyo vasībhūtānāma honti. Etā pana sabbaññubuddhānaṃ matthakappattā honti. Tesaṅhi yamakapāṭi hāriyādīkalesu lahukapavattiṃ icchantānaṃ taṃtaṃjhānaṅgā rammaṇācittavārāpi catupañcajavānikāeva pavattanti. Antarabhavaṅgāni pacchimavārassa upacāra bhūtāni bhavaṅga calana saṅkhātāni dveeva pavattanti. Yattha aparaṃ jhānaṅgaṃ āpāta māgacchati. Nahi ārammaṇe āpātamaṃ anāgate bhavaṅgaṃ calati. Naca vinā bhavaṅgacalanena āvajjanuppattināma atthīti. Thapetvā sabbaññubuddhe aññesaṃ vasībhāvapattānaṃpi antarantarā bhavaṅgacāre gaṇaṇānāma natthīti paṭisambhidāmaggaṭṭhakathāyaṃ vuttaṃ. Visuddhimagge pana ayaṃ pana matthakappattāvasī bhagavato yamakapāṭihāriyakāle labbhati. Aññesaṃvā evarūpe kāleti vuttaṃ. Jhānassa sīghataraṃ samāpajjanasamatthātā samāpajjanavasīnāma. Teneva hi pālīyaṃ samāpajjane dandhāyitattaṃ natthīti vuttaṃ. Esanayo sesāsūpīti. Tathā samāpajjitaṃ jhānaṃ accharāmatādivasena atiparittakampi khaṇaṃ thapetuṃ samatthātā adhiṭṭhānavasīnāma. Samāpajjitajjhānato sīghataraṃ vuṭṭhātuṃ samatthātā

vuṭṭhānavasīnāma. Paccavekkhanavasī pana āvajjanavasīyā siddhāya siddhāeva hotīti.

Vibhāvanīyaṃ pana

Yattakaṃ kālaṃ icchati. Tattakaṃ cirataraṃ jhānaṃ thapetuṃ samatthataḍḍhiṭṭhānavasītanāmātipi vuttaṃ. Tathā paricchinna kālato anto avuṭṭhahitvā yathāparicchinna kālavaseneva vuṭṭhānasamatthataḍḍhiṭṭhānavasītanāmāti. Taṃpi yujjatiyeva.

Pāliyañhi pathamajjhānaṃ yatthicchakaṃ yadicchakaṃ yāvaticchakaṃ adhiṭṭhāti. Adhiṭṭhānāya dandhāyittatṭaṃ natthītiadinā sīghataraṃvā hotu. Cirataraṃvā. Yattakaṃ kālaṃ jhānaṃ thapetuṃvā yattake kāle tato uṭṭhātuṃvā icchati. Tattakaṃ kālaṃ anūnaṃvā anadhikaṃvā katvā adhiṭṭhātuṃvā vuṭṭhātuṃvā samatthatāpi dassitāyeva hotīti. Evañcasati vuṭṭhānavasītāpi adhiṭṭhānavasītāya siddhāya siddhāevāti tāsāṃ dvinnāṃ visesakappaṇāpi nippayojanā hotīti daṭṭhabbā. Vasanaṃ vasī. Samatthatāti attho. Issara bhāvoti vuttaṃ hoti. Vasīeva vasitā. Yathā devoeva devatāti. Katvā padahatoti sambandho. **Vitakkādikaṃ oḷārikaṅgaṃ pahānāyāti** ettha pathamajjhānaṃ tāva vasībhūtaṃ katvā thitassa vitakko oḷārikato upaṭṭhāti. Tadā ahovatame avitakkaṃ jhānaṃ assāti evamassa ajjhāsayo saṅghāti. Tadā avitakkaṃ jhānaṃ samāpajjissāmīti puna tasmīṃ paṭibhāganimitte parikkammaṃ karontassa sā bhāvanā vitakkavirāgabhāvanānāma hoti. Sāpi yāva vitakke nikanti na pariyādiyati, tāva parikkammabhāvanānāma. Pariyādinnāya pana vitakkanikantiyā upacāra bhāvanānāma hoti. Esanayo sesajjhānupacāresupi. Evaṃ taṃtaṃjhānaṅgavirāgabhāvanābalena vitakkādikassa oḷārikassa tassa tassa jhānaṅgassa pajjanaṭṭhāya. **Vicārādisukhamaṅguppattiyāti** vicārādīnaṃ sukhamānaṃ catunnaṃ tiṇṇaṃ dvinnāṃ puna dvinnāṃvā jhānaṅgānaṃ tena tena vitakkādīnā oḷārikena aṅgena vinā puna uppattiyā. **Pāhatoti** padahantassa. Padhānanāmakaṃ ātāpavīriyaṃ karontassāti attho. **Dutīyajjhānādayoti** dutīyajjhānādīni sesarūpāvacaṃrajjhānāni. **Yathārahanti** idaṃ dvāvīsakammaṭṭhānesu dutīyajjhānādīnaṃ anurūpāni kasiṇānāpāṇāni sandhāya vuttaṃ. Avasesesu pana aṭṭhārasakammaṭṭhānesu yasmā arūpajjhānāni nāma ārammaṇātikkaṃmanavaseneva pavattanti. Tadatikkamaṇatthañca kasiṇuggahāṇaṃnāma hoti. Tasmā yesu taduggahāṇaṃ sambhavati. Tāniyeva kasiṇāni dassetuṃ **ākāsavajjitakasiṇesūti** vuttaṃ. Ākāsakasiṇāñhi ugghāṭiyamānaṃpi ākāsa meva hotīti natthi tattha tadatikkamaṇasambhavoti. **Ugghāṭetvāti** yathādiṭṭhe kasiṇanimitte kasiṇanimittasaññāṃ akatvā tattha ākāsaṃ anantaṃ ākāsaṃ anantanti ākāsaññāṃ pavattentassa citte taṃkasiṇanimittaṃ antaradhāyati. Tappamāṇaṃ ākāsameva upaṭṭhāti. Evaṃ kasiṇasaññāvidhamanena ākāsaññāpavattanena yaṃkiñci kasiṇaṃ ugghāṭetvā viyojetvāti attho. Laddhaṃ ākāsaṃ ārabbhāti pāṭṭhasena sambandho. Esanayo pathamā ruppaviññāṇantiādīsipi. **Anantavasenāti** anantaṃ ākāsaṃ evaṃ pavattamanasikārasena. **Santametam paṇītametanti parikkammaṃ karontassāti** ettha tathā sambhāvetvā parikkammaṃ karontassapi ārammaṇassa samatikkantattā upari jhānaṃ hotiyevāti vuttaṃ **catutthārūppamappetīti**. **Parikkammaṃkatvāti** so bhagavā itipi arahantiadinā samanussaraṇaparikkammaṃ katvā. **Tasminti** tasmīṃ buddhaguṇādike ālambaṇe. Bhūmatthe cetam bhummavacanaṃ. **Nimitteti** tassa ārammaṇassa ākārasaṅkhāte nimitte. Bhāvalakkaṇe cetam bhummavacanaṃ. **Sādhukamuggahiteti** ārammaṇassa vibhūtatara vasenavā cittassa tasmīṃ ninnapaṇapabbhārasenavā suṭṭhu ugghāte. **Upacāroca sampajjati** ariyasāvakaṇaṃ diṭṭhasaccānanti adhippāyo. Itaresaṃpi vā maraṇasaññāvavattānesūti. Etthaca nīvaraṇavikkhambhanaṃ jhānaṅgapātubhāvenacaupacārasampadā veditabbā. Evaṃ cattālīsakammaṭṭhānesuyathārahaṃsamathajjhānānaṃ pavattim dassetvāidānitesusamathajjhānesukasiṇajjhānānaṃ nisandabhūtaṃabhiññā pavattim dassetuṃ **abhiññāvasenapavattamānantiādi** vuttaṃ. Tattha yo katādhikāro hoti. Āsannaṃbhave samathajjhānesu katābhiyogovā hoti, pūritabodhisambhāro mahāpurisa jātikovā. Tassa aṭṭhavidhesu navavidhesuvā samathajjhānesusijjha mānesu abhiññāpi sijjhatiyeva. Rūpajjhānamattesupi sijjhantesu sijjhati yevātipi vadanti. Teneva hi aṭṭhasāliniyaṃ visuddhimageca āruppajjhānaṃpaccayabhāvaṃanupagatassapiākāsakasiṇajjhānaṃ abhiññāpādakatāsambhavo vuttoti. Dīghanikāyattakathāyaṃ pana nahi aṭṭhasu samāpattīsū cuddasahākārehi ciṇṇavasībhāvaṃ vinā upari abhiññādhigamo hotīti vuttaṃ. Taṃ pana thapetvā purisa visese avasesānaṃ bahūnaṃ

ādikammikakulaputtānaṃ sādharmaṇavasena vuttanti yuttaṃ. Teneva hi visuddhimagge imehi pana cuddasahi ākārehi cittaṃ aparidametvā pubbe abhāvitabhāvano ādikammiko yogāvacarō iddhivikubbanāṃ sampādessatīti netāṃ t̄hānaṃ vijjatīti vuttaṃ. Tasmā tādīsānaṃ aṭṭhasu samāpattīsu ciṇṇavasībhāvānaṃ abhiññākamme ādikammikakulaputtānaṃ kaṣiṇā nulomato kaṣiṇapaṭilomatotiādinā nayena vuttehi cuddasahi ākārehi attano rūpapañcamajjhānacittaṃ paridametvā tikkhaṃ sūraṃ abhinīhārakkhamaṃ katvā idāni iddhivikubbanāṃ karissā mīti ārabhantānaṃ abhiññāvasena pavattamānaṃ pana rūpāvacarapañca majjhānaṃ rūpādīsū chasu ālambaṇesu yathārahaṃ appetīti yojanā veditabbā. **Abhiññāpādakapañcamajjhānā vuṭṭhahitvā** abhiññāya pādakatthāya yaṃabhiññājātikaṃ rūpāvacarapañcamajjhānaṃ sabbapathamaṃ samāpajjīyati. Tato bhavaṅgapavattivasena vuṭṭhahitvā. Adhiṭṭhātabbanti adhiṭṭheyyaṃ. Savatthukaṃ satarūpasahassarūpādikaṃ nimmitarūpaṃ. Taṃ adhiṭṭheyyaṃ ādi yassa avatthukassa āvibhāvatirobhāvādikassa kammassatī **adhiṭṭheyyādikam.** **Āvajjitvā parikammaṃkarontassatī** ettha iddhividhe tāva yaṃyaṃsatādikaṃ nimmitarūpaṃvā āvibhāvādikaṃ nimmitakammaṃvā nipphādetuṃ icchati. Taṃ taṃ avajjitvā sallakkhetvā sataṃ homi sahaṃsaṃ homītivā sataṃ hotu sahaṃsaṃ hotūtivā idañcīdañca hotu evañcevañca hotūtivā parikammaṃ karontassa. Dibbasotādīsū pana yaṃ yaṃ ārammaṇaṃ sotuṃvā passituṃvā jānituṃvā anussarituṃvā icchati. Taṃ taṃ sallakkhetvā asukassa asukānaṃvā saddaṃ suṇomītiādinā parikammaṃ karontassa. Aṭṭhakathāyaṃ pana parikammaṃ katvā puna pādakajjhānasamāpajjanaṃ āgatameva. Yathāha abhiññāpādakajjhānaṃ samāpajjitvā vuṭṭhāya sace sataṃ icchati. Sataṃ homīti parikammaṃ katvā puna abhiññāpādakaṃ jhānaṃ samāpajjitvā vuṭṭhāya adhiṭṭhāti. Adhiṭṭhānacittena saheva sataṃ hotīti. Tatthaca ādito pādakajjhānasamāpajjanaṃ parikamma cittaṃ samādānatthāya hoti. Pacchimaṃ pana abhiññāya anu balappadānatthāyāti. Tathā hi pādakajjhānabalena suṭṭhu samāhitam parikammacittaṃnāma attano visaye abhiññācittagatikaṃ hoti. Pubbenivāsānussaraṇakāle teneva cittaṃ tasmiṃ bhava atītaṃ dhammajātaṃ yāva paṭisandhiyā jānāti. Teneva hi aṭṭhakathāyaṃ taṃsampayuttaṃ ṇānaṃ parikammaṃsamādhiññānti vuttaṃ. Atītaṃsaññāntipi vuccatīti. Sesābhiññāsupi tassa ṇānaṃsa visayaviseso yathārahaṃ vattabboti. Therena pana pacchimaṃ pādakajjhānasamāpajjanaṃnāma na sabbesaṃ hoti. Na hi abhiññāsu vasībhāvapattānaṃ puna pādakajjhānena kiccaṃ atthīti katvā taṃ idha nagahitanti daṭṭhabbaṃ. **Rūpādīsūālambaṇesuyathārahamaṃappetīti** ettha iddhividhaññānaṃ tāva tekālikabhūtesu chasu ārammaṇesu pavattati. Tañhi rūpādīsū chasu ārammaṇadhammesu yaṃ yaṃ nipphādeti. Taṃ taṃ ārammaṇaṃ katvā pavattati. Pādakajjhānacittaṃ pana kāyagatikaṃ adhiṭṭhahitvā dīssamānenakāyena ākāsegamanakāle atītaṃ pādakajjhānacittaṃ ārabha pavattati. Kāyaṃ cittagatikaṃ adhiṭṭhahitvā adīssamānena kāyena gamanakāle paccuppannaṃ rūpakāyaṃ ārabha pavattati. Tathāpavattamānassa pana tassa ṇānaṃsa kiñcirūpaṃ ārammaṇa mattaṃ hoti. Kiñci ārammaṇapurejātaṃ. Kiñci vatthārammaṇa purejātaṃ hotīti daṭṭhabbaṃ. Anāgate idaṃnāma hotūti adhiṭṭhāna kāle anāgataṃ taṃtaṃrūpadhammaṃ ārabha pavattatīti. Paccuppanno saddo dibbasotassa ārammaṇaṃ hoti. Atīte sattadivasāni anāgate sattadivasānīti etthantare kāle atīta nāgatapaccuppanabhūtaṃ parassacittaṃ cattārovā khandhā cetopariya ṇānaṃsa. Cittañhi jānanto taṃ sampayuttadhammaṃpi icchanto jānissatiyeva. Evañca katvā paṭṭhāne kusalā khandhā ceto pariyaññānaṃsa yathākammupagaññānaṃsa ārammaṇapaccayena paccayoti ṇāṇadvayaṃ ekato katvā vuttaṃ. Etthaca aṭṭhakathāyaṃ tāva paracittassa paccuppannālambaṇatānāma santativasenavā addhā vasenavā yojitā. Yadi hi khaṇikavasena yojeyya. Āvajjane paccuppannaṃ yaṃkiñci ekaṃ cittaṃ āvajjetvā niruddhe javanānīpi tadeva āvajjanena saddhiṃ niruddhaṃ atītaṃ gaṇhantīti tāni kālato āvajjanena saha bhinnālambaṇāni nāma hontī. Naca anīṭṭhe maggaphalavīthito aññasmīṃ t̄hāne kālamattenāpi tesāṃ tena saha bhinnālambaṇatā aṭṭhakathācariyehi anu matāti. Tasmā īdisesu t̄hānesu paccuppannaṃnāma santativasena addhāvasenaca gahetuṃ yuttanti. Mūlaṭīkāyaṃ pana khaṇikapaccuppanna vaseneva yojitaṃ. Nahi abhidhamme atītārammaṇattikaṃ santati addhānavaseneva vuttanti sakkā vattuṃ. Itarathā paccuppanno dhammo paccuppannassa dhammassa anantarapaccayena paccayo āsevanapaccayena paccayoti vattabbo siyā. Na tu vutto. Atīto dhammo paccuppannassa dhammassa anantarapaccayena paccayo āsevanapaccayena paccayoticceva pana vutto, tasmā āvajjanādīni sabbāni cittāni paccekaṃ attanā khaṇavasena saḥuppannāni parassa cittānigaṇhantīti yuttaṃ, naca tāni dhammato bhinnā lambaṇānīnāma hontī. Gahaṇā kārassa abhinnattā. Āvajjanampi hi cittanteva āvajjati. Javanānica cittaṃ cittanteva javanti. Tānica sabbāni cittānieva hontīti. Atītanantara cutito pana paṭṭhāya atīta khandhā khandhupani bandhā nāma gottakasiṇa nimittādikā paññattīyo nibbānañca pubbenivāsāññānaṃsa ārammaṇaṃ hoti.

Paccuppannaṃ rūpārammaṇaṃ dibbacakkhussāti evaṃ rūpādīsu chasu ālambaṇesu yathāraha mappeti. Idāni abhiññāvasena pavakkhassa tassa pañcamajjhānassa kiccabhedena pabhedam dassetum iddhividhantiādīgātha māha. Tattha yaṃ yaṃ adhiṭṭhāti. Yathā yathāca adhiṭṭhāti. Tassa tassa tathā tathāvā ijjhana saṅkhāto vidho koṭṭhāso pakārovā etassāti **iddhividham**. Taṃ pana tividham adhiṭṭhā niddhi vikubbaniddhi manomayiddhi vasena. Tattha attano pakativannaṃ avijahitvā tasseeva sata sahasādi bahubhāva karaṇa vasenavā ākāśagamañdivasena vā bahiddhā nānāvanna pāṭihāriya dassana vasenavā pavattitā iddhi **adhiṭṭhāniddhināma**. Pakativannaṃ pana vijahitvā attānameva kumāraṇṇanāgavaṇṇādikaṃ katvā dassanavasena pavattitā iddhi **vikubbaniddhināma**. Attano sarīrabhantare aññaṃ sabbaso attanā sadisaṃ sarīraṃ nimminivā nīharitvā dassanavasena pavattitā iddhi **manomayiddhināma**. Dive bhavaṃ dibbam. Devaloke jātanti attho. Dibbañca taṃ sotañcāti dibbasotaṃ. Devānaṃ uḷārakammaṇibhattā dūrepi paṭicchannepi ārammaṇasampaṭicchanasamattham pasādasotaṃ. Dibbasotasadisattā pana idaṃ abhiññāñāṇampi **dibbasotanti** vuccati. Kasinajjhāna saṅkhātenavā dibbavihārena paṭiladdhattā sayañca tasmim dibbavihāre pariyāpannattā dibbañca taṃ sotañcāti dibbasotaṃ. Parassa cittaṃ vijānanti etenāti **paracittavijānaṃ**. Tadeva cetopariyāyanti paricchijja jānanti etenāti katvā cetopariyāñāntipi vuccati. Pubbe nivāso vuccati atītabhavesu attano chasu dvāresu āpātaṃ āgatā suṭṭhu viditā dhammā. Pubbe atītajātīsu gocara nivāsavasena nivasimsu attano chadvārikāni cittāni etthāti katvā. Sabbaññubuddhānaṃ pana paresaṃ chadvāragahitāpi dhammā pubbe nivāso hotiyeva, pubbe nivāsassa anussaraṇaṃ **pubbenivāsānussati**. Idha pana taṃ sampayuttaññaṃ adhippetam. Pubbe vuttanayena dibbañca taṃ cakkhucāti dibbacakkhu. Taṃ sadisattā idaṃ abhiññāñāṇampi **dibbacakkhūti** vuccati. Dibbavihāra vasena paṭiladdhattā sayañca dibbavihārasannissittā dibbañca taṃ cakkhucāti dibbacakkhu. Yathākammupagaññaṃ anāgataṃsaññānti imāni dve ñāṇāni imasseva paribhaṇḍaññānīnāma. Nahi tesam paṭilābhathāya visuṃ cittaṃparidamanaparikkammaṇāma atthi. Dibbacakkhuññaṃ paṭiladdhe tesampi paṭiladdhattāti. Tattha dibbacakkhunā nirayesu dukkhaṃ devesuvā sukhaṃ anubhavante satte disvā tesam atītaṃ kammaṃ jānissāmīti parikkammaṃ karontassa taṃ kammārammaṇaṃ yathākammupagaññaṃ pavattati. Tato cavitvā kattha bhavissanti tesam anāgate pavattiṃ passissāmīti parikkammaṃ karontassa tesam anāgatakhandhārammaṇaṃ anāgataṃsaññaṃ pavattati. Pubbe nivāsānussati ññaṃ viyaca sabbampi anāgatadhammajātaṃ etassa ārammaṇaṃ hotiyeva. Etañhi attano visaye sabbaññutaññāgatikanti aṭṭhakathāyaṃ vuttaṃ.

Vibhāvanīyaṃ pana

Anāgate sattadivasato paṭṭhāya cittacetasikadhammā dutiyadivasato paṭṭhāya yaṃkiñci ārammaṇaṃ etassa visayoti adhippetam. Tampi yuttaṃviya dissati.

Nahi bhavantarepi anāvatadhamme jānituṃ samatthaṃ etaṃ imasmim bhava anāgatadhamme najānātīti sakkā bhavituṃ. Yathā cetam, tathā pubbenivāsāññaṃ imasmim bhava parasantānagate atītadhammeti. Pāliyaṃ pana aṭṭhakathāsuca bhavantaragatatadhammehi eva ññadvayaṃ yojitaṃ. Taṃ pana asādhāraṇakālavasena ānubhāvavisesapākaṭatthaṃ yojitanti yuttaṃ siyāti. **Gocarabhedoti** dasakasiñādīsu gocaresu samathajjhānānaṃ pavattibhedo.

Samathakammaṭṭhānanayo.

171. Sabbalokiyamahājanehi yathādiṭṭhaṃ puggalasattaitthi purisādikaṃ nicca dhuva sukha atta nimittañca atikkamitvā visesena passanti etāyāti vipassanā. Kiriyā kammaṃ. Bhāvanāpayogo. Vipassanāya kammaṃ vipassanākammaṃ. Vipassanā eva vā kammanti vipassanā kammaṃ. Vipassanākammassa ṭhānaṃ adhiṭṭhānaṃ bhūmīti **vipassanākammaṭṭhānaṃ**. Khandhādidhammajātaṃ. Vipassanā kammameva vā uttaruttarassa bhāvanā visesassa ānisaṃsavisesassavā ṭhānaṃ āsannaṃkāraṇanti vipassanākammaṭṭhānaṃ. Tasmim vipassanākammaṭṭhāne sattavidhena visuddhi saṅgaho tīṇi lakkhaṇānītiādīnā sambandho. Niccasīlameva sayañca dussilyamalato visuddhattā kāyaṃ vācañca tato visodhanato visuddhīti **silavisuddhi**. Subhāvita

cittasantānameva sayañca nīvaraṇamalato visuddhattā taṃsamaṅgipuggalañca tato visodhanato visuddhīti **cittavisuddhi**. Cittasīsenā cettha samādhī adhippeto. Dhammavavattānañāṇasaṅkhātā diṭṭhīeva taṃ samaṅgipuggalaṃ sakkāyadīṭṭhimalato visodhanato visuddhīti **diṭṭhivisuddhi**. Soḷasavidhaṃ aṭṭhavidhaṃ kaṅkhaṃ vitaranti atikkamanti etāyāti kaṅkhāvitarāṇā. Paccayapariggahañāṇaṃ. Sā eva taṃsamaṅgipuggalaṃ ahētu diṭṭhī visamahetudiṭṭhīhi saddhiṃ yathāvuttāhi duvidhāhi kaṅkhāhi visodhanato visuddhīti **kaṅkhāvitarāṇavisuddhi**. Maggoca amaggoca maggāmaggā. Tattha ñāṇadassanavisuddhādhiḡamanassa upāyabhūto manasikāraviddhivā ariyamaggovā maggonāma. Tassa anupāyabhūto manasikārovā adhimānavatthūnivā amaggonāma. Maggassa maggato amaggassaca amaggato jānaṃ dassanañca maggāmaggañāṇadassanaṃ. Tameva taṃsamaṅgipuggalaṃ amagge maggasaññāya visodhanato visuddhīti **maggāmaggañāṇadassanavisuddhi** nāma. Upari viṣesaṃ paṭipajanti etāyāti paṭipadā. Vipassanāparaṃparaṃsaṅkhāto pubbhāgamaggo. Paṭipadābhūtaṃ ñāṇadassananti paṭipadāñāṇadassanaṃ. Tameva niccaññādito visuddhattā visuddhīti **paṭipadāñāṇadassanavisuddhināma**, ariyamaggañāṇasaṅkhātā ñāṇadassanameva sammohamalato visuddhattā visuddhīti **ñāṇadassanavisuddhināma**. Etthaca sutamayādivasena siddhaṃ anumāna ñāṇaṃpi ñāṇamevāti taṃ paṭikkhipitvā atthapaccakkhañāṇameva gaheṭuṃ sabbattha dassanagahaṇaṃ katanti veditabbaṃ. Lakkhīyanti sallakkhīyanti ime aniccāevāti ekantena vinicchīyanti dhammā etenāti lakkhaṇaṃ aniccāta eva lakkhaṇanti **aniccalakkhaṇaṃ**. Pubbapade bhāvapaccayalopo. Aññohi anicco, aññā aniccātāti. Tattha yathāgamanakriyāyogena puriso gatoti vuccati. Na pana gamana kriyā puriso. Naca puriso gamanakriyā. Aññā hi kriyā, aññā puriso. Tathā aniccāyogena sabbo saṅkhatadhammo aniccoti vuccati. Na pana aniccāta so dhammo, naca so dhammo aniccāta. Aññā hi aniccāta, aññā so dhammoti. Katamā pana sā aniccātāti. Vipariṇāmā kāro. Jīraṇākāro bhijjanākāroti vuttaṃ hoti. Taṃ pana ākāraṃ disvā tadākāravante dhamme ñāṇaṃ pavattati ayaṃ dhammo aniccoti. Tasmā sā aniccātāyeva idha lakkhaṇanti vuccatīti. Esanayo sesesupi dvīsu. Tattha pana abhinhasaṃpaṭipīḷanākāro dukkhatānāma. Avasavattanākāro anattatānāmāti. Yathāvuttāya pana aniccātāya saha aniccassa dhammassa aniccena vā dhammena saha aniccātāya anuanupassanā **aniccānupassanā**. Esa nayo sesesupi dvīsu. Yāva sarīre dhammānaṃ tividhalakkhaṇayuttatā attano ñāṇena paññāyati. Tāva tesu tividhalakkhaṇavibhāvanavasena punappunaṃ masanaṃ āmasanaṃ sammāsanaṃ. Sammasanākārena pavattaṃ ñāṇaṃ **sammāsanañāṇaṃ**. Udayo vuccati taṃtaṃ khaṇānurūpaṃ taṃtaṃ paccayānurūpañca navanavānaṃ dhammānaṃ pātu bhāvo ceva uparupari vaḍḍhanañca. Vayo vuccati yattha yattha laddhapaccayā navanavā dhammā pātubhavanti ceva vaḍḍhantāca. Tattha tattha aladdhapaccayānaṃ purāṇadhammānaṃ antaradhānaṃ. Samūha santativasena pana udayapakkhassavā vayapakkhassavā samanupassanañāṇaṃ **udayabbayañāṇaṃ**. Tesu pana dvīsu pakkhesu udayakoṭṭhāsonāma uparupari pākāto hutvā āgacchati. Vayakoṭṭhāso pana apākāto. So eva ca aniccātāya paramā koṭṭi tasseva suṭṭhutarāṃ samanupassanañāṇaṃ **bhaṅgañāṇaṃ**. Bhaṅge diṭṭhe evaṃ bhijjanasabhāvānaṃ dhammānaṃ anekasahassasoka dukkhavattubhāvena tathā tathā bhāyitabbapakārasamanupassanañāṇaṃ **bhayañāṇaṃ** nāma. Loke pana kiñci bhayavattumaṃ passantāpi āsanne aññasmiṃ paṭisaraṇe sati na bhāyanti. Asati eva bhāyanti. Evaṃ bhāyitabbānaṃ tesu sabbaso aññapaṭisaraṇābhāvadassanaṃ **ādīnavañāṇaṃ** nāma. Kutoci paṭisaraṇābhāvena tehi ukkaṇṭhatākāra sahitāṃ vipassanāñāṇaṃ **nibbidāñāṇaṃ** nāma. Nibbindīyamānehi tehi attānaṃ vimuccitumaṃ ajjhāsayasahitaṃ vipassanāñāṇaṃ **muccitukamyatāñāṇaṃ** nāma. Suṭṭhu muccitumaṃ icchantassa sīghaṃ muccanattaṃ tesu dhammānaṃ cattālīsāya ākārehi anekādīnavarāsi bhāva paṭisaṅkhānavasena suṭṭhuvipphāratarāṃ pavattamānaṃ vipassanā ñāṇaṃ **paṭisaṅkhāñāṇaṃ** nāma. Tesu pana anekādīnavarāsi bhāve suṭṭhu diṭṭhe saṅkhāresu nikantiyā pariyaḍinnāya idāni muccanupāyo laddhoti adhimattabyāpāraṃ akatvā samena vāyāmena saṅkhāre pariggaṇhantassa saṅkhārapariggahe majjhataḡārasahitaṃ saṅkhāresuvā bhayañca nandiñca pahāya udāsīnabhāvasahitaṃ vipassanāñāṇaṃ **saṅkhārupekkhāñāṇaṃ** nāma. Upari maggappavattimaṃ vahitumaṃ samatthabhāvena magguppattiyā anulomehi thāma balehi sampannaṃ vipassanāñāṇaṃ **anulomañāṇaṃ** nāma. Heṭṭhimānaṃvā ñāṇānaṃtaṃ anulomaṃ hoti lakkhaṇattayassa suṭṭhutarāṃ vibhāvanato. Uparimaggassavā anulomaṃ hoti tassa parikammabhāvato, padaṭṭhānattācātipi anulomañāṇaṃ nāmāti. Atta jīvasuññatādassana balena khandhesu kilesabandhanato vimuccamāno maggo **suññatāvimokkho** nāma. Saṅkhāraṇaṃ yāni nimittāni kilesānaṃ avassayo hoti. Tāni vidhamitvā sabbaso dhammānaṃ anātha bhāva dassana balena

vimuccamāno maggo **animittovimokkho** nāma. Saṅkhāresu sabbaso assāsābhāva dassanabalena vimuccamāno maggo **appaṇihitovimokkhonāma**. **Suññatānupassanā**ti anattānupassanā. Sā hi dhammānaṃ samūhaghana santatighana kiccaghana ārammaṇaghaneṣu taṃtaṃghana vinibbhujjana vasena pavattattā attā iti gahetabbassa kassaci sārassa abhāvānupassanato suññatānupassanāti vuccati. **Animittā nupassanā**ti aniccānupassanā. Sāpi hi santati vicchedana vasena pavattattā ahanti gahitassa nimittassa vidhamanato animittānupassanāti vuccati. **Appaṇihitānupassanā**ti dukkhā nupassanā. Sāpi hi mahādīnavarāsi bhāva vibhāvanavasena pavattattā idaṃ mama etaṃ mamāti gahetabbassa kassaci paṇihita guṇassa abhāvānupassanato appaṇihitānupassanāti vuccatīti. **Pātimokkhasaṃvarasīlanti** vinayapaññattisīlaṃ. Tañhi sabbalo kiyasīlānaṃ jeṭṭhakattā patica hoti. Catubhūmakakusalānaṃ ādipabhavabhūtattā mukhañca. Iti patimukhaṭṭhena pātimokkhanti vuccati. Tamevaca dussilyamaggassa saṃvaraṇato pidahanato saṃvaroti vuccatīti. Yesaṃ dhammānaṃ uppattiyā cakkhādīni indriyāni viphanditāni honti. Lolāni honti. Tadanubandhāca akusaladhammā uppajjanti. Tesāṃ uppatti maggassa saṃvaraṇavasena pavattamānā sati indriya saṃvaronāma. So eva sīlanti **indriyasaṃvarasīlaṃ**. Ajīvanti jīvitaṃ kappenti etenāti ajīvo. Paccayapariyesanavāyāmo. Soeva buddhapaṭikuṭṭhehi pupphadānādīhi micchāpayogehi tividhakuhanavattuhica parisuddhattā **ajīvapārisuddhināma**. Sā eva sīlanti samāso. Tathārūpena parisuddhena bhikkhācārādīnā payogena paṭiladdhānaṃ paccayānaṃ paṭiggahaṇa paribhuñjanakālesu sammohassa gedhassa madassa pamādassaca pahānatthaṃ taṃtaṃpayojanamariyādaṃvā paṭikūlalakkhaṇaṃvā dhātumattalakkhaṇaṃvā pariggahaṇa paccavekkhanavasena pavattaṃ paccayasevane paṭisaṅkhāññaṃ **paccaya sannissitasīlaṃ**nāma. Parisujjhatīti parisuddhi. Parisuddhieva pārisuddhi. Sā eva sīlanti samāso. Cattāri pārisuddhisīlānīti **catupāri suddhisīlaṃ**. Cittavisuddhīti ettha cittasaddena samādhi niddiṭṭhoti vuttaṃ **duvidhopisamādhi cittavisuddhināmāti**. **Lakkhaṇarasapaccupaṭṭhānapadaṭṭhāna vasesanāti** ettha dhammānaṃ paccattasabhāvo lakkhaṇaṃnāma. Aggissa uṇhattaṃ viya. Tena sabhāvena sādhetabbaṃ kiccaṃvā sādhanapaccayā paṭiladdhaguṇasaṅkhātā sampattivā rasonāma. Aggissa parivācana jotānāni viya. Sā eva sampattivā kāriyasaṅkhātā phalaṃvā paccupaṭṭhānaṃnāma. Aggissa dhūmo viya. Attano uppattiyā asādharānapaccayasāṅkhātā āsannakāraṇaṃ padaṭṭhānaṃnāma. Tesāṃ vasena nāmassaca rūpassaca pariggaho ñāṇena paricchindivā gahaṇaṃ nāmarūpavavattānaṃ **diṭṭhivisuddhināma**. Etthaca pariggaho duvidho saṅkhepa pariggaho vitthārapariggahoti. Tattha ajjhattadhamme dvidhā katvā idaṃ nāmameva, na rūpaṃ. Idaṃ rūpameva, na nāmaṃ. Aññaṃ nāmaṃ aññaṃ rūpaṃ. Tadubhayatoca añño attāvā jīvovā sattovā puggalovā manussovā devovā brahmāvā natthīti evaṃ paccakkhato sudiṭṭhaṃ katvā pariggaṇhanaṃ saṅkhepariggaṇhonāma. Nāṇuttarikohi puggalo ettakamattenapi sakkāyadīṭṭhiṃ vikkhambhetuṃ sakkoti saddhiṃ sañña cittavipallāsehīti. Tayo hi vipallāsā. Yathāha-anattāni attāti saññāvīpallāso cittavipallāso diṭṭhivipallāsoti. Tattha satthusāsanadhamme suṭṭhu patiṭṭhitena saddhāmattenapi diṭṭhi vipallāso vikkhambhito hoti. Itare pana nāmarūpariggahe kateyeva vikkhambhitā honti. Yāvaca ete dve avikkhambhitā honti. Tāva nāmarūpariggahe aparisuddhoyeva hoti. Taṃmūlikāca kilesadhammā avikkhambhitā eva hontīti apica. Catunnaṃ āhārānaṃ vasena catudhā, pañcannaṃ khandhānaṃ vasena pañcadhā, channaṃ dhātūnaṃ vasena chadhātīādīnā nayena nāmarūpaṃ pariggahe tabbameva. Tattha cha dhātuyonāma pathavidhātu āpodhātu tejodhātu vāyodhātu ākāśadhātu viññāṇadhātuyo. Pakkusāti kulaputto hi imā cha dhātuyo pariggaṇhitvā anāgāmi phalaṃ patvā capitvā suddhāvāsesu nibbattoti. Yattake vā pana dhamme pariggaṇhanto attā meti pavattamāne saññācittadiṭṭhi vipallāse vikkhambhetuṃ sakkoti. Tattakāpi pariggaṇhetabbā yevāti. Imasmiṃ pana saṅgahapakaraṇe yo yo cittacetāsika vibhāgo rūpavibhāgo ca heṭṭhā vutto. Tassa sabbassa vasena nāmarūpassa pariggaṇhanaṃ vitthārapariggaṇhonāma. Ayaṃpana ādikammikānaṃ avisayo. Paṭividhacatusaccānaṃ pana ābhidhammikatherānaṃ eva visayoti veditabbo. Nāmarūpaṃ pariggaṇhantassa pana nāmarūpa mattato uddhaṃ aññaṃ kassaci abhāvadassanatoca sarīrabbhantare jīvasaññito attā atthi. So karoti, so paṭisaṃvedeti, saṃsaratī, sandhāvātīti evaṃ pavattā diṭṭhi pahīyati. Suddhe nāme evavārūpe evavā puggalasattakriyasaññitānaṃ ihābyāpārānaṃ sabbaso abhāvadassanato tadubhayasaṃyogeeva tesāṃ labbhamānatā dassanatoca tadubhayaṃvā ekamekaṃvā uddissa attāti pavattā diṭṭhi pahīyati. Attā jīvo satto puggalo manusso devo brahmāti evamādīsu vohāresuca vohāra matte aṭṭhatvā attānāma ekantato atthi jīvonāma ekantato atthītiādīnā tadatthābhīnivesavasena atidhāvānañca pahīyatīti daṭṭhabbaṃ. Tadatthābhīnivesotica attānāma atthi jīvonāma atthītiādīnā

dalhataram abhiniveso. Atidhāvananti nāmarūpaṃ attātiādinā gahaṇaṃ. **Paccayapariggahoti** etthapi duvidho paccayapariggaho saṅkhepato vitthārato cāti. Tattha vatthārammaṇavasena nāmassa cittotukāhārasena rūpassa avijjātaṇhupādānakammavasena tadubhayassaca paccayaṃ pariggaṇhanto saṅkhepato pariggaṇhātināma. Heṭṭhā paccayasaṅgahe vibhattehi paṭiccasamuppādanaya paṭṭhānanayehi pariggaṇhanto vitthārato pariggaṇhātināma. Etthapi paṭṭhānanayena pariggaho ādikammikānaṃ avisayoeva. Paccayaṃ pariggaṇhantassapana yathāvavattitassa sabbassa nāmarūpassa sabbaso paccayāyattavuttikatādassanato ahetikadiṭṭhi pahīyati. Attano anurūpapaccayasāmaggiyā vinā aññathā pavattiyā adassanato issaranimmāna kālanimmānadikā visamahetudiṭṭhica pahīyati. Hetusambhārapaccayehi kammappavattiyā vipākappavattiyāca aññassa kammakārakassavā vipāka vedakassavā kattuno abhāvadassanato kāraka vedaka diṭṭhi pahīyati. Anamataggeca saṃsāre tīsu addhāsu hetuphala paraṃparāvasena kevalassa nāmarūpamattasseva pavattidassanato ahoṣiṃ nukho ahamatītamaddhānanti evamādikāya puggalasatta visayāya soḷasavidhāya kaṅkhāyaca atikkamo hoti. Sabhāvadhammapavattiyāca suṭṭhu diṭṭhāya desanādhammassa sudhammatā dassanato buddhasubuddhataṅca disvā sathari kaṅkhati dhamme kaṅkhatītiādinayapavattā aṭṭhavidhāpi kaṅkhā pahīyatīti. Lokuttaradhammānaṃ saṅkhatānaṃpi sataṃ asammasanupagattā **tebhūmakasaṅkhāresūti** vuttaṃ. Anusayasamūhanatthaṅca sammasananti katvā yattha kāmarāgādayo anusayā anusenti. Teyeva dhammā sammasanārahā hontīti vuttaṃ tebhūmakasaṅkhāresūti. Imassa ca padassa lakkhaṇattayaṃ sammasantassāti iminā sambandho. **Atītādibhedabhinnesūti** atītānāgatapaccuppannajjhatabhiddhādīhi ekādasahi bhedehi bhinnesu. **Khandhādinayaṃārabbhāti** paṭisambhidāmagge vibhattaṃ khandhapaṅcakaṃ dvārachakkaṃ ārammaṇachakkaṃ viññāṇachakkaṃ phassachakkaṃ vedanāchakkaṃ saññāchakkanti evamādikāṃ sammasanabhūmivibhāganayaṃ ārabha anugantvā taṃnayaṃanusārenāti attho. Tattha pana tevīsatiyā dhammakotṭhāsesu yassa yo koṭṭhāso pākaṭo hoti. Tena taṃ gahetvā sammasanaṃ ārabhitabbaṃ. Sakkontena pana sabbampi gahetvā ārabhitabbameva. **Kalāpavasenasamkhipitvāti** khandhapaṅcakena ye rūpaṃ tāva atītānāgatapaccuppannādibhedabhinnaṃpi samānaṃ sabbam ekarūpapaṇḍabhāvena saṃkhipitvā esa nayo vedanā disupīti. Tatrāyaṃ nayo. Yaṃkiñci rūpaṃ atītānāgatapaccuppannaṃ ajjhattaṃvā bahiddhāvā oḷāritaṃvā sukhumāṃvā hīnaṃvā paṇītaṃvā yaṃ dūre santikevā. Sabbam rūpaṃ aniccaṃ khayatṭhena dukkhaṃ bhayatṭhena anattā asāraḷatṭhena. Yākāci vedanā.La. Yākāci saññā.La. Yekeci saṅkhārā.La. Yaṃkiñci viññāṇaṃ.La. Sabbam viññāṇaṃ aniccaṃ khayatṭhena. Dukkhaṃ bhayatṭhena anattā asāraḷatṭhenāti. Etthaca sabbam rūpaṃ.La. Sabbam viññāṇanti gahaṇameva kalāpavasena saṅkhipananti daṭṭhabbaṃ. **Aniccaṃkhayatṭhenāti** ettha rūpaṃ aniccaṃ khayatṭhena. Vedanā aniccā. Saññā aniccā. Saṅkhārā aniccā. Viññāṇaṃ aniccaṃ khayatṭhenātiādinā nayena sammasitabbadhammapariggahena saheva sammasanaṃ kātabbaṃ. Itarathā sammasanaṃ na ruhati. Tadattassa pana pākaṭattā idha aniccaṃ khayatṭhenātiādinā sammasanapadameva therena gahitanti daṭṭhabbaṃ. Tattha rūpaṃ aniccaṃ khayatṭhenāti taṃtaṃrūpaṃ ñāṇena dalhaṃ gahetvā ayaṃ pathavidhātu aniccā khayatṭhena. Ayaṃ āpodhātu aniccā khayatṭhenātiādinā sammasanaṃ kātabbaṃ. Tattha imasmiṃ kāye sabbam thaddhakriyāmatṭam pathavināma. Sāca kriyā sītuṇhaparivattiyāvā parivattati. Nānāhāraparivattiyā vā nānācittaparivattiyāvā nāniriyāpathaparivattiyāvā nānā kāyikakriyā parivattiyāvā parivattati. Nānāsantati saṅkanti hotīti attho. Tattha navanavāsu kriyāsantatīsu pātubhontīsu pubbapubbakriyāsantatiyo nassanti. Yasmāca santati nāma dhammato visuṃ natthi, tasmā navanavasantaṭīnaṃ pātubhāvonāma navanavakriyānaṃ uppattieva. Pubbapubbasantatīnaṃ nassanaṃnāma pubbapubba kriyānaṃ bhijjanaṃevāti. Evaṃ attano kāye nānāthaddhakriyānaṃ parivattim passanto pathavidhātuyā khayavayaṃ passati. Taṅca passanto taṃsahajātānaṃ rūpānaṃ khayavayaṃ passatiyeva. Āpo nāma ābandhanakriyāmatṭam. Tejonāma sītakriyāmatṭam uṇha kriyāmatṭaṅca. Vāyonāma vitthambhanakriyāmatṭam. Imāca kriyā khaṇe khaṇe parivattantiyeva. Imāsaṅca, visuṃ visuṃ santatiparivattim passanto āpādīnaṃ taṃsahajātarūpānaṅca khayavayaṃ passati. Santatiparivattim pana bahiddhā cakkhunā disvā jānāti, sarīrabbhantare pana kāyasamphassena jānāti. Santatisarīrabhūtānaṃ pana dhātūnaṃ khayavayaṃ ñāṇenaeva passati. Tasmā attano sarīrabbhantare taṃtaṃsantati parivattim ñatvāvā tathā tathā kappetvā vā rūpadhātūnaṃ aniccattam ñāṇena sudiṭṭham katvā punappunaṃ sammasitabbam. Sesakhandhesupi taṃtaṃsantatināntam ñatvā vedanādīnaṃ khayavayaṃ sudiṭṭham katvā sammasanaṃ kātabbanti. **Bhayatṭhenāti** bhāyitabbaṭṭhena. Yaṅhi aniccaṃ hoti. Khaṇamattepi vipariṇāmadhammaṃ. Taṃ ekantena bhāyitabbameva. Kasmā, taṅhi yo abhāyitvā

vissāsaṃ karoti. Etaṃ meti attano aṅgaṃ katvā pariharati. Taṃ apariyantehi anekasahashehi abhisāṅkharāṇadukkhehivā vipariṇāmadukkhehivā abhinhaṃ pīleti. Bādhati. Iti nānādukkhadhammehi abhinhaṃ sampañipīḷanasabhāvattā ekantena bhāyitabbaṭṭhena dukkhaṃnāmāti. Attapaṭipakkhattā anattā. Yo hi ito uddhaṃ mayhaṃ abhantarimataronāma natthīti evaṃ paramajjhatabhāvena pariggahito hoti. So attāti vuccati. Katamo pana tathāpariggahi tabboti. Yo attano vase sabbaso vattati. Yathā vuttehi abhisāṅkharāṇakiccehi vinā kevalaṃ attano chandenavā vasenavā ajjhāsayenavā āṇāvidhānenavā niccaṃ avirajjhamāno pavattati. So tathā pariggahetabboti. Tathārūpo eva hi dhammo niccaṃ sukhakāmānaṃ dukkhapaṭikūlānaṃ sattānaṃ attakiccaṃ karoti nāmāti. Yo pana niccaṃ sukhakāmānaṃ tesāṃ yathāpavattaṃ sukhaṃ viddhamseti vikireti. Dukkhopaṭikūlānaṃ tesāṃ abhisāṅkharāṇādi mūlakaṃ nānādukkhaṃ janeti vaḍḍheti. So attapaṭipakkhoeva hoti. Idañca rūpaṃ edisameva hoti. Iti attakicassa akaraṇato attapaṭipakkhakkicassa karaṇatoca rūpaṃ anattānāmāti. Kasmā panetaṃ attano vase navattati attakiccaṃ na karoti attapaṭipakkhakkiccaṃ karotīti āha **asārakaṭṭhenāti**. Tattha sāronāma paccayasāmaggiyā vinā kevalaṃ ajjhāsayamattena uppajjituṃvā uppajjitvāca paccayupatthambhena vinā yadicchakaṃ paṭiṭṭhātuṃ vā samatthabhāvasaṅkhāto thāmbalaviseso vuccati. Rūpaṃ pana sayampi evarūpo sāronāma na hoti. Naca evarūpena sārena yuttanti. Nahi tassa paccayasāmaggiyā vinā uppajjituṃvā uppajjitvāpi paccayupatthambhena vinā khaṇamattaṃpi paṭiṭṭhātuṃvā thāmovā balaṃvā atthi. Yañca attano thāmena balena vinā kevalaṃ paccayasāmaggi baleneva uppajjati. Paccayupatthambheneva paṭiṭṭhāti. Taṃ aneka sahasāni paccayābhisāṅkharāṇadukkhaṇi janetvā ekantena niccaṃ attapaṭipakkhakkiccaṃ karoti, pīleti, bādhatiyevāti. Esanayo vedanā aniccā khayaṭṭhenātiādīsu. Iti lakkhaṇattayaṃ samma santassāti sambandho. **Addhānavasenāti** ekekabhavaparicchinna pāvattakālassa vasena. Nahi bhavantare uppannaṃ khandhapañcakaṃ aññaṃ bhavantaraṃ gacchati. Tasmim̐ tasmim̐ bhaveva asesāṃ nirujjhatīti. Apica, ekasmiṃ bhavepi tiṇṇaṃ vayānaṃ mandādīnaṃ dasannaṃ dasakānaṃ saṃvaccharautu māsa pakkhatithi ahoratti yāma pahārādīnañca vasena addhānabhedo yojetabbo. **Santativasenāti** sabhāgekasantānavasena pavattamānāya rūpasantatiyāvā arūpa santatiyāvā vasena. **Khaṇavasenāti** rūpārūpadhammānaṃ āyu parimāṇasaṅkhātassa khaṇassa vasena. Etthaca khaṇavasena sammāsanaṃnāma sabbaññubuddhānaṃ eva visayo siyā, na sāvakānaṃ. Nahi te evaṃ parittake khaṇe uppādaṃvā nirodhaṃvā sampāpuṇituṃ sakkontīti. Tasmā addhāsantativasena sammāsanaṃ eva idhā dhippetanti daṭṭhabbaṃ. **Lakkhaṇattayaṃsammāsantassāti** tesu tebhūmaka saṅkhāresu dhammesu tilakkhaṇāni āropetvā te dhamme punappunaṃ āmasantassa parimajjantassa. Tesāṃ dhammānaṃ anicca jātikataṃvā dukkhajātikataṃvā anattajātikataṃvā ñāṇe suṭṭhu pākāṭaṃ karontassāti attho. Visesto pana imasmiṃ ñāṇe aniccalakkhaṇadassanaṃ eva padhānaṃ. Tasmim̐ diṭṭheya itarāni kamena diṭṭhāni honti. Adiṭṭheca adiṭṭhāntīti. Tasmā ādito aniccalakkhaṇasseva suṭṭhu pākāṭabhāvo adhippetoti. **Tesvevāti** tebhūmakasaṅkhāresu eva. **Paccayavasenāti** rūpakkhandhe tāva avijjātaṇhupādānakammāhārasaṅkhātānaṃ paccayānaṃ vasena. Vedanāsaññāsaṅkhāresu pana āhāraṭṭhāne phasso vattabbo. Viññāṇeca nāmarūpaṃ. Tatrāyaṃ nayo. Atītānantarabhāve avijjātaṇhupādāna kammesu appahīnavasena samuditesu imasmiṃ bhāve paṭisandhito paṭṭhāya rūpasantatiyo vedanāsaññāsaṅkhāra viññāṇasantatiyoca samudenti. Yāva maraṇakālā khaṇe khaṇe nānākalāpavasena uđenti pasavanti. Tesu pana tasmim̐ bhāve eva pahīnavasena niruddhesu tā rūpārūpasantatiyo nirujjhanti. Bhavantare puna anuppādasāṅkhātaṃ nirodhaṃ pāpuṇanti. Ettha pana yathā uđake sati macchānāma honti, asati na honti. Evaṃ kammajesu nāmarūpesu sati itarāni nāmarūpāni honti. Asati na hontīti itarāni sabbāni kammajesu saṅgahetvā kammavasena udayabbayavidhānaṃ gahitanti daṭṭhabbaṃ. Evaṃ avijjātaṇhupādānakammāpaccayānaṃ vasena pañcakkhandhassa udayabbayapavatti hotīti. Kammavasena pana imasmiṃ bhāve samudentānipi paṭisandhito paṭṭhāya khaṇe khaṇe kabalīkārāhārūpatthambhanaṃ laddhā eva yathā pavattarūpasantatiyo anubandha mānā navanavā rūpasantatiyo samudenti. Aladdhā pana nirujjhanti. Taṃ santatiyaṃ puna anuppādasāṅkhātaṃ ekabhavanirodhaṃ pāpuṇanti, yathā pavattasantatiyo vā chijjanti bhijjanti antaradhāyantīti.

Vedanāsaññāsaṅkhārā pana bahiddhā ārammaṇesu āpātāgatesu ārammaṇasamphassaṃ laddhāeva chadvārikā kusalākusalavipāka kriyabhūtā samudenti. Navanavā santatiyo pātubhavanti. Aladdhā pana

nirujjhanti. Santatiṃ na ghaṭenti. Viññāṇaṃca sahaajāta nāmeva vatthurūpeca pavattamāneeva pavattati. Nivattamāne nivattatīti. **Khaṇavasenā**ti vuttappakāre paccaye anapekkhitvā kevalam nāmarūpānaṃ pavattikkhaṇavasena. Khaṇasaddena cettha sammāsanañāṇe vuttarūpasantati nāmasantatiyopi gahetabbā. Nahi sāvakanāṃ ñāṇaṃ khaṇavasena nāmarūpānaṃ udayaṃvā vayaṃ vā sampāpuṇitum sakkotīti. Yathā pana rattandhakāre anto leṇe mahanto tamokhandho jāyati. Dīpaṃ jālentassa pana dīpobhāso ekakkhaṇe eva sakalaṃ antoleṇaṃ pharamāno udeti. Tamokhandho veti. Ālokassa udayo hoti. Tamokhandhassa vayo. Puna dīpe nibbāpīyamāne tamokhandhassa udayo hoti. Ālokassa vayo. Eva mevaṃ sarīre nānāutuvasenavā nānāhārasavenavā nānācitta vasenavā nānīriyāpathavasenavā nānāpayogavasenavā udayapakkhānaṃ vayasakkhānaṃ nānāsantatīnaṃ udayaṃca udayato vayaṃca vayo sudiṭṭhaṃ katvā samanupassantassāti attho. Evaṃ samanupassantassa pana āradhaviṇṇasakabhāvaṃ pattassa udayabbaya ñāṇe tikkhe sūre vahante dasavidhā vipassanupakkilesasāṅkhātā paripanthakadhammā uppajjanti. Te dassetuṃ obhāsotiādigātha māha. Tattha **obhāsoti** vipassanā cittasamuṭṭhito sarīrobhāso. **Pīṭi** vipassanācittasampayuttā pañcavidhā pīti. **Passaddhī**ti duvidhāpassaddhi. **Adhimokkhoti** saddhādhimokkho. **Paggahoti** vīriyaṃ. **Sukhanti** somanassaṃ. **Ñāṇanti** vipassanā ñāṇaṃ. **Upaṭṭhānanti** sati. **Upekkhāti** tatramajjhātupekkhā ceva āvajjanupekkhā ca. **Nikantīti** obhāsādīhi saha vipassanāya ālayaṃ kurumānā sukhumā taṇhā. Ayameva pana ekantato vipassanupakkilesa hoti. Obhāsādayo pana tassā vatthubhūtatā upakkilesāti vuttā. Tesu hi uppajjamānesu na vata me ito pubbe evarūpo obhāso uppannapubbo. Evarūpā pīti.La. Upekkhā uppannapubbā addhā maggaṃ pattosmi. Phalaṃ pattosmīti evaṃ assādasahitā amagge maggasaññā aphale phalasaññā uppajjati. Tadā koci abyatto yogāvacaro kammaṭṭhānaṃ vissajjetvā adhimānavasena vikkhipanto vicaratīti. Byatto pana tāvadeva sabhiṃ paṭilabhitvā idāni mama etesu obhāsādīsu etaṃ mama eso ha masmi eso me attāti cittassa nikāmanākāro paññāyati. Naca lokuttaradhammāna īdisassa nikāmanassa vatthu. Addhā mama saṃkilesadhammo uppanno. So vaḍḍhamāno maṃ niyyānamukhato pātetvā vaṭṭamukhe yojessati. Handa tesveva lakkhaṇattayaṃ āropetvā nikantiṃ sodhetvā yathāpavattaṃ vipassanāvīthiṃ paṭipādessāmīti te obhāsādayo eva tāva pariggaṇhāti. Ayaṃ me obhāso anicco khayatṭhena dukkha bhayatṭhena anattā asāraikatṭhenātiādinā sammasatīti attho. Evaṃ te obhāsādīke vipassanāya upakkilesabhūte paripantha dhamme pariggaṇhitvā tappariggahavasena tesu nikantiṃ pariyādi yitvā ṭhitassa uppannaṃ maggāmaggalakkhaṇavavattānañāṇaṃ maggāmaggañāṇa dassanavisuddhināma. Amaggesu obhāsādīsu maggasaññāmalato yathā vuttanikantimalatoca visuddhattā. Tañhi ñāṇaṃ tesu nikantiyāpi vikkhambhitāya eva obhāsādīpaṭibandhato suṭṭhu parisuddhamnāma hotīti.

[245] Vibhāvaniyaṃ pana

Aniccādivasena obhāsādi paṭibandhapariggahaṃ visuṃ avatvā maggāmaggañāṇadassanavisuddhināma vuttā. Sā aṭṭhakathāya na sameti.

Tathā paripanthavimuttassāti tathā pariggahetvā tato vipassanupakkilesaparipanthato vimuttassa **yāvānulomāti** yāvaanulomañāṇā. Tilakkhaṇaṃ āropetvāti sambandho. **Vipassanāparipākaṃ āgammāti** saṅkhārupekkhābhāvaṃ patvā tividha vimokkhamukhabhāvappattiyāceva sattaariyapuggalavibhāgassa paccaya bhāvappattiyāca vipassanāñāṇassa paripākaṃ āgamma paṭicca. Idāni appanā uppajjissatīti vattabbakkaṇeti sambandho. **Appanā** tica sotāpattimaggaappanā. **Dvetīnivipassanācittānīti** tikkhapaññassa dve vipassanācittāni. Mandapaññassa tīṇi vipassanācittāni. **Yaṃkiñcīti** tīsu lakkhaṇesu aññataraṃ yaṃkiñci. **Yāsikhāpattāsānulomāsāṅkhārupekkhāti** matthakapattā anulomañāṇasahitā yā saṅkhārupekkhā atthi. Sā vuṭṭhānagāminivipassanātica vuccatīti yojanā. Saṅkhārupekkhāñāṇaṃ anulomañāṇanti imāni dve ñāṇāni vuṭṭhānagāmini vipassanāñāṇāni vuccantīti vuttaṃ hoti. Idaṃ pana paripākagatavipassanā dassanavacanāṃ. Etthaca **vuṭṭhānanti** maggo vuccati. So hi vipassanāñāṇassa ārammaṇabhūta saṅkhāranimittatovā sayāṃ saṃyojanavattubhāvato vā vuṭṭhāti. Taṃ samaṅgipuggalaṃvā puthujjanabhāvato samudayapahānavasena vaṭṭa pavattatoca vuṭṭhāpeti. Tasmā vuṭṭhānanti vuccati. Avassaṃ vuṭṭhānaṃ gacchanti etāyāti vuṭṭhānagāminīti evaṃ dvinnaṃ ñāṇaṃ

vuṭṭhāna gāminibhāvo veditabbo. **Tatoparanti** dvinnamvā tiṇṇamvā vipassanā cittānaṃ pavattiyā paraṃ **nibbānaṃ ālambivā**ti maggassa āvajjanatṭhāniyaṃ hutvā tassa purecarabhāvena nibbānameva ārammaṇaṃ katvā. Tato yevaca taṃ vipassanānāmaṃ nalabhatīti. **Puthujjana gottamabhibhavanti** etena gottaṃ bhavati abhibhavatīti **gotrabhu**. Gottanti cettha paripuṇṇakilesa samāyogena anariyabhāvasaṅkhātā puthujjanajāti vuccatīti imamattaṃ dasseti. **Ariyagottamabhisambhontañcā**ti etena gottaṃ bhavati pāpuṇātīti gotrabhu. Gottanti taṃtaṃ kilesa visuddhabhāva saṅkhātā ariyajāti vuccatīti imamattaṃ dasseti. Maggo appanā vīthiṃ otaratīti sambandho. **Dukkhasaccamparijānantoti** tebhūmaka dhammānaṃ ekantadukkhabhāvaṃ paricchijja jānanto. Parijānanañcetta tesāṃ dukkhabhāva paṭicchādakassa sammohassa pahānameva daṭṭhabbaṃ. **Samudaya saccampajahantoti** attano cittasantāne anusayabhāvena pavattamānaṃ taṅhāsaṅkhātāṃ samudayasaccaṃ ekadesenavā anavasesenavā apacchāvattikaṃ katvā pajahanto. **Nirodhasaccamsacchikarontoti** cakkhumā viya nabhamajjhe virocamaṇaṃ candamaṇḍalaṃ attano santāne ekadesassavā sakalassavā kilesa vaṭṭassavā āyatim bhāvino vipākavaṭṭassaṃvā attano santāne puna anuppādadhammabhāpattivāsena nirodhasaṅkhātāṃ nibbānaṃ paccakkhaṃ karonto. **Maggasaccambhāvanāvasenā**ti ito pubbe anamatagge saṃsāre anuppannapubbassa aṭṭhaṅgikassa maggasaccassa uppādanasaṅkhātāya bhāvanāya vasena. Maggacetanāya pana ānantarikaphalattā taṅkhaṇe apanītaggike padese puna udakaṃ āsiñcivā nibbāpento viya maggānukūlapavattivāsena dukkhaparijānanādīni cattāri kiccāni anukubbantāni tatoparaṃ dvevā tīṇivā phalacittāni pavattanti. Tatoparaṃ bhavaṅgapāto hotīti dassetuṃ **tatoparanti**ādīmāha. Yathā pana pasādacakkhunāvā dibbacakkhunāvā kiñcirūpaṃ passantassa tāni cakkhūni taṃ rūpaṃ paccakkhaṃ katvā pacchā tassa puggalassapi paccakkhato pātubhūtaṃ katvā nirujjhanti. Na tāva tesāṃ uppattikkhaṇe taṃ rūpaṃ tassa ahaṃ idaṃnāma passāmīti pākaṭaṃ hoti. Pacchā pana paccavekkhana vāresu pavattamānesueva taṃrūpaṃ tadanubandhāca nānākārā tassa pātubhūtā honti. Evamevaṃ idhapi paccavekkhanavāresu pavattamānesueva nibbānañca tadanubandhāni maggaphalādīnīca pātubhavantīti vuttaṃ **punabhavaṅgaṃ.La. Pavattantīti**. Idāni paccavekkhanañāṇassa bhūmiṃ dassetuṃ **maggamphalañcanibbānanti**ādīgātha māha. Tattha **paṇḍitoti** ariyāya paññāya samannāgato phalaṭṭho. **Hīneti** pahīne. **Seseti** apahīne uparimaggavajjhe. Imāni pana dve pahīnāvasiṭṭhakilesapaccavekkhanāni kesañci jīvitasamasīpuggalānaṃ kilesa vibhāgesu akovidānañca nalabbhantīti vuttaṃ **paccavekkhativānavā**ti. Etthaca visuddhimagge tāva sabbapathamaṃ maggapaccavekkhanaṃ vuttaṃ. Tato phalapaccavekkhanaṃ. Tato pahīnakilesapaccavekkhanaṃ. Tato avasiṭṭhakilesapaccavekkhanaṃ. Avasāne nibbānapaccavekkhanaṃ vuttaṃ. Paṭisambhidāmaggaṭṭhakathāyaṃ pana sabbapathamaṃ kilesapaccavekkhanaṃ adhippetāṃ. Vuttañhi tattha paccavekkhanesu pathamaṃ kilesapaccavekkhanaṃ hoti. Tato maggaphalanibbānapaccavekkhanānīti. Taṃ pana pāliyaṃ paccavekkhana ṇāṇassa niddesato pubbe pathamaṃ chinnamanupassane paññāvimutti ṇāṇanti evaṃ visuṃ vimuttiñāṇassa āgatattā vuttaṃ. Tattha chinnanti tena tena maggena samucchinnaṃ kilesajātanti attho. Pāli anu sārena vuccamāne pana pathamaṃ pahīnaṃ kilesānaṃ paccavekkhanaṃ. Tato paccekaṃ maggaṅgabojjhaṅgādīnaṃ paccavekkhanaṃ. Tato tesāṃ ārammaṇabhūtassa nibbānassa paccavekkhanaṃ. Tato phaladhammānaṃ paccavekkhanaṃ. Tato tesāṃ ārammaṇabhūtassa nibbānassa paccavekkhananti vattabbaṃ hoti. Pāliyañhi paccavekkhanañāṇaniddese nibbānaṃ maggavārepi phalavārepi dvikkhattuṃ āgatanti. Iti nibbānapaccavekkhanaṃ nāma itaresāṃ paccavekkhanānaṃ ādimhivā majjhe antarantarāvā avasānevā yatthakatthaci pavattatīti siddhaṃ hoti. Tathā kilesapaccavekkhanaṃpi maggaphalapaccavekkhanānaṃ ādimhivā pacchāvāti. Evañhi sati maggaṃ phalañca nibbānanti ayaṃ gāthāpi aviruddhā hotīti. Evañca katvā adhimānaniddesaṭṭhakathāsu so hi maggaphalanibbāna pahīna kilesā vasiṭṭhakilesa paccavekkhanena sañjātasomanasso ariyaguṇapaṭivedhe nikkānkhanti vuttaṃ. Etthaca sotāpannassa pañca paccavekkhanāni honti. Tathā sakadāgāmissa pañca. Anāgāmissa pañca. Arahatō pana avasiṭṭhakilesanāma natthīti cattārīti ekūnavīsati paccavekkhanāni hontīti. Idañca paripuṇṇa vasena labbhamānaṃ sandhāya vuttaṃ. Aparipuṇṇampi pana hotiyeva. Tathā hi cūladukkhaḥkhandhasuttaṭṭhakathāyaṃ sā pana na sabbesaṃ paripuṇṇā hoti. Eko hi pahīnakilesameva paccavekkhati. Eko avasiṭṭhakilesameva. Eko maggameva. Eko phalameva. Ekonibbānameva. Imāsu pana pañcasupaccavekkhanāsu ekaṃvāddevā no laddhuṃ navatṭatīti vuttaṃ. Evaṃ chabbisuddhikamena bhāvetabbo catubbidho maggo ṇāṇadassanavisuddhināma vuccatīti sambandho. Maggasaddena cettha

catubbidham maggañāṇaṃ tadanukūlapavattivasena phalañāṇaṇca gahitanti datṭhabbam. **Etthāti** vipassanākammatṭhāne. **Tatthāti** tesu anupassanā maggaphalesu. Abhinivisaṇaṃ abhiniveso. Heṭṭhā silāpathaviyaṃ nikhātasinerupādassa viya ajjhatakkhandhesu daḷhaṃ gahetvā pavattīti attho. Attā iti abhiniveso attābhiniveso. Taṃ **attābhinivesaṃ. Muñcantīti** ajjhatakkhandhamānaṃ kevalaṃ paccayāyatta vuttitāya khaṇabhaṅgassaca adiṭṭhattā so abhiniveso pavattati. Tasmā taṃ dvayaṃ sudiṭṭhaṃ katvā rūpaṃ anattā vedanā anattātiādinā punappunaṃ samanupassanāvasena taṃ abhinivesaṃ vimocayamānāti attho. **Vimokkhamukhaṃ hoti**, suññatavimokkha saṅkhātassa maggassa phalassaca pavesanadvārabhūtattā, **vipallāsa nimittanti** viparītavasena āsanaṃ upagamaṇaṃ pavattanaṃvā vipallāso. Anicce niccanti upagamaṇaṃ pavattanaṃvāti attho. So eva kile suppatiyā āsannaḥāraṇattā nimittanti vipallāsanimittam. **Muñcantīti** ajjhatakkhandhamānaṃ khaṇabhaṅgassa adiṭṭhattā taṃnimittam hotīti tesam khaṇabhaṅgaṃ sudiṭṭhaṃ katvā rūpaṃ aniccaṃ vedanā aniccātiādinā punappunaṃ samanupassanāvasena taṃnimittam vimocayamānāti attho. **Tañhāpaṇidhanti** tañhāeva abhisāṅgavasena ārammaṇe cittassa paṇidahanato daḷhaṃ thapanato paṇidhīti tañhāpaṇidhi. Taṃtañhā paṇidhiṃ. **Muñcantīti** ajjhatakkhandhamānaṃ mahāādīnavarāsibhāvassa adiṭṭhattā soṇidhi hotīti tesam mahāādīnavarāsibhāvaṃ sudiṭṭhaṃ katvā rūpaṃdukkhaṃ vedanādukkhātiādinā punappunaṃ samanupassanāvasena taṃpaṇidhiṃ vimocayamānāti attho. **Tasmāti** yasmā etā vimokkhamukhabhūtā tisso anupassanā evaṃ vīsa nāmikā honti. Tasmā. Yasmā saṅkhāresu suññatadassanavasena atthasiddhināma kevalaṃ attākinivesabhūtassa diṭṭhigāhassa paṭipakkhabhūtassa ñāṇasseva ānubhāvo hoti, tasmā tathā samanupassitvā vimuñcantassa vipassanāpi maggopi sahaajātañāṇa kiccena nāmaṃ labhatīti vuttaṃ **yadivutṭhāna.La. Suññatovimokkho nāmahotimaggoti**. Aniccadassanavasena atthasiddhināma nimittāti nivesabhūtassa mānagāhassa paṭipakkhabhūtāya saddhāyapi ānubhāvo. Tasmā tathā samanupassitvā vimuccantassa vipassanāpi maggopi sahaajātasaddhā kiccena nāmaṃ labhatīti vuttaṃ **yadianiccato.La. Animitto vimokkhonāmāti**. Dukkhadassanavasena atthasiddhināma paṇidhisāṅkhāta tañhāgāhapaṭipakkhabhūtassa samādhissapi ānubhāvo. Tasmā tathā samanupassitvā vimuccantassa vipassanāpi maggopi sahaajātasamādhikiccena nāmaṃ labhatīti vuttaṃ. **Yadi dukkhato. La. Appaṇihito vimokkhonāmāti**. Vuttañhetam paṭisambhidāmagge aniccato manasikaroto saddhindriyaṃ adhimattaṃ hoti. Dukkhatō manasikaroto samādhindriyaṃ adhimattaṃ hoti. Anattato manasikaroto paññindriyaṃ adhimattaṃ hotīti. Magge pana tiṇṇaṃ dhammānaṃ kiccavisesonāma vipassanāgamana vaseneva siddhoti vuttaṃ **maggo. La. Nāmāni labhatīti**. Tatha suññatavimokkhena vimutto ariyasāvako sotāpattimaggakkhaṇe dhammānusārīnāma hoti. Majjhe chasu maggaphalakkhaṇesu diṭṭhippato nāma. Arahattaphalakkhaṇe paññāvimuttanāma. Animittavimokkhena vimutto sotāpattimaggakkhaṇe saddhānusārīnāma. Upari sattasu ṭhānesu saddhāvimuttanāma. Apaṇihitavimokkhena vimutto pana aṭṭhasupi ṭhānesu kāyasakkhināma. Soyeva arūpajjhānaṃ pādakaṃ katvā vimutto arahattaphale ṭhito ubhatobhāgavimutto nāmāti ettāvataṃ yaṃ heṭṭhā vuttaṃ vipassanāparipākamāgamamāti saṅkhārupekkhābhāvaṃ patvā tividhāvīmokkhamukhabhāvappattiyāceva sattaariyapuggalavibhāgassa paccayabhāvappattiyāca vipassanāñāṇassa paripākamā āgamma paṭiccāti. Taṃ sarūpato niddiṭṭhaṃ hotīti. Maggavīthiyaṃ phalañca maggāgamana vasena tathā tiṇi nāmāni labhatīti yojanā. **Yathāvuttanayena vipassantānanti** yadi anattato vipassatītiādinā vuttappakāranayena vipassantānaṃ catunnaṃ phalaṭṭhānaṃ puggalānaṃ. **Yathāsakamphalanti** sotāpannassa sotāpattiphalaṃ. Sakadāgāmissa sakadāgāmiphalantiādinā nayena attano attano santakabhūtaṃ yaṃ yaṃ phalaṃ vipassanāgamana vaseneva suññatādivimokkhotica vuccati. Namaggāgamana vasenāti adhippāyo. Etthaca vipassanāgamana vasena maggassa animitta nāmālābhonāma suttantikapariyāyena vutto. Abhidhamme pana animitto nāmamaggo naāgato. Nahi so nippariyāyato animittonāma hoti. Hīnapaṇitādivasena vibhāgārahassa saṅkhāranimittassa sabbhāvato. Teneva hissa dukkhaṇapaṭipadā dandhā bhiññādivasena vā pāramidhammānaṃ parittamahantādivasena vā hīna paṇita paṇitatarā paṇitatama vibhāgo sandissatīti. Aṭṭhakathāyaṃ pana aniccānupassanā saṅkhāresu niccanimittam vidhamanavasena pavattattā animittanupassanānāma samānāpi sayam saṅkhāranimittam pariyāpannattā ekantena attanonāmaṃ maggassa dātuṃ nasakkoti. Tasmā maggo abhidhamma pariyāyena animittanāmaṃ nalabhatīti vuttaṃ. Suttantikapariyāyena pana yathā pathavikasiṇārammaṇaṃ jhānaṃ pathavikasiṇanti vuccati. Evaṃ suññatādināmaṃ nibbānaṃ ārammaṇaṃ katvā pavattāni maggaphalāni pi ārammaṇavasena pi suññatādināmaṃ labhanti. Ārammaṇakaraṇavasena pana sampayogavasena vā

palibodhakarāca nimittakarāca pañidhikarāca rāgādayo kilesadhammā tesu natthi. Tasmā tāni aññaṃ āgamaṇaṃvā āramaṇaṃvā anapekkhitvā attano sabhāvenapi suññatādīnāmaṃ labhantīti dassetuṃ **ārammaṇavasenā**tiādi vuttaṃ. Tattha **sarasavasenā**ti attano sabhāvena. **Nāmatayanti** suññatādi nāmatikaṃ. **Sabbatthā**ti sabbāsu maggavīthi phalasaṃpattivīthīsu. **Sabbesaṃpī**ti sabbesaṃpi maggaphalānaṃ. **Samamevā**ti samānameva. Sadisameva. **Etthapanā**ti etesu pana yathāvuttetu maggaphalesu. Yasmā sabbādiṭṭhiyoca soḷasaividhā vicikicchāca attadiṭṭhimūlikā eva honti. Attadiṭṭhiyā niruddhāya nirujjhanti sabbānica apāyagāmi kammānīnāma attadiṭṭhiyā satiyāeva vipaccanti. Asatiyā na vipaccanti. Diṭṭhasaccānañca sā diṭṭhi sabbaso pahīnā hoti. Tasmā **sotāpattimaggam.La. Pahīnāpāya gamanoti** vuttaṃ. Apāyaṃ gacchanti etehīti apāyagamaṇāni. Diṭṭhivicikicchāvippayuttā akusaladhammāceva pubbekataduccaritakammānica. Pahīnāni apāyagamaṇāni etassāti pahīnāpāyagamaṇo. Paṭividdhacatusaccānaṃ pahīnaattadiṭṭhīnaṃ bodhipakkhiyadhammā ekantena uparūpari vaḍḍhanapakke ṭhitā honti. Kilesadhammā pana hāyanapakke. Tasmā te anukkamena parihāyitvā gacchantā uparima koṭiyā sattahi bhavēhi sabbaso parikkhayaṃ gacchantīti vuttaṃ **sattakkhattuparamosotāpannāma hotī**ti, tattha sattakkhattusaddena sattapaṭisandhigahaṇavārā vuccanti. Paramoti ukkaṃsaparicchedo. Iti sattakkhattuṃ paramo etassāti. Sattakkhattuparamo. So pana devevu sattakkhattu paramo, manussesu sattakkhattu paramo, ubhayattha sattakkhattu paramoti tividho hoti. Yathāha –

Katamoca puggalo sattakkhattuparamo idhekacco puggalo tiṇṇaṃ saṃyojanānaṃ parikkhayaṃ sotāpanno hoti, avinipātadhammo niyato, sambodhiparāyano, so sattakkhattuṃ deveca manusseca sandhāvitvā saṃsaritvā dukkhassantaṃ karoti. Ayaṃ vuccati puggalo sattakkhattu paramoti.

Ettha hi ca saddo aniyamattho. Etena yoca deveeva sattakkhattuṃ saṃsarati. Yoca manusseeva sattakkhattuṃ saṃsarati. Yoca deveca manusseca missakabhava vasena sattakkhattuṃ saṃsarati. Tividho peso sattakkhattu paramonāmāti dasseti. Aṭṭhakathāyaṃ pana missakabhava vasenassa attho vutto. Etthaca yasmā mahaggatajjhānassaca uparimagga vipassanā yaca ānubhāvaṃ anapekkhitvā kevalaṃ imassa maggassa ānubhāvagatiyā eva sattakkhattuparamonāma vutto. Soca pāliyaṃ katamesaṃ pañcannaṃ idha niṭṭhā. Sattakkhattuparamassa kolaṃ kolassa ekabījissa sakadāgāmissa yoca diṭṭhevadhamme arahāti vuttatā kāmabhavēva jhānarahito sukkhavipassakovā parihīnājjhānovā datṭhabbo. Tenevaca paṭisambhidāmaggaṭṭha kathāyaṃ tayopi ime sotāpannā kāmabhavavasena vuttā. Rūpārūpabhavē pana bahukāpi paṭisandhiyo gaṇhantīti vuttaṃ. Aṅguttaraṭṭhakathāyañca aṭṭhamaṃ bhavanti kāmabhavē aṭṭhamaṃ paṭisandhinti vuttaṃ. Tasmā ye kāmabhavēyeva sattavārato oraṃvā diṭṭhadhamme yevavā uparimaggam gaṇhanti. Tesam tathārūpo pavattiviseso upari maggavipassanābalena siddhoti veditabbo. Tathā hi aṭṭhakathāsu upari tiṇṇaṃ maggānaṃ vipassanā niyāmetīti vuttaṃ. Ye pana diṭṭhadhammēvā sakkaanāthapañḍikavisākhādayo viya sattu bhavesu yatthakatthaci bhavēvā jhānaṃ uppādetvā brahmalokaṃ gacchanti. Yeca brahmalokeyeva sotāpattimaggam labhitvā tattheva parinibbāyanti. Tesam tathārūpo pavatti viseso mahaggatajjhānabalena siddhoti. Yasmāca pāliyaṃ sattakkhattuṃ devecāti etena kāmabhavē satta opapātika paṭisandhiyo dasseti. Sattakkhattuṃ manussecāti etena satta gabbhaseyyakapaṭisandhiyo dassētīti ubhayena cuddasa paṭisandhiyo dassitā honti. Tasmā tena pariyaṇena labbhamāne cuddasabhavē sandhāya sakkapañhasutte –

Ito satta tato satta, saṃsarāni catuddasāti vuttaṃ. Tathā aṅguttareca tikanipāte sace udāyi ānando avitarāgo kālaṃ kareyya, tena cittapasādena sattakkhattuṃ devevu devarajjaṃ kareyya. Sattakkhattuṃ imasmiṃyeva jambudīpe mahārajjam kareyya. Apica udāyi ānando diṭṭhevadhamme parinibbā yissatīti vuttaṃ. Keci pana imehi suttapadehi sattakkhattu paramassa sotāpannassa kāmabhavē cuddasa paṭisandhiyo icchanti. Mahāvaggasaṃyuttaṭīkāyañca keci pana kāmabhavē sattakkhattuṃeva uppajjati, na tato uddhanti vadanti. Tam vīmaṃsitabbanti vuttaṃ. Vibhaṅge pana tattha tattha aṭṭhānasuttēsuca aṭṭhānametaṃ anavakāso yaṃ diṭṭhisampanno puggalo aṭṭhamaṃ bhavaṃ nibbatteyya, netam ṭhānaṃ vijjatītica, aṅguttare chakkaniṇipāte abhabbo diṭṭhasampanno puggalo aṭṭhamaṃ bhavaṃ nibbattetunti ca,

mahāniddese ajitapañhe sohāpattimaggañāṇena abhisañkhāraviññāṇassa, nirodhena sattabhava thapetvā anama taggesaṃsāre ye uppajjeyyūṃ nāmañca rūpañca, etthete nirujjhanti. Vūpasamanti. Atthaṃ gacchanti. Paṭipassambhantīca, evaṃ daḷhaṃ katvā vuttattā yathāvuttanayeneva tesam suttapadānaṃ attho veditabboti. **Rāgadosamohānanti** kāmarāgassa dosassa tadekaṭṭhamohassaca. **Tanukarattāti** yathā sotāpannasantāne uppajjantā dhammikesu kāmavattūsu balavantā hutvā uppajjanti. Yato tesam methunavattusamāyogopi pavattati, tathā uppajjituṃ asamatthe katvā saṃlikhanavasena tanukaraṇato. Adhiccuppattivasenaca pariyuṭṭhānamandatāvasenaca tanukabhāvaṃ sādhanatoti attho. Tattha adhiccuppattivasenāti kadāci cirena uppattivasena. **Pariyuṭṭhānamandatāyāti** cirena uppajjantānaṃpi mandatarāṃ pariyuṭṭhānavasena. Mahāsivattherena pana tesampi methunavattu samāyogo icchito. So mahāṭṭhakathāyaṃ paṭikkhitto. Yañca chakkanipāte migāsālavatthumhi abrahmacārinopi isidattassa brāhmaṇassa sakadāgāmittaṃ bhagavatā byākatam, tampi tassa āsannamaraṇakāle adhigamavasena byākatanti veditabbaṃ. Sakimdeva imaṃ lokaṃ āgantvā āgamanato sakadāgāmināma hotīti yojanā. Yamettha vattabbaṃ, taṃ heṭṭhā pathamaparicchede vuttameva. **Arahattambhāvetvāti** arahattamaggaṃ bhāvetvākhiṇā cattāro āsavā yassāti **khīṇāsavo**. Dakkhiṇā vuccati kammañca kammaphalañca saddahitvā āyatiṃ phalapaṭilābhatthāya dinnadānaṃ. Dakkhanti vadḍhanti sattā etāyāti katvā. Tāya pana dakkhiṇāya vipattikarānaṃ kilesānaṃ sabbaso abhāvato sampattikarānañca sīlakkhandhādiguṇānaṃ sabbaso paripuṇṇattā dakkhiṇeyyesu aggo jeṭṭhako hutvā taṃdakkhiṇaṃ paṭiggahituṃ arahatīti **aggadakkhiṇeyyo**. **Puggalabhedoti** catunnaṃ phalaṭṭhapuggalānaṃ saṅkhepabhedo. Vitthārabhedo pana evaṃ veditabbo, aṭṭhakathāsu tāva catuvīsati sotāpannā, dvādasa sakadāgāmino, aṭṭhacattālīsa anāgāmino, dvādasa arahantoti phalaṭṭhānaṃ channavutibhedo vutto. Tattha saddhādhimutto paññādhimuttoti dve sotāpannā honti. Te ekabījī kolaṃkolo sattakkhattuparamocāti tīhi guṇitā cha. Puna catūhi paṭipadāhi guṇitā catuvīsati honti. Tividha vimokkhacatupaṭipadānaṃ pana bhedenā dvādasa sakadāgāmino dvādasa arahantoca honti. Anāgāmino pana aviheṣu tāva tayo antarāparinibbāyino, eko upahacca parinibbāyī, eko uddhaṃ soto akaniṭṭhagāmiti pañca. Teyeva asaṅkhārāparinibbāyī asaṅkhārāparinibbāyīcāti dvīhi guṇitā dasa. Tathā atappasu dassasudassīsu ticattālīsa honti. Akaniṭṭhe pana uddhaṃsoto akaniṭṭhagāmināma natthīti cattāro asaṅkhārāparinibbāyino cattāro asaṅkhārāparinibbāyinoṭi aṭṭhāti. Sabbe aṭṭhacattālīsa hontīti. Suttanipātaṭṭhakathāyaṃ pana dvādasa sotāpannā, dvādasa sakadāgāmino, catuvīsati anāgāmino, dve arahanto, cattāro maggaṭṭhāti catupaññāsa honti. Teyeva saddhādhura paññādhura vasena dvīhi guṇitā aṭṭhasataṃ puggalā hontīti āgato. **Etthāti** etasmim puggalabhede. **Sabbesampīti** catunnaṃ phalaṭṭhānaṃpi sādharmaṇāva. Na nirodhasamāpatti viya ekaccānaṃeva sādharmaṇāti adhippāyo. Ativiya mamāyitassa abhinindi tassa ajjhositassa attano cittasantānassa apavattikaraṇaṃ nāma baharāgavimuttānaṃeva sijjhatīti vuttaṃ, **anāgāmīnañceva arahantānañcalabbhatīti**. Tesampi aṭṭhasamāpattilābhīnaṃ kāmarūpabhavagatānaññeva idha gahaṇaṃ daṭṭhabbaṃ. Kasmā, ādito paṭṭhāya anupubbanirodhabaleneva gantabbattā. Tenāha tatthātiadi. Tatrāyaṃ vidhi, pathamajjhānaṃ samāpajjitvā vuṭṭhāya tattha gate saṅkhāre aniccato dukkhato anattato vipassati. Tato dutīyajjhānaṃ samāpajjitvā vuṭṭhāya tatthagate saṅkhāre tatheva vipassati. Tato tatīyaṃ jhānaṃ. Tato catutthaṃ jhānaṃ. Tato pañcamāṃ jhānaṃ. Tato ākāsañācāyatanāṃ. Tato viññāṇaṇcā yatanāṃ samāpajjitvā vuṭṭhāya tatthagate saṅkhāre tatheva vipassati. Tato ākiñcaññāyatanāṃ samāpajjitvā vuṭṭhāya nānābaddhaavikopanaṃ saṅghapatimānaṃ sathupakkosanaṃ addhāna paricchedoti imaṃ catubbhaṃ pubbakiccaṃ karoti. Tato nevasaññā nāsaññāyatanāṃ samāpajjati. Ekaṃvā dvevā cittavāre atikkamitvā acittako hoti **nirodhaṃ phusatīti**. **Tatthatatthevāti** tato tato jhānato tasmim tasmim vuṭṭhitakāleeva. **Vipassantoti** nirodhassa samatha vipassanā yuganandhabaleneva pattabbattā vipassanābalenapi cittasantānassa saṅhasukhumabhāvā pādanatthaṃ idaṃ pathamajjhānaṃ aniccantiādinā nayena vipassanto. **Yāvaākiñcaññāyatanāṃgantvāti** yāva ākiñcaññāyatanajjhānaṃ, tāva samāpajjanavutṭhānavipassanāvasena gantvā. Avajjanādhittāna paccavekkhanānipettha icchitabbāniyeva. Teneva hi paṭisambhidāmagge pañcavidhā vasiyo nirodhaparikkammesū vuttāti. **Tatoparanti** ākiñcaññāyatanajjhānagate saṅkhārevipassanānantaraṃ, adhiṭṭhātābanti adhiṭṭheyyaṃ. Attano sarīrabandhe parikkhāre thapetvā nānābandhāni civarādīni parikkhārāni aggiādinā parissayena māvinassantūtivā, ekasīmāyaṃ saṅghakamme karīyamāne saṅgho maṃ pabhimānessati, tadā vuṭṭhahāmītivā, sathā maṃ kenacikāraṇena pakkosā pessati, tadā vuṭṭhahāmītivā adhiṭṭhānakiccaṃ.

Ādisaddena nirodhabbhantareeva maraṇaṃ nukho me bhavissatīti evaṃ pavatto addhāna paricchedo gahito. **Dvinnam.La. Vocchijjaticittasantati** tadatthāya ādito paṭṭhāya tathārūpassa payogavisesassa suṭṭhu katattā. **Tatoti** tasmim kāle. Anāgāmino anāgāmi phalacittam nirāvajjanampi nipparikkammampīti adhippāyo. Tathāhi ādito paṭṭhāya punappunaṃ pavattitaṃ vipassanāparikkammameva tassa parikkammaṭṭhāne tiṭṭhati. Na visum āsannaparikkammaṃ nāma atthīti. **Paccavekkhananti** phalapaccavekkhanaṃ. Evaṃ duvidham kammaṭṭhānanayaṃ niddisitvā idāni yadattham so niddisīyati, tadatthe sotujane niyojento **bhāve tabbanti** gāthamāha. Tattha paṭipajjitabbāti paṭipatti. Paṭipajjantivā etāya uparupari visesanti paṭipatti. Sīlādidhammo. Rasiyati nirāmisasukhānubhavanavasena anubhaviyātīti raso. Jhānamagga phalabhūto adhigamadhammo. Arahatta phalamevavā. Tadubhayaṃ paṭicca uppannapītisomanassamevavā. Paṭipattiyā raso paṭipatti raso. Soeva assāditabbaṭṭhena assādo cāti **paṭipatti rasassādo**. Sāsane paṭipattirasassādam patthayantena bhikkhunā iccevaṃ mayā niddiṭṭham uttamaṃ bhāvanādvayaṃ bhāvetabbanti sambandho.

Iti paramatthadīpaniyānāma abhidhammatthasaṅgahassa

Catutthavaṇṇanāya kammaṭṭhānasaṅgahassa

Paramatthadīpanā niṭṭhitā.

Nigama paramatthadīpanī

172. Cārittēna kulācārena sobhite nāti mitta dhana bhogasampattiyā visāle kule udayo vaḍḍhi yassa soti **cārittisobhitavisālakulodayo**. Tena. Saddhāya abhivuḍḍhānaṃ parisuddhānaṃ attano sīlasutacāgādiguṇānaṃ udayo vaḍḍhi etasminti **saddhātivuḍḍhaparīsuddhaguṇodayo**. Tena. **Nampavhayenāti** nampanāmakena upāsakena. **Paṇidhāyāti** bhusaṃ nidhāya hadaye thapetvā upādāya paṭicca. **Parānukampanti** paresaṃ attano mandabuddhīnaṃ pacchimajanānaṃ anukampaṃ anudayaṃ kāruṇīyaṃ paṇidhāyāti sambandho. **Patthitanti** abhiyācītaṃ. **Puñṇena tena vipulenāti** tena vipulena abhidhammattha saṅgahapakaraṇassa karaṇapuñṇena. **Tumūlasomanti** evaṃ nāmakam vihāraṃ. Vuttañhi khuddasikkhāṭṭikāyaṃsihaḷāḍīpe tumūlasomavīhāre saṅghassa pākavattaṃpi tāla paṇṇam vikkiṇitvā karīyati. Na hi tattha paṇṇena attho atthi. Sabbepi iṭṭhakacchannā pāsādādayoti. Eso kira vihāro ādito abhayagirirañño aggamahesibhūtāya somadeviyā kārāpitattā yāvajjatanāpi somavīhārotveva paññāyittha. Tumūlasaddo pana vipulasaddapariyāyo.

Athettha vattati saddo, tumūlo bheravo mahā;
Hatthināge padinnamhi, sivīnaṃ raṭṭhavaḍḍhaneti.

Ādisu

Viya. Soca vihāro saṭṭhimattehi mahāpariveṇehi saṅghito hotīti ativiya vipulo mahanto vitthiṇṇo hoti. Tasmā so vipulattā mahantattā vitthiṇṇattā tumūla somoti vuccati. Taṃ tumūlasomaṃ. Athato mahāsoma vihāranti vuttaṃ hoti. Etena thero attano ācariyavaṃsassa vasana vihāraṃ kitteti. Attano vasanaṭṭhānaṃ pana nāmarūparicchede kittitaṃ. **Dhaññādhivāsanti** tasmim vihāre ādikammikabhūta mahindattherādīnaṃ puñṇavantattherānaṃ ajjhāvutṭhabhūtaṃ. Dīpapasādaka mahāmahindattherassa hi vaṃse jātattā tasmim vihāre ādikammikabhūto mahātheropi mahindattheronāmāti dhātuvamse vutto. **Uditoditanti** ativiya uditam. Nabhamajjhe puṇṇacandamaṇḍalaṃ viya sakalaśihaḷāḍīpe ativiya uggatanti attho. Ariyamaggapaññāvasena pariyattivesārajjādi paññāvasenavā avadātehi pariyodātehi guṇehi sotitāti **paññāvadātaguṇasotitā**. Te eva lajjīpāpāgarahino. **Maññantūti** anussarantu. **Puññāvībhāvodaya maṅgalāyāti** vipulānaṃ puññānaṃ vaḍḍhisankhāta maṅgalatthāya. Tatrāyaṃ yojanā, puñṇena tena vipulena dhaññādhivāsaṃ uditoditaṃ tumūlasoma vihāraṇca tattha nipāsino

mahindattherādiḱe paññāvadāta guṇasobhite lajjibhūte bhikkhūca puññavibhavodayamaṅgalāya āyukantaṃ maññantu pacchimā janāti. Athavā, taṃvihāraṃ aññe paññāvadāta guṇasobhita lajji bhikkhū maññantūti yojanā. Etena thero pacchimajanānaṃ chasu anuttariyadhammesu anussatānuttariyasaṅkhātāṃ puññavisesaṅca mayāṃpi tādisaguṇabhāgino bhavissāmāti ussāhanupāyaṅca paṭipādesīti.

Paramatthadīpanī nigamakathā

Ettāvatāca –

Nagare **dīparaṅgamhi**, gāme ti nāmake;
Aṭṭhasuññadvayekamhi, sāke jātena yā mayā.

Mumrvāgāme araññamhi, **laṅghatīti** vissutālaye;
Vasatā mahato bhikkhu, gaṇassa hitakārinā.

Paramatthadīpanīnāma, saṅkhatā sāradaṣṣinā;
Sāresīnaṃ hitatthāya, sārāsāravivekināṃ.

Suniṭṭhitā ayaṃ ṭīkā, nibbhayā nirupaddavā;
Navapañcadvayekamhi, sāke komudasārade.

Tathā kalyāṇasaṅkappā, sādḱhūnaṃ amatapphalā;
Niṭṭhaṃ gacchantu sabbepi, nibbhayā nirupaddavā.

Yathā lokamhi jotanti, ubho candimasūriyā;
Tatheva paramatthesu, ayaṃ **paramatthadīpanī**.

Pāḱiyattesu sā subhā, **saddaniruttidīpanī**;
Ubho lokamhi jotantu, saddhammo yāva tiṭṭhatīti.

Tattha nagare dīparaṅgamhīti dīpavāsīmahājanaṃ rañjetīti dīparaṅganti laddhanāme nagare. Gāme nāmakeṭi rohitamiḱānaṃ nivāsabhūmitale paṭiṭṭhitattā evaṃnāmake mahāgāme. Sākeṭi kaliyuge. Yā mayāti paramatthadīpanīnāma yāṭīkā mayā saṅkhatāti sambandho. Laṅghatīti vissutālayeti evaṃvissute araññavihāre. Sāresīnanti sārāgavesīnaṃ. Sārāsāravivekinanti ayaṃ sāro ayaṃ asāroti evaṃ sārāṅca asāraṅcavive cetvā jānitūṃ samatthānaṃ. Sākeṭi kaliyuge. Komudasāra deti kumudapupphayutte saradautu pariyaṅpannecchi makattikamāse. Amatapphalāti nibbānapayojanā. Subhāti atthabyañjanasampattiyā sobhaṅā. Saddhammoti tividhaṃ satthusāsaṅgaṃ vuccatīti.

Iti abhidhammatthasaṅgahapakaraṅassa catutthasaṃvaṅṅanā

Bhūtā paramatthadīpanīnāmā yaṃṭīkā

Sabbākārena niṭṭhitā.